

هذه هي القوانين

فيك الجن



ديك الجن

مأمون القانوني

قصص قصيرة

## إهداء

إلى أمي وأبي..

الذين تكبدوا عناء مجيئي إلى هذا العالم..

وعرفوني عندما لم أعرف نفسي..

وأحبوني عندما كنت مجرد كتلة غير ذات فائدة من العظام واللحم..

حياً سرمدياً حانياً غير مشروط..

وإلى زوجتي..

هذه الحضارة التي دخلت روحي قبل أحد عشر عاماً..

هي الرزق الذي وهبت.. والفرح الذي أعطيت.. هي السماء التي أظلت

والأرض التي أقلت.. والقمر الذي أشرق لي من دون الناس..

هذه الملاك التي أستلقي بقربها كل ليلة..

وأنا أتساءل أين تخبئ أجنحتها..

لهؤلاء.. أهدي هذه الورقات..

# لولو

أول مرة شفتها كان يوم تسجيل الفصل الأول في الجامعة.. لسه سنافر طازة.. بالكرتونة.. و تقريبا كان التاريخ الفاتح من سبتمبر على رأي العقيد، دخلنا من البوابة كقطيع من السنافر الجاهلة، يقودنا رجال ملتحون.. عرفت بعدين انهم اتحاد الطلبة الاسلاميين و بساعدوا الطلاب الجدد.. المهم وصلنا مبنى القبول و التسجيل، نادوا على أسماءنا.. و بس نادوا الاسماء نادوا اسمها أول بعدين اسمي.. و اجت.. و انفجر اخضرار سحري في كل ارجاء المكان.. زقزقت العصافير و هطلت الامطار و سالت الجداول و الوديان في داخلي.. كان جماها أخذ فعلا.. و حسيت بقشعريرة بس شفتها.. لدرجة انه الشيخ تبع اتحاد الطلبة نادى مرتين على اسمي و أنا مش سامعه و من حظي اللي صار اسمه سوء حظي بعدين.. طلعت وراها.. ووقفنا في الطابور و بدأت أتأمل بديع صنع الله.. كانت لابسة جينز أزرق ما يبلى و بلوزة سودا كمان هي ما تبلى، و الشعر الغجري المجنون يسافر في كل الدنيا.. اخ من الشعر المجنون..

طبعا قبل ما أكمل عن لولو بدي أحكي شوي عن حالي عشان تفهم يا عزيزي القارئ و عزيزتي القارئة خلفيات الموضوع.. أنا دخلت المدرسة بكيرو و بالتالي دخلت الجامعة بكيرو.. يعني ما كنت لسه مخلص مراهقة لما دخلت الجامعة.. كنت لسه مش مكمل 17 يعني كنت لسه مبلش فعليا.. تأخر الموضوع عندي شوي لأسباب فش داعي تعرفوها.. المهم.. علاقتي



بالجنس الاخر كانت محدودة.. كنت بس بعرف امي و اختي.. و خالتي  
صفية اللي على البركة (الله يرحمك يا خالتي) وأول أنثى لفتت انتباهي و  
تفتحت عيوني عليها.. كانت جارتنا سميرة اللي جوزها بشتغل في مصنع  
سيرف.. و كنت دايا بشوف بطات اجريها بس تشطف.. و كانوا الشباب  
في الحارة يحكوا انه جوزها عنده مشكلة في القلب و انها ست وحيدة و  
بتعاني و كنا مقررين بس نكبر نغويها.. و سميرة هاي.. بالاحرى بطات  
اجريها وهي بتشطف كانوا ابطال تخيلاتي اللي مش بريئة في هذالك الزمان..  
هذول اللي بعرفهم بس.. ستي ما لحقتها.. دعسها باص كوستر وهي  
مروحة من عزا في شارع الثلاثين.. زمان يعني قبل ما اوعى على الدنيا.. و  
في بنت جيراننا لمى.. بس هاي كانت تحب صاحب الظل الطويل و تستنى  
فيه يبجي يخطبها.. و أصلا كان كل وزنها مع الشنطة و المايول بطلعش 15  
كيلو.. فانسى موضوعها..

بالنسبة لشكلي كنت عادي و أقل من عادي.. كنت أقل أقل من عادي..  
كنت عامل شعراتي غرة كوكو.. كانت موضه ايامها و ما كنت بلعب حديد  
ولا شي. مسح يعني... وشوي ناصح.. مش ناصح يعني.. ممتلى.. قال  
ممتلى قال.. المهم.. كنت ناصح.. و قصير.. بس خالتي صفية الله يرحمها  
كانت دايا جابرة خاطري و رافعة ثقتي بنفسي و كل ما بدها أروح أشتريها  
بيبي تحكيكي انت زينة الشباب.. خد هالبريزة و روح جيبلي بيبي.. الله  
يرحمها كانت مبلية بالبيبي.. وكانت دايا تتقاتل مع امي من تحت راس  
الموضوع.. و حتى بس ماتت، امي كثير زعلت انها كانت تتقاتل معها على  
البيبي.. مع انه امي لهسه مقتنعة انه خالتي ماتت من البيبي.. أما الوضع  
المادي فكان مزري للغاية.. الدخل محدود و ديون و حالة الدنيا حالة و  
كنت أنا الامل المعقود لانقاذ العيلة في المدى القريب و المنظور...

المهم حبيتها للولو.. و من أول نظرة.. خلصنا تسجيل و ما عرفت شو سجلت حتى.. رocht على السكن و كانت قد ملكت علي كل أحاسيسي.. كنت رسميا بحبها.. وداومنا السنة الاولى في كلية العلوم.. و كانت بتوخذ معي عربي و كيميا.. نظرا لطبيعتي الخجولة.. مش أدب بس خجل.. ما كنت أحاول أقعد جمبها.. ولا حتى حاولت أحكي معها.. حكيت معها كثير في خيالي.. و أكثر من الحكي بكثير.. بس في الواقع ما صار شي.. مجرد نظرات ما أخليها تحس فيها.. طبعا بعد فترة في السنة الاولى اكتشفت انه أنا و هي من طبقتين مختلفتين.. مش بس ماديا.. لا و ثقافيا و اجتماعيا.. كانت من بيئة منفتحة أكثر من بيتي.. يعني كان في شباب يحكوا معها.. ما كانت مريم البتول أبدا و ما كانت صايعة.. بس كانت علاقتهم سلسلة بطريقة مش موجودة في الطبقة اللي أنا منها.. احنا بالنسبة لنا كان الحوار مع بنت غربية أشبه بحرب.. و اذا بدك تحكي مع بنت لازم تكونوا حبايب.. فش حدا بعرف بنت صداقة.. و كان مجرد الحديث مع بنت بده تخطيط أكثر من معركة ستالينغراد.. شغلة صعبة كانت.. بس هي كان عندها الموضوع غير.. كانت ببساطة تحكي مع شباب ثانيين من نفس طبقتها أو فئتها الاجتماعية او سمياها اللي بدك اياه.. كان سهل ممتنع.. سهل عليهم ممتنع علي.. و كان لبسهم غير و حياتهم غير..

المهم.. خلصت السنة الاولى على خير و هي ماخذة كل حياتي بس بتعرفنيش.. عالسنة الثانية قررت إني أتشجع و اخذ خطوة.. و بدأت عمليات التحضير الاستراتيجية للموضوع.. كانت نفس تخصصي و كنا ماخذين أكثر من مادة سوا.. و قبل كل يوم يكون عنا محاضرة سوا.. أوقف قدام المرآة و أتدرب على الحوار المفترض.. و على الفاضي.. بروفات

بروفات و أدخلني أيها المدرب.. و تخونني شجاعتني في اخر لحظة.. مش عارفين ننفذ الخطة.. لغاية ما اجا اليوم الموعود و شاهد و مشهود...

كان عندي امتحان فاينل في الاحصاء.. كنت عايد المادة و هي كانت منزلتها أول مرة.. الامتحان كان متأخر.. و بس طلعتنا بره.. كانت الشمس غايبة... و يا دوب في باصات.. و كان يوم اربعاء اخر يوم دوام.. كان زمان الخميس عطلة.. هذا قبل ما نصير يهود و نعطل السبت.. المهم.. طلعتنا بره نستنى باص عمان.. كنا بنروح على عمان اخر الاسبوع.. وللصدفة كنت واقف وراها في الطابور.. و لابس اللي على الحبل يعني... بنطلون جينز أزرق هو الحيلة و الفتيلة.. ما كان عندي غيره.. كان جزء من شخصيتي.. و قميص كروهات من الباله.. حكايته حكاية.. اشترت لي اياه امي.. و حلفت انه البياع حلفها انه مش ملبوس.. كان كاروهات و كل خطوطه بني.. بني غامق بني فاتح بني مسكر مأمون النبي.. كل درجات النبي.. طبعا قميص بني كاروهات كم.. على بنطلون جينز أزرق (قبة خنق) كان زمان بنطلونات الجينز التركي تيجي ضيقة من تحت و وواسع (باجي) من فوق.. بالعافية اصابعك يفوتوا فيه.. مرة انكسر بنصر اجري و انا بحاول البس البنطلون.. و كنت لابسهم على بسطار عسكري أسود اشترت لي اياه خالتي صفية من الزرقا بليرتين.. كانوا يبيعوا الاواعي العسكري هناك.. و أقنعتني انه موضه و انا اقتنعت.. و اشتريتها فينة بيبي مني كرد للجميل..

طبعا في شغلة لازم احكيها عن القميص.. انا بس لبسته أول مرة عرفت ليش ما حدا كاين لابسه.. كان في عيب تصنيعي انه من جهة الكتف اليسار بجرح.. في اشي جوا بالقماش بجرحك.. و عبثا حاولت الاقيه بس عالفاضي.. فعمل لي حساسية في كتفي اليسار.. ظلت معي حتى بعد ما

رميت القميص و لبعد ما تخرجت.. ما راحت الا بعد عملية الباسور..  
فكنت لابس القميص البني و الجينز و البسطار.. و صافف ورا لولو على  
الدور.. هي كانت لابسة بنظلون قماش أسود مفصل.. و بلوزة صوف  
خضرا قصيرة.. لخصرها بس.. و انا كنت واقف وراها و بعاني.. حينا ما  
كان عذري عذري.. كانت تشوبه الشوائب يعني... وهو زي ما أسلفت  
كان حب من طرف واحد.. بالاحرى حب مقطوع الاطراف.. ما علينا..  
مش موضوعنا.. المهم احكي طلعتنا بالباص.. و ساعتها تدخلت كل أقدار  
السموات و الارض و كل دعوات اليتامى و الارامل و المساكين و  
المجاهدين في الشيشان و الصومال (ايامها كانوا يجاهدوا في الصومال) و  
دعوات خالتي صفية الله يرحمها الي كل ما اشتريلها بببسي انه ربنا ينولني  
مرادي.. كل هاي الامور اتحدث عشان تحدث المعجزة.. دخلت هي على  
الباص و دخلت أنا وراها و ما كان في الاكرسيين فاضيين جهم بعض في  
نص الباص تقريبا.. قعدت عند الشباك و قعدت أنا جهمها.. و حط الشفير  
أول و مشي باص الاحلام...

طبعا انا ساعتها قررت انه دقت ساعة الحسم.. الى الامام الى الامام..  
لازم أحكي معها ونصير معرفة على أقل تقدير.. فرصة ذهبية ربنا رتبها و ما  
راح تضيع.. حكيت بس يلم الكنترول الاجرة و يهدى الباص بنبلس  
نسولف.. طبعا انا كنت قاعد في الكرسي زي سليمان القانوني.. ماخذ  
وضعي.. بس للامانة كنت ضامم ركبي سوا.. عشان ما ألمسها.. ما كنت  
سافل يعني.. على الاقل مش معها و مش هاي المرة.. وهي فتحت شنطتها  
ابصر شو تعمل.. و انا مديت ايدي على جيبي اتحسس الفلوس.. كان معي  
بالزبط 75 قرش.. نص ليرة اجار باص عمان و 10 قروش سرفيس العبدلي  
لوسط البلد و 8 قروش سرفيس منطقتنا.. يعني محسوبة.. و بزيد معي

شوي قلت بشتري سيجارتين فرط بس أوصل او بجيب سمسمية لخالتي  
صفية الي ما كنت راح اكون موجود في هذا الموقف بدون دعواتها.. هي  
فتحت محفظتها و طالت ورقة دينار خضرا و مسكتها بطرف اصبعها.. و  
اجا اصبعها على منخار الملك الي على العملة (ريته منخاري).. المهم..  
وقتها قررت أسترجع أفضل خبراتي عشان أحكي معها.. و شو أحسن  
أسلوب.. كنت قارئ انه الانجليز دايبا بحكوا مع الاغراب عن الجو.. و  
كان شاب صاحبي (خلب بنات) حاكي لي بعد ما شكيتله همي.. حكي لي..  
اسمع اذا يوم قعدت جيب بنت في الباص و بدك تربطها اعرض عليها  
علكة.. قلت له و اذا ما معي علكة.. حكي لي.. احكيلها لو معي علكة  
بتوخذي؟.. المهم طرحت أفكاره و نصائحه جانبا و قررت أحكي معها عن  
امتحان الاحصاء..

وفجأة و انا بحاول أشوف بأي خطة راح أستغل. حدثت المأساة.. كان  
الباص يا دوب مشي شوي.. ووصل بعد ساحة الجامعة بشوي و متوجه  
لعمان.. وقف الكنترول المقل الملعون.. و حكي "يا جماعة ترى الاجرة  
لعمان دينار.. لأنه متأخرين.. اللي بده يدفع و اللي ما بده بترجعه  
عالموقف".. طبعا ساعتها انهارت السموات و الارض و راحت كل  
دعوات اليتامي و الارامل و المجاهدين و دعوات خالتي صفية.. طلعا  
ضدي كل الدعوات.. كل الي كان في جيبتي 75 قرش.. و طبعا ما فيني  
أقله رجعني.. أنا جيب لولو.. حب عمري.. أيقونتي.. طبعا الناس ما  
اعترضوا و بلشوا يدفعوا الطلاب.. و الكنترول يللم مصاري.. و كل ما يللم  
من صف تتوقف عندي وظيفة من الوظائف الحيوية لجسمي.. مبدئيا  
صابني شلل و حسيت راح افقد السيطرة على العضلة الي بتتحكم بنظام  
البول.. وظل الكنترول يقرب وهي ولا هامها.. حاطة اصبعها على منخار



الملك.. و أنا منخاري صار يطلع دخان أزرق.. الكنترول بقرب و انا مش عارف شو بدي أعمل في وجه هالامبريالية اللي بتطحن مواطن فقير ضعيف خجول مثلي.. و صرت أسب في حالي عالاردن و عالحوكمة و عالملك و عالنظام الرأسمالي.. وينك يا لينين؟ وينك يا كارل ماركس؟! و صرت زي الولد اللي صحي لقي حاله عاملها على حاله و مستني امه تفوت على الغرفة تطين عيشته.. بستنى قدري بس.. او أشي من عند ربنا ينجيني.. أنتظر عجيبة تنقذني من مصيبة.. و صرت شوي شوي أنزل جوا الكرسي وهي ماسكة منخار الملك ولا على بالها.... ولما صار الكنترول على بعد صفين منا.. قام شاب.. اسمحوا لي أسميه سادس الخلفاء الراشدين.. المهدي المنتظر.. الشاب الطيب اردوجان (ما كان اردوجان وقتها).. هو طالب.. لا لا مش طالب.. هو علي بن أبي طالب.. وقف هيك و حكى للكنترول.. ما راح ندفع دينار.. ليش الاستغلال؟ الاجرة نص دينار بتوخذ نص دينار بس.. ما بدك ترى انا اتحاد طلبة و مسؤول لجنة المواصلات.. والله بحياتك ما بتفوت المجمع.. و تراجع الكنترول الذئب و من وراه السواق الغول عن مخططاتهم.. و وافقوا.. طبعاً انا من الفرحة و الامتنان كنت بدي أقوم أحمله للشاب على كتافي.. بس كنت لسه مشلول..

رجع الكنترول و رجع للناس فلوسها.. و لم منا نص نص عالداير.. ومشي الموضوع على خير.. رجعت كل دعوات اليتامى و الارامل و المجاهدين و خالتي صفية رجعوا وقفوا معي.. طبعاً أخذني الموضوع شوي لاهدى.. بعد دقيقتين بلشت الوظائف الحيوية لجسمي تشتغل كمان مرة.. رجع النفس و تدفق الدم.. و اشتغلوا الكلى.. بش ظل الشلل موجود.. بلشت أحس باجري اليمين شوي عند ثغرة عصفور (مكان في طريق اربد)..

على بال ما هديت و استجمعت قواي.. و قررت أفتح موضوع امتحان  
الاحصاء.. اطلعت على لولو ولا هي نامت.. نامت.. بكل بساطة نامت..  
انا اشتعلت عندي الحرب و انطفت و هي نامت.. نامي بحفظ الله ايتها  
الجميلة.. طبعاً حكينا سوا.. و حيننا بعض في الخيال.. هي كانت نايمة و أنا  
صاحي و بحلم.. و اخترت انا أسماء و لادنا و بناتنا.. ووين نسكن و كل  
التفاصيل الصغيرة المحزنة.. صحيت لولو لما وصلنا جسر صويلح.. كنت  
أنا بلشت أحرك اجري و العب بالبسطار.. و نزلت عند جريدة الدستور..  
واضح انها سكان عمان الغربية و انا نزلت في العبدلي و اخذت السرفيس و  
من الصدمة نسيت اشترى سمسمة لخالتي صفية.. يومها فقدت الامل انه  
نصير اصحاب.. ما خف حبي الها بس تأكدت انه بدون أمل..  
في سنة رابعة عرفت انها بتحب واحد و بده يخطبها.. أكبر منا كان.. تخرجت  
قبلي و انا ظليت شوي في الجامعة ادفع ثمن الخطايا البايته و ليالي التركس و  
السهر و أهواك بلا أمل.. و ناسي حتى ايما اخر مرة شفتها في الجامعة..  
تخرجت أنا و ماتت خالتي صفية بعد حفلة التخرج بيومين.. تزحلق و  
كسرت حوضها و هي قايمة تتوضى.. عاشت بعدها اسبوع و ماتت.. امي  
حكى انه البيسي عملها هشاشة عظام.. و جارتنا لمى كبرت و اتزوجت  
واحد مندوب مبيعات.. طويل شوي.. و جارتنا سميرة رحلوا من الحارة و  
بطلت أشوف بطات اجرها ولا حتى أغويتها زي ما كنت ناوي.. انا  
اشتغلت و صار معي فلوس و اشترت اواعي و رميت القميص البني و  
الجينز الازرق و البسطار..

للصدفة شفتها مرة ثانية بعد 15 سنة من التخرج شفتها في مكة مول  
كنت مع زوجتي و أطفالي.... كانت في أواخر الثلاثين مثلي.. بس كانت  
متغيرة كثير.. السحر اللي كان فيها رايح.. ووجهها مبلش يجعد.. وواضح

انه حياتها كانت صعبة و من لبسها كان واضح تماما انه حالتها المادية وسط  
و أقل شوي من وسط.. بعد يومين سألت واحد بعرف محيطها عنها..  
حكى لي انه اللي كان ناوي يخطبها وعدها سنتين وتركها.. و ما تزوجت.. و  
لغاية الان مش متزوجة و بتشتغل و ساكنة مع امها و ابوهم مات..

طبعا بس شفتها كانت شبح من لولو اللي كانت زمان.. و كان حبي الها  
كمان شبح باهت.. مع هيك ابتسمت لها لأول مرة في حياتي.. هي اطلعت  
باستغراب و مشيت..

لو حدا حكى لي ايام الجامعة انه هاي البنت راح تصوير ولا شي بحياتي و  
مجرد ذكرى كنت ذبحته.. بس بدون حكي و بدون مقدمات.. الزمن تكفل  
بكل شيء.. الزمن القاتل.. نهاية الأشياء..

تمت..



## بدي اتزوجك..

بس خيلنا نكون صريحين شوي.. انا مش متزوجك عشان انا بحبك..  
يعني شو بحبك؟ انا متزوج لانه نضال ابن عمتي تزوج، وعبدالله ابن  
خالتي تزوج و انا كمان لازم أتزوج.. وبدي ولاد زي ولادهم.. ويشبهوني  
زي ما ولادهم يشبهوهم..

راح نتزوج، وكل طلباتك اللحظية هاي اللي انا مش مقتنع فيها راح  
اعملها.. عرس و حفلة و فستان و صالون وهم بايت.. كله عشان أتزوج..  
وبدي حقي، وبدي تطبخي و تجلي و تغسلي و تكوي،. تعبت من الغربية  
و المطاعم و الغسيل.. وبدي عملي شاي و قهوة و تجيبي لي و انا سهران  
صحن بردقان! و تقشريه و تطعميني.. و تجيبي لي صحن لوز و زبيب  
عشان اتقوى..

وبدي تكوني معي في عزائم العيلة، بديش أروح لحالي.. و تظل شيرين  
تطلع علي.. بحبهاش.. بدي تقهرها..  
وبدي تدرسي ولادي و تعلميهم الصلاة و أحاديث الرسول..  
وتعلميهم يحترموا أبوهم.. بدي اشوف بنتك تقلدك و تلبس يانس الصلاة  
زيك..

وبدي تراقبي محمد و انا بالشغل، تشوفيه بدخن ولا لا.. وتشلعي ذنيه  
اذا لف ورا بنات الجيران.. بكفيننا مشاكل معهم.. وبدي تحكي مع مروة و  
تشوفي مين مزعلها في مدرستها.. ما حدا لازم يزعل بنتي..

وبدي تعمل لي لنا كعك عالعيد.. أزكى من كعك خالتي اللي مفكرة  
حالها بتعرف تعمل كعك.. وبدي تبوسي ايدي يوم العيد الصبح.. ولو  
أعطيتك عيدية تظيها لمصروف الدار.. وتجيبي البنات والأولاد يسلموا  
علي.. ويبوسوا ايدي..

وبدي ما تبكي كثير يوم تخريج محمد.. تفضحيناش.. ولا يوم عرس  
مروة.. اسكتي.. وبدي تكوني حماية كويسة.. ما بدنا نظلم بنت الناس..  
عشان ما حدا يظلم بنتنا..

وبديش تغليني كثير واحنا رايمين نعتمر.. ترى جوز ختيرة احنا و انا  
اجري مش حاملاتني.. ومش زاح الف الحرم وراك.. خليك جمبي و  
تضيعيش..

وبديش تشكي بصمت من وجع اجريكي.. ما معي حق عملية الركبة..  
لما يحول ابنك بفرجها الله..

مالك نحفانة؟ شو مالك يا ام محمد؟ تبكيش.. بديش تبكي.. ليش  
بتشهدني؟ مشان الله لا تركيني.. والله اني بحبك..

## حكاية شلن

مرحبا.. أنا اسمي شلن.. و في شهادة الميلاد اسمي الحقيقي نصف درهم.. انولدت في مطبعة العملة الملكية في ويلز في بريطانيا سنة 1978.. و ما بعرف شو تهبأ للرسام جيفري كولي يومها.. بس لما طلبوا منه يرسم صورة للملك عشان نحملها على ظهرنا شأننا شأن أي مواطن اردني.. رسم صورة الملك وهو تقريبا أصلع.. الله يرحم الملك و يرحم جيفري كولي.. و يرحم كل الصلغ.. انشحت أنا و اخواني ال 19 في لفافة ورقية على متن طائرة عسكرية من royal mint في ويلز للمطار العسكري (تم منع ذكر اسم المطار حفاظا على السرية).. وكانت أول مرة يسافر فيها.... نزلنا من الطائرة.. و حملونا النشامى لمخازن البنك المركزي.. كانت الدنيا شهر واحد و برد شديد.. ولا راعوا انا انجليزيو الاصل و المنبت ولا شي.... بعد ما وقعوا اوراق التسليم.. رمونا في المخزن البارد.. وراحوا.. ولا شغلوا التدفئة حتى..

خلال اقل من شهر كنت نازل في السوق.. اول انسان مسكني كان أبو فادي صاحب دكانة النجاح في حي نزال.. راح على بنك الاسكان فرع الجبل الاخضر و هناك فدوى موظفة الكاش الحلوة ام شامة على الخد.. أعطت أبو فادي اللفافة اللي أنا موجود فيها لما طلب فراطة.. و بس طلع من البنك، عدلت فتحة قميصها و دعت عليه أبو عين زايغة اللي قد أبوها..

دخلت درج الدكان أنا و اخواني.. وودعنا بعض لأنه عارفين الفراق قريب.. وهاي طبيعة حياتنا.. قعدت يومين بس في الدرج.. وحقولي الشلون القديمة و البرايز و القروش عن طبيعة البلد و السكان.. مثلي مثل أي مغترب جديد..

من درج أبو فادي وقعني حظي التعس بايد عياش.. ولد في الصف السادس.. كانوا ينادوه عتريس.. مدحبر و أسمر و اله دغاديش و لسانه زفر... أول ما شافني انبسط.. كنت لسه بلمع.. وصلعة الملك بتلمع.. ولما كان عتريس مدمن فنة (ملك و كتابة).. قرر يعتبرني شلن الحظ.. و طول نهاره يلعب فنة عن قلول حلبية و مش حلبية.. وعن أكل و عن اللي بدك اياه.. قعدت مع عتريس 3 شهور.. طبش راسي من الفنة.. ما خلصت منه الا لما جاع جوعا شديدا في يوم.. و ضحى في مقابل سندويشة فلافل من عند أبو عايد.. مع شطة زيادة..

لفيت بعدها بين ايدين الناس.. شأني شأن أي عملة معدنية.. لفيت الاردن كلها.. من شهاها لجنوبها.. رحلة استمرت 8 سنوات.. متنقلا بين الجيوب و الدروج و محافظ النساء الجلدية و عبب الختاريات... حضرت أفراح و أتراح و ليالي ملاح و ليالي مش ملاح.. وطوش و صلحات و جاهات و زواجات و طلاقات و حردات كمان.. رحى على العقبة.. و رحى البتراء و السيق و ركبت على الجمل (بتدوخ الركبة على الجمل).. و شفت هناك السائحات الأجنبية.. و كان في سائحة هولندية هولندية (التكرار للتأكيد و أشياء أخرى) كان بدها توخذني تذكارة.. بس باخر لحظة بطلت.. شحدتني لولد بترأوي لزق فيها.. وزرت اربد و النعيمة و الصريح و شويينا عند ذات راس كمان.. ورحى عجلون و الشوبك و الطفيلة و الزرقا و حي معصوم أو حي مفصوم.. و شفت العقبة و البحر الميت

(كنت راح اغرق هناك) ورحت على الشام اربع خمس مرات و نزلت على الضفة كمان و زرت القدس و الخليل و ترمسعيا و الاقصى (بس ما دعيت لحدا) و اعتمرت و حجيت و كفرت و الحدت و كل شي عملت.. و دخلت مطاعم و محامص و سرافيس و تكاسي و باصات و كليات و جامعات و بارات و مراقص و مساجد و كنائس و غرز و اوكار.. ما خليت..

لغاية ما في يوم.. كان صيف 1987.. كنت موجود في جيبة كنترول باص و أعطاني لبنت مروحة على بيتها.. حطنتي في شنطتها.. سلمت على قلم الروج و علكة شعراوي و قعدت.. لما وصلنا البيت.. حطت الشنطة على الكنباية و دخلت.. و اجا ولد صغير 3 سنين يبعبش في الشنطة.. و من سوء حظي مسكني..

طبعا كعملات معدنية.. بنكره الاولاد اللي في هذا العمر. لأن أول اشي بعملوه انهم يكتشفونا عن طريق الفم.. و ياما اخوة و أصحاب الي انتهوا في أمور مثل هاي.. مسكني الولد الصغير و أنا متوقع نهايتي المحتومة.. لكن الشرير بدل ما ييلعني.. دحش ايده جوا ايد الكنباية.. و وقعني..

وقعت جوا الكنباية اللي أتوقع انها من العصر الطولوني.. (نسبة لأحمد بن طولون).. دخلت مكان مظلم. فيه بقايا قشر بزر.. قلم رصاص مقطوع.. زر قميص.. وبقايا أشياء بدون ملامح.. سمعت حنان وهي بتبهدل فيه ليش يلعب في الشنطة.. و أخذت الشنطة و راحت. و أنا ما حدا انتبه لي.. و كانت بداية التيه يا يوشع بن نون..

بعد يومين يئست اني أخرج من الجب.. وبدأت أتأقلم على حياتي الجديدة.. و من الأصوات اللي كنت أسمعها تعرفت على العائلة اللي استضافوني في كنبائتهم الطولونية.. صاحب البيت اسمه أبو نضال.. في

الخمسين و بشتغل بليط.. عصبي و بصرخ بس قلبه طيب.. الام اسمها..  
(عيب أحكي اسمها).. أم نضال.. في أواخر الاربعين.. ست مؤمنة و  
ملتزمة و صابرة على الحياة.. البنت الكبيرة حنان 26.. خريجة كلية مجتمع و  
بتشتغل سكرتيرة لدكتور في جبل الحسين.. نضال 24 بدرس هندسة في  
رومانيا.. و اله 6 سنين هناك و ما خلص.. و بنت متزوجة اسمها أمل 22  
ومتزوجة بليط شاب بشتغل مع أبوها و ساكنة جمبهم... و الشيطان الصغير  
هو ابنها صبحي.. صبحي الصغير مدوحس..

مع كل سفراتي و روحاتي السابقة و محبسي الراهن الا انني كنت  
مبسوط.. لأنني تعرفت على الناس عن قرب و في أمور ثانية غير البيع و  
الشراء.. ولان الكنباية الطولونية كانت في غرفة القعدة اللي هي نفسها غرفة  
الضيوف و غرفة النوم للزوار و غرفة كل اشئ تقريبا.. كنت أسمع كل شي  
بصير.. وكان التلفون قريب جدا.. فبسمع كل مكالمة كان.

أبو نضال كان وضعه بدأ يصير صعب.. الشغل في البلد قل.. و نضال  
هلكه بالتحويل و أم نضال بتصبره عليه عشان يرجع بالشهادة اللي طال  
انتظارها.. و ليل نهار تدعي ربهما يوفق نضال و يبعد عنه بنات الحرام  
الشقراوات الرومانيات.. حنان كانت تتعب كثير في الشغل.. بس مش  
قادرة تترك.. من جهة كانت تحب الدكتور من طرف واحد.. (زي ما  
اعترفت لبنت خالتها على التلفون) و من جهة وضعهم صعب.. أمل  
جوزها بظل يضربها و يحردها.. و وضعه مش أحسن من وضع أبوها..

كانت حياتي مع العائلة حلوة.. أبدأها الصبح بام نضال تصلي الفجر  
وتدعي.. و أبو نضال يصحى و تفطره أم نضال.. و حنان تلبس و تطلع  
على الشغل.. عال 7 يكون البيت فضي الا مني و من أم نضال وهي  
بتشتغل.. و تصلي الضحى و تدعي لنضال.. عشت معهم رمضان و العيد

و الصيف و الشتا و الصوبات.. و انتظار نضال اللي طول.. في 1988 الملك  
أعلن فك الارتباط.. و انهار الدينار الاردني و صار في غلاء فاحش..  
ومظاهرات.. وضع البلد صار مكركب.. و كثير أيام قعد أبو نضال عن  
الشغل.. و نضال صفى بدون تحويل.. و صار البيت كله مشاكل و توتر.. ما  
يقطعها الا صلوات و دعاء أم نضال..

يتبع..

في 1989.. أعدموا تشاوتشسكو.. ورجع نضال بخفي حنين.. لا  
شهادة ولا هم.. و حكى لأبوه انه كان ظايل فصل و ما كمل عشان  
الثورة.. و نفس الكذبة انحكت للاقارب.. بس ما حدا صدق.. في 1990  
صار حرب الخليج.. و انجلط أبو نضال و قعد في البيت شهرين و  
مات... حنان فصلها الدكتور بعد ما استغلها.. و تزوجت ابن عمها اللي  
أكبر منها ب 15 سنة في الضفة.. و رحلت هناك.. نضال طلع على ليبيا و  
انقطعت أخباره و تحويلاته بعد 6 شهور.. و صفت أنا و أم نضال لحالنا في  
البيت..

في 1998.. توفت أم نضال بعد معاناة طويلة.. و انقطع عن ابناءها..  
باعت أمل الاثاث لتاجر خردة و أنا كنت ضمن الصفقة.. خلال يومين  
كنت حر طليق بعد ما فككوا الكنباية الطولونية.. رجعت ألف بين الناس..  
بس كانت نظرتي مختلفة أو الناس كانوا مختلفين و قيمتي الشرائية كانت  
انحدرت بشكل كبير..

في 1999.. توفي الملك حسين.. كنت يومها مع واحد من الناس اللي  
وقفوا على باب المدينة الطبية بيكوا.. و استلم الملك الجديد.. و قرر يعدم  
العملات المعدنية القديمة و يطبع عملات جديدة عليها اسمه.. صاروا

يجمعونا لحملات الاعدام.. و في يوم كنت في مطعم و صاحب المطعم أعطاني لشاب.. عرفته من لمسة ايده.. عياش أو عتريس.. كان كبير و بطل مدحبر.. وكانت الحياة لاعبة فيه فنة لشبعانة.. و مطبشة راسه زي ما طبش راسي.. كان يشتغل عامل باليومية.. ثاني يوم نادوه عشان صيانة للمدرسة الشركسية في حي الظهر في مرج الحمام.. كان في تسريب مي من الزينكو على السطح و طلع يذبطه و أنا معه.. لما خلص و اجا ينزل.. وقعت من جبية بنظونه.. و اجيت جوا طوبة.. هو انتبه انه في شلن وقع.. بس ما انتبه وين وقع.. تركني و نزل..

الي 15 سنة جوا الطوبة على سطح المدرسة.. و الحلوان الطوبة فيها فتحة بتسمح لي أشوف عمان.. راقبتها كيف كبرت في ال 15 سنة الاخيرة.. و حمام مرج الحمام كان يحكي لي كيف تغيروا الناس و كيف صاروا أكثر عصبية و نزق.. وكيف مع انه عمان تطورت الا انه الناس فقرت.. و تعبت و كبرت.. والمستقبل أسوأ و أسوأ.. و صعب يرجع زي زمان..

مع كل صيف و شتا كان يتغير لوني لغاية ما صرت أخضر.. و زملائي العملات كلهم انعدموا.. عشان يفسحوا مجال للجيل الجديد.. لما بطلع على حياتي و حياتكم يا بشر بستغرب.. أنا أديت مهمتي على أكمل وجه.. ياما أسعدت أطفال و ياما جبت أشياء لناس.. و عشت الحياة بعدها و عديدها.. كنت قرش حلال و كنت قرش حرام و كنت صدقة و كنت مصروف و كنت سرقة... 20 سنة من عمري و أنا أخدم الناس لما انتهت فترة صلاحيتي و صرت بدون قيمة.. و أنتوا مثلي.. راح تأدوا دوركم و تنتهوا.. بس مشكلتكم يا بشر انكم بتعطونا احنا الفلوس قيمة أكبر مما نستحق.. على حساب أمور أهم.. و ما بتعرفوا القيمة الحقيقية للفلوس الا ساعة الموت.. بتعرفوا انها مجرد وهم..



لو كنت مكان الملك حسين بزمانه.. كان ما طلبت من جيفري كول  
يرسم صورتي على العملة.. يمكن كان أحسن لو كتبوا عليها "تزودوا.. فإن  
خير الزاد التقوى".

تمت..

## أقدار

انا عارف كل ما تشوفيني بكون منكد.. بس والله ما هو بايدي يا أقدار..  
فكرك ما بحب أقعد أنا وإياك و نكون مبسوطين زي زمان؟ بس والله الزمن  
أقوى مني، والحمل صاير كثير ثقيل....

اليوم رحت على مدرسة محمود، انت ما بتعرفني، ما حدا بحكي لك بس  
هاي ثالث مرة بروح عالمدسة هذا الشهر! المعلمين بشكوا منه.. صاير  
عصبي و مشكلجي و فوضجي.. انت ما لكيش دخل، تلو ميش حالك..  
مش عم بحكي عشان تزعلي.. بس لازم تعرفني.. مش عارف هذا الولد  
طالع لين.. مش مشكلة، بعقل.. بس المهم انت تكوني بخير..

اليوم حكوا معي نسايبنا الجداد، بدهم عرس نهلة الشهر الجاي..  
شايفة؟ نهلة كبرت و بدها تتجوز قال.. حاولت أأجل ما قدرت.. ما بنفع  
نأجل أكثر من هيك أقدار ما بنفع.... حكيت مع روجي عشان يساعديني في  
المصاريف، ما رضي.. قال بعمرّ بحواصل، الله يشبع بطنه بس.. و حكيت  
مع ابن عمي سليمان في السعودية اعتذر كمان! مبطللة الناس تساعد بعض يا  
أقدار.. متذكرة قديش ساعدته لسليمان؟ متذكرة؟ يوم عملية مرته مين لف  
معه و ساعده و اخذ ولاده طول ما هي في المستشفى؟ مش أنا و انت؟ ليش  
هيك بعملوا؟ ليش يا ربي!؟

لا تقولي لي نظمي..! قال اخوي من الكرشة قال! اليوم بحكي معه  
الصبح، ولا أقول لك..

طز في نظمي.. طز فيهم كلهم.. مش مهم كل هذا الحكي أقدار. مش  
مهم، بتتدبر بتتدبر، زي ما تدبّر غيرها بتتدبر.. راح يصير العرس و راح  
تلبسي الأخضر اللي بتحببيه.. ريته ما يبيل..

أصلا بديش احكي عن العرس، ولا عن شي..

انا جاي أحكي معك انت، عنك انت.. اشتقت لعالم ما فيه الا أنا و

انت..

اشتقت تضحكي من قلبك..

متذكرة واحنا خاطبين؟ متذكرة الفستان الأزرق اللي جبت لك اياه؟

اللي بس شافوه بنات عمك طقوا و انقهروا؟ حلو كان صح؟ smile

emoticon متذكرة شهر العسل في الشام و فيلم فريد شوقي اللي حضرناه في

السينما؟ هههه.. والله كان حلو! وانت كنت بتجنني.. في كل الشام ما كان

في مثلك يا أميرة..

ايبيه.. والله يا أقدار كان نفسي كل أيامك تكون فرح.. والله لما كان معي

مصري ما قصرت.. انت مش عارفيتني؟ مشان الله ابتسمي.. مشاني.. والله

ابتسامتك طول عمرها هي اللي ساندة ظهري.. مشان الله لا تزعلي حالك يا

أقدار..

أحكي لك صح أحكي لك.. وأنا مروح من الشغل اليوم مريت

عالسوق، شولقيت؟ اه smile emoticon! البردقان الفالنسي اللي بتحببيه،

المعطر.. اول نزلته، غالي شوي، بليرتين الكيلو تخيلي!.. بس جبت لك

حبتين smile emoticon الأسبوع الجا..

"يا عم كفاية ارحم نفسك بقا!، البقاء لله.. الدنيا بقت نص الليل و  
مبقاش في المقبرة غيرك.. وانا عايز أنام" ..

## صحن كنافة

بتعرفوا البنات المحجبات العصريات؟ نظارة شمسية وجينز وشنطة  
لويس فيتون مقلدة و عطر چادوغ وايفون مع كثر زهري و مثقفة و بتلطش  
انجليزي وجود داي ويز فرندز وسيلفي وبلا بلا بلا بلا؟ هاي أنا..

عمري ٢٦ سنة و ٤ شهور و ٢٣ يوم.. مش مهم شو دارسة و شو  
بشتغل.. مهو كله محصل بعضه، و مش مهم من اي عيلة ووين ساكنة، كله  
مش مهم، المهم اني لسا مش متزوجة!! ومع انه بين للناس ولصاحباتي  
اللئيمات الكهنيات المتجوزات انه الموضوع مش فارق معي واني مستمتعة  
بحياتي، الا اني أكذب من مسيلمة بكون لما أحكي هيك.. كوني مش  
متزوجة هي اهم علامة فارقة في حياتي و في شخصيتي.. وهذا هو محور  
كفاحي.. وهمي الذي لا يزول ومعركتي الاولى والأخيرة..

طبعا راح تتساءل يا نيكولا تسلا ليش ما تزوجت؟ ما اجاك عرسان؟  
اجاني، مش كثير يعني، بنعدوا يعني.. هم أربعة ومن عند رب حكيم  
الأربعة غريبين الاطوار!

الاول مهندس كهربا، اول دفعته و معقد و خجول و بده يعيشني في  
نجران، الثاني خريج شريعة وداعشي، وفي ثاني قعدة النا قعد يناقش معي  
التعدد.. الثالث مش متعلم وشكاك وغيور و بده أسكن عند إمه، الرابع  
رجليه الشنتين شمال و بس..

وانا مش انه والله بتكبر، بس يعني اشي ومنه!! يعني انا مش انجلينا  
جولي ولا سلمى حايك.. بس مقبولة والله، ومتعلمة وبشتغل و مش طالبة  
شي كثير، شاب مقبول و عنده شخصية، حتى فلوس ما بدي..

المهم، وصلت لمرحلة انه تخرجت و كل صيفية لازم احضر عرس هاي  
و خطبة هديك.. لغاية ما خلصوا صاحباتي وانا قاعدة في وجه امي زي  
مرطبان المخلل..

طبعاً جربت كل نصائح الفيس بوك اللي بتحث على الصبر و انتظار  
النصيب، وأختاه و عمته، وكل شي،، ودعيت كل أدعية الواتس اب  
بالعدد.. كل دعاء ٤٠٠ مرة.. وفش فائدة.. ما اجا المهدي المنتظر..

لما صار عمري 25، ربع قرن يعني.. قررت أتصرف أنا.. بدي اجيب  
عريس يعني بدي أجيب عريس.. وما كان قدامي الا النت.. ومواقع  
التواصل.. فتحت حساب في كل مكان، عالفيس بوك، تويتر، الاسك،  
لينكدان،، اليوتيوب كاندي كراش، جوجل، انيستا، تشافي، كل شي،،

وانا نيتي شريفة، وما بدي اتسلى بولاد الناس.. بس قلت بدي افتح  
ابواب اشوف شباب بلكي واحد زبط وانحلت عقدتك يا بنت مريم..  
وصرت أتفاعل مع الناس.. وأظهر بمظهر البنت الرزينة، العاقلة، المثقفة،  
ومقررة إذا حدث و صار في كيميا زي ما بحكوا يعني، ممكن نقعد قعدة  
وحدة بس في مكان عام، عشان نعرف بعض..

وسنة كاملة على المتعوس الفيس والمنكوب تويتر و هريت حالي بوستات  
و صداقات وتويتات و تعليقات وبدون أي نتيجة،، يا إما شاب أصغر مني،  
يا إما معاتيه و مشاطيب... مغناطيس مشاطيب أنا!! مغناطيس!! نيلة  
تنيلني في حظي الهباب!!!

والمنيح بطلع متجوز، واللي بعجبني ما بعجبه واللي بعجبه ما بعجبني..  
وآخر إحباط وخيبة أمل.. عالم النت الكبير اللي كنت شايفته الحل زاد  
اكتثابي..

لغاية قبل شهر.. شاب ضافني على اللينكد ان.. بموضوع شغل.. انا  
أخذت الموضوع عادي انه شغل وهيك.. شوي، صار بيعت لي رسائل،  
ارتفع الأدرينالين.. شوي بعث انه معجب بشخصيتي.. طبعا انبسطت،  
بس قلت له هذا مش موقع تعارف.. ولا هو بحكي بكلام ملائكي ملاً  
شغاف قلبي ولا مس أمنياتي الحزينات.. "ما حدا بعرف شو مخبي.." طبعا  
الشاب مهندس،، وشغله منيح، عمره ٣٠ سنة.. وشخصيته حلوة وشكله  
مقبول.. ودمه خفيف قلت هذا اللي وصى عليه الحكيم.. هذا حصاد السنين  
وكتزي الضائع الدفين.. وأخيرا راح أستفيد من النت!

وعشان يجلو عمري في غمضة عين، طلب نقعد نشوف بعض.. انا  
تحججت شوي انا مشغولة هداك الأسبوع و أجلته أسبوع واكثر لزوم  
الحركات.. وبالاخر أعطيته موعد.. حبيبة اللي في شارع المدينة.. نوكل  
صحن كنافه.. بفاول ع حالي عقبال كنافتي..

لبست اللي على الحبل، و زبطت حالي، وتدرت عابتسامتي.. ورميت  
كل سنيني العجاف ورا ظهري وقررت انه اليوم راح أغاث... طبعا كنت  
معطيته رقمي لأنني مش راح استنى حسين فهمي بوردة حمرا.. وكنا حاكين  
واتس اب شوي..

وصلت قبل نصيبي.. وقعدت استنى وادعي ربي يهونها و تزبط..  
واشمت فيهن اللثيمات اللي طول نهارهن بنزلن صور أعراس و خطبة وانا  
بعمل لايك بس.... وصرت أتخيل حالي منزلة صور العرس عالفيس بوك

و صور شهر العسل في تركيا.. و صور ابني في النونية زي ما عملت تغريد..  
وانا بشوف اللايكات الافتراضية وصل..

طبعا اللي نكد ان فيه صورة وجهك بس.. مش جسمك كله.. ببينش  
الطول يعني، والشاب طلع مش موهوب في هاي الناحية.. يعني لكتفي  
بوصل.. بس مش مشكلة، أبدا مش مشكلة. قلت لحالي، هي الملك حسين  
قصير، وتوم كروز قصير.. المهم نتجوز.. وبس نتجوز اذا في كيس ع ظهر  
خزانة ولا لمبة بدها تغيير انا بتولى المهمة.. مش مهم.. مش مهم..

بلعت ريقى و صدمتي و ابتسمت الابتسامة اللي تدرت عليها و سلمت  
عليه و قعدنا.. و عيونى و قلبي و كيانى فيهم هدف واحد.. مش راح يفلت  
من ايدي..

طلبنا كنافه ناعمة.. و صرنا نحكي و الشاب حكياته جد حلوين.. حكيانا  
عن الجو، و الأزمة.. و طلع معه بي ام.. و الحياة كنافه ناعمة.. واجت سيرة  
رمضان و كيف الواحد تخربط نومه و هيك، و لا هو بحكي لي.. " هو  
صحيح انا ما بصوم، بس برضه تخربط نظام نومي "

قلت في بالي.. مش مهم.. مش مهم.. معلىش، بكره انا بهديك الصراط  
المستقيم.. و حكيت له " عاد حرام عليك، و الله سهل رمضان كان السنة "  
و لا بحكي لي.. " أنا يمكن ما حكيت لك، بس أنا مسيحي "

يعني هو ضروري أتجوز؟؟ شو الفرق بين المتجوزة و اللي مش متجوزة  
يعني؟! فش فرق!!! راس مالها بس أعبي طلب لشي، بدل ما أحط صح في  
خانة متزوجة بحط في خانة عزباء.. و أصلا الخانتين جمب بعض!!



## ليلة خميس ..

أنا بحب يوم الخميس .. وهذا الحب مش سمة فردية عندي .. أو شي بتميز فيه عن الناس، هذا شي بشاركه مع جميع سكان حوض المتوسط ... اللي انتوا بالضرورة منهم .. مثله مثل زيت الزيتون و السلطة الخضرا و المخلل والرقص والاعاني الحزينة .. جزء أساسي من طقوس حياتنا انه نحب يوم الخميس و نكون مبسوطين فيه، لانه من جهة بنخلص شغل، ومن جهة بنعيش الحب فيه ..

بعد المقدمة خليني أعرفك عن نفسي .. أنا صابر، اسمي يعني صابر .. عمري ٣٠ سنة .. وبشتغل في جريدة الدستور .. طبعا انا لما بحكي للناس اني بشتغل في جريدة الدستور بفكروني محرر او كاتب او مسؤول .. وبستمع بالنظرات هاي، .. بس فعليا أنا بشتغل في الأرشيف .. يعني مالي اي دخل في الجريدة .. موظف حكومة من ١٠ سنين. وراتبي ٤٨٣ دينار و ٤٥ قرشا بعد خصم الضمان والتأمينات .. بس مأمّن صحي ..

ساكن في جبل النصر، متزوج بنت عمتي سناء .. وهي حب عمري من واحنا صغار .. وعندي من سناء الحلوة ٣ أطفال، جني و سما توأم عمرهم ٥ سنين، وأحمد عمره ٣ سنين .. ساكن فوق بيت أبوي، في شقة صغيرة، ومستور الحمد لله ..

[fb/groups/Sa7er.Elkotob/](https://fb/groups/Sa7er.Elkotob/)

طبعا راتبى ما بكفينى، بس بما انه رئيس الوزراء سمح لنا موظفين  
الحكومة الغلابى نشتغل بعد الدوام، فأنا بشتغل في محل نسخ و تصوير  
وترجمة في وسط البلد.. وبرجع كل يوم عالييت عال ١٠.. يا دوب آكل و  
أبوس الاولاد وهم نايمين وأنا..

إلا يوم الخميس، ما بدوام بعد الظهر.. بروح عالييت عال ٤.. وشعور  
غريب انك تروح من الشغل و الشمس طالعة!! بنام ساعتين و بسهر مع  
ولادى ليناوما.. وفي آخر الليل بستمع متع الفقراء المجانية مع سناء.. هبة  
الرب لعبيده المساكين..

والصراحة هذا الموضوع بعني لي كثير، لأنى بس أشوف سناء الجمعة  
الصبح متحممة و رابطة شعرها و مبسوفة.. بشوف في عيونها لمعان سعادة  
ورضى بنسبني وضعي و وضعها.. ويخليني رغم كل شي، راضي عن  
نفسى.. وانه الرزق حكمة من الله.. واني مش فاشل في كل شي.. صحيح ما  
بجيب لها كل اللي بدها اياه، ولا عنا أشياء زي الناس.. بس على الاقل  
مبسوتين في اشي..

الخميس الماضي.. صحيت متنشط و مبسوط و رايق، أفطرت باستمتاع!  
و طلعت عال دوام.. وما في بالي شي، الا أرجع المسا أنبسط مع حبيبة قلبي..  
وما قدرت أزمة المواصلات و لا ريجة الناس، ولا بهدلة المدير و لا رطوبة  
الأرشف و لا أخبار داعش و غزة و سوريا انهم ينزعوا مزاجي.. انه  
الخميس..

روحت عالييت عال ٥.. مريت عسوق الخضرة و شففته جميل.. و شفت  
الخضرة طازة و البائعين لطيفين زي اللي في برامج الأطفال.. جبت لبناتي

مانجا، ولأبوي موز، وكانت سناء موصيتني ع بيتنجان عشان المقلوبة!  
تسلملي ام المقلوبة شو بحبها!

شفت أبوي قاعد بره، أعطيته الموز، و سفق حبتين مانجا مني.. وشربني  
شاي بارد وطلعت نمت..

طبعا من أكبر معكنات ليلة الخميس، ولي العهد أبو حميد.. البنات  
شاطرات بناموا بكير، بس هالمسخوط كأنه ضرتي.. عالشرة بفتح معه  
العدّاد.. كأنه هسه صحي!! ولا بجاوب معه لا دوا كحة ولا هيستامين ولا  
سخام الطين! قاعد في وجهي زي العمل الردي!! وشوي بده مصاص و  
شوي بده ينزل عند سيده! وشوي بعملها ع حاله! عقّدي!!

دخلته ينام ٣ مرات! ويرد يطلع! ويا بابا ويا حبيبي ويا عمري فش  
فايدة! بالآخر شمطته كفين وطلعت ادخن عالبراندا.. راحت سناء عملت  
له حليب، ودخلته ينام واجت قعدت معي نستناه يندفس العزول! وكانت  
طلعة البراندا عملا

سناء حطت الولد ينام واجت.. واحنا قاعدين عالبراندا.. شفت ناس  
بحاولوا يفتحوا بابص أبو رضوان جارنا.. فكرتهم ولاده! شوي ولا شغلوا  
الباص وهربوا!! طبعا عرفتهم أنا وقتها.. هذا واحد أزعر سرسري عنا  
اسمه إسحاق الشبر..

طبعا طلع أبو رضوان بس ما لحقهم ولا شافهم! وصار يصرخ و  
ينادي!! أنا سكتت ونزلت راسي عشان ما حدا يشوفني.. ينسرق الباص  
ولا تنسرق الاردن كلها.. ماليش دخل! بدي بس أحمد ينام... بس الله  
يجرس لي اياها سناء ما رضيت! "حرام يا صابر! والله حرام نسكت! مش

انت عرفت السرّاق؟ انزل وقف مع ابو رضوان و احكي له، وبستناك حبيبي.. كلها ٥ دقائق، ويكون أحمد نام، حبيبي انت "

طبعاً من وين الله بلاني أكون شاهد عالسرقة ما بعرف! عاندت أنا، بس غمزتني ووشوشتني مع ضحكة وأنا اقتنعت.. لبست الزنوبة ونزلت..

نزلت و رحى عند ابو رضوان وحكى له يشكى ع إسحاق وما يجيب سيرتي! وعشان تكمل الليلة، صار بده أروح معه عالمخفر أشهد معه! وكلها نص ساعة يا أخوي يا صابر معلش.. " يخرب بيتك يا سناء!! يخرب بيتك يا أحمد يابا!!!!!"

وما قدرت أقول له لأ.. مهو كنا خلص دخلنا المعمة، وبدي أعمل شهم ومساعد.. وبدي أتحمّل..

وصلنا المخفر، دخلنا جوا انا و ابو رضوان و ابنه.. ورحنا عالمسؤول و شرح له ابو رضوان القصة، وحكى له انه انا شفت انهم جماعة إسحاق الشبر هم اللي سرقوا الباص.. الشرطي طلع بعرف إسحاق و طلع أصلاً مطلوب على قضايا ثانية هو و اثنين معه..

أشر لنا الشرطي وين نقعد، وقعدنا ع كراسي حديد، نستنى.. وانا اجت قعدتي جيب باب غرفة الضابط اللي بنستنى فيه.. وعشان أنسى وين أنا، قعدت أتخيل في سناء وشو لابسة.. وأفكر إذا أحمد نام ولا لسه.. ويا ترى شو لونه قميص النوم؟ والله يسامحك يا سناء على هالعملة..

وأنا بواسي في حالي على هالورطة.. نادى الضابط الأول عماد بيك، على ابو رضوان و ابنه.. عشان يطلعوا فوق يكتبوا افادتهم ورقم السيارة.. انا ما صدقت على الله قمت معهم بدي أخلص واروح.. قام عماد بيك حكى لي.. انت خليك هون.. بدك تفوت عند حيدر بيك بعد شوي تعطي شهادتك..

رجعت خائب الأمل وقعدت لحالي.. وهم طلّعوا فوق.. ولا بدخلة ٤  
شرطة ماسكين واحد اسمر وبضربوا فيه.. طبعا شكله متشرد وازعر، بس  
ضخم الجثة.. كركدن.. وهو يصرّخ ويضرب فيهم ويسب.. وشوي طلع  
هذا المنتظر حيدر بيك من مكتبه عالصوت.. وطلع أضخم من ابو سمرة..  
طلع ثلاثة كركدن في بعض. وبلش خبط في الأسمر من كل مكان.. نهنه  
كتل.. طبعا الأسمر رجع عالحيط، وتكوّم ووقع زي شوال البطاطا.. ومع  
انه انا ماليش دخل، وجاي أساعد في تحقيق العدالة على حساب متعتي، بس  
من قوة الخبط قلبي صار في رجلي.. وانا بس أخاف بتلعثم وظهري كله  
بصير عرق بارد.. وبحس في عنكبوتات بمشوا جوا البنطلون.. جوا جوا..

شخطوه الشرطة للأسمر من رجليه وراحوا.. ولف وجهه حيدر بيك  
لقاني في وجهه.. قرب علي وهو بطلع بوجهي بغضب ومناخيره بطلع منهم  
بخار.. وسألني، شو بتعمل هون ولا؟!!

طبعا أنا احتراماً يعني للكركدن وللقانون و سيادة القانون وقمت  
حيلي.. و صرت أحاول أرتب الكلمات احكيها في وجه هذا الكركدن  
الغاضب، ولا سمعت شرطي من وراه بحكي له.. هذا تبع الباص المسروق  
سيدي..

انا ارتحت انه الشرطي حكي هيك وأنقذني.. ما بتذكر شو انحكى بعدها  
او اذا أنا حكيت شي أو لأ.. بس متذكر ان الكركدن العظيم حيدر بيك  
هجم علي وبلشت أكل كفوف.. كف ورا كف.. وبكوس و شلايط وانا  
أصرخ وأستغيث ومش فاهم اشي.. بتذكر انهم حوالي ٣٠ كف.. غير  
الشغلات الثانية في أماكن ثانية وغير المسبات.. طبعا العناكب هربت..  
وقبل ما أغيب سمعتهم بحكوا له..، هذا شاهد سيدي.. شاهد..

لما وعيت و غسلت وجهي وفتحت عيوني، لقيت حالي في مكتبه و  
قدامي فنجان قهوة.. ووجهي منفخ زي المرة الحامل وكل عظمة في بتوجع،  
وأنفي سايل وأواعي مبهدلة ولابس فردة زنوبة وحدة.. وهو قاعد ورا  
مكتبه وبيضحك و بحكي لي.. طيب يا زلمة الله يسامحك ليش ما حكيت انك  
شاهد؟ فكرتك السراق أنا!!

طبعا كان ثمي مورّم وسخن وكل حرف بحكيه بوجّع.. مع هيك قلت  
له.. سيدي انت اعطيتني مجال أحكي؟ ضحك واعتذر ع أساس، وأنا لسه  
خايف منه كنت.. شربت قهوتي بالعافية و طلعت. ووصلني أبو رضوان  
عالبيت عالواحدة..

ما حدا يسألني شو عملت انت وسناء! منيح ما طلقتها!!

تمت..

مستوحى من قصة حقيقية..

## عبد الوهاب..

أکید کل واحد فيكم في يوم من الأيام عابس، تمنى لو يطلع له عم مجهول مليونير في البرازيل و يموت و يورثه.. ويصير غني فجأة.. هذا حلم أردني شائع.. بس أنا تحقق معي، وصار واقع.. مش بنفس الحيشات لكن بطريقة مشابهة.. وهاي هي قصتي..

في صيف ١٩٨٢.. كان أبوي عاشق بتابع كأس العالم بكل شغف.. ويحاول ما يشغله عن أي مباراة شيء.. شو ما كان يكون حتى لو كانت طلبات إمي الحامل... ولحسن حظه وصلت ألمانيا - فريقه المفضل - للنهائي.. وقعد متمسمر قدام التلفزيون يستنى المباراة..

بس قبل ما تبدأ المباراة بساعة.. اجا الطلق لإمي.. ونزلت مية الراس.. واضطر أبوي ساعتها يترك المباراة و يروح معها عالمستشفى وهو يسب ويلعن على ابنه الجديد وتوقيته الغريب، وعشان تكمل معه.. خسرت ألمانيا..

ومن يومها و أبوي بحكي اني ولد نحس.. ومن كثر ما عصّب من توقيت ولادتي.. ما رضي يسميني.. فإمي الله يخليها سمّنتي سعيد.. فصرت السيد سعيد نحس..

وبين أحداث منحوسة وأحداث سعيدة مشت الحياة، وكبر السيد سعيد نحس.. وفي صيف ٢٠٠٠ خلصت توجيهي.. وجبت ٩٤.. وعملوا أهلي

حفلة تخريج يوم الجمعة.. وكانت هاي هي لحظة السعادة اللي راح تلون حياتي..

قبل حفل التخريج بيوم، اجوا ناس من العيلة على أبوي وحكوا له ان عبد الوهاب بده يجي يصلحه ويسلم عليه ويبارك لابنه.. ووافق أبوي على مفض..

وبس طلع أبوي حكيت لنا أمي قصة عبد الوهاب، قريينا اللي عمرنا ما شفناه.. طلع هذا بكون ابن خال أبوي.. وكاين أيام المخيم يجب عمتي، وخطبها وطلع على ألمانيا.. هذا الحكوي سنة ١٩٦٠.. وقعد هناك ٤٠ سنة ما حدا سمع عنه شي.. طبعا عمتي استتته ٥ سنين، قبل ما تياس.. وصاها حالة اكتئاب ومرضت وماتت.. وسيدي الله يرحمه كان حالف يقتله لعبد الوهاب لو شافه..

شفته لعبد الوهاب،، وسلم علي و على أبوي.. وظل عنا لخلصت الحفلة.. كان اله في عمان سنة.. اشترى بيت و عايش فيه لحاله.. وما تزوج طول عمره.. اختيار في السبعين.. لكن بتشوفه بتحكي عنه ٥٠.. كان مبين أصغر من أبوي مع انه بينهم ١٥ سنة.. وأمي كانت تحكي انه مليونير كبير في ألمانيا بس تقاعد ورجع عشان يموت هون.. واله شركات هناك..

في وسط الحديث، سألني واحد من القرايب شو ناوي أدرس.. طبعا انا ما كنت مفكر بشي.. بس ميال للصيدلة.. تدخل عبد الوهاب و حكى "مهو خلص دراسة الصبي! مش بتعرف تقرأ و تجمع و تطرح!؟ بكفي! لازم يشتغل الولد.. التعليم مضيعة للوقت و تخريب للفكر!" وقام نقاش حاد بين عبد الوهاب من جهة و القاعدين من جهة ثانية.. عبد الوهاب مع انه بكفي تعليم ولازم أشتغل شغل حر كمان.. وأبوي وباقي الناس مع



التعليم.. وبس حمي النقاش، تحدى عبد الوهاب الجميع انه لو أستغل معه شهر واحد بس.. راح أطلع راتب أبوي في سنة.. طبعا أبوي وقتها كان أستاذ وكالة.. وبطلع في السنة حوالي ٧٠٠٠ دينار..

وتراهنوا.. وحكى لي أبوي، من بكره بتروح مع عبد الوهاب.. شهر كامل.. وبدي أشوف كيف بدك ترجع ب ٧٠٠٠ دينار! بأخر الشهر يكون عندك جامعة..

وأنا بصراحة تحمست.. وثاني يوم فعلا.. كنت عند عبد الوهاب في بيته.. وصلته ٨ الصبح.. كان مشتري بيت طابق واحد بس معه حديقة كبيرة.. فتح لي الباب وهو لابس روب زي اللي في الأفلام.. وشربنا قهوة.. وطلعنا عالحديقة..

طلب مني أنكش أرض الحديقة كلها وبأخر النهار بحاسبني.. وفعلا.. من شجرة لشجرة وبالفاس والطورية طول النهار لما انفتح ظهري! بس خلصت.. وهو بس قاعد بتفرج علي و بشرب قهوة وبدخن.. وبلعب مع بيغاء أزرق وأحمر عنده..

آخر النهار أعطاني ١٠ دنانير، وحكى لي.. انه اليوم اشتغلنا بالجسد، بس بكره شغل العقل.. وراح نشوف مين بكسب.. وطلب مني آجي ثاني يوم وأنا لابس شورت وطاقية ونظارة شمسية..

روحت و أنا كلي غبرة وتعبان وحاسس حالي أكلت مقلب.. وأبوي شمت في.. بس كنت مصرّ أكمل.. وحاسس في شي راح يطلع من عبد الوهاب..

ثاني يوم كنا في طريقنا للبترا.. ومعنا البيغاء وكاميرا حديثة بتطبع الصور فوراً.. وقفنا مكان ما بنزلوا الباصات السياحية.. ونصبنا يافطة انه تصور

مع البيغاء بدينار.. طبعاً عبد الوهاب كان في شخصية ختیار أوروبی،  
ویمزح مع السیاح والسائحات ویحكي لغتهم وكثیر حبه.. وأنا بس أصور  
وأعد فلوس في عقلي.. ولدهشتي روحنا ومعنا ١٨٦ دينار..

واحنأ في الطریق فهمني عبد الوهاب انه في ألف طریقة وطریقة عشان  
تعلم فلوس.. منها الصعب زي مبارح، ومنها السهل زي الیوم ومنها  
المملة اللي هي طریقة أبوی، وكان لازم أعمل الصعبة عشان ما أكرها، لان  
الانسان بتعلم الغلط وبتعلم الصح..

وداومنا شهر ٨ كله في البتراء.. تصور السیاح مع البيغاء.. ونخليهم  
یطعموه.. وآخر النهار الغلة تكون دنانیر و عملات أجنبية.. وتعلمت فيها  
من عبد الوهاب انه الاقتصاد عرض و طلب صح.. بس في طلب، وفي  
قدرة على الطلب.. وفي رغبة في الطلب.. والسائح بجمع كل هدول.. وان  
الفلوس مرمية على الارض، بس بدك مين یعرف یلمها..

في آخر شهر ٨ كان معنا ٩١٢٥ دينار.. غیر اللي صرفناه أكل و شرب..  
طبعاً طلع لي هندسة في التكنو.. وأبوی كان مستني أخلص مغامرتي مع عبد  
الوهاب و أداوم.. ویوم ما اجتمعنا مع أبوی وورجيته الفلوس مع ابتسامة  
نصر من عبد الوهاب.. عصّب أبوی و حكي انه هيك هيك راح أكمل  
جامعة.. وهون قرر سعید النحاس يتحدى أبوه.. ورفضت أكمل جامعة..  
وقررت أشتغل مع عبد الوهاب..

بعد مشاكل عنيفة، أبوی كرر لإمي اني نحس من یومي.. وترکني..  
وبدت أكبر مغامرة في حياتي..

كان موسم السیاح خلص.. ولازم نشتغل في شي ثاني.. وعبد الوهاب  
اقترح نعمل مطعم شاورما و حمص وفول.. لأن على رایه.. الاكل و الجنس

ما بوقفوا.. أخذنا محل في الخامس (كان عبد الوهاب بأمن انه لازم نخدم الأغنياء بالبضاعة، ونخدم الفقراء بإنا نشغلهم معنا).. وجهزناه.. وبدينا.. وربنا فتح وبارك في المحل.. وصرت أكسب كثير.. طبعاً عبد الوهاب ما دفع شي ولا طلب شي اله.. كان بس بساعدي.. وكل شي باسمي.. بآخر السنة كان عنا ٣ فروع..

وفي يوم طلب مني عبد الوهاب خارطة لعُمان.. وصار يشرح لي ان الانسان لازم يفهم مدينته.. ووين ممكن يكون تمدد العقار.. وبعد ما درس الخريطة، شرح لي ان الناس ما راح تروح شمال عُمان لأنه بارد.. ولا شرق عُمان لأنه فقير، ولا جنوب عُمان عشان في مطار.. ما في الا غرب عُمان.. وتحت حي الصناعة تحديدا.. وشفنا طبربور كمان.. كانت جديدة و سعرها مقبول..

فهمني عبد الوهاب اني لازم أزور دائرة الأراضي مرتين على الأقل كل سنة.. وما أكون ببيع.. وفعلاً.. صرت كل شي اربحه من المطعم أشتري فيه اراضي في طبربور.. وفي مرج الحمام.. كانت ببلاش أيامها.. واقترح علي عبد الوهاب انه اي قطعة أرض أشتريها.. أزرعها شجر مثمر عالاًطراف وأسيجها.. عشان نعطيها قيمة مضافة.. وتوقع انه أي حرب في المنطقة راح تفجر أسعار العقار..

اشتغل المطعم سنتين وصار له ٦ فروع، وصار اسم تجاري.. وهون اقترح عبد الوهاب انه لازم أتركه حالياً.. لانه كان يؤمن انه المصلحة مثل الطفل الصغير.. لازم تعلمه المشي وتتركه.. حطينا مدير للمطعم و اتفقت معه على مبيعات معينة ونسبة اله و طلعت..

في الأثناء هاي كان أبوي بدأ يغير رأيه في إني أنا شخص نحس،  
خصوصا مع الفلوس اللي كان يشوفها معي..

وبدأت حرب العراق.. وكانت أكبر كنز الي.. كل الاراضي اللي اشتريتها  
ضربت في ٢٠.. وأول ما بدأ تدفق اللاجئين، فتحت بمشورة من عبد  
الوهاب شركة إسكان و مقاولات.. وعيننا مهندسين.. وبدأنا بنبي على  
أراضينا و نبيع.. وصارت حركة هائلة في سوق العقار والمقاولات..  
طبعا عبد الوهاب ما كان معي في كل خطوة.. نتيجة عمره ومجهوده، بس  
كنت لازم أمر عليه كل يوم او يومين في البيت آخذ نصائحه ومشورته..  
ومشورته في شركة المقاولات كانت اني مش لازم أعين مهندس شريف،  
لازم يكون حرامي.. وأعطيه أقل من ما يستحق، عشان أجبره يسرق مني..  
ورأيه كان انه السراقين بربحوا الشركة أكثر لأنهم مبدعين.. بشرط تكون  
محدد له كم يسرق.. وفعلا كانت ارباح شركة المقاولات كبيرة..

وفي ٢٠٠٦.. كنت مليونير حقيقي.. كان حسابي في البنك حوالي مليون  
و ٤٠ ألف.. ولما ورجيت عبد الوهاب كشف الحساب.. أخذني عالمطبخ..  
وصار يقلي بطاطا وانا معه.. وبس خلص.. مسك بطاطا سخنة بالمغرفة و  
حطها في ايدي حرقني.. وحقى لي "هاي الفلوس.. Hot potato حرام  
تظل في ايدك.. واحنا بنشرب قهوة ما بعد العشاء، حقى ان المسلمين تعلموا  
كل شي من الرسول، بس ما تعلموا انه كان تاجر.. وانه صار وقت أقتدي  
بالرسول وأصير تاجر..

وتحامل على نفسه وطلعنا على تركيا.. ومن اسطنبول ركبنا العبارة  
لبورصة.. طلع عبد الوهاب بحكي تركي منيح من أيام ألمانيا.. واتفقنا مع  
٨-٧ مصانع نستورد منتجاتهم.. ملابس وقطنيات و عدد و مواد غذائية..

وفتحت شركة استيراد و تصدير و بنيت مخازن و مستودعات.. كنت بتضخم تضخم سرطاني..

وصار عندي مجموعة قابضة، فيها مطاعم.. ومقاولات و إسكان و تجارة و مطبعة و مجمعات تجارية و لسه ما كملت ثلاثين سنة.. كان كله بفضل توجيهاته و فكره في الاستثمارات الناجحة.. وأقنعني عبد الوهاب في جلسة مسائية أفتح مدرسة انجليزية.. لأن الأردنيين على قولته بموتوا في التعليم.. وفساد الدولة راح يفسد التعليم، فلازم يكون في بديل خاص مربح خصوصا انه الشعب الأردني بحب المستعمر ومنتجاته..

ثاني يوم افتتاح المدرسة.. كان شهر ٨ / ٢٠١٠.. كنت بعرف عبد الوهاب الي بالزبط عشر سنين.. ومع انه كان شعلة نشاط و مش مبين عليه التعب و الهرم.. الا انه دخل المستشفى في أزمة قلبية..

زرته و ظليت معه.. وطلعته من المستشفى.. كان بالكاد يقدر يحكي أي كلمة.. كأن شي سحب روحه.. كتب لي اني أظل أزوره.. ووعده ما أتركه أبدا..

وصرت فعلا أزوره كل أسبوع.. بس مع اندلاع الثورة السورية و بدء تدفق اللاجئين.. كانت إمبراطوريتي بتكبر و تتوسع.. وأخذت عقود توريد معونات، و عقود إغاثة.. و بنيت عمارات كثيرة في اربد و عمان.. وفتحت خط مع الصين و صرت مشغول جداً جداً.. بالكاد أزور عبد الوهاب مرة في الشهر و كنت فعليا استغنيت عن نصائحه و صارت مكررة و أزهد و أنا أسمعها، خصوصا بعد ما مرض.. و بس أزوره يمسك ايدي و يههم بكلام مش مفهوم.. و بس يكتب لي أشياء..

السنة الماضية كنت بجهز حالي أطلع اجتماع و كلاء في دبي.. ولا بوصلني شحنة أرامكس.. فتحتها لقيت فيها تمثال صغير لأسد أبيض من العاج..

كنت أشوفه في الصالون عند عبد الوهاب.. بس شفت التمثال تذكرت انه كان لي تقريبا ٥ شهور ما زرت عبد الوهاب..

مع الأسد كان في الرسالة التالية..

"ابني سعيد.. أنا لما وصلت ألمانيا وأنا صغير كنت شاب طموح مثلك وناوي أكمل دراستي وأصير موظف.. احتضني ختيار ألماني كانت الحرب دمرت كل شي بملكه.. سكنت عنده و اعتنيت فيه.. وكل شي علمتك اياه هو علمني اياه.. وكانت فلسفته في الحياة ان المتعلمين بقضوا حياتهم يدرسوا الجذور، بس الأذكيا هم اللي بقطفوا الفاكهة.. ومثلك تماما.. ساعدني أبدأ من الصفر وبنيت امبراطورية كبيرة في ألمانيا.. أنا بعمرى ما كان عندي عائلة.. الشيء الوحيد اللي عملته على مدى ٤٠ سنة هو انى أعمل فلوس.. ولما تعبت.. تركت كل شي وراي وجيت عشان أعمل عائلة.. وشفتك.. وقررت انك تكون ابني.. وأعلمك تعمل فلوس وتكون فعلا سعيد.. وما كان بدي منك شي، الا انك تحبني و تزورني.. وانا مش زعلان منك..

قبل ما يموت الألماني أعطاني هذا الأسد لأني كنت آخر انسان اهتم فيه ومنحه السعادة قبل ما يموت.. ولما توصلك هاي الرسالة وهذا الأسد.. اعرف انى أنا ميت.. وبشكرك لاهتمامك فيّ في آخر عمري."

السنة كنت بستنى مباراة ألمانيا والأرجنتين.. بس قبل المباراة بساعة.. اجا مرتي الطلق.. ونزلت مية الراس.. ومع انه راحت علي المباراة وخسرت الارجنتين.. الا انى كنت سعيد جداً بابني البكر.. عبد الوهاب..

تمت..

## قاع المدينة

كثير ناس بتفكر انه الفقر هو مجرد أنه ما يكون معك فلوس تشتري ملابس أو أكل.. بس الفقر فعليا أعمق من هيك بكثير.. الفقر صبغة حياة.. بفرض عليك وين تسكن.. ومين هم جيرانك.. و طبيعة علاقاتك مع أهلك و عائلتك.. و بفرض عليك وين تدرس وإذا تدرس أصلا أو لأ.. وشو تشتغل ووين تشتغل.. ووين سقفك بالحياة.. وشو طبقتك اللي مسموح لك تتعامل معها.... بل حتى بفرض عليك قيمك وطبيعة علاقتك مع ربك ونظرتك بشكل عام للحياة والمجتمع والدين...

ما بدي أحكي انه الفقر كان سبب للي أنا مریت فيه.. بس يمكن هو اللي وفر الأسباب..

اسمي جهاد.. وعمري 24 سنة..سكان منطقة الجبل الأبيض في الزرقاء.. طبعا في ناس كثير منكم ما عمرهم عاشوا في منطقة مثل الجبل الأبيض.. ولا يعرفوا شو يعني انك تعيش في منطقة خارج القانون و المنطق والزمن و خارج نطاق الاخلاق أساسا.. أكبر مشكلة عندنا في المناطق الشعبية هي ما يعرف بالزعران.. والزعران عبارة عن ناس خارجة عن القانون.. على الأغلب مش متعلمين.. وكل واحد منهم اله لقب يميزه "الطُج، الزرافة، الغاوي، أبو الليل، وهيك" ممارساتهم اليومية هي البلطجة والسرقة و الاعتداء على الناس بأسلحة بيضاء و الترهيب و سب الرب و

الدين علنا.. و السكر.. و الزنا والمخدرات و الدعارة و القائمة  
تطول.. طبعا في أي مكان ثاني.. هؤلاء المجرمين مكانهم السجن.. لكن في  
حي مثل الجبل الابيض.. هؤلاء هم جيرانك.. ولازم تعرف تتعامل  
معهم..

عشت عمري كله في حالي.. بحاول أبعد عن الشر قدر الامكان.. وما  
أتعاطى مع حدا فيهم.. وحتى لو تعرضت لمضايقات.. أحاول أنهي  
الموضوع بهدوء وبدون ما يكبر مع الحفاظ على الكرامة.. والسبب الاساسي  
انه الازعر ما عنده شي يخسره، وأي نزاع معه انت الخسران.. وعشت  
وكبرت وأنا بدعي الله انه يخلصنا منهم.. ولما ما تحقق دعائي، صار همي  
الأكبر اني أدرس وأتعلم وأقدر اطلع أهلي من هذا الحي الموبوء.. قبل ست  
سنوات خلصت توجيهي.. انا و فوج كامل من الناس اللي بتقدم امتحان  
الوزارة لعل و عسى يقدروا يكملوا جامعة و يطلع لهم احتمالات شغل  
ومستقبل أفضل.. ومع كل طموحي، الا انه قدراتي الدراسية ما ساعدتني  
أجيب معدل يأهلني أدخل جامعة حكومية.. ولو جبت يمكن ما كنت  
أقدر أدرس.. الوضع المادي أسوأ من سي..

وعشان أساعد أبوي في مصاريفي انا وأخواتي الاربعة.. كان لازم  
أشتغل.. وبما انه ما عندي أي حرفة أو مؤهل..وبما انه الرزق عند تزاحم  
الاقدام.. قررت أشتغل أبسط شي ممكن يشتغله انسان.. بسطة.. فصلت  
طبلية خشب.. و ب 50 دينار تدبروا بصعوبة.. اشتريت بضاعة بسيطة،  
أمشاط و بُكُل و اكسسوارات بنات صغار ودبابيس و أشياء زي هيك..  
واخذت معي دعا الوالدة و طلعت السبت الصبح على مجمع الزرقا و  
اخذت مكان بعيد عن الناس و بسّطت فيه..



اول يوم، ومع انه كان يوم سبت.. والحركة قليلة.. الا اني بذلت كل شي بقدر عليه.. ابتسم للرايح والجاي.. واحكي مع الستات واقنعهم يشتروا.. وبفضل من الله.. تمكنت اكسب 8 دناير رزق حلال.. و باخر النهار.. حملت بسطتي و بضاعتي و روحت و انا بحلم بيع أكبر بكره، وتماديت في حلمي انه البسطة تنجح وأجولها محل أكسسوارات وأشتري لإمي وخواتي اللي بدهم إياه..

ثاني يوم كنت في المجمع من ال 6 الصبح.. والحمد لله كانت الحركة أحسن.. بس حوالي الساعة 10.. ما شفت الا هال بنت جاي علي.. وشكلها أصلا غريب ولا بسطة مثل الشباب.. وبدون اي سابق انذار.. سالتني "مين سمح لك يا ابن <sup>^&\*^\*&^</sup> تبسط هون؟" من الصدمة والرعب وقفت على اجري و تطلعت فيها.. ولا حواليها 4 شباب.. واضح انه زعران.. واحد فيهم قرب علي.. وحط ايده ع كتفي و حكي.. "شكله غشيم الشاب.. جديد يا حبة عين إمه.. و صاروا يضحكوا.. وانا لسه ساكت و مش فاهم.. قام واحد مسك فكّي بين ايديه و قرب وجهه على وجهي و حكي.. "هذا المجمع كله للمعلمة هون.. اي واحد ببسط لازم يبوس اجرها قبل ما يبسط.. واجار البسطة كل يوم ليرتين.. فاهم يا @\$&\$&\$&!!!" اشرت براسي اني فاهم.. و طلّت ليرتين و اعطيته.. قبل ما تروح هي و جماعتها.. دفشت البسطة كلها برجلها و راحت وهي تسب و تلعن الزمن..

وانا بلملمم بالبضاعة من الارض.. قرب علي واحد ببيع كعك.. اختيار.. و صار يساعد في و يفهمني.. حكي لي انه هاي البنت كاسرة و زعرا.. و معها حوالي 50 واحد.. كلهم بشتغلوا معها.. و بتوخذ فلوس من كل محل و بسطة و من كل باص.. و الكل بخاف منها و بعمل لها ألف حساب..

ولازم أَدفع وأنا ساكت.. والشرطة نفسها شايفينها و ساكتين.. كلهم يخافوا منها..

ما اقتعنت بكلامه.. بس استغفرت ربي و لمّيت بضاعتي و قعدت.. واعتبرت اللي صار جزء من ان الواحد يكون في السوق.. وقررت المسا أروح أشكي عليها.. وفعلا.. الساعة 8 رحيت شكيت.. وكتب الشرطي الشكوى ووعدني خير وروحت..

ثاني يوم الصبح.. فتحت البسطة و قعدت أستنى الشرطة تيجي.. الشرطة ما اجت، البنت اجت، وانا كنت مجهّز ليرتين.. وناوي يكونوا آخر ليرتين..، بس بدون أي كلمة بلشت تضرب في هي و جماعتها وانا بحلف إها انه راح أَدفع.. لغاية ما كل وجهي صار دم.. وهم يضربوا وهي تسب علي اني شكيت عليها.. وتتحدى الشرطة و الملك و الحكومة و ربنا كمان.. أكلت ضرب ما بتحملة انسان.. وبكيت من كثر القهر والألم.. شالوهم الناس بالرجا عني.. و اجا لي الختيار تبع الكعك يمسح جروحي و يراضيني.. رتب لي البسطة.. و صار يلوم في.. يا ابني مش حكيت لك ما حدا بقدر عليها؟ يا ابني ادفع لها و انت ساكت الله يرضى عليك..

واستلمتني.. كل يوم الصبح تمر توخذ ليرتين ومرات ثلاث.. ومرات 5.. غير انه اللي يعجبها من البسطة تشيله.. ويوم عن يوم صرت أعرف عنها أشياء أكثر.. انه امها انسجنت و هي صغيرة.. وعاشت بين البيوت.. و في عمر 20 سنة، في شخص اغتصبها و حملت منه.. ورمت ابنها في مركز أيتام.. و عايشة على النصب و السرقة و البلطجة.. و عليها قضايا كثير بس ما حدا بقرب عليها.. اي شرطي بتعرض لها بنفس الليلة بكونوا الزعران هاجمين على عيلته كلها.. ويطلع هو الخسران.. حتى أحكام السجن ضدها

ما بتتنفذ.. وانه الله بحبني انهم ما ضربوني بموس على وجهي او تهجموا على عيلىتى..

كملت شهر في المجمع و أنا خاضع لها.. بس كل مرة كانت تمر على كنت أنظر لها نظرة المظلوم للظالم.. ومرة سألتني.. "ليش بتتطلع في هيك ولا؟" تأسفت لها و قلت لها "ما في شي.. حقتك على".. وفي يوم امي تعبت.. واخذناها عالمستشفى.. ووصفوا لها دوا حقه 26 دينار ما كان معنا نشتره.. وأصلا خالص من عند الحكومة.. ولازم نشتره من بره.. ودعيت الله يزيد رزقي عشان أقدر أشتره لامي..

ثاني يوم ما اجت البنت الصبح.. وبعث كثير منيح.. والعصر مرّوا خواتي عندي عالبسطة يشوفوني ويشوفوا لو معي ال 26 دينار حق الدوا.. وكان معي منهم 15.. قلت لهم المسا ان شاء الله بشترى لها الدوا لامي.. وكثير انبسطوا ودعوا لي.. وصدفت وأخواتي عندي اجت.. وبدون اي مقدمات بلشت تسب علي بكلام وسخ.. انه ليش ما جبت لها المعلوم.. خواتي تفاجأوا منها و من كلامها.. و أنا حاولت أحتوي الموقف.. وقفت لها.. وقلت لها بكره بعطيك بس اليوم عندي ظروف.. وصارت تسب بصوت اعلى.. قامت أختي صرخت عليها.. وصارت تسب على أختي.. بكلام وسخ.. طبعاً انا انجنيت.. وروحت خواتي بسرعة وطلعتهم بالباص و رجعت لها.. لقيت جماعتها كلهم واقفين معها.. ضربتني هي و جماعتها كمان مرة وكسروا البسطة.. واخذوا كل الفلوس اللي معي وراحوا.. وتركوني وأنا مرمي عالارض ووجهي منفخ و اواعي كلهم دم..

ما روحت عالبيت يومها.. ظليت قاعد بالمجمع.. بس بفكر.. والنار بتوكل قلبي من جوا.. ورحت اتداينت من بيع الكعك 5 ليرات.. و اشتريت موس.. وقعدت أستناها.. وأفكر بحالي و بأهلي و بالمجمع و

الشرطة الي ما إجت و بالبت و بخواتي و أبوي و أمي و بالله و بكل شي..  
وما وعيت على حالي الا الساعة 3 الصبح صارت وانا على نفس القعدة..  
قمت من مكاني وفتحت الموس و خليته في جيبتي مفتوح.. وصرت أتمشى  
في المجمع زي الضبع الجوعان.. كان لازم أشوفها!! ومع أذان الفجر  
شفتها.. ماشية لحالها كانت.. قربت منها.. وفي عيوني نفس النظرة الي  
كانت تشوفها بعيوني.. ضحكت بس شافتني وحتت لي تعال.. مشيت  
لعندها وبدون ما تكون متوقعة أي شي.. وبأسرع ما يمكن.. قربت عليها  
ولفيت ايدي وراها و نحرتها من رقبتها.. وقعت ووقعت فوقها ومثبتها  
كنت،، وصرت أمشي الموس يمين يسار و أضغط.. كنت بقتل كل الخوف  
والرعب والظلم الي عشته..والدم يعفر من رقبتها وهي تقاوم وكأنه  
بطهرني أنا.. لما هديت حركتها تركتها و قمت.. كانوا في شوية ناس واقفين  
ومصدومين.. لما شفت عيونهم كلهم علي صحيت.. رميت الموس و  
وركضت للبيت ركاض..من الخوف ما دخلت عالبيت، ظليت قاعد ورا  
البيت و من التعب و الخوف نمت و انا قاعد عالارض..

الصبح كانوا الشرطة في البيت والتهمة كانت القتل العمد.. مع سابق  
الاصرار والترصد.. كل الدنيا كتبوا عن القصة، وصار في مطالبات بالافراج  
عني و تبرئتي.. واني انا عملت الي لازم الحكومة عملته من زمان.. وحاوول  
المحامي يطلعني مختل عقليا عشان تنزل العقوبة.. بس القانون الي غمض  
عيونه عنها فتحهم علي.. ومع الأسباب المخففة أخذت 15 سنة سجن..  
وصاروا سبع سنين و نص بعد ما أبوها تنازل.. ودخلت السجن أقضي  
محكوميتي.. والي ست سنين فيه.. وان شاء الله الشهر الجاي بطلع من  
السجن و يرجع عالجيل الأبيض..

لو رجل قانون يطلع على قصتي من بعيد، بحكي اني قتلت انسانة..  
ويمكن كان لازم أنعدم. أو أقل ما فيها آخذ مؤبد.. ولو رجل دين يطلع  
على قصتي بحكي انه القصاص لازم، أو أقل ما فيها اتوب وأستغفر ربي..  
والناس اراءها كانت مختلفة.. بس شخصيا، لغاية الان.. ولغاية 100 سنة  
جايات.. أنا مقتنع انه ربنا لما شاف قصتي كان رأيه اني عملت الشي الصح..  
ويمكن لما يشوفني يكون مبسوط اني قتلتها..

تمت..

## حُبّ وأشياء أخرى

صحّ انه أسعد أيام حياتك بكون يوم ما يجيب أهله يخطبوك وأهلك يوافقوا؟ صحّ هو هذا اليوم اللي بكون أوفى بوعدده فيه؟ وما شمتت حدا فيك؟ وفيه بتنتهي فيه كل الأوجاع والانتظارات و احتمالات خيبة الأمل؟ وصحّ انت هيك بتفكّري؟! لأنك هبلة! وأنا كنت مثلك..

قصّتي مش غير عن الناس.. حبيته مثلي مثل أي بنت.. كنت سنة ثالثة جامعة.. هو للأمانة ما كان أول حب بحياتي، كنت داخله قبله قصتين حب صغار عالفيس، بس خلصوا بسرعة.. وتدمّرت زي اللي عن جد.. وعبيت بروفايلي دموع و حكم و صور ذئاب و هيك.. بس هو كان غير، كان أول حب حقيقي.. أكبر مني بثلاث سنين.. موظف قطاع خاص، حليوة نوعا ما.. و فهم.. بحكي من هذا الحكي الصعب والمصطلحات الغريبة هاي، الرأسمالية و الشيوعية و الكبة نيّة و هيك.. و بفتح عيني على شغلات ما كنت فاهمتها..

المهم، اتدهولت على عيني و حبيته.. و بيدينا نطلع مع بعض.. كنا كثير نتمشى في الجامعة أولها.. وبعدين صرنا نتمشى برا الجامعة.. أولها كان حلو المشي، ورومانسي و إيد بإيد و هيك.. بس بعدها تعبت و صرت أطلب نقعد في كافيه أو مطعم.. وقتها عرفت انه كان مفلس.. وانه المشي كان خياره الاقتصادي الوحيد لمواجهة الوضع القائم.. فكنا نخاف ندخل مطاعم.. لما

نجوع نجوع، كنا نوكل سندويشة فلافل عالطائر.. ولما نطبخها نطبخها واحتفال يكون، نوكل KFC.. ونركب بالباصات العمومي.. والسرافيس.. التكسي كان رفاهية ما بنقدر عليها.. برجوازية على رأيه.. وكل مرة أرجع من رانديثو معه، أنقع اجري بمي وملح.. ويومين وانا أعرج.. طبعا انسي موضوع الهدايا و فالتاين واينشتاين.. رجس من عمل الشيطان هدول.. ويوم عيد ميلادي طلع لي قصيدتين من نزار قبّاني.. قصيدتين كاملات.. وساندويشة فلافل صاروخ.. مع شطة حمرا.

يمكن لو رجع في الزمان، كان ممكن أفركها عالبيكر.. بس وقتها كانت المسلسلات التركي و مستغانمي مخربين عقلي.. والفقر يليق بك والقصص هاي.. وكنت حابة ألعب دور البنت المضحية اللي بتوقف مع حبيبها في أزوماته.. وإنه ما دام الحب موجود، أي شي ثاني مش مهم.. وبصراحة كنت كثير أحبه و مش شايقة غيره.. المهم بالجمعيات و سلف الشغل و قرض النقابة وألف يا ويلاه.. تدبر معه ٢٥٠٠ دينار يجي يخطبني.. وحقى لي انه الجمعة بالليل جاين أهله يشوفوني..

طبعا انا حبيته هو كشخص مستقل، وما عمري فكّرت بأهله... صحيح كانوا موجودين في الخلفية، بس عمري ما فكّرت فيهم انهم شيء مهم.. كانوا بالنسبة الي شيء مؤقت مرتبط بحبيبي.. زي ما بتشتري بنطلون وييجي معه بطاقة المصنع، بتشيلها و بتستمتع بالبنطلون.. عادي يعني.. ما عمري فكّرت او تخيلت انه هم يكونوا البنطلون اللي راح ألبسه.. وحبيبي بس البطاقة..

يوم ما كانوا بدهم يجوا.. صحيت الصبح وانا مبسوطة انه الحمد لله.. راح تكمل فرحتي.. وأبطل مشاوير السرّ وكنكناات السرّ والله غفور رحيم يعني... وقررت أتحمم عشان أجهز حالي وأكون على سنجة 10.. نسيت

أحكي إني سكان منطقة شعبية، ولأنا في قفا هرم اهتمامات الحكومة، في منطقتنا بتيجي المي بس يوم الجمعة الصبح ولمدة ٣ ساعات.. ويا بتلحق تعبي التنكات و تشغل الماتور يا ما بتلحق..يومها تأخرت المي.. انه يخرب بيتكم.. ع حظي تاخرت المي؟؟ ووقفت تحت الدش الساعة تسعة الصبح أصلي استسقاء وألعن في الحكومة.. بعد صلاة الجمعة رينا استجاب صلاتي واجت المي وتحممت..ولبست وتجهزت..

ورتبنا الصالون انا و اختي.. وقعدت أستنى على جمر.. وقلبي بين الخوف والأمل... وعالسبعة رن الجرس في بيتنا و في قلبي..وكنت أول مرة بلتقي بالوالدة باشا.. السلطانة الام.. هند بنت عتبة.. ومساعداتها.. نجلاء و شياء.. خواته.. أنا للأمانة ما كان في قلبي شي تجاههم.. ولا أي حكم مسبق ولا شي.. وقابلتهم بابتسامة بريئة..

طبعاً احنا ناس بسطا، وأثاننا قديم نوعاً ما.. يعني اشتراه أبوي الله يطول بعمره بعد حرب أيلول بشوي، بس مريح.. ويبدو كاينات موزعات الواجبات والأماكن قبل ما يدخلوا ومحددات وين كل وحدة تقعد وشو تعمل.. اختاروا الكنباية الثلاثية، شياء ماسكة ميسرة الجيش ووظيفتها تتفحص أهلي.. نجلاء قائدة الميمنة ووظيفتها تتفحص بيتنا.. وأنا وجهها لوجه مع هند بنت عتبة.. تفحصتني بعيونها ولا أجدع طيب باطنية و نسائية وتوليد.. وكل سؤال تسألني إياه أمر من الثاني.. طبعاً بالليل كذب علي و حكى لي اني كئيبيير عجبت أهله.. بس أنا كنت عارفة إنها الحرب..

وبعد مفاوضات جنيف عالمهر و المتأخر والاشياء هاي، تحدد موعد الخطبة.. وأنا من طيب نيّاتي ومن اللي كنت أشوفه عالانستغرام عند صاحباتي، اقترحت نعمل الخطبة في صالة.. مش شرط البنفسج او النعمان



أو هيك.. أي صلاة بقبل! ان شاء الله صالة وادي النسناس! أو جمعية كفر  
راعي! بس والله يا حبيبي بيتنا صغير و ما بوسع..

المهم، جنبنا طاولة كبيرة من جيراننا، وخطينا كنبه أيلول فوقها و  
انصمدت أنا و حبيبي في صالون بيتنا أبو ٤\*٤.. خطبتنا كانت بسيطة  
جداً.. تلييسة صغيرة هي نقتها.. ذهب يكاد يكون شفاف قد ما هو رقيق..  
ويمنع منعاً باتاً تعرضه للشمس أو للغبار.. وفتان مستأجر من عند  
صاحبة شياء.. بشبه فستان فاتن حمامة وهي عروس، في فيلم لا أنام.. نفس  
الموديل تقريباً.. وطبعاً خالته لحبيبي اللي كانت متولية التصوير.. ونصيبي  
بالزبط كان ٤ صور.. ثنتين وانا مغمضة.. بس قلت يلا بنعوضها بالعرس..  
طبعاً طول الخطبة وإمه مبسوطه.. كل شي صار عمزاجها وأنا مغلوبة  
على أمري.. بس ماشي الحال، قلت بدني اعتبرها معركة أحد.. بس العرس  
أنا راح أرتبه.. فتح مكة جاي يا هند..

وصرنا مخطوبين.. وصار يزورني كل فينة و فينة.. وصحيح ما عمره  
جاب لي شي واحنا حبيبة.. بس قلت و احنا خاطين غير.. الا ما يجيب  
يعني.. واجا عيد ميلادي.. ويوم الاستقلال، و عيد الشجرة.. و عيد ميلاد  
الملك.. و ذكرى ظهور ولي العهد.. وصاحبنا مش هون.. ولا في باله  
الموضوع.. وانا مش مادية، و تربيت عالقناعة.. بس الله يصلحك تذكرنا  
بشغلة.. شغلة أخزق فيها عينين صاحباتي.. بديش عطر و ذهب و اشي  
غالي.. بس أي اشي.. سحارة بندورة.. جاجتين.. طبق بيض! اثنين كيلو  
قرشلة! أي شي! فش.. مش هون الزلمة.. واجا عيد الاضحى.. وقلت فش  
فيها.. الا ما يعيدني يعني.. أكيد ما راح يمر العيد هيك.. اجا و جاب معه  
كيس هدايا.. وكل عام وانت بخير يا حبيبتى.. من هبلي فتحته قدام اختي..

بيجاما صفرا عليها فراشات زهري، وكل فراشة قد راسي.. ما عليه حبيبي  
ما عليه.. الفقر يليق بي أصلا..

بعد العيد، كان موعد نبدا نحضر للعرس، وطبعا من أجل ذكريات  
الخطوبة.. انك تكوني متفقة مع حبيبي على اثني، وبس يروح على بيتهم و  
ينام هناك.. الصبح يكون رأيه "اختلف" .. سبحان مغير الأحوال والآراء..  
بدون طول سيرة، تقرّر انه أنا والوالدة باشا ننقي كل شي مناصفة..  
الجهاز والصالة والذهب والفتان والتجهيزات الأخرى.. وطلع مش  
حبيبي لحاله اللي بحبّ المشي.. طلع المشي عندهم تراث عائلي.. صفة  
جينية.. رياضتهم المفضلة، أو طريقتهم لتعذيب الآخرين..

طلعنا نشترى الكندرة - أجلكم الله - دخلنا السوق قبل صلاة الظهر  
وكانت نمرة إجري 39.. طلعنا منه بعد المغرب وأنا 42.. بس موفرين  
ليرتين بحق الكندرة عن أول حل شفناه.. ألف حمد وشكر يا رب..

الفتان طبعا من عند صاحبة شياء.. ووديناها عالدراري كلين 3 مرات  
عشان تروح ريجته.. والذهب أصفر أصفر زوي ذهبات ستي هيجر..  
(مهو إمي ما بدها الذهب يخسر يا حبيبي).. طيب يا نضوتي ماشي.. يا  
بلوتي من الزمان.. والله شكلكم ناويين تبيعوني إياه من أول أسبوع..

الصالة صالة أسيل.. جاتوه بوليسترين والبيسي حل.. بس طلع لنا ليلة  
بفندق.. يا فرحتي يا هنائي.. (بعوض لك اياها حبيبي.. ما انت عارفة،  
كلها ساعتين وخلينا نوفر فيها.. ووعد وعد أعوضك).. الله يعوضني فيك  
بس..

والسيارة المرسيدس الكشف اللي طول عمري بحلم فيها.. تحوّلت  
بقدره قادر ليسان صني تبعة صاحب جوز نجلاء (والله يا حبيبي حلوة  
السيارة ومدهونة جديد) يحلي وبرك ووبر إملك يا حبيبي..

والكروت طبعهم ابن خالته.. أرخص بثلاث قروش من اللي اخترته أنا  
(كريمته).. شو ظل كمان؟ آه صح.. تركولي الصالون أختاره الله يبارك  
فيهم.. مع ميزانية ٥٠ ليرة.. حطيت عليهم كمان ٥٠ مع وعد أسدّهم من  
نقوطي.. ورحت عند صالون على راس الشارع.. وطلعت شبه ميريام  
فارس بس وجهي ملوّن..

وجاء اليوم اللي طول عمري بحلم فيه.. وطلّيت بالأبيض اللي أكله  
الدراي كلين.. وجاتوه خشب وبيسي حلّ، وأبوه أخذ النقوط، وما حدا  
رقص على جثة فرحتي إلا نجلاء و شياء.. وهند قاعدة بعيد بتبتسم..  
ونابها الذهب بلمع... وأنا واختياري والفقير يليق بك، قاعدين عاللوج..  
والناس يرقصوا وبغثوا وأنا في عالم ثاني.. بتطلع فيهم ويفكر باللي عملته  
بحالي وباللي مستنيني.. حتى وقت الصورة الجماعية لما ابن شياء مسح  
شفايفه اللي كلهن كيك وبيسي بفتاني ما اهتمّيت..

ممكن انت تفكّري انه أنا ببالغ.. أو انه ممكن نعتبر انه هاي مشاكل مؤقتة  
و راحت لسبيلها وممكن تصير مع أي بنت.. وإنه كل البدايات صعبة،  
والمهم انكم تزوجتوا.. وانت بايدك هلاً تغيريه و تشكليه وجوزك على ما  
بتريه.. وإنه ما دام تسكّر علينا باب واحد، خلص ما حدا بتدّخل بشي وما  
بظل بينك وبين أهله إلا الزيارات.. بس حياتكم الكم وانتوا بتقررروها..  
صح؟

ما أنا قلت لك من الأول إنك هبلة!

تمت..

## تويكس أبيض ..

لو عمرك وفتت على بلكونتك بالليل، وألقيت نظرة على عثمان، راح تشوف شبابيك كثير ضوها مطفي، ومنها ضوءه خافت.. ورا كل شباك فيهم، في بنت حاطة راسها عالمخدة.. وبتطلب من ربنا شي خاص بجماها او بحياتها.. هاي بتقول.. يا ربّي طولني ٥ سم بس.. يا رب يا رب.. بس ٥ سم وبوعدك لأصلي وما أقطع ولا فرض!! وهديك بتقول.. يا رب ليش إخواني بيض وأنا سمرا طيب؟! يا ربّي هم شو بدهم بالبياض؟؟ والله انا حلوة وما ناقصني الا شوية بياض؟ ليش طيب!؟.. وغيرها طالعة من الحمام وبتمسك خصل شعرها وبتتحسر.. وبتقول.. يا رب هاد سلكة جلي اللي عندي ولا شعر؟! ليش يا رب هيك طيب!؟.. وهاي أبوها فقير، وهاي حبيبها حقير، وهديك صدرها صغير... وهلمّ جراً.. وآلاف الدعوات والأمانى والعتابات بتصعد كل ليلة من الارض للسما.. وبتتكرّر..

ولو أرخيت سمعك شوي، ممكن كنت تسمعني وأنا بدعي.. يا رب يموت الميزان يا رب!! يا ربّي متى أنحف!!!!

طبعا لا يتيهأ لك عزيزي القارئ او عزيزتي القارئة انه أنا من الدراما كوينز هدول اللي بكون وزنها 60 وبدها 2-3 كيلو وبتبكي عليهم وعاملة

مناحة.. لا لا... الموضوع أعمق من هيك بكثير، أو بتعبير أدق، الموضوع أثقل من هيك بكثير..

مشكلة السمنة قديمة جداً معي.. يعني أنا من أول حياتي وأنا سمينة.. بيبأ لي كنت بويضة سمينة حتى! انولدت وكان وزني 4 كيلو و 300 غم.. خروف صغير يعني.. وبتروي خالتي انه في عمر ست شهور كنت آكل صحن مقلوبة وفخدة جاج! وتراكم الجاج فوق الرزّ والرزّ فوق الجاج لوصلت الصفّ الأول ووزني 30 كيلو.. صحيح كنت طويلة، بس برضه مليانة.. كان واضح انه عندي مشكلة سمنة.. وكل الكلام المجاملة انه أنا بيبى مللظ بطلّ ينفع.. صار لازم الكلّ يعترف بالحقيقة.. أنا سمينة...

طبعا انا مولودة في عائلة ميسورة.. عنا فيلا كبيرة مع حديقة و مسبح.. ومزرعة، وبابا عنده استثمارات كثير.. وفي طبقة زي هاي، حاصلة على كل شي.. المظاهر بكون لها أهمية كبيرة.. فشكلي كان بسبب لماما نوع من الاحراج أمام سيّدات المجتمع المخملي هذا.. وكان هذا واضح من تعاملها معي..

ما بعرف هي كانت تحجل مني زي ما كنت أحسّ، أو بدها مصلحتي زي ما كانت تحكي، بس بكلّ الأحوال، كان كلامها معي دائماً قاسي..

كانت بدأت تعاني وهي تجيب لي أواعي..

دايا تجيب مقاس أكبر بستين أو ثلاث و برضه يطلع صغير.. وتقول "يا ماما ارحميني والله ما في شي على قدك" ومراّت لما تشوفني آكل حلو كانت تحكي "خليك كلي والله لتصيري مثل البقرة!! فضحتينا!!" وكنّت مراّت أحلم إني جد صرت بقرة زي اللي في المزرعة! وأستغرب انه هذا ممكن

يصير!! وأبوي من جهة ثانية كان يحميني.. وما يخجل مني، ويحبنى مثل ما أنا.. ويحاول قدر الإمكان يلعبني الألعاب اللي بلعبها لأختي الصغيرة.. ويملني على كتافه مثلها عشان ما أحس باختلاف.. وياما سمعته بعاتب إمّي على كلامها معي.. وهي تحكي انه ما حدا مخربها غيرك.. وكنت اذا ماما بكتني وزعلتني أروح على غرفتي أبكي.. ويحي بابا على غرفتي يحضني ويراضيني... ومع هيك كان بس يطلع، أمسح دموعي وأطول الأكل واكل..

ودخلت المدرسة، أول لقاء الي مع مجتمع غريب.. وكانوا الطلاب والطالبات أولها بين ساخر و مستغرب.. وشوي شوي بطل في استغراب، صار كلّه سخرية لو مبطنة.. في الصفّ الثاني بدأت الألقاب في الظهور.. بنصّة.. دبة.. برميل.. فيل، إم كرش.. وصار عندي نوع من الانطواء.. وما كنت أقدر أتساكل مع حدّ.. لأنه سلاحهم دايمًا أقوى من سلاحي.. بسخروا مني وأنا ما بقدر أسخر منهم.. وعشان هيك كنت أركّز بس بدراستي، وصرت شاطرة.. وبس أرجع عالبيت، أبعد عن ماما.. بس الأكل ما كنت أقدر أبعد عنه.. وكنت أحاول كثير ما أحكي لها شو يصير معي.. لأنه جرّبت و حكيت و كان نصيبي البهدلة.. صحيح أولها كانت تحاول معي بلطافة وهيك.. "ويا حبيبي ويا عمري، وأنا بحكي عشانك". بس لو تجرّأت ثاني يوم و طلبت شي فيه سكر، أو شوكولاته، كانت ترجع تبهدل وتصرّخ.. فبطلت أحكي لها شي.. بس ما بطلت أكل.. كنت بحب الأكل مش بإيدي.. وخصوصي الشوكلاته.. وبحبه أكثر لما حدا يزعلني.. بظل أكل لأرضي أو أتعب.. وعشان أهرب من كلامها، صرت أكل بالسرّ.. بس شو الفائدة اذا أكلت بالسرّ ونصحت بالعلن!؟

ووصلت صفّ ثالث ووزني 50 كغم (على وزن فَعِم) واللي باكله في الليل بلبسه في النهار. ومع كل سنة في المدرسة كنت أزيد شوية وزن.. وأفقد ممارسة أنشطة معيّنة.. على الرابع بطّلت أقدر أسبح قدام الناس.. صرت أسبح بس في بيتنا.. عالخامس.. كان الركض أو ممارسة نشاط بدني صعب جداً علي.. فطلعت من حصة الرياضة.. واكتفيت بالتشجيع.. وفي عطلة الصف الخامس اللي طالع على سادس.. كنت بشوف منال لأول مرة.. كانوا اشتروا بيت جيب بيتنا.. كانت من عمري.. وقضينا الصيف سوا.. وسجّلوا بمدرستنا.. هي وأخوها محمّد.. كان محمّد أكبر منّا بستين.. ودخلت الصفّ السادس وهم أصدقائي..

صرنا صاحبات أنا و منال.. وكانت تحبني وأحبّها.. بس التأثير الأكبر في شخصيتي كان لمحمّد.. عمره ما عايرني إني سمينة.. ومع هيك عمره ما شفق علي.. كان يعاملني كإنسانة عادية.. حتى لما كان يسمع حدا يسخر مني في المدرسة كان يهدلهم.. بس عمره ما راضاني، ولا عمره حكى لي أنحف! وإذا شافني بكيت، كان يقعد ساكت و ما يحكي شي.. ولا عمره أعطاني نصيحة تشعرنني اني ضعيفة ولازم أتعلّم كيف أتصرّف.. كنا كثير نضحك سوا، ومرات نزل من بعض، بس عمره ما طيب خاطري او حزن علي لأنني سمينة، وعمره ما خلق حاجز الشفقة هذا اللي كان بيني و بين أبوي مثلاً.. كان يعاملني بالزبط زي ما كنت بحبّ.. ومع هيك ما كنت أحبه ولا كان يحبّني.. كنا أصدقاء بالمعنى الحرفي للكلمة..

وجود منال و محمّد، وخصوصاً محمّد بحياتي ساعدني كثير.. وبدأت منال تعطيني نصائح كيف أدافع عن نفسي، وأردّ الالهانة.. وتحسنت شخصيتي شوي.. وصرت جريئة أكثر.. بس كرشي ظل زي ما هو.. بل كبر.. عالسابع ما كنت أقدر أصلي إلا و أنا قاعدة.. زي ستي

إسعاف.. عالئامن صار لازم أفصل كل ملابسي.. لأنه بطل الجاهز يمشي حاله.. عالئاسع.. كانت آخر مرة بشوف فيها سحاب البنطلون بدون مراية.. وعالعاشر كانت آخر مرة بقرأ فيها وزني من خائتين.. وداعا للوزن ذي الخائتين.. وهاي السنة اللي في آخرها طلع محمد من حياتي.. خلص توجيهي وراح يدرس في ألمانيا.. صحيح افتقدته، بس شخصيتي كبت قوية وجريئة ومرحة كانت تشكلت.. على الأقل في المدرسة..

خلصت توجيهي و دخلت الجامعة الاردنية أدرس إدارة.. ومنال راحت عالئكنو تدرس صيدلة.. وكان لازم أواجه هذا المجتمع الجديد الحالي.. طبعا في الجامعة فش حدا بحكي بنصة و فيل وأم كرش.. مرّات كنت أسمعهم يتخوّتوا طبعا.. بس مش بوجهي.. بس كان عندهم هناك طريقة ثانية يعبروا فيها عن رفضهم لك كمختلف.. بستبعدوك..

في أوّل سنة ما قدرت أعمل صحاب.. مع إني كنت خفيفة دم.. وهون لازم أحكي شي عن خفة الدم.. الناس دايمًا بقولوا.. انه الشاب السمين او البنت السمينة خفيفين دم.. وكأنه بالفطرة.. هاي موفطرة.. انت كشخص سمين، بتتجبر تكون خفيف دم.. لأنه ما بنفع تكون ثقيل و ثقيل دمّ كان! وبتضطر تطوّر هاي المهارة لسبيين.. أول شي، عشان تعمل جو للسخرية بعيد عنك.. أو تسخر من نفسك قبل ما يسخروا منك.. والثاني، انه بدك شي الناس يحبوك عشانه! لأنه انت مش محبوب لذاتك.. في أكوام وأكوام من الرز و الدجاج المعالجين.. واقفين بينك و بين انك تكون محبوب.. بينما الناس العاديين ما بطوروا هلي المهارات عشان ما بحتاجوها..

طبعا خلصت سنة أولى وأنا لحالي.. وكنت كثير أنقهر لما أشوف شاب و بنت بحبوا بعض.. وأحسداهم.. خصوصا البنات الحلوات الخفيفات.. كنت أتصور انها لو ركضت بسرعة شوي ممكن تطير!! بس شو بفيد



الحسد؟! كنت أنا كمان بحاجة حبّ.. وكل ما أفكر أتأمل بشي، عقلي يرجعني للواقع... مين راح يتنيل على عينه و يحبّ بنت وزنها 120؟ حتى البنات كان يحاولوا يبعدوا عني بلا ما تطولهم المسخرة.. بس قلبي ما كان راضي يسمع الكلام،، كان بدّه حبّ يعني بدّه حب!! وما كان في إلا النت.. وشكرا للفييس بوك انه بخليك تخلق الشخصية اللي بدك اياها.. فكنت أنا "أميرة القمر" وخطّيت صورة بينولوبي كروز.. وما ضفت أي حدا من صاحباتي أو العائلة.. وصرت أشارك في الصفحات.. وخلقت لحالي حياة موازية ممتازة.. عوّضتني عن خواء حياتي الحقيقية..

وصرت أضيف شباب.. وأحكي معهم.. ولأول مرة كنت بسمع كلام غزل في حياتي!! صحيح ما كانوا شايفيني.. لكن غزل بعد كل حساب! وصار قلبي يتحرّك! وطلع ورا الدهون هاي كلها في قلب.. وصرت أشتاق وأعرف الشوق واللهفة.. وصرت أفهم نظرات البنات بس يحكوا عن اللي بحبّوهم.. صار عندي نفس النظرات.. ونفس اللهفة ونفس الشوق..

طبعا العلاقات ما كانت تطوّل.. لأنه الشباب طمّعين.. وبعد فترة من الكلام المعسول.. بصيروا بدهم أشياء ثانية.. وأنا ما بقدر أعطيها.. بس بنفس الوقت ما كنت بدي أخسر هذا الاهتمام اللي عمري ما حصّلتته.. فصرت أعطي هذا الشيء بحدود.. وبدون صور أو شي.. وفي كل مرّة أحتقر حالي وأحتقر ضعفي.. كنت كثير أفهم وأحسن من الي بستغلّوني، بس كنت أضعف منهم.. وأبكي وأبكي على مخدّتي.. كان لازم أبيع شي غالي، عشان آخذ كلمة غزل البنات بوخدوها بدون شي.. كنت أحسّ حالي محاصرة جوا هذا الجسد.. وهو قاتلي ومقتلي بنفس الوقت..

وبعد فترة من الانهيارات النفسية المتتالية.. ونهضات و سقطات ومدّ  
وجزر.. لغيت حسابي.. وسكّرت باب هاي الحياة الموازية.. لأنها بس  
جرحّحتني بزيادة وشوهت احترامي لنفسي.. ورجعت لحسابي الحقيقي..  
صورتني الحقيقية.. وقررت اني أقبل أكون مكروهة بشكل حقيقي، ولا أكون  
محبوبة بشكل كاذب.. ونار الواقع ولا جنة الوهم.. وحكيت بس أشغل  
يمكن أتسلى وتكون البيئة غير وواعية..

وتخرّجت.. ورحت أشغل في شركة إعلانات و دعايات لبابا..  
ومسكت منصب إداري.. وهناك كمان كان في نوع ثاني من التمييز.. بس ما  
كان في سخرية.. كان في نظرة نمطية مصحوبة بشاتة تجاه الأغنياء.. إنّه  
الغني ما بطلع له كل شي.. صحيح غنيّة بس دبة.. والحمد لله على الفقر و  
الصحة و هيك.. أشياء ما بتقدر تعطيتها أساء.. بس بتلمحها في أطراف  
التصرّفات ونظرات العيون.. بس من كتر ما كنت شايفة، ما تفاجأت كثير  
ولا تأثرت.. ومع هيك تعبت.. وصرت أداوم وأروّح وأنا منكّدة.. لغاية ما  
شفت مالك..

شاب أكبر مني بثلاث سنين.. كان موظف مبيعات في الشركة وأول ما  
داومت كان بإجازة.. لطيف جداً ونحيف وطويل!! ما كان ذكي يعني، او  
مثقف او هيك.. بس جذاب.. وشوي شوي صار بيننا اهتمام.. صحيح انا  
كنت مساعدة المدير وبنت صاحب الشركة وهو موظف.. وأنا سمينة وهو  
حليوة.. بس حسّيت في اهتمام منه.. واللي مريح في الموضوع انه شايفني..  
وبعرف شكلي.. يعني ما في داعي أكون أميرة القمر ولا همس الأحزان ولا  
شي.. بس كان في شي منغصني حوالين مالك..

كان في هبه... مصممة دعايات.. ناعمة و نحيفة.. بس لثيمة.. من  
هدول البنات اللي أول ما تشوفهم بتكرههم! بتحسّ اللؤم انولد معهم..

نفس الشخصيات اللي كانوا يجرحوني في المدرسة!! والمصيبة انها حلوة ونحيفة و شايقة حالها!! وكنت أكرهها! وأكثر شي أكرهه فيها انها مهتمة بمالك... وكنت بس أكون مع مالك، أشوف السخرية مني في عيونها.. (انه بده يتطلع عليك انت!؟)

وغمضت عيوني عنها وعن احتمال انه مالك ممكن يكون يجاملني أو بتقرب لي لمصلحة.. واخترت اني أصدق انه مهتم جد.. ويوم عن يوم صرت أحبه.. كان هو الحب اللي لازم يعوضني عن سنين خيبي الطويلة.. وصرت أستنى منه يصارحني بحبه.. وصارت المعجزة.. في يوم سكر ما صفقة مهمة واجاع مكتبي يبشرنى وحامل شي ورا ظهره.. فكّرت ورد أو شي.. وابتسمت له ابتسامة غريق شاف سفينة.. فتح ايده ولا هو جايب لي تويكس بيضا.. طبعا هاي شوكلاتتي المفضلة.. وبما انها مش دايمًا موجودة.. فكنت عندي استعداد أتعامل مع إسرائيل عشان أجيها.. كيف عاد لما اللي بحبه هو يجيها؟! فرحة للقلب والمعدة سوا.. وهو - بالصدفة أكيد - جاب لي اياها..

طبعا هو ما كان بعرف انها شوكلاتتي المفضلة.. فاعتبرت انها عربون حبّ منه، وإشارة من ربنا إنه أحزاني على وشك تنتهي.. وقررت أردّ المبادرة بأكبر منها وأعمله هدية مفاجئة.. وأنا مروحة، مريت جبت له آيفون 4.. كان جديد وقتها.. ولقيته بورق هدايا.. ورفعت راتبه 300 دينار وخطيت رسالة الشكر والزيادة في ورق هدايا كمان.. وجهزت كل شي لثاني يوم.. وما بعرف لأن الدنيا شتا كانت وقتها والروح بتكون خفيفة.. ولا أنا من حبي اله كنت حاسّة حالي خفيفة.. بس لما وصلت الشركة ثاني يوم الصبح على بريك الفطور و معي الهدية كنت في قمة السعادة والخفة.. وكأني كنت بطير مش بمشي..

دخلت مكتبي خيبت الهدايا ورحت بسرعة عال lounge أشوفه  
وأناديه على مكتبي عشان أعطيه إياهم.. وبس دخلت لقيت هبه لابسة  
جكيتات الناس - عشان تبيّن ناصحة - وبتقلدني كيف بهزّ وأنا بمشي..  
والموظفين بضحكوا بهستيريا وهو بضحك معهم.. وانطبقت السما على  
الأرض..

بعد أسبوعين كاملين من البكا والأكل.. قررت أتغير.. بكفي.. كان  
لازم أطلع من قدري اللي اسمه سمنة.. كان لازم أتغير لو بدّي أموت..  
وقبل ما تبرد ناري، اتفقت مع مدربة شخصية تعيش معي ست شهور في  
المزرعة.. كنت بدّي انعزل عن العالم.. ودفعت لها ضعف المبلغ الخيالي اللي  
طلبتة! بس المهم أنحف!!

ورحنا عالمزرعة.. وسكنت أنا وإياها هناك.. وكان برنامج مكثف  
وبدور حول رياضتي المفضّلة.. السباحة.. كنت أسبح ٦ ساعات كل يوم..  
ومع ريجيم قاسي جداً.. وياما بكيت واشتقت للرز واللحمة و المنسف و  
التويكس وكل شي.. بس كل ما أضعف أتذكر مناظرهم وهم بضحكوا..  
بترجع لي إرادتي.. وأفرغ عصيّي في السباحة.. وأنا أصلا كثير بحب  
السباحة، من وانا صغيرة.. لان المي هي المكان الوحيد اللي كنت أحس  
حالي خفيفة فيها.. وبرضه نفس المكان اللي بقدر ابكي فيه براحتي وما حدا  
يشوف..

وبعد عزم لا يلين، وبعد صمت الأقوياء الصابرين القادرين.. قدرت  
اني أنزل من 125 ل 75 في 6 شهور!! كانت معجزة حقيقية.. شيء  
سحري.. شيء خلاني شفت أشياء كنت ناسيتها او مش متخيلة انها  
موجودة..

قدرت أشوف سحّابي وحزامي!! بدون مراية!!.. وأصلي وأركع  
وأسجد براحتي.. وقدرت أحطّ رجل على رجل!!! وأنطّ حبله! وأطلع  
درج بدون ما ألهث.. وآكل وأشبع! وألبس ملابس جاهزة! أقيس جينز  
ويجي على قدي!! وأربط ربّاط البوط!!! لحالي!!! وطلعت حلوة! أصلا  
طول عمري حلوة! بس كنت سمينة!! وأهمّ شي كان.. اني تصالحت مع  
جسدي وصرّت أحبه!! وفخورة فيه!! وحانت لحظة الحقيقة والانتقام!

لبست لبسة حلوة.. ورحت عالشركة.. ودخلت وقلبي بدق بدق  
بشكل كبير!! كنت بدي أشوفه للكلب مالك والحرباية هبه! وبدي أفنشهم  
بعد البهدلة!! دخلت الشركة وانصعقوا الموظفين بس شافوني، ومنهم ما  
عرفوني و ما صدّقوا.. بس ما كان بهمني.. كانوا عيوني رادارات بدوّروا  
على شي واحد!! مالك و هبه!! وتطوعت موظفة الاستقبال تعطيني الحقيقة  
المرة.. ما كانوا موجودين.. طلّعوا تاركين الشركة.. وخاطبين..

ومن هناك عالمزرعة كمان مرّة!! بس المرة هاي بدون ريحيم ولا شي..  
بدون أكل بالمرّة.. بس قهوة و دخان.. تعلّمت عالدهّان.. وقعدت شهر  
هناك و أنا حزينة وأنفث همومي.. وجبت المدرّبة تعييط معي.. دموع مكلفة  
كانت... صحيح كنت مبسوطة على جسمي الجديد.. وبصحي كل يوم  
متفاجأة فيه.. بس برضه حزينة.. بفكر بعلاقتي مع جسدي وكيف شكّلت  
كل حياتي و علاقاتي.. وبراجع كل حياتي ووين كنت وشو صرت.. وشو  
خسرت وشو كسبت.. واكتئاب ماله آخر.. ما طلّعتني منه إلا تلفون..

منال صاحبتني القديمة تخرّجت.. وعزمتني على عرسها.. وقالت لي  
محمّد جاي من ألمانيا يحضر ونفسه يشوفني.. كان خلص دراسة وبشتغل  
هناك.. وجاي يحضر عرسها..

تشجعت أشوف محمد ورحت عالعرس.. وشفته لأول مرة من 8 سنين.. كان نفسه محمد القديم.. بس صاير زلمة.. وكان مربي لحية طويلة وحالق عالصفرة.. وبس شفته حكيت له:

- hey! Your head is upside down!!

ضحك كثير، وتفاجأ أنه أنا نحفانة.. وقال

- hey، where is your other half?

انبسطت كثير بشوفته.. وطول الحفلة واحنا قاعدين ونحكي، وانبسطنا كثير.. في آخر الحفلة،.. تطلع في نظرة طويلة ما فهمتها، بعدين مسكني من ايدي.. وحكى لي تعالي. وراح عند أبوي.. وقال له، انه منال تزوجت و بطل عندهم في البيت حدا يغسل ويجلي ويشطف.. ولو ما عند أبوي مانع وفاضي ثاني يوم،، بده يجي هو وأهله يخاطبني عشان آجي أغسل وأجلي عندهم..

الأسبوع الجاي خطبتي على محمد.. بس في مشكلة صغيرة.. محمد طول عمره رياضي و بكره السجاير.. والمشكلة انه أنا بشهر الحزن الأخير في المزرعة،، اكتشفت انه المارلبورو الأبيض أزكى من التويكس الأبيض..

تمت..

## الرياضيات في حياتنا..

عمرك رحى عند ناس والأب جاب ابنه الصغير وصار يستعرض مهاراته في الحساب قدامك؟ وصرت انت تسأل الولد وبس يجاوب صح، الأب ينبسط وانت تتضايق من هذا الهبل؟؟ وان كل الأولاد هيك!؟ هذا الولد الصغير هو أنا.. بس ما كان معك حق تتضايق.. أنا فعلا كنت شاطر.. وكنت غير.

تعلمت العدّ قبل ما أتعلّم الكلام، وفي عمر 5 سنين كنت أجمع وأطرح خانتين.. وفي كلّ سنة في الابتدائي كنت أخلّص منهاج الرياضيات لحالي، وبدون أستاذ، وعلى العكس، أحسّه جداً سهل وبسيط، وأستغرب كيف يشوفه الطلاب صعب.. في نهاية الصف التاسع كنت أعجوبة تفاضل وتكامل ومعادلات مرتبطة بالزمن.. وكنت أحلّ أسئلة التوجيهي بمتهى السهولة..

في التوجيهي جيت 95.4 ومع حسرة من إمّي اللي قضت عمرها تبخّرنى وتقرأ عليّ، وتقبّل من أبوي اللي قضى عمره يفاخر الناس في، وافقوا اني أتخلّى عن مقعد الصيدلة وأدرس رياضيات في التكنو..

في الجامعة ما كنت أعرف حدا، لا شباب ولا بنات.. ما كان عندي وقت أصلا، كانوا صحابي هم أساطير الرياضيات.. ريمان، هودج، بوانكريه، جيلبريث، ومعهم عشت كل سنين جامعتي..

كانت الرياضيات بالنسبة الي أسلوب حياة، وكل شي أشوفه أنظر له بصيغة رياضية..

كانت كل مادة بتفتح آفاق لا محدودة جوّاي..

كنت بشوف حالي الخوارزمي الجديد.. جزري القرن الواحد والعشرين.. كان عندي يقين كبير اني أقدر أربط الرياضيات بالاقتصاد مثلا، وأخلق منظومة رياضية تعالج اختلالات الاقتصاد بدالات لا نهائية.. أو أربط الرياضيات بالهندسة المعمارية، ودرست واجهات قصر الحمراء على أساس رياضي.. حتى التوزيع الغذائي ومواجهة المجاعات، كنت بفكر باستقراءها رياضيا.. كان عندي إيمان ان الرياضيات قادرة على حل كل مشاكل الحضارة لو وظفت بشكل صحيح..

كان دكاترتي مبهورين في بشكل كبير.. ومبهورين بأفاق الرياضيات التطبيقية اللي بطرحها.. وكلهم شجعوني أكمل ماجستير.. تخرّجت الثالث على الدرجة.. وكنت مصمم أكمل ماجستير.. لكن لما طلعت نتائج القبول، كانت صدمتي هائلة... ما طلع لي منحة.. طلعت لطلاب ثانيين أقل مني مستوى.. كان لازم أكمل على حسابي لو بدّي.. وهذا كان مستحيل...

ما يئست ولا شي.. واعتبرته حل خاطئ لمعادلة.. وقررت أكمل مسيرتي.. قدّمت للحكومة، وقلت بشتغل و بحوّش و بدرس.. ومش أنا أول واحد بلاقي عوائق في طريقه.. وطلع لي تعيين في مادبا.. أدّرس صفّ رابع.. أعلمهم جدول الضرب.. كانت صدمة كبيرة الي ولأحلامي.. ومع هيك تقبّلتها في سبيل هدف أسمى.. وهو الماجستير وبعدين الدكتوراه....



راتب الحكومة كان جدًّا ضعيف، كانوا يعطوني 210 دينار، نصيبي الشهري من الخزينة الأردنية.. وبعد أول راتب، وباستخدام ابسط مبادئ الرياضيات التطبيقية اكتشفت إني بين مواصلات وأكل و شرب.. قاعد بخسر في الشهر 12 دينار.. يعني اليوم اللي بعطل فيه بكسب فعليا.. وهاي الحسبة البسيطة.. خلّنتني أتخلّي عن أحد أهم مبادئ (العلم لا يباع)، وبدأت على مضض بالتدريس الخصوصي لطلّاب التوجيهي.. ولشباب بس....

وبعد 4 سنوات كاملين من المعاناة، وبفضل طموح أهل طلّاب التوجيهي اللي مش حافظين جدول الضرب وبدهم يختموا الرياضيات ليلة الامتحان، كنت حوّشت مبلغ محترم.. كافي بمقاييس العالم المادّي النقدي انه يمنحني فرصة أدرس ماجستير، وأساهم في نهضة وطني و مجتمعي.. وكنت راح أبدأ أحقق حلمي.. لولا الإنفلونزا..

في ربيع 2005 أصبت بإنفلونزا.. ومريت على صيدلية في طريقي للبيت.. ولأول مرة في حياتي، كنت بشوف شي أجمل من التفاضل والتكامل وأجمل من حدسية بوانكريه..

كنت يبدو لأول مرة بشوف بنت.. جمال من نوع أخاذ.. انحناءات هندسية ذات اربع أبعاد.. ناولتني الدوا وهي بتبتسم.. وما عرفت اني طبّيت بس من ابتسامتها.. صيدلانية خريجة جديدة يبدو.. وروّحت من الصيدلية و طيفها في بالي..

ولاحظوا علي أمي وأخواتي اني كنت مبسوط.. وبخجل شديد وبعد اسبوعين كاملات حكيت لهم.. وانبسطوا أمي وأخواتي كثير.. انه أخيرا عرفت انه في بنات في الدنيا.. وأخيرا اينشتاين بفكر بشي غير الرياضيات.. يمكن كان عندهم شكوك تجاهي ما بعرف..

وأصرت أختي الكبيرة يروحوا يشوفوا البنت في الصيدلية على إتهم زبائن.. وفعلا راحوا خواتي و شافوها.. وأثنوا على اختياري وانه لو صار نصيب راح يجمعوا أولادنا بين الذكاء والجمال.. وصارت البنت هاي حديثنا المرح في البيت، وتقرر انه في بداية العطلة الصيفية نروح نشوفها وأروح أنا معهم.. جلسة مبدئية يعني.. نطلب البنت.. ولغاية ما اجبت العطلة، كانت هي شغلي الشاغل، وشفتها بصدف مصطنعة أكثر من 4 مرّات.. وفي كل مرّة كان قلبي يطلع من مكانه...

واجبا يوم ما نروح نشوفها، وحلقت شعري، ولبست بنطلوني البني القماشي الجميل، مع قميص أبيض.. ولّعت نظارتي ونظفت نقاط ارتكازها على أنفي.. وتعطّرت.. وفي الطريق كنت بفكر انه معلش لو تأجل مشروع الماجستير شوي.. أكيد هي راح تتفهم طموح زوجها الرياضي، ولما نتزوج أول شي بعمله راح أكمل ماجستير.. وتخيّلتها زوجة العالم الكبير، وبشكرها في كلمات التكريم واستلام الجوائز.. وخصوصا جائزة فيلدز..

وصلنا بيتهم حسب ما سألنا.. ما كانوا عارفين انه احنا.. وما عندهم تفاصيل.. بس انه جماعة جاين نشوف البنت.. ودخلنا.. وكان فؤادي خاويا زي فؤاد أم موسى.. مش لأنه بدنا نطلبها.. لأنني بدني أشوفها بس.. ولاحظت أمي اني متوتر، فكانت تطمنني وتحكي.. ليش متوتر؟ مين راح يلاقوا أحسن وأفهم منك؟!!

قعدنا في صالون كبير.. وجابوا لنا عصير ما عرفت شو هو.. واستنيتها تيجي بس ما اجت.. كانت امها وأختها بس.. وتكلمت إمّي في الموضوع.. انه ابني طول عمره شاطر و ذكي، وتخرّج الثالث على الدفعة، وبدرس في الحكومة في مادبا، ومقدم على نقل، وبدرّس خصوصي وبده يكمل

ماجستير.. وشاف هديل في الصيدلية و عجبته.. واحنا بنفوت البيوت من ابوابها.. وحماتي المستقبلية قاعدة وبتسمع بس..

لما خلصت أمي كلام.. سألت حماتي.. كم بعطوك في الحكومة؟ أنا جاوبت " 330 دينار.. وبدرس خصوصي وان شاء الله السنة الجاي بدي.. " قاطعتني، وتطلعت بأمي وحكت بكلام حازم..

"ابنك ما بتعيّب يا ام كامل، وما شاء الله مبيّن ذكي.. لكن انت عارفة طبيعة الحياة والمصاريف، ووضع موظفين الحكومة، وبصراحة، ال 300 دينار ما بكفّوا بنتي شوكلاته.. والدنيا قسمة و نصيب والله بيعت له أحسن من هديل" ..

بتذكر انه أمي ردت عليها بكلام معيّن، بس مش متذكر التفاصيل.. كانت الصدمة أكبر من الاستيعاب.. كنت بعد عمر طويل من التقدير، لأول مرّة بحسّ بهذا القدر من التحقير الي كشخص.. وفي مكان كنت أستنى فيه سعادة حياتي..

كانت بدأت العطلة الصيفية.. وقضيت حوالي شهر كامل، في حالة من الصمت.. بس قاعد في غرفتي وبرايج حياتي كلها.. موقف موقف وحدث حدث.. واكتشفت إنّي غفلت عن أهمّ معادلة في حياتي.. وإنّ المعادلات اللي كنت متصوّر انها راح تقودني للمجد.. قادتني إلى لا شيء.. وإنّي كنت ماشي في اتجاه والناس في اتجاه آخر..

وقتها العائلة كانوا متحاشين يحكوا معي.. وتاركيني في عزلتي.. وطلعت من غرفتي لأول مرة بعد شهر تقريبا.. بنفسية مغايرة تماما.. كنت متعطش للتغيير.. بالصدفة كانت أختي مروّحة من السوق.. كانت بتجهّز لعرسها.. ودخلت عليهم المطبخ ووسمعت إمّي بتحكي لها.. "هذاب 15

دينار!؟.. مش كثير يّا!؟" .. كانت إمّي ماسكة قميص نوم عرايسي خفيف جداً.. مسكته أنا و صرت أتطلع عليه..

طبعاً أختي استحت وحاولت توخده مني، بس إمّي أشرت لها تسكت.. وصرت أقلب فيه.. وسألت أختي "هذا ب 15 صحيح؟" .. هزّت رأسها.. وأرجع أسأل!؟ ضحكوا عليك ولا هاي جد ب 15؟ وتأكد هي انها ب 15 وبعد المفاصلة!!

مسكتها وأقلب فيها.. كان هذا الشيء التافه المصنوع من قماش رخيص، والي وزنه ١٠٠ غرام وغرضه تافه وبيعه شخص تافه، قيمته بتعادل قيمة شغل شخص مثلي لمدة 4 أيام!!!

سهرت ليلتها عالإنترنت.. ما نمت وأنا بتطلع على الملابس الداخلية الحريمي، وبشوف أسعارها.. ويقارن بين هون وهون.. وثاني يوم كنت في السوق، بلف وبسأل على الأسعار..

خلال أسبوعين، وبمساعدة من ابن خال الي بشتغل في الملابس، فتحت سجلّ تجاري لاستيراد الملابس الداخلية.. وبفلوس الماجستير الي تحولت لفلوس زواج ما تمّ، اشترت أول شحنة وكانت من فيتنام.. وكون علاقاتي قليلة، وما عندي أي خبرة، تغلبت فيها كثير أولها.. ولقيت أنا وابن خالي كثير عشان نسوقها.. بس إصراري كان بدون حدود.. ولأنها كانت مش موجودة في السوق، وسعرها مناسب.. مشي حالها..

واستقلت من الحكومة، وصرفت نظر عن الرياضيات، وعن الماجستير، وتفرغت لتجارة الملابس الداخلية.. نظرة عائلتي الي تغيرت.. كانت أمي خائفة علي.. وخواتي مستغربين.. وخايفين ومستحيين من هذا الانقلاب.. ويمكن في السر كانوا يدعوا على هدليل.. بس أنا كنت مصرّ على هذا

التغيير.. وشايف انه قرار صحيح بل متأخر كثير... وشوي شوي طلبت  
طلبية ثانية، وثالثة ورابعة.. وصرت أجيب من تايوان، ومن الصين،  
وسريلانكا.. وفتحت محلّ.. وصرت أبيع فيه وأوزع للمحلات.. ومشيت  
التجارة.. واكتشفت انه في مجتمع محدود الذكاء، أي شخص يستخدم عقله  
ومعرفته شوي، ممكن ببساطة ينجح في أي عمل تجاري..

والغضب اللي دفعني في أولها راح.. وصار محله رضا بالوضع الحالي  
وشهامة وكره لشخصي السابق.. وصارت شخصيتي تتغير شوي شوي..  
من جوا ومن برا كمان.. تركت بلاطين القماش وقمصان القماش.. وصرت  
ألبس من Springfield.. وعملت ليزك.. وغيرت قصة شعري.. وسجلت  
بنادي حديد.. وحملت ايفون ونظارات لاكوست.. وصرت أتابع أغاني  
ومسلسلات وأي موضة دارجة.. وصرت بشبه تماما الشخص اللي كنت  
بدي اياه.. أو بتعبير أدقّ اللي الحياة بدھا إيّاه.. والسوق علّمني أحكي  
وأمزح وأبتسم وأنا كرهان اللي قدامي.. وصرت أحكي منيح مع البنات،  
وما أخجل أبداً.. بالعكس، صار في مغامرات حتى.. وبعد 4 سنين.. كنت  
شخص مختلف تماماً.. حتى نظرات عيوني تغيروا..

وفي عمر 30.. قرّرت أتزوج.. واخترت صيدلانية برضه.. بس المرّة  
هاي ما رحنا بتكبي، ولا بينطلون قماش بني و نظّارة ووظيفة مدرّس  
رياضيات.. رحنا في سيارة بي ام جديدة.. وبدلة ماسيمو دوتتي.. وبدون  
الرياضيات..

وحكيت انا اني تاجر ملابس جملة، وبحضّر نفتح خط مواد تجميل..  
وعندي سيارة وشقة.. إمّھا للبت كثير انبسطت.. البنت سألتني بخجل،  
انت شو دارس؟ حكيت لها اني معي شهادة في الرياضيات، لكن عقلي  
تجاري.. وبحبّ التجارة من زمان وربّنا بارك في التجارة.. ضحكت الأمّ

وحكت.. "الزلة ما بعينه الا جييته.. وانت ما شاء الله عنك شغيل.. وبرضه يعني الشهادة مهمة.. " ابتسمت لها بكل وجع قلبي وشماتة في الرياضي القديم حكيت.. "أكيد عمّتي أكيد.. أهمّ شي الشهادة!!..

لما كنت ناوي أكمل ماجستير.. كان عندي قناعة جازمة اني راح أحلّ فرضية ريمان.. وأحلّ سر الجذور غير البديهية للدالة زيتا.. وكنت بحلم أكون أول عربي يحلّ واحدة من مسائل الألفية وأساعد في فك سر الأعداد الأولية.. لكن هذا مش مهم، لا إلكم ولا للبلد ولا لإمّ هديل ولا إلي كمان.. المهمّ فعلا ان كونتير الملابس الداخلية النسائية بنباع في شهر.. وبكسب 8000 دينار..

تمت..

#### ملاحظات:-

- فرضية ريمان هي أعقد مسألة رياضية غير محلولة إلى الآن.. يعتقد أن حلّها سيساهم في فهم الأعداد الأولية..
- جائزة فيلدز هي أعلى جائزة تمنح لعلماء الرياضيات، وتعادل جائزة نوبل في العلوم الأخرى..
- الخوارزمي والجزري علماء مسلمين قدامى
- قصر الحمراء هو أكبر أثر إسلامي قائم، وصممت واجهاته بناء على معادلات رياضية وهندسية تعتمد على أقطار الدوائر.

## دي ماريا

في العادة كل أيامي بتشبهه بعض، زي ما الخنزير يشبه الخنزير! بصحى الصبح، بشرب كاسة شاي، بأدي دوري كمواطن داعم لمسيرة الصرف الصحي في البلد، بدخن سيجارتين أمريكيات دعم للصهاينة وبسحب حالي و بطلع عالشغل في كيا سيفيا هي كل ما املك..

مش مميز بشي، مثلي مثلك، تخرجت بالدفش، وبايح حالي لشركة جرافيك ديزاين بالتقسيط.. كم بوخذوا مني كل شهر، بعطوني مقابله القسط اللي بكفي انه يبقيني على قيد الحياة عشان أشتغل شهر ثاني.. مش أكثر من هيك..

علاقتي بالجنس الآخر عادية، أردنية نمطية.. بعرف ثنتين ثلاث، بضحك عليهم و بضحكوا علي، بنكنكن عالتلفون شوي، واللي بدها تتزوج بتحلق لي ويبجي غيرها و هيك..

عندي عيلة زي قاع الكيلة، أخ مغترب و معه فلوس و شايف حاله علينا، مرته حربية وولاده بحكوا انجليزي.. اخت متزوجة من شاب الحياة مطلعة عينه، الصبح بدبغ جلود بقر، وفي الليل بدبغ جلد اختي، نص حياتها حرد.. اب متقاعد عصبي غضبي غضوب متفجر، ممنوع التصوير او الاقتراب.. معظم وقته فاتح الجزيرة mute وبلعن بشار الاسد، وأم بتتنقل بين المطبخ و سجادة الصلاة و المسبحة.. ودوا الضغط..

وعندي أخوي قيس بن لادن، شيخ و حامل السلم بالعرض، دعدوش صغير، بسب عالحكومة الكافرة اللي مستأجريته عشان يدرس عربي لولاد ما بدهم يدرسوا.. وبده يتزوج بنت شيخه في المسجد، ابو الحية الدمهوري..

عندي 3 أصحاب، عبد الجبار، ترك المدرسة بكير وبشتغل طبيع في مطبعة لواحد سكرجي.. أعرج و بطل شطرنج واشقراني و عنده عين أكبر من الثانية..وعايش مع امه الأرملة..

حاتم، صيدلي ومسؤول عن مستودع كبير في شركة أدوية، بسرق منهم بما يرضي الله و كل سنة في الجرد السنوي بصييه إسهال و مراجعة.. بشبه احمد زكي بس قصير..

ضرار، ابن خالته لحاتم و جاره و ضرته في نفس الوقت.. مهندس ميكانيكا فاشل و بشتغل في معمل صغير لعبوات البلاستيك، شعره مهيش وعنده كرش ونظارات زي نظارات ستي، قارئ كتابين وبهت على الناس فيهم.. هو و حاتم بحبوا نفس البنت.. ميسم بنت خالتهم، طالبة تغذية في الجامعة وبتشبه دي ماريا!

هذا أنا.. باختصار.. وهاي هي حياتي.. اه صح، شهادة ميلادي ضاعت في التعزيل للعيد الكبير، بس تقريبا عمري ٢٧ سنة.. شو في في الأفق؟ ما في شي.. كل الأيام بتشبه بعض زي ما الخنزير بشبه الخنزير.. الا يوم واحد.. كان مختلف شوي..

كان يوم خميس وكنا رايمين عند عبد الجبار نحضر مباراة برشلونة وريال مدريد.. خسروا برشلونة المهم.. وبعد ما حللنا المباراة ولعننا ام امه للحكم



و للفيفا والمدرّب وفرانكو، سكتنا شوي.. حلت لحظة رحمانية شيطانية نطق فيها عبد الجبار بالشّي اللي غير حياتنا الأربعة..

حكى عبد الجبار انه في ناس بطبعوا ستكيز لشاي لبتون عندهم في المطبعة، وبعبوه شاي مقلد وبيعهو لبتون.. طبعا الفكرة كانت جديدة علي.. الكل صار يناقش وانا أفكر.. شايفهم بحكوا ومش سامع شي..  
بسمع بس لشيطاني.. فجأة قلت لهم اسكتوا كلكم..

"عندي فكرة راح تنشلنا احنا الأربعة من براثن الفقر كله! بس بدها شجاعة وتركيز منا كلنا! متفقين؟!؟" سكتوا هم و خافوا.. وانصتوا وكأن على رؤوسهم الطير.. قعدت في الكرسي مثل دون كورليون و شرحت انه بدنا نتاجر بالدوا.. جماعة عبد الجبار بطبعوا لبتون.. بس احنا بدنا نطبع علب دوا.. انا بعمل تصميم العلب، ضرار بطبع العبوات و بعبوها! عبد الجبار بطبع البكيتات و حاتم بسوقها!

كانت فكرة بتلايمنا كلنا! و كل واحد دوره مركب اله بالزبط! استغربوا هم بس اتفقنا كل واحد يدرس الموضوع من جهته و و نلتقي بعد أسبوع..  
ثاني خميس اجتمعنا، الكل وافق على الفكرة بشرط ما تكون حرام.. اقنعتهم أنا انه احنا ما راح نمرض الناس.. احنا بس راح نعطيهم مي و سكر.. ما راح يموتوا يعني! و حاتم حكى انه الدوا مش اكثر من هيك، و نتائجها معنوية اكثر منها طبية.. واهم شي، ما في مضاعفات جانبية! المهم الشيطان أقنعنا كلنا.. بس كنا بحاجة راس مال عشان نبدأ.. ومنتج نبدأ فيه.. و مكان للتخزين..

بعث الكيا سيفيا بدموع عيني و عيني عالمستقبل، و حاتم دفع الف دينار محوشهم عشان ميسم، و تبرع يصير التخزين في مخزن قديم لابوه في الحزام

الدائري.. مخزن فاضي،، وضرار جاب ٣٠٠٠ دينار من تحت البلاطة.. طلع  
مقرش النصاب.. عبد الجبار اعتذر عن المساهمة كونه مفلس، ويا دوب  
الاكم ملطوش اللي بوخدمهم بصرفوا عليه و على امه..

قسمنا الحصص، انا الي ٤٠٪ كوني راح أكون مدير المشروع و اترك  
شغلي والبقية ٢٠ ٢٠ ٢٠.. واشهدنا الله وأشهدنا الشيطان على الاتفاق..  
وحانت ساعة التنفيذ..

حاتم قرر شو الدوا اللي بدنا نبدأ فيه.. اوجمتتين للاطفال.. شراب..  
وضرار قعد أسبوعين لعرف يعمل العلبة، صممت البكيت انا، وحاتم  
صمم التعبئة و عبد الجبار طبع البكيت.. بعد محاولات مضية استمرت  
شهرين.. وصلنا لعلبة مطابقة تماما للحقيقة..

وبدأنا الإنتاج.. ضرار اقنع صاحب المصنع اني انا صاحب معمل  
سكاكر وطبع لنا ٣٠٠٠ عبوة.. وتعبوا فعلا بشراب سكري ابيض.. وعبد  
الجبار رشى عمال المطبعة و طبعنا البكيتات في الليل من ورا ظهر  
السكرجي. وراحت البضاعة عالمخزن!

الشحنة الاولى باعها حاتم لتاجر دوا في السوق السوداء ب ١٨ الف دينار  
على أنها اوجمتتين أصلي! كان كنز بالنسبة إلنا! بس انا رفضت نتصرف  
بالمبلغ! كان لازم نستعمله استثمار.. وافقوا على مضمض..، كوني مدير  
المشروع..

عملنا شحنة ثانية وثالثة ورابعة.. وبدت الفلوس تنهمر كالطر!  
استأجرنا مخزن كبير في الحزام وجبنا مكينة طباعة إلنا.. عشان نطبع ليل  
نهار.. واشتغل عليها عبد الجبار! وجبنا مكائن تعبئة و تغليف.. شغل

علاصول.. واشترينا المعمل اللي بشتغل فيه ضرار! وباص للتوزيع.. وكل شي صار عنا.. الكل ترك شغله و صرنا بس في هذا المشروع..

ومع التدفق النقدي الهائل، قررنا نخدم الشعب الأردني العظيم بزيادة، وتوسعنا، صرنا نطبع دوا و برسيل و شاي و سيريلاك و كل شي بنقدر نزوره.. عبد الجبار مسك الطباعة، و ضرار التصنيع و حاتم التسويق و أنا الإدارة..

الناس حبوا المنتجات، وصرنا مليونيرات في اقل من ستين.. صار عندي مرسيدس وكالة.. وجوزت قيس لبنت ابو لحية الدمهوري في عرس إسلامي.. واشترت لجوز اختي محل اواعي يشتغل فيه بدل ما هو شغال في المرة، و حججت أبوي و أمي و قلت له يدعي على بشار في الحرم....

وصرت اقضي عطلة في شرم و عطلة في دبي.. وأشرب من كاسات العصير اللي عليها مظلة صغيرة.. والأوكرانية اللي ما بتعجبك في ٢٠ بدالها.. وشقق وأراضي وأسهم و ذهب.. اشتريت شقة في الخامس عملتها عش غرام! بس الي، و حطيت فيها أفخم فرش و شغالة فلبينية مزة خزة.. وأخرجت هارون الرشيد المخبي والمكبوت جواي.. وكله بالمى والسكر.. وكله بما يرضي الله..

طبعا كنا على وشك نمنسك اكثر من مرة.. بس الرشاوى عملت كل شي،، وصرت شخصية مهمة، وأقعد مع ناس مهمين.. والحياة كانت جداً سعيدة.. وكنت بديت أبني فيلا ورا وزارة الخارجية مع حديقة ومسبح.. وبدي اتزوج بنت من طبقة عالية.. وأصير رجل أعمال محترم..

فتحت شركة مقاولات و مطعمين.. وشركائي فتحوا مصالح ثانية.. كان لازم يكون في غطا قانوني للفلوس.. والحياة كانت أجمل ما يكون..

لغاية ما في يوم.. قرر حاتم يوخذ خطوة مجنونة!! كنت انا وضرار في الصين، رايجين نجيب مكينة بتصنع علب دوا الربو.. advair.. ونستكشف نساء المشرق عن قرب.. كان هذا خط انتاجنا الجديد.. واللي لازم يضاعف أرباحنا..

رجعنا من الصين لقينا السيد حاتم خاطب بنت خالته دي ماريا! وكاتب كتابه عليها. وقامت القيامة.. واختلف هو و ضرار عالموضوع ووصلت للضرب.. حاولنا انا و عبد الجبار نهدي الموضوع بس عالفاضي.. صارت قطيعة..

انا الموضوع ما كان يهمني.. كان يهمني الشغل ما يخرب.. كلها بنت.. بس ما كنت حكيم كفاية استوعب غضب ضرار.. قلت آخرهم يتصالحوا.. غاب ضرار أسبوعين. تركته قلت بهدا.. ورجع بعدها وهو هادي فعلا.. فكرته نسي الموضوع.. بس طلع عامل عملته السودا في لحظة انتقام انتحاري مجنون...

ثاني يوم كبست علينا الحكومة.. واحنا بنطبع اول شحنة ادفير.. كانوا اكثر من إنا نقدر نرشيهم.. دخلوا علينا مثل الضباع، أنا ولعت سيجارة وقعدت أتفرج بكل هدوء وهم بصادروا بأحلامي..

توقفنا في الجريدة، والقضية صارت قضية راي عام.. وانطبلت فيها كل المواقع الاخبارية.. وكل اللي بعرفوني وياما رشيتهم، انسحبوا.. وترقى مدير رقابة الغذاء والدواء.. وطالب الناس باعدامنا لأنا عملنا لهم سرطان بالملي والسكر.. امي انجلطت وماتت، وقيس تبرا مني.. وابوي قاعد عالجزيرة mute. بسب على بشار والسيسي وعلي،، وجوز اختي الكلب طلق البنت، قال أخوها حرامي..

اعترف ضرار بعدين انه نادم و طلب نسامحه.. بس كانت ولات حين مندم... حاول اكثر من محامي بس التهمة كانت لابسيتنا لابسيتنا..

بعد ٨ جلسات.. أخذنا كل واحد ١٥ سنة.. الا عبد الجبار ١٠.. يمكن شفق عليه القاضي عشان أعرج..

تصادرت كل أموالنا.. ودي ماريا خلعتة لحاتم بعد ٣ شهور من الحكم.. ضرار صابه زي مرض نفسي ونقلوه من عنا.. وعبد الجبار صار دائماً قاعد في السجن لحاله، وبلعب شطرنج ضد حاله... وحاتم كل ما يشوفني وأشوفه بنتقاتل.. فاعتزلنا بعض.. وبعدها صار شيخ و يصلي.. وصار ابو لحية الدمهوري..

وانا زي ما أنا.. والأيام بتشبه بعض، زي ما الخنزير يشبه الخنزير.. بصحى الصبح في السجن.. بشرب كاسة شاي، وبساهم في دوري كمواطن اردني في دعم شبكة الصرف الصحي.. وبدخن سيجارتين دعماً للصهاينة.. تمت..

## متغربين احنا..

في كثير أشياء بالدنيا.. ما بتعرف كم هي جميلة و حميمة إلا لما تفقدها...  
وما بتتخيل كم كنت محظوظ بوجودها الا لما تروح منك.. لما تترك هذا  
الفراغ في الروح اللي ولا شي بعبيه.. وشخصيا.. يمكن أجمل هاي الاشياء  
في حياتي كان عبد الرحيم..

انولدنا أنا و اياه في نفس الشهر.. وامي و امه جارات و صاحبات من  
زمان.. لعبنا سوا و تربينا سوا.. ودخلنا المدرسة سوا.. ومن صف أول  
للتوجيهي و احنا الاثنين على نفس الدرج.. حتى لما راهقنا حيننا نفس  
البت.. مها أكواسال.. هيك كان لقبها لأنها نحيفة.... وما حدا حكى  
للثاني.. ولما عرفنا.. سمعنا أغنية عبد الحليم "ضحكت تاني" .. وضحكنا  
سوا.. بس للأمانة، عاملته هو بشكل أفضل مني شوي.. لما أعطاها  
الرسالة.. ما رضيت توخدها.. ولما أعطيتها أنا الرسالة أخذتها.. ومشيت  
مشيت لوصلت الحاوية.. ورمتها فيها.. محافظة على البيئة اسم الله..

ومع كل التشابه في تفاصيل الحياة، الا انه شخصياتنا كانت مختلفة  
شوي. كنت متسرع وهو كان هادي.. أنا ما كنتش أحسبها بالمرّة، بس هو  
كان واعي ومحسب كل خطوة و يتطلع لقدام.. حتى لما كنا نلعب فطبول في  
الحارة. كنت أنا هجوم وهو دفاع.. وفي الصلاة، كنت أخلص قبله.. كان

دايما يطول شوي زيادة عني.. وحتى في الشطرنج و التريكس.. كان دايما  
يوخذ وقته في اللعب والتفكير.. وأنا لأ..

في التوجيهي جبت أكثر منه بعشر واحد بس.. ودخلنا البوليتكنك  
ندرس هندسة كهربيا.. وتخرجنا.. وعمل نفس السيرة الذاتية.. ما كنت  
تقدر تميزها الا من الصورة والاسم.. بس التفاصيل كلها نفس الشي.. نفس  
الدراسة، نفس الجامعة، نفس الكورسات و نفس التوفل حتى.. نفس  
السيرة الذاتية وبدون كذب أو مبالغة.. لأننا فعليا كنا شخصين ملتصقين..  
حتى لما بدأنا نقدم لوظائف كنا نشترى الجريدة و نرسل لنفس الفاكس..  
الحياة كانت رابطة أقدارنا سوا بطريقة غريبة.. لغاية اليوم المشؤوم..  
الاربعاء الأسود.. 20-7-2000

كنا متخرجين النا شهر و بندور على شغل.. وشركة الكهرباء الوطنية  
نزلت اعلان انه مطلوب عدد 20 مهندسين كهرباء حديثي التخرج.. رحنا  
عند أبو ياسين صاحب المكتبة.. وبعث عبد الرحيم الفاكس تبعه.. وبعثت  
أنا الفاكس تبعي.. وروحنا و احنا بنحلم نشتغل سوا...يوم السبت كنت  
عند عبد الرحيم.. والساعة 10 الصبح تماما.. رن تلفون عبد الرحيم ال  
talk about.. كانت شركة الكهرباء.. وطلبوه على مقابلة.. وفرحنا.. و لما  
سكر التلفون.. صرنا نتطلع على تلفوني.. متوقعين يرنوا علي.. زي ما بصير  
دايما.. ومرت 10 دقائق و نص ساعة و ساعة.. وما حدا رن.. روحت من  
عنده و انا بحكيه.. لما يرنوا بحكي معك عشان نروح سوا.. بس ما حدا  
رن.. وصرت أفكر.. ليش رنوا على عبد الرحيم وما رنوا علي؟؟ السيرة  
الذاتية نفس الشي يعني! فش شي مميز بيني وبينه! وصورتنا كبيرة و مختلفة..  
ما راح يغلط السكرتير و يفكرهم نفس السي في يعني.. ونمت وأنا بفكر..  
ليش السكرتير رن على عبد الرحيم و ما رن علي.. والموضوع ما كان حسد

لا سمح الله.. بقدر ما هو استغراب.. لأنه ما في فرق بيننا.. وانا كنت بدي  
أكون معه ونشتغل سوا..

ومع انه ظل موضوع السكرتير اللي ما حكي معي محيرني.. إلا إني قررت  
أمشي بحياتي، وصرت أقدم لوظائف يمين و يسار.. وناوي أقبل بأي شغل  
يجيني.. حتى لو الراتب قليل، المهم أبدأ حياتي العملية، وأكسب خبرة..  
وبدأت حياتي العملية مع أبو ربحي في مصنع شيبس الأبطال..

طبعاً أنا تعيّنت هناك كمهندس كهربا للماكينات.. لأنه كانوا دايبا  
يتعطلوا وأبو ربحي بدفع صيانة كثير.. فقرر يعين مهندس كهربا أوفر له..  
بس اللي صار اني في أول أسبوع زبّطت المكاين و صرت أظل قاعد.. وصار  
بس يمر و يشوفني قاعد يتضايق.. وأنا عارف انه متضايق، بس هاي طبيعة  
الأمور..

بعد أسبوع ما تحمّل، كانوا الشباب بحمّلوا نقلة كراتين عالشاحنة..  
فقال لي بودية مصطنعة، ساعدهم يا باش مهندس.. انت شباب و كلك  
حيل.. وعلى مضض قبلت.. وحملت الكراتين معهم.. بس كان قلبي  
مقبوض..

وعرفت ثاني يوم الصبح ليش قلبي كان مقبوض.. كان في تنظيف لماكينة  
الشيبس الصبح، و بكلّ ثقة طلب مني أنزل جوّها أنظفها مع العمّال..  
وكلمة مني على كلمة منه.. تطلقنا بدون مؤخر ولا نفقة.. وروحت من  
سحاب، وأنا بلعن ابو ربحي والشيبس والحكومة والبلد و السكرتير اللي ما  
حكي معي..

وبعد هاي التجربة الفاشلة، عملت عدة مقابلات بس عالفاضي.. ومع  
ضغظ البطالة ونظرات الناس، بدأت وأنا متردد، أقدم لشغل براّ البلد..



وطلع لي شغل فعلا.. وخلال شهرين بس، كنت على متن المخلوق العجيب  
بوينج 747.. وبتجه إلى أرض الحجاز...

بعد ما هديت من خوافة الإقلاع وارتباك الشخص المسافر في طائرة  
لأول مرة والبصبة على المضيفة.. قعدت أفكر في اللي عملته.. كان قرار  
صعب جداً اللي اتخذه أنا.. لكن ظروفه كانت أصعب... كان عندي إخوان  
صغار، وكوني أنا الكبير، كان لازم أساعد أبوي في مصاريف الحياة اللي  
بتزيد قاعدة وأبوي بطل ملحق.. في إخوان وأخوات بدهم أكل و لبس  
وشرب، وبعد شوي راح يدخلوا جامعة.. كانت الغربية مرّ علقم، بس الفقر  
ما كان كنافه هو الثاني..

ووصلت المطار وكانت شهر 8، وأنا بنزل من درج الطائرة تهيأ لي انه  
هاي سخونة محركات الطائرة.. وبس أبعد شوي بتحسّن الجو أكيد، بس  
طلع هذا هو الجو المحيط.. وأهلا بك في الخليج ولات حين مندم.

وداومت في مشروع للشركة في أطراف الرياض، وبدأت حياتي كمغرب  
عزاي من الجيل الثاني للمغتربين الأردنيين.. وبين مندي برياني كبسة، و  
كبسة برياني مندي، وبين جسم الهيئة وسواليف سواقين التكاسي مشيت  
الأيام..

طبعاً أيامها ما كان في فيس بوك ولا واتس اب ولا شي.. بس أشتاق  
لامي وأبوي أروح أكلمهم من البدالة.. وأسمع وما أشوف.. وأشم وما  
أذوق، وصارت الأشياء اللي كانت بديية في الوطن مشتهاة ومهمّة في  
الغربة..

كنت بشتاق لبيتنا، وحارتنا، وأهلي وأصحابي.. وحتى دكّانة أبو عيسى  
كنت أشتاق لها.. واشتقت لسريري ومخدّتي.. وقرابيننا.. حتى اللثيمين

منهم.. وصارت أكالات بسيطة مثل الحمّص والبقول والحاملة، والكنافة..  
تيجي على بالي وأشتهيها.. وشغلات ثانية ما بتلمس ولا بتنحس صارت  
أمانى.. الصوبّا وريجة الارض بعد المطر.. ومنظر طلاب المدارس في الزيّ  
والمرايل والبرد في ليالي الشتاء.. والثلج، حتى الباصات والكونترولية  
اشتقت لهم.. ومشتاق لعبد الرحيم كنت.. وأيامنا وضحكاتنا سوا..

ليالي الجمعة كانت هي ليالي الحزن العظيم بالنسبة الي.. أظل أفكّر  
وأسأل حالي.. يا ترى مستاهل الموضوع؟! مستاهل أكون هون أنا؟!  
مستاهلة الفلوس؟! وأظل أفكّر وأفكّر لأنام.. وفي الحلم أشوف السكرتير  
واقف جنب عبد الرحيم وبتطلع علي وضحك.. مع اني عمره ما شفته،  
بس كنت أعرف انه هو..

وصرت أحول لأهلي مبلغ محترم كل شهر.. وفرحهم بالمبلغ ينسيني  
همومي شوي.. وما بنكر اني مرات كنت أفكّر أترك وأرجع، إلا إني كنت  
كل مرّة أنزل إجازة.. ومن كثر الشكاوي من وضع البلد، أخاف وأرجع  
أسافر.. الوحيد اللي ما كان يشكي عبدالرحيم، يمكن عشان شخصيته  
هادية ويمكن عشان شغله.. وضعه كان منيح نوعا ما.. كان مشتري أرض  
بالتقسيط من النقابة، ويسدد فيها وعایش بقليله ومبسوط.. وأشوفه وأقول  
كان ممكن يا ترى أكون هيك؟ وأرجع ألعن السكرتير..

ومرّوا أربع سنوات عجاف، انفصلت فيهم عن الاردن تماما... صحيح  
قدرت أحسن وضع أهلي فيهم، وأعلّم أختي في الكلية، وأسدّ ديون متفرقة  
هون وهون.. وحوّشت مبلغ عشان أتزوج.. بس كنت غريب تماما عن  
البلد، وعن الناس، وعن أهلي، وعن الشخص اللي كتته أنا زمان.. كنت زي  
شجرة بتنمو، بس في بيئة غير بيئتها.. شجرة بتنمو على سطح المي، بدون  
جذور.. جذوري كلها اقتلعت.. وأسوأ شي كان، اني فقدت القدرة على

الحديث مع أي حد.. ما في مواضيع مشتركة.. بس تهليل ومجاملات وبقايا حب قديم.. وأهلي اللي هم أهلي، صرت أحس حالي غريب عنهم.. نظراتهم الي غير نظراتهم لبعض.. انه هذا هو أخونا، بس أخونا المغترب... وكان في دفء صح، بس غير.. انفصلت تماما عنهم، وهذا الشعور كان جداً جارح.. حتى لقاءاتي بعبد الرحيم، فقدت حميمتها وصدقها.. وسنة عن سنة، كان وقتها يقل، ويعتذر عنها لأبسط الأسباب..

وفي 2004 وعشان أهون هم الغربة على حالي، تزوّجت.. زواج تقليدي من بنت تقليدية وأنا أصلاً يعني تقليدي.. وفي نفس السنة تقاعد أبوي.. وأخوي دخل الجامعة.. وبدأت مشوار زواجي بياني حملت مسؤولية مصروف بيت أهلي كامل، والتعليم، ومصروف بيتي الجديد.. ومررت من جهتها ساهمت في الحمل، حملت بأول ولي للعهد..

طبعاً زوجتي الله يحرسها.. ما حبت تناقشني في المواضيع الماديّة أولها.. من جهة مش عارفة الطابق كلّ، ومن جهة لسه عرسان جداد، وبنستحي من بعض شوي يعني.. بس لما تقريبا خلصت السنة واحنا ما معنا شي، بدأت المناكفات.. انه انت ليش بتشتغل ما دام ما بتوفر؟ وشو المستقبل اللي بستنى ولادنا؟ وشو العرس الرخيص اللي عملته؟ ووين شهر العسل اللي وعدتني نطلعه؟ وبدأت معاتبات النساء التي لا تنتهي.. ودخلت نادي المتزوجين بأفضل صورة ممكنة..

وإمي الله يسامحها حرصت في أول إجازة الي كمتزوج، انها تطين عيشتي.. مرتك عملت ومرتك سوت.. ويا ريت سمعت كلامي وأخذت بنت خالتك، وانت تغيرت بعد الزواج.. وبذك تبيع أهلك.. وبطلت تحوّل زي زمان.. وأبوي من جهته.. أنا غلظت اللي تقاعدت.. أنا لازم ما تركت

إخوانك الك.. وبدي أرجع أشتغل عند الناس.. ومن هذا الحكي الي  
بحفر في الروح.. وبركز عقدة الذنب.. وصرت أنا الابن الضالّ..

والزواج الي كان لازم يريحني، ذبحني.. وصارت حياتي بين المطرقة  
والسندان.. بين زوجتي ومصاريف بيتي، وبين متطلبات أهلي.. وترتيب  
الأولويات صار أصعب من صعب.. ودخلت موال السلف والديون..  
وفوق كل هذا همّ الشغل والغربة والنكد في الشغل.. وأهرب من همومي  
للنوم، ويلحقني السكرتير، وهو يضحك..

ومشيت السنين، وأنا عايش شهر بشهر.. يا دوب ملحق اللقمة..  
بشتغل طول السنة والطايح رايح، وآخر السنة بنزل على عمّان حامل معي  
شوية دشاديش وعبايات وعلطور مقلّدة، وبرسيل أصلي، لأنه برسيل عمّان  
بنظفش.. وآخر الإجازة بكون مديون، وبرجع عالسعودية، وهكذا  
دواليك.. والصيت متغرب ومعه فلوس.. وحتى لو ما اشترت شي في  
الإجازة، كانت نظرات الناس كلها بتحمل نفس المعنى، هذا مدكّن..

وفي 2008 تخرج أخوي ودخل الي بعده.. ووصلت مع المرة  
مواصيلها.. خصوصا انه في كل إجازة، كان حدا من صحابنا المغتربين أو  
حتى الاهل والقرايب يشتري شقة.. واحنا بس نهني ونبارك.. وكلّ مرة  
وحدة من هالنسوان تورجيهها صور شقّتها يشتغل عندنا مسلسل "ما عنّا  
شقة".. وينتهي بوعود منّي، وتهديد منها، وتذكير بفضيلة الصبر..  
وبابتسامة السكرتير الساخرة..

طبعا مسلسل "ما عنّا شقة" كان يعرض يوميا في إجازة الصيف..  
والحلقة تنعاد مرتين وثلاث في اليوم..، كان لازم مشاكل أمني ومرتي.. وبما  
انه ما عنّا بيت.. كانت الإجازة موزعة بين بيت أهلي و بيت أهلها..

وطولت عند أهلها.. وما بداها نشوف الولاد، وجايبة كل الهدايا لأهلها،  
واحنا جايبة النا شراميح، وانت بدك تتخلى عنا.. وهي ما صحيت من النوم  
لقيتك مهندس.. وهلم جراً..

ومن جهة مرقى، أمك ما بتحبّني ولا بتحب ولادي، بتظل تزت لي  
حكى، وأهلك مستغلينك.. واحنا مش مجبورين نعلّم أخوك.. وأنا مش  
ماخدة راحتى في بيت أهلك، وهاي آخر سنة بنزل عندهم.. وأنا مش  
خدّامة، ونزلنا بشقّة مفروشة.. وفلان راتبه أقل منك و اشتري شقّة..  
وفلانة مش أحسن منى، ويا حسرة على جوز نصرّة..

وقررت عشان سلامتي العقلية، انى أشتري شقّة لو بدي أبيع معلاقى  
كلّه، مش كليتي بس.. وبعد مفاوضات ومناقشات عائلية وزوجية..  
توزعت المصاريف بينى وبين أخوي اللي تخرّج واشتغل.. ولأول مرة من  
عشر سنين، بتوفّر معى شي من راتبي..

وصرنا أنا وزوجتي نوفّر مبلغ كل شهر.. ونحط الريال فوق الريال،  
ونقتصد من هون ونوفر من هناك.. وأهلك بصرفوا كثير ومرتك هي  
المصرفية.. وبعد ثلاث سنوات من شدّ الحزام، وتحمل زعل الطرفين  
ومعاتباتهم، وطوش الواتساب الدائمة، واطلع من الجروب وارجع على  
الجروب، توفّر معى 30 ألف دينار كافيين كدفعة أولى..

سنتها لما نزلت عالصيف، كان عبد الرحيم فتح شركة مقاولات مع  
أخوانه.. وبدأوا بأول إسكان.. وعرض على أدفع اللي معى دفعة أولى  
وبكمل على سنتين.. كان الشقّة سعرها 50 ألف.. وعالمخططات منيحة،  
ومكانها مناسب.. بس لامي ما كان مناسب.. كان قريب على بيت حماي..  
بالمقابل، كان في ابن خالي فاتح شركة إسكان مع واحد صاحبه.. وبدأوا في

عمارة قريبة على بيت أهلي.. الشقة أصغر شوي، وتوزيع الغرف مش بزيادة، بس حقها 45 ألف.. وقامت حرب المائة عام..

زوجتي بدها هديك الشقة كونها أحسن، وإمّي بدها الشقة القريبة عليهم.. وصرت بين خيار أكون طرطور لإمّي أو أكون طرطور لمرتي.. وفي الحقيقة، أنا مش طرطور لحدّ.. بس قد ما بضغطوا على أعصابك بتبطل تفكّر بذاتك وانت شو بدك.. ويصير بس بدك تفزّع بينهم وتتفادى تهمة الطرطرة..

وبعد ما انجلى غبار المعركة، وبعد ما انجلط أبوي (جلطة كذبية) وأنا العاق كنت السبب، وبعد ما مرّتي طلبت أطلّقها.. أعطيت ابن خالي ال 30 ألف.. تحويشة عمري الحزين الضائع في الصحاري.. واتفقنا انه هاي دفعة أولى للشقة، وبكامل الفلوس الصيفية الجاي و بنسجلها.. وقلت أوّل على آخر، براضي مرّتي.. بس ما يزعلوا الأهل..

ورجعنا على ديار الاغتراب.. وكانت أهدأ سنة في زواجي.. مرّتي تجاوزت أزمة مكان الشقة وركّزت على فكرة وجودها أساسا، ونفسيتهها ارتاحت، وبلّشت تشتري أشياء صغيرة للشقة، طقم تيفال، صواني تقديم، مفارش طاوولات، سكريّة ومن الأشياء الصغيرة هاي اللي كل ست بتزين فيها مملكتها وبتورجيهما لصاحباتها في كل زيارة..

وأنا بدأت أحس انه أخيرا راح نطلع من الغربة بنتيجة.. صحيح إنّه عشر سنين غربة ما راحوا بلاش، وساعدت فيهم أهلي.. بس عشان توازني النفسي، كنت بدوّر على شي إلي و إسمي عليه، ويكون ملموس، يعني لو حطينا عليه فرشاية الدهان بتغير لونه! وكان هذا الشيء هو الشقة.. واكتشفت سنتها، انه أنا مفهوم الملكية الفردية عمره ما كان بحياتي.. يمكن

لأني جاي من عائلة فقيرة، بس فعلا عمره ما كان لي شي.. حتى نقوط  
التوجيهي والجامعة كنت أعطيهم لامي عشان مصروف البيت.. ما عمره  
كان لي شي.. ما عمره..

ومرّ عام الخير على خير، وكل شهر تقريبا أمني تبعت لنا صور البناية،  
وصور الشقة، لما خلصت عظم، ولما خلصت طوب، وهي بتبسط.. وكان  
لازم على الصيف تكون جاهزة، وندفع باقي الفلوس ونسجل.. ولأول مرة  
من سنين.. بطل السكرتير يزورني في أحلامي..

روّحنا الإجازة واحنا مبسوطين.. وطول ما احنا في طريق البرّ، والمرة  
مبسوطة وبتخطط شو تدهن غرفة الأولاد، وأي ثلاجة بدها تشتري،  
وصار بدها تحط حوض سمك في الصالون، وأنا بسوق ومبسوط.. وبتنظر  
وصولنا لعمّان على أحرّ من الجمر.. لكن لما وصلت بيت أهلي، كان في في  
عيونهم نظرة غريبة، ما خبّتها فرحتهم بانستقبالي.. وبعد ما نزلنا الشنط،  
والاحضان والقبلات والعشا.. قعدنا سوا.. شو في ياناس؟ شو في يا عالم؟  
وتبرّع الوالد بصوت متهدج يحكي لي المفاجأة المرّة.. طلع ابن خالي محبوس،  
وشريكه هارب، وكاينين ناصبين على ناس كثير، والبنك حجز على العمارة..

وكانت ليلة وكأنها ميتم.. الكلّ عنده حكي، بس الكلّ قاعد وساكت..  
وكلّ شوي بتطلع حوقلة أو استغفار أو تنهيدة وبرجع الصمت بسود.. ما  
في إلّا الصغار قاعدين بلعبوا و صوتهم طالع.. ومرتي ما تحمّلت.. صارت  
تضرب بالصغار، وتفش غلّها فيهم.. ولما إمي عاتبته.. قامت القيامة.. ابن  
أخوك ضيّع تعبنا! وأصلا شكله من أوّلها نصّاب! وهاي مشورتك انت!!  
وعلى الجهة المقابلة، شو قصدك ولي؟! إنت أصلا كنة نحس، ومن يوم ما  
خطبك ما شفنا الخير.. وصراخ ومشاكل انتهت بفصل القوّات وبياّته

أخذت مرتي تنام في بيت أهلها في نص الليل.. وقضت الليلة تبكي هي  
وصواني التيفال..

ثاني يوم، وبعد مشاورات مطوّلة مع الأهل، قررت أشكي على ابن خالي  
من باب حفظ الحقّ على الأقلّ.. صحيح الشقّة طارت، بس على الأقلّ  
الفلوس ما تروح مع الحمام البرّي..

ورحت أسهر عند نسايب عشان نصالح المرة.. وبعد شدّ وجذب و  
جذب وشدّ، حلفت بالعظيم ما ترجع لي على بيت، لا بيت أهلي ولا  
السعودية كلّها.. وأهلها وقفوا معها..

نزلت من عندهم بعد نص الليل وهموم الدنيا فوق راسي.. ويلى تعب  
عمري اللي راح، ويلى مرتي الحردانة، وأمّي اللي زعلانة عشان بدّي أشكي  
على ابن أخوها.. ونزلت من بيت حمّاي وناوي بس أروح أقعد في مكان  
لخالي أهدا.. أو بس أتمشى بالسيارة لخالي في هذا العالم الكئيب اللي متأمّر  
علي وعلى أحلامي البسيطة.. انه معقول بعد هذا العمر الضائع في الغربة ما  
أطلع بشي؟! لهالدرجة الوطن غالي و غني؟ ولا أنا اللي فقير ورخيص؟!  
وشو كان ممكن أعمل أكثر من اللي عملته؟! وين غلطت أنا؟ وين  
قصّرت؟! صار عمري بده يصير 40 ولسه لا أملك من حطام الدنيا إلّا  
سيارتي العجوز؟!.. وفي خضمّ هذا العتاب القاسي للنفس ومن عميان  
ضوّي نسيت وين صاففها أصلا.. بس بعد نصّ ساعة تدوير، طلع لا  
عميان ضوّ ولا همّ.. طلعت السيارة مسروقة.. بس الحمد لله مش كلها  
انسرت، المفتاح ظلّ معي..

اللي باقي من قصتي تاريخ.. شكيت على ابن خالي، وبلّغت عن السيّارة  
في نفس المخفر.. طبعاً شكاوى بلا أمل في استرداد الحقوق، إنّما إسمي



شكيت.. لكن ولأني مواطن كذاب ابن كذاب، ما صدق القانون انه سيّارتي  
انسرت، الحكومة قررت اني بعثتها قطع، أو هربتها للعراق، أو دفنتها في  
حديقة بيت أهلي.. وبحسب "القانون" كان لازم أدفع جمركها للسيارة..  
يعني الحرامي سرقها، وأنا جمركت له اياها..

وبعد شهر من الأسى والحزن، ومحاولات فاشلة مع الحكومة الرشيدة  
المؤمنة الداعمة للمواطنين، دفعت اللي كانوا ظالين معي للشقة كجمرك  
السيارة المسروقة.. وتركت مرتي وولادي عند أهلها.. ورجعت لحالي  
عالسعودية، ربّي كما خلقتني.. بدون شقة ولا سيارة ولا مرة ولا ولاد..  
سافرت زي ما سافرت أول مرة من 14 سنة.. بس المرّة هاي سافرت  
بباص..

وأنا في الباص، ما كان خوف من الإقلاع، ولا فيه مضيّفة أبصص  
عليها، فكان معي وقت أفكّر.. وفي نقطة ما على الطريق، وفي خضمّ التفكير  
المرهق، شيء ما أضاء في عقلي، وانفتحت نافذة الغيب، وعرفت السر اللي  
أزقني طول حياتي.. عرفت ليش السكرتير ما حكى معي زمان.. التفسير  
الأرجح اللي وصلت له، انه السكرتير لما وصل فاكس عبد الرحيم، كان  
حشران، وصل الفاكس، حطّه عالمكتب وراح عالحمّام.. ما لقي فاين  
هناك.. رجع على مكتبه يدوّر على فاين، ما لقي.. شاف السيرة الذاتية تبعتي  
بتطلع من جهاز الفاكس.. اتطلع حواليه، ولما تأكّد أنّه ما حدا شايفه،  
أخذها معه عالحمّام ومسح مؤخرته بشهاداتي ووجهي المبتسم..

ليش بتضحكوا؟! مش عاجبكم التفسير؟! شو تفسيركم طيّب؟ اذا في  
تفسير ثاني احكوه!!

تمت...

## سيمون دي بوفوار

"التنمية مش مصانع ولا مزارع ولا شركات قابضة ومعدلات نمو اقتصادي بتتطاير رذاذ على الجماهير.. التنمية حرية! حرية الفرد في معتقده وفكره وحقه في التعبير عن نفسه!! التنمية هي حرية الفرد في لباسه وعاداته بما لا يتعارض مع مشاعر مجتمعه!! هي حرية المرأة في نظرتها للعالم وطريقة تربيتها لأطفالها.. التنمية هي مكانة المرأة في مجتمع ذكوري يلبس التقاليد لبوس الدين!! الحرية هي لبنة البناء الأولى في أي وطن متحضر! وبعد ضمانها للناس من الممكن أن نبني فوقها أي لبنة حضارية أخرى!!.. لكن بدونها.. فنحن نسير إلى الهاوية.. بغض النظر عن كل الكذب الذي نعيشه ونسميه تنمية.."

عجبكم الخطاب؟ أنا كمان عجبني.. وهذا كان الخطاب اللي وقّعني بشرّ أعمال، وربط قدري بقدر حبيب قلبي وشرياني التاجي سند.. بس قبل ما أحكي عن سند، خليني أحكي لكم شوي عن حالي..

إسمي لين، ومضى من عمري يا إخوتي 24 رأسا هجريا وترتيبى الثانية من 4 بنات.. بابا تاجر كبير، وماما - الله يخليها - ربة بيت مترامي الغرف في إحدى ضواحي عمّان الراقية.. عنا حديقة كبيرة ومسبح، وعنا كمان على باب البيت هذا الشجر الملولو تبع الاغنياء..

والعلاقة بين بابا وماما والتناقض الجميل في شخصياتهم كان هو أساس حياتنا.. بابا شخص مكافح و بسيط، بدأ حياته من الصفر وأسس لنفسه تجارة رابحة.. لكن مع كل فلوسه، ظل محتفظ بأصوله ولهجته الفلاحية وطريقته البسيطة في الحياة ونظراته المتواضعة والواقعية للدنيا وروح الدعابة العالية اللي ورثنا إياها.. ماما من جهة ثانية ست مدنية من عائلة مرموقة وأصول تركية زي ما بتقول.. ساكنة في برج عاجي من يوم ما انولدت، ومع أخلاقها العالية وطيبة قلبها إلا إنها كثير بتهتم ببرستيج العائلة ومظهرنا قدام الناس والمجتمع.. وكل خلافاتها مع بابا على هذا الموضوع.. باختصار، أنا بنت العمدة سليمان غانم ونازك هانم السلحدار.. بس مبالغة أكثر لبابا..

خلصت توجيهي، وطلع لي صيدلة.. بس بما إنه أنا أكثر شي بكرهه في العالم الكيمياء.. خصوصا الكيمياء العضوية!! وأصلا هادا السؤال اللعين تبع "أذكري تركيبة ميشيل اثيل كبريتيد الفلفل بالفسفور المثلج" ضيع علي 12 علامة بالتوجيهي!! فرفضت أدرس صيدلة رفضا قاطعا..

وبعد مناكفات ماما، ومستوى العائلة وشو بدهم يقولوا الناس عنا، وشوفي بنات خالتو عفاف، وكل الشكاوى الطبقية هاي، بابا - الله يسعده - حسم الموضوع و قال "بنتي بتدرس شو ما بدها" .. ودرست إدارة أعمال.. وعشت حياة جامعية هادية وسعيدة...

ولأني ما كنت بأمن بعلاقات الجامعة.. قضيت فترة الجامعة وأنا بقرأ كتب وروايات.. خصوصا لكتاب أمريكا اللاتينية، ماركيز وماريو بارغاس يوسا، وغيرهم.. وتشكلت عندي ثقافة بتناهض كبت الحريات.. وبتشجع الفرح والجنون الواقعي في الحياة.. ولأني من عائلة ميسورة، فكانت أقصى

همومي اني أحصل رواية مفقودة أو أتسلى بمشاكل ماما مع الشغالة لما تعمل  
لنا فنجان قهوة الصبح في الحديقة ويكون بدون وش..

خلصت جامعة، وبمساعدة من بابا، اشتغلت مع هيئة تابعة للأمم  
المتحدة في عمان.. الهيئة هدفها المعلن نبيل، بس بعدين اكتشفت انها مختصة  
بخربطة الاقتصاد وزيادة الفقر، المهم، كان شغل مكثبي و سهل ودوامه  
قصير.. وسمح لي إنه بعد الدوام أكون ناشطة اجتماعية على تويتر وفيس  
بوك.. وأكتب عن الحريات وحقوق المرأة..

ولأن الحياة كانت طول عمرها لذيذة وحلوة معي، بعد شهرين ما  
اشتغلت، وذات يوم شتوي غائم رمادي جميل، عزمتمني صديقتي منى على  
حفل لشي اسمه انكتاب.. جمعة شبائية لناس "مثقفين" بناقشوا فيه كتب  
وبشربوا فيه قهوة.. وهناك شفت سند لأول مرة..

كان في نقاش حول الكتاب، وتفرّع منه نقاش حول الحرية والتنمية  
الاقتصادية وأيها أهم.. والخطاب اللي قرأته بالأول كان كلام سند، ورده  
على خصمه واللي علّقني فيه..

كبت من عائلة غنية ومتحررة نوعا ما، ومع الأخذ بالاعتبار شخصيتي  
اللي شكلتها قراءاتي، كان أهم شي بدي اياه في زوج المستقبل هو انه يكون  
مثقف ومتفتح ويؤمن بحرية المرأة، ما كنت بالمرّة بدور على حدا يخنقني..  
كنت طير حرّ و بدي أظل طير حرّ.. وتفاجأت انه في شاب بفكر هيك..  
حسّيته كثير بشبه بابا.. بواقعيته و صراحته وبساطته وتفهمه العميق لطبيعة  
المرأة.. وبالإضافة لفكره، كان أسمراني وطويل وبشبه تشي غيفارا.. ولبسه  
عصري وجميل و غمازات ما يبلوا.. وتعلّق قلبي فيه..

حكيت معه بعد النقاش، وتعرّفنا.. طلع مخلص اقتصاد، وبشتغل مع والده في العقارات والأراضي.. ووظفنا بعض عالفيس بوك.. وبدون تخطيط من حد، حيينا بعض ومشيت في دورة حياة العشق بكل سلاسة.. بركة، شرنقة، عشيقة، خطيبة، ومع أول نجيات أيلول، و برغم تحفظات ماما، وتحفظات بسيطة من أهل سند.. تم الزواج الميمون..

شهر العسل كان في تركيا، أظننا في البوسفور، تغدينا في التوب كابي، وتعشينا في تقسيم.. وكنا واحنا نتمشى على خليج القرن الذهبي نناقش السياسة والاقتصاد والحرب والحب وحتى أسماء ولادنا.. كان نفسي كثير أسمي سليمان، لأنني بحب النبي سليمان وبحب سليمان القانوني.. وسند تفهم الموضوع، و كان فعلا مثال الرجل اللي بدور عليه طول عمري.. مثقف متفتح وبحترمني وبقدرني.. وكان بهمني كثير كشخصية منفتحة، انه ما أشعر بأي قيود.. وأمارس حرية مسؤولية ضمن أطر... وسند كان فعلا سند في هاي الناحية.. وأكدّ لي انه راحتي و حرיתי و سعادتي فوق كل شيء..

ورجعنا من ضيافة سليمان القانوني لضيافة عمّي أبو مصطفى (أبوه لسند).. سكننا في شقة سند في عمارة أهله.. كانت شقة عالطابق الثالث، حوالينا إخوانه والطابق الأرضي بيت حماي.. ودخلت عالم سند الحقيقي..

طبعا اكتشفت بعد ما رجعت، انه المجتمع بعد الزواج بصير يراقب فيه.. بده يتظمن على نجاح هذا الزواج بمعايره هو، وكأنه هو المسؤول عنه.. بدهم يتأكدوا من فحولة الرجل وخصوبة المرأة.. طبعا أول شغلة ما فيهم يتأكدوا منها.. بس الثانية براقبوها.. ومن أول شهر كانت النظرات الغريبة تلاحقني.. وبدأت بعدها الأسئلة اللي أولها ما فهمتها.. "ما حوشتوا شي يا عمّتي؟" .. "عمّتو، سند شغله منيح.. وبصراحة ما بتدخل بالأموار المادية" ..

كان في اثنين من اخوانه متزوجين، وخلفتهم كانت بنات.. ومع انه كنا متفقين أنا وسند إنه أول سنة ما أحمل، عشان نبسط سوا.. إلا إنه بعد مرور شهر تقريبا.. أصر إنه أحمل.. وانه متفهمني بس بتمنى يكون هو صاحب أول حفيد.. وقبلت هذا التغيير لأسباب خارجية على مريض..

وحملت بسرعة، ولأنه ولا سلفة قبلي جابت ولد.. كانت التوقعات مني عالية.. وكان كرشي محور اهتمام ومراقبة الجميع.. كلهم في انتظار ولي العهد الأول.. وجاء السونار المبارك في الشهر الرابع ليتوجني كابتن فريق السلفات.. واحتفالا بالشاهزاده القادم.. عملت حماي عزومة كبيرة للجميع.. وتصدرنا أنا وسند القعدة وسط نظرات الغبطة والحسد والتوقعات الملهوفة..

وانا باكل، ولا حماي بتحكي "نذر علي يا أبو لظفي بس يجي الصبي على خير، إلا أذبح عجل لوجه الله!".. طبعا انا تطلعت حوالي عشان أعرف مين أبو لظفي اللي بتحكي معه حماي، ولا جوزي بكل ثقة برد.. "الله يسلمك يما".. وعلقت سفينة الجاج اللي كنت باكلها بحلقي.. وزورث وصرت بدي أموت.. ولحقوني لحوق بالمى... ومسكت حالي لرجعنا عالشقة.. حبيبي مين لظفي؟!؟ ومين أبو لظفي؟!؟ انا أم لظفي!!؟؟ وبكل برود أعصاب وظهره الي رد علي.. "إمّي حابة تسمّي الولد باسم أبوي.. وأنا وافقت" وكانت أكبر صدمة في حياتي!! وقلت له "سند.. متذكر الخطاب؟! هذا ابني.. ملكيتي.. أنا وإنتم بنسميه..؟! شو تغير؟ مش اتفقنا على سليمان!!؟ مين لظفي؟!؟" وبعصية ونفاذ صبر حكى... "بلا خطاب بلا بطيخ.. هاي الأمور ما فيها نقاش.. ويمكن أنا وافقتك على أشياء زمان.. لكن يتغير الرأي بتغير الحال".. وراح..

ماما بس عرفت، غيّبت.. بابا ابتسم وما علّق.. وصار اسمي في موبايلات خواتي "أم لطفي تضيوي و تظفي" .. أنا اللي كان مموتني.. مش الاسم بحد ذاته.. مع انه بلوة مصبّرة، بس انه يعني أبسط حقوق الست انها تسمي ابنها.. اللي بتحمل فيه.. الطفل مش ملكية حدا غير إمّه.. ويمكن أبوه.. بس مش ملكية جدّه و جدّته!! وكيف تغيّر سند!! و ليش؟!

ورجعت أتناقش معه مرة ثانية.. وثالثة ورابعة.. طيب.. فكّر شو راح يحكوا له الاولاد في المدرسة؟! ما راح أسمح حدا يتمسخر على إبنّي!!! طيب حبيبي نستخير؟!؟ يعني أنا أحمله وأتعب فيه 9 شهور وأرّيبه عمر!! وغيري يسمّيه؟! ما حزرتوا!! طيب حبيبي نعمل قرعة؟! يعني شو دخلها إمك تسمي ابني أنا؟! مش هي سمّت ولادها؟!؟ شو بدها بولادي?!!!!! طيب نسّميه محمد لطفي؟! وبدون فائدة..

لا الترغيب فاد، ولا التهديد فاد.. ولما يثست مرحلياً إني أقنعه.. قررت ألجأ لحلّول ثانية.. شو رأي الدين؟! طلعت الفتاوى انه الأب له حق التسمية.. ما اقتنعت ومسكت القرآن أفتش فيه..، طلع رب العالمين هو اللي سمّي النبي يحيى.. ما زبطت معي هاي.. دوّرت في السنّة لقيت انه الرسول (ص) سمّي الحسن والحسين.. وناقشت سند.. وعالفاضي.. قال أبو طالب كان ميت.. لو عايش كان سمّي هو.. وصرت أنا بدّي أبوه يموت..

والموضوع مع انه ضحكني أولها.. خصوصاً اسم لطفي.. انه شو بدّي أدلّعه.. لظوف؟ لظوط؟؟ فظوط؟؟ فظبل؟! يا لطيف الألفاف نجّنا مما نخاف!! بس إنه مع مرور أيام الحمل صار كابوس حقيقي!! الولد راح يجي.. وراح أصير أم لطفي!! وقررت ألجأ لبابا.. بس بابا قال انه ما بدّه يتدخل بين الست وزوجها.. وماما كالعادة سمّعتني كلمتين على سوء

اختياري.. ومن يأسى الشديد قرّرت أجباً لصاحبة القرار وغريمتي..  
حاتي.. قلت هي الوحيدة اللي ممكن تعيّر شي..

زبّطت حالي، ومسكت أعصابي.. وتدرّبت عالكلام، وبكل جهل  
مصطنع وحبّ مصطنع بدأت معها الحوار.. بيني وبينك يا عمّتو، سند بدّه  
يسمّي الولد على اسم عمّو.. إنّه عمّو أبو مصطفى في قلوبنا.. واسمه كثير  
حلو، بس انت عارفة شقاوة الأولاد الأيام هاي.. وممكن ممكن ممكن يعني،  
يسخروا من الولد، وهاد مش منيح لصحّته النفسية.. ومن كل هذا الكلام  
المنمّق.. والعجوز ساكتة وبتتطلع علي بس.. ولما خلّصت.. ابتسمت  
ابتسامة زرقاء وقالت بهدوء.. "ما يهّمك حبيتي، ما بصير إلا كلّ خير"..  
وظلعت على غرفتي وأنا عندي شويّة أمل..

كنت في السابع وقتها.. وبس رجع سند من الشغل، فتح باب البيت  
وهو يصرخ ويسب ويلعن وينادي علي.. وعرفت شو عملت العجوز..  
وظلعت أنا مزعّلة إمّه و مستعرة من اسم أبوه.. وكلامي مرّض عمي أبو  
مصطفى.... وبعد الكلام القاسي والجراح اللي عمري ما توقّعتة ولا  
سمعتة.. حكى لي سند بصريح العبارة.. هذا اللي عندي، و اللي مش عاجبه  
الله معه.. وتركني ونزل...

طلع كل شي قرأته أو سمعته عن حرّية المرأة كذب.. حتّى اللي أنا كتبتة  
لما كنت ناشطة، كذب.. تنظير بس.. حتّى خطاب سند كان تنظير.. في  
مجتمعنا المرأة ما إلهها حقوق.. والزواج هذا سفينة.. وانت كزوجة لو  
اعترضت على شي هو حقّ أساسي الك.. أسهل شي انك تنرمي من هاي  
السفينة.. أو بتقعدي ساكتة..



وكرهت سند وإمه وأبوه وابني والزواج والسفينة كلها.. بس ما قدرت  
أخذ قرار أطلع منها زي ما ماما بدها، أو زي سيمون دي بوفوار بدها..  
واقعتي اللي علّمني إيّاها بابا، وحبّي لسند منعوني.. وقرّرت أظل في  
السفينة.. حتّى لو في الطابق السفلي..

ومشي الحمل، وما ظل لي إلّا ربّي ينجّيني من اسم لطفي، ومع إنّه  
السونار خزق عيوني، إلّا إني وصلت التاسع وأنا أدعي دعاء اليائس إيّاها  
تطلع بنت.. ولو سمّوها على إسم حماي ماشي.. إيّان أحسن من لطفي..  
مقبول شوي..

واجت لحظة الولادة كأتمّها لحظة الموت.. وربّ العالمين اللي بسمع نداء  
المظلومين استجاب.. وكان كلام الممرضة ماء غمام بارد على قلبي..  
"مبروك.. اجتك أحلى عروس" .. ونمت بدون حتى ما أشوف البنت..  
نمت نوم محارب بحارب إله أشهر.. وبس وصل لحفّة الهزيمة، فجأة  
انتصر..

مبارح كمّلت لطفية حبيتي سنة.. وأخذتها تتطعم.. وكثير بكيت حبيبة  
قلبي.. بدي أخذها بكره عند ماما تلعب هناك.. ومنه بشرب لي فنجان قهوة  
بلاوش.. وبسمع عتاب ماما وشماتها الطبقية شوي..  
وسيري يا سفينة الحياة.. سيري..

تمّت..

ملاحظات:-

- سيمون دي بوفوار هي ناشطة اجتماعية وكاتبة فرنسية  
راحلة.. كتبت كثيرا عن اضطهاد المرأة..

- شكر خاص لصاحبة مصطلح كبريتيد الفلفل بالفسفور  
المثلج..

- أنا دائماً ما كنت ضد السخرية من الناس وأسمائهم.. وأحاول  
أن لا أعبّر الخط الفاصل بين الكوميديا السوداء والسخرية من  
الناس.. لكن جزئية اختيار الأهل لاسم لطفي مبني على قصة  
حقيقية.. لذلك لا يقصد أي إساءة لحاملي اسم لطفي أو لطفية..  
وأعتذر لأي شخص قد تسبب له القصة أدنى حرج.. وأطلب منه أو منها  
السماح..

## لنشر الرمال ذهباً..

كل واحد فينا عنده ناس عالفيس بوك ما بطيقهم.. ووجودهم ويوستاتهم المستفزة خطر عالجهاز العصبي.. ومع هيك انت مجبر تخليهم عندك وما تشطبهم.. منهم خالتك اللي بتنزل صورة الجراة اللي ساجدة في الحرم وبتزعل إذا ما عملت لها لايك.. ومنهم صاحبك أيام الجامعة، المكيودة اللي ضافتك بس عشان تعرف أخبارك وتقارن بين أوضاعكم وتشوف مين أحسن.. ومنهم ابن عمك الداعشي باقية وتمدد.. ومنهم مرة خالك ظهير أيسر كاندي كراش اللي كل يوم لازم تطلب 20 روح.. ومنهم صاحبك أبو جمعة مباركة اللي بغتالك بالتاغات..

لكن في شخص أخطر من كل هؤلاء وإن مش منتبه له.. هذا هو الصديق المتفائل اللي يحاول يغيرك ويغير واقعك للأفضل زي ما هو معتقد.. ويحط لك بوستات من قبيل "شوف وين كان ستيف جوبز ووين صار" "أنت تستطيع" "لا بد من المخاطرة لتحقيق أحلامك".. هذا هو اللي لازم تحظره فوراً.. وأنا بحكي لك ليش، بس خلينا نرجع الشريط لورى شوي..

في ال 94.. خلصت توجيهي.. ودخلت هندسة مدنية.. مش لإني بحبها أو هي خيارى.. لكن لأنه الحكومة اجتمعت وقررت انه الطلاب

اللي جايبين من كذا لكذا في التوجيهي.. هم أصحاب الميول الهندسية  
وبتأين المستقبل.. وتقبلت قرار الحكومة بصدر رحب..

ومع إتها ما كانت اختياري، إلا إني حبيت الهندسة.. وبدأت أدرس  
موادها بعمق.. استمتعت بقوانين الاتزان وخصائص المواد.. والتحليل  
الإنشائي والتصميم الخرساني..

لكن اللي ما استوعبته.. هو ليش يتم الفصل بين الهندسة المعمارية  
والمدينة!! هذي الجسد وهذي الروح.. كانوا توأمين بالنسبة إلي..

ومن باب الفضول، بدأت في أوقات الفراغ أحضر محاضرات في كلية  
الهندسة المعمارية.. وشجعني على الموضوع انه كليتهم كانت أطرى شوي  
من كليتنا.. وأكثر اخضارا وانحناءً وياسميناً..

تخرجت كمهندس عادي.. لا نابغة ولا شي.. كلية الهندسة المدنية  
أعطتني الشهادة والتحليل والتصميم والعلم الصلب الجامد، وشلة من  
الأصدقاء الخناشير خشني الصوت والملبس والملامح واللحية وكل شي..  
بينما كلية الهندسة المعمارية أعطتني الفن الجميل والتخيل الابداعي الانساني  
و صاحبتي ناعمات كالرخام رقيقتين كياسمين الشام..

ودخلت سوق العمل.. طبعا سوق العمل هون كلمة فضفاضة  
وكاذبة.. لأنه انت بس تسمع كلمة سوق، يهياً لك انك داخل تشتري  
كالعادة يعني... لكن في هذا السوق الافتراضي اللعين، انت مش زبون..  
انت بضاعة.. وأصحاب شركات المقاولات الأوغاد هم الزبائن اللي  
بفحصوك من فوق لتحت، وبحسسوا عليك زي ما بحسسوا على بطيخة..  
وبقلبوك يمين ويسار وفوق وتحت.. وإذا.. فقط إذا.. عجبته.. يبدأ

يفاوض فيك على المبلغ الشهري اللي بده يعطيك إياه عشان يجرت عليك شهر شمسي كامل..

وقلت معلش يا ولد.. والحياة كفاح وإنّ بدأت كفاحك.. وبدك تنسى سكوير ال C وتنسى سكوير المعماري.. وجلسات القهوة والقمح.. ومرايا يديك وكحل عيونك والقصص هاي كلّها، الحياة صعبة.. بس إنت قدّها..

طبعا وقتها، بعض زملائي طلّعوا بره البلد.. انه شو بدك في الوطن العربي.. وتعال معنا كندا أو أستراليا.. بس أنا رفضت.. وقلت إنه درهم الوطن ولا دينار الغربة.. وخليني في بلدي أحسن.. والناس ببالغوا شوي في تقدير سوء البلد وظليت..

وعلّقت ال سي ثي على ظهري.. وصرت كل يوم الصبح أبعت فاكسات.. وأزور مشاريع قيد الإنشاء أدور على شغل.. وطبعا أضعف واحد في العالم، هو المهندس المدني الباحث عن عمل.. لأنه لما يدخل موقع البناء، ما يكون عارف مين هو مين في الشركة.. فمممكن ببساطة المراسل يتمقطع فيك.. أو واحد فورمان يسوق عليك انه مدير المشروع.. وحتى المهندسين القدامى بكونوا شايفينك صعلوك بدون خبرة.. وفش منك فائدة..

بدون طول سيرة، بعد 4 شهور من البحث المضي وانحناءً لواقع الحياة وبحثاً عن الشيء السحري اللي اسمه خبرة.. اشتغلت تحت مسمى مراقب عمال في مشروع عند الدوّار الثامن، وبمرتب وقدره 125 دينار أردني أخضر فقط لا غير..

وعشت حياة المهندس المدني في شركة المقاولات.. طبعاً كمهندس حديث التخرّج، كل واحد في الورشة بعرف أكثر منك، حتى حمدي المصري اللي بعمل الشاي والقهوة بيجي بدّه يعلم عليك ويعلمك كيف القسارة والبلاط والدهان.. والدوام بدايته محددة.. لازم تلتزم فيها.. بس نهايته مفتوحة.. والراتب الهزيل مثل المطر.. ما بتعرف ايما تنزل..

ومع كل هاي المثبطات، إلّا إنه إرادتي كانت أقوى من كل شيء.. وأكملت 10 سنوات كاملة متنقلاً بين المشاريع وشركات المقاولات المحلية،.. نضجت جداً كمهندس.. وراتبي نضج شوي معي.. لكن عمري ما ارتحت في شركة مقاولات.. شو ما كانت الشركة منيحة أو صاحبها منيح.. (أو خليني أكون دقيق..، فش شركة منيحة، بس أقل سوءاً من الأخريات).. المهم، شو ما كانت منيحة، إلّا لما تيجي تركهم يكون الطلاق مؤلم.. وتروح عليك حقوق، وتطلع انت ما عملت لهم شيء.. وهكذا دوالك..

لغاية ما الحلّيم الكريم ذي العرش العظيم.. وفّقني واشتغلت مع شركة انجليزية ماخدين مشروع مستشفى.. وبدأت وقتها أعرف شو يعني شغل.. الدوام محددة بدايته و نهايته.. الراتب معروف متى تنزل.. التعامل راقى وهادي.. الشغل بمشي بدون صراخ وبدون هستيريا.. كل شيء محسوب حسابه.. فش أسافين ولا أزاميل ولا قنابل موقوتة.. فش عيون للمدير.. ما حدا بسرق شغل حدا.. ولا في محاسب بعامل الموظفين كأنه بعطيهم من جيبه أبوه.. في إدارة.. في حقوق.. في كل شيء.. عالم غريب تماماً ضمن عالمنا الأعوج..

وكانوا سنتين من أجل ما يكون.. وحوشت فيهم عن عمري السابق  
كله.. بس شاء المولى ورجعوا الإنجليز على بلدهم.. ووقتها كنت حالف ما  
أرجع موظف عند العرب.. فكان لازم أعمل شي جديد.. وهون اجا دور  
صديقي تبع الفيس بوك اللي حكيت لكم عنه بالأول.. تبع ستيث جوبز..

بعد حوار بسيط على بوست نزله عن واحد بفتح بزنس بسيط و بصير  
اشي كبير.. قعدت معه.. وبعد حوار مطوّل.. أقنعني أفتح مصلحة  
شخصية.. ومع إيماني العميق المدعم بتجارب الآخرين بانعدام أدنى معايير  
نجاح المشاريع في بلدنا.. إلا إنه أقنعني أنني أستطيع.. وممكن أغير وممكن  
أنجح.. وي طرح لي أمثلة عن ناجحين ورواد من الغرب آمنوا بنفسهم  
ونجحوا.. ولو طرحت فكر جديد في المقاولات راح أكون شخص رائد  
وناجح.. ونثر الرمال ذهباً..

ورجعت لي ذكريات أيام الجامعة.. اللي كانت السنين العجاف تبعة  
الشغل نستني إياها.. رجعت لي نظرياتي الخاصة بدمج الهندسة المعمارية  
بالمدينة.. ونظريات فرانك لويد رايت..

ومع إنّي طول عمري مقتنع بكوني موظف، إلا إنّ الحماسة كانت عالية..  
وبدون تردد.. قرّرت أكون مختلف ورائد في مجالي... فتحت مكتب،  
وظلّعت رخصة مقاولات.. وقرّرت أنخصص ببناء الثلل.. وكان طابع  
الشركة هو الهندسة العضوية.. وهي الهندسة اللي بتآمن إنه البيت كائن  
حيّ.. ويجب تصميمه وتنفيذه تبعاً لشخصية صاحبه وبيئته المحيطة.. وإنّه  
البيت شخصية فريدة.. الخ..

وعملت ويب سايت.. وطبعت مشورات.. وجهزت المكتب بطريقة  
عصرية.. وبدأت رحلة البحث عن مشاريع.. واكتشفت بعد فترة.. إنه كل  
مشاريع القلل في البلد هي بايدين الاستشاريين.. وعشان تحصل أي  
مشروع منهم.. بدك تدفع من تحت الطاولة..

أنا ما عمري كنت شيخ ولا راح أصير.. بس بخاف من ربّي وما بدفع  
رشاوي.. فرفضت.. لكن مع طول البحث غير المجدي عن أي مشروع  
نظيف فوق الطاولة.. وانقضاء أشهر بدون أي مردود.. كان لازم أغير  
توجهي.. ما قدرت أغير السوق..

وبدأت آخذ مقاولات من الباطن من شركات المقاولات الكبيرة.. وهذا  
أشبه بإنك توكل من ورا حدا.. الريح الكبير اهم.. وإلك العظم.. بس مع  
هيك استمرّيت.. وبدأت أشتغل.. وبلا هندسة عضوية بلا هم..

وبدأت آخذ مشاريع صغيرة من الباطن.. بس مشكلتي الأكبر كانت  
الدفعات.. بتوقع عقود رسمية.. وبشتغل نظامي.. وبس يجي وقت  
الدفع.. الكل بأجلك.. وبدأت أعاني.. ورأس مالي يعاني كمان.. وأهل بيتي  
يعانوا.. والحياة الرتيبة اللي كنت عايشها أيام ما كنت موظف اختفت..

وبدأت أفاعي صفراء في صدري تحكي لي انه ممكن اللي عملته أنا غلط..  
ممكن لازم ظليت موظف.. بس كنت أعتبرها مجرد أفاعي صفراء.. وبدأت  
ولازم أكمل وأنجح.. وآخرتي أوصل حلمي..

وبعد عدة تجارب سيئة مع مقاولين.. ودفعات متأخرة.. شاء القدر  
اللذيذ، ألتقي بأبو البراء.. صاحب شركة الإحسان للمقاولات.. رجل



فاضل.. النور طالع من وجهه.. يندر تشوف مثله في هذا السوق المليئة  
بالضباع..

وبعد ما حكينا سوا عن أزمة الدفعات في البلد.. وسوء أخلاق  
المقاولين.. وأعط الأجير أجره قبل أن يجف عرقه.. عرض علي أبو البراء  
مشروع العمر.. 4 ثل هو ماخذهم وأنفذهم أنا من الباطن.. وأعطاني سعر  
مرتاح فعلا..

وحسيت إنه ربنا راح يوفقني أخيرا.. وما يشمت في الناس اللي قالوا لي  
انت مش قد السوق.. خليك موظف أحسن..

وبدأنا العمل.. والدفعات كانت فعلا في موعدها.. وأنا بذلت قمة  
جهدي في المشروع.. وتوازنت أموري.. وأبو البراء كان غاية في الروعة..  
كنت بس أزوره في المكتب.. يقوم يصلي فينا العصر.. من الإيمان والتقوى  
أكون بدّي أصلي العصر مرتين وثلاث معه..

وقربنا نخلص المشروع.. وسافر أبو البراء عالسعودية.. كان بده يعتمر،  
ويبدأ مشروع هناك.. واستأمني أخلص المشروع بوقته..

وحطيت في المشروع كل وقتي وجهدي.. ودفعت للناس مني..  
وأعطيتهم شيكات مني، بس نخلص في الوقت.. وخلصناه فعلا.. بس معه  
كانت خالصة كل فلوسي.. وبستني دفعتي الختامية الدسمة..

والاستشاري استلم المشروع من هون.. واختفى أبو البراء من هون..  
في المكتب مش موجود.. وما برد عالتلفون.. ومرة مسافر.. مرة ما أخذ  
فلوسه.. مرة ابنه مريض.. والوقت بمرّ علي وأنا مفلس والناس بدهم مني  
فلوس..

وتدهورت أوضاعي بشكل متسارع.. بدأوا الناس يقدموا الشيكات ضدي.. وبيتي بدون مصروف.. وتحويشة عمري وأرباحي كلهم مع أبو البراء.. وتحت الضغط الهائل.. رفعت عليه قضية بضمان العقود.. والنظام القضائي طبعاً.. بطبعه حكيم ومتمهّل.. يتريث.. بس التريث ما كان في صالحه..

بعث ذهب مرتي.. وسيارتي.. وأثاث مكنتي.. خليت بس كرسي ومكتب ولا بتوب وطابعة.. بيتي بدون مصروف.. عمالي بدون رواتب.. مش دافع إيجار المكتب.. ولا دافع إيجار البيت ولا شي..

واكتأبت وقعدت في البيت أستنى النظام القضائي العظيم يجيب لي حقّي المثبت والواضح.. أو يجبسنني.. أيها أسرع.. وبدأت دائرة الديون والشيكات تضيق شوي شوي علي.. وأبو البراء اللي قبض حق المشروع.. بصليّ في الحرم.. والمحامي بحكي لي، إنه خلال سنة أو سنة ونص.. بنجيب الفلوس..

بهاي الأثناء كان في شركة فرنسية حاكيين معي على مشروع.. ومن يآسي سعّرتة بغالي.. وبعثت السعر.. لكن للمفاجأة حكوا معي.. رحت وقعدت مع المهندس العربي اللي عندهم، وطلع الشغل كبير.. وافق على سعري.. وعرض علي دفعة أولى كبيرة.. كانت بتنشلني من مصايبي بشكل كبير.. لكن في آخر الجلسة، وبعد ما رجع لي الأمل.. طلب نقعد بره نشرب قهوة قبل ما نوقع العقد.. وفهمت شو بدّه بس ما قدرت أحكي آه أو لأ.. طلبت مهلة أفكر..

ليلتها ما نمت.. كان أصعب قرار ممكن آخذه بحياتي.. كنت بموت فعليا.. وأحلامي بتنهار.. وبيتي بنهار.. وبينني وبين السجن أيام.. وبين وبين حقي عند أبو البراء شهور وسنين.. والأهم.. كان بيني وبين الإنقاذ، تلفون لهذا المهندس..

فكّرت بحالي وبمرتي وبأولادي وبأصحابي اللي في كندا.. وفقه الواقع والحلال والحرام.. ويا ترى ربنا شو رأيه.. وشو لازم أعمل.. وفكّرت كثير بالبلد.. وطلع علي الصبح وأنا بفكّر.. وعالساعة 8 الصبح.. كنت ماخذ القرار.. اتصلت فيه، وحددنا موعد في كوفي شوب..

أخذت دفتر شيكاتي.. ورحت عالموعد.. قعدنا و طلبنا قهوة.. وبعد شوية أحاديث جانبية هدفها كسر الجليد.. حكيت له بصوت واضح.. "مهندس.. أنا ما راح أدفع عالمشروع هذا ولا فلس.. هذا ضد مبادئي.. لكن هاي دفتر الشيكات.. لو محتاج.. ممكن أداينك" .. ابتسم ابتسامة المتفاجئ.. وحكى لي.. "توقعتك أذكى من هيك.. عموما، لا تغلب حالك.. في شركات كثير غيرك" .. وقام بدون ما يشرب قهوته..

لما قام وتركني، كان شعوري بالزبط زي واحد أعدم حاله.. أو أطلق الرصاص في فمه.. كان قلبي بدق بشكل كبير.. ودموعي في عيني.. بس كنت راضي وفخور بنفسي..

بعد اربع أيام.. حكوا معي شركته.. وطلبوا مني ثاني يوم الصبح.. أجبب الختم وأجي أوقع العقد وأستلم الدفعة الأولى وأباشر العمل.. وبكيت من فرحتي..

ثاني يوم الصبح كنت في مكتبي.. كانت الكهرباء قطعت فيه.. بس مش مهم.. كنت مبسوط جدًا.. وناوي من الدفعة الأولى أرجع كل شي زي ما كان.. أخذت الختم وأوراق الشركة و فتحت الباب عشان أطلع وأروح أوقع العقد وأستلم شيك الدفعة الأولى..

لما فتحت الباب لقيت شرطيين.. جاين يوخذوني لتنفيذ حكم قضائي.. وللصدفة، واحد فيهم كان يشبه أبو البراء وواحد يشبه صديقي اللي أقنعني أفتح شركة.. ابتسمت لهم بكل أسي.. ضحكت حتى.. ورحت معهم..

إلي يومين طالع من السجن.. لسه ما أحصيت الأضرار بشكل كامل.. ولا عارف شو راح أعمل.. بس أول شي لازم أعمله إنّي أروح عند صاحبي.. وبعد ما أنطّ في كرشه.. بدّي أفهمه، انك ممكن تجيب حكم الدنيا كلها و قصص نجاح الغرب كلها وتعمل لها كوبي بيست عالفيس بوك.. بس ما بتقدر تعمل كوبي بيست لا لبلادهم ولا لنظامهم ولا لمجتمعهم.. ما بتقدر..

تمت..

## بيرة وسمك

من حكمة ربنا ورحمته إنه دائماً بعرض لك مثال حي عن تجربة الزواج قبل ما تخوضها.. وأنا التجربة اللي شاهدتها وعشت فصولها كانت أسوأ من سيئة..

حاولت وأنا مراهق ألاقى أسباب ومبررات لسوء العلاقة بين أبوي وإمي.. وكنت أفترض إنه لو إمي سكنت هون، أو لو أبوي استوعبها هناك كان ممكن الأمور تنحل.. لكن كل افتراضاتي كانت عبث.. والنتيجة اللي وصلت لها بعد طول معاناة، إن الزواج نفسه هو الخطأ.. وأي محاولات لإصلاحه من الداخل هي محاولات محكوم عليها مسبقاً بالفشل..

عشان هيك كان هدفي السامي وشغلي الشاغل وأنا في الجامعة إني أطلع من بيت أهلي بأسرع ما يمكن.. وأعيش حياة العزوبية اللي بحلم فيها..

ما كنت بدّي أكرر تجربة أبوي في المعاناة من أجل توفير الطعام والوقت لأولاد هو اختار إنه يجيبهم.. وكان ممكن كثير يعيش حياته مرتاح بدونهم... ولا إرضاء زوجة ضحى بشبابه وحرّيته وروحه عشان يأمن متطلباتها.. وبنفس الوقت ما كنت بدّي أحول إنسانة لما كينة تفريخ وشغالة وغسّالة وطباخة مدى الدهر مثل إمي..

تخرّجت.. واشتغلت بشركة منيحة.. وبعد أشهر بسيطة.. بدأت أحضر  
للخطوة الأولى في مشوار حياتي المخطط مسبقا.. الخروج السريع من بيت  
أهلي وبدء حياة العزوبية الطويلة..

وفي غضون سنة، ومع استدانة بعض الفلوس، وجمعيات كنت مرتبها..  
كنت موفر الدفعة الأولى لشقة أحلامي.. الشقة اللي بحلم فيها حياة  
العزوبية.. شقة طابق ثالث، غرفتين وصالة كبيرة مع بلكونة شايقة بانوراما  
عمّان.. وموقعها بين السادس والخامس.. جنتي المفضلة في عمّان.. مقابل ال  
..HSBC

الشقة كانت قديمة شوي.. جددتها وقررت أفرشها وأزبّطها مثل ما أنا  
بدّي.. عملت أرضياتها خشب باركيه غامق يعطي انطباع القدم والعراقة..  
والجدران دهنتها بألوان مختلفة.. منها الأخضر البارد الكئيب.. ومنها  
الأزرق الفاتح ومنها الأحمر الشهواني.. وعملت لها باب خشب معتق..

أول ما تفتح الباب بتدخل عالصالون المضاء إضاءة خفيفة.. على يسارك  
بتلايك طاولة بلياردو.. قماشها أزرق.. وعليها من فوق ضواو نازلين في  
حواضن من القصدير القديم.. وجمبها في كرسيين عاليات.. بينهم رف  
رخامي عالي وفوقه صورة بالأبيض والأسود لجود لو وهو بلعب بلياردو..

لو تطلعت عاليمين بتشوف مطبخ مفتوح عالصالون.. بلاطه بني  
معتق.. في وسطه طاولة خشب خشب.. مبينة عروق الخشب فيها... لا  
مدهونة ولا مزوقة ولا عليه مفرش مستفز مخرّم مستفز غبي!!.. طاولة  
خشب!! وحواليها اربع كراسي خشب بسيطين.. ومعلّق على جدار المطبخ  
صورة كرتونية لبخار اله كرش كبير وماسك غليون..

وقدامك بس تمشي شوي في درجتين بنزلوك على القعدة.. القعدة بسيطة جداً.. كنباتين مريجات وواسعات بتقدر تنام عليهم لو بدك!! وفي الضلع الثالث كرسي فيكتور هزاز..

كنبات مش مخصصة للنفاق الاجتماعي والفسخرة بقدر ما هي موجودة للراحة.. عليها مساند (cushions) ملونين ومش طقم!! مش متجانسين!! وما في حد فارق معه انه المساند مش من نفس العيلة.. وعلى جدران القعدة صور كبيرة لتشي غيفارا وماركيز وعبد الناصر وصور إيلي بأحجام مختلفة وبدون أي ترتيب.. وصورة لسيارة مرسيدس كلاسيك!!

والطاولات الصغيرة اللي بين الكنبات عليها كواوير فيها شجر بونساي صغير وتماثيل نحاسية عارية لرودن.. وكتب.. ومكتات اسطنبولية مخرمة..

مقابل الكنبات فيه مكتبة بتوسطها تلفزيون كبير محطوط بس عاجزيرة الرياضية.. وحواليه عاليين واليسار كتب وصور وشوية تحف أعجبتني.. وبعد الممر في غرفتين.. وحدة منهم غرفة نوم بسيطة.. والثانية فيها عدة الحديد.. ومرسم صغير وتريد ميل.. وحمام..

هاي كانت شقتي حلمي.. شقة لعزابي.. مش ملتزمة بشي.. مش لابسة جرافة ولا بدلة.. ولا ممشطة ولا منشية ولا بتحاول تثير إعجابك.. شقة ما بتخليك تحس أنك على أعصابك وإنه كل شي فيها لازم يكون منظم ومرتب.. بتقدر تستقبل ضيوفك فيها ويقعدوا وهم مرتاحين.. والهدف منها بس راحة الساكن فيها مش إثارة إعجاب الضيوف..

وعشت فيها.. حياتي اللي أنا بدّي إيّاها.. ومش ناوي أتزوج لو طال الزمان.. كنت بدوم وأنا مرتاح وبروح وأنا مرتاح.. مش عايش تحت

ضغط أي ساعة لازم أروّح ومش مرهون لساعة ايدي.. ما حدا بتصل في  
ايمتا أرجع وشو أجيب معي بس أرجع.. وتأخرت أو ما تأخرت.. ما حدا  
فيها بطلب مني أنام وقت ما هي بدها تنام.. وإذا سهرت لازم أفسّر سهري  
وأقدم كشف حسن نوايا..

عندي أصدقاء و صديقات... بحضر مباريات برشلونة مع أصحابي في  
البيت.. ويندخن وينصرخ بدون ما نخاف نصحي حد.. أو يضطروا  
يروحوأ أول ما تخلص المباراة... وبلعب شدة معهم للصبح.. وبسافر ومش  
عارف ايمتا راح أرجع..

بتحمم زي ما بدي.. وباخذ الوقت اللي بدي اياه.. وبترك المي في الحّمّام  
لأنه آخرتها تنشف!! باكل في مطاعم.. ولما بدي أتعشى بمزاج.. بحضّر أنا  
عشاي المفضل.. بيرة (بدون كحول) وسمك.. وبطلع عالبلكون أقعد  
عالكرسي القش وأدخن وأفكّر..

ما بنكر إني كنت مرتاح، مع هيك كنت مرّات لما أشعر بالوحدة أتذكر  
كلام الناس اللي بنصحوني أتزوج.. وإنه مش كل النسوان زي بعض،  
ويمكن ما تكرر تجربة أبوك.. وتتزوج وتتهنى.. وأفكّر وأسرح..  
\*يفتح باب البلكون الزجاجي\*

- حبيبي!! انت متجوزني ولا متجوز المسخوط التلفون؟! دير بالك  
تركه من ايدك دقيقة وتذكر انه إلك مرة وولاد!! دير بالك..  
\* -تهيدة\* تفضلي....

- الله يزيد فضلك إلهي.. أنا رايجة أنحمد!!.. بس تنساش تطلع الزبالة،  
لأنه كلها سمك، وريحته بتطلع.. وبس عشان تعرف، مش ظايل عنا لا



بندورة ولا خيار ولا ليمون ولا شي، والبنت مش ظايل عندها بامبرز،  
والحليب بأخره..

- حاضر.. بكره بجيب ان شاء الله..

- إن شاء الله يجي بكره!! تا نشوف.. خليك على تلفونك حبيبي.. دير  
بالك تغلط وتيجي تنام مع مرتك مرة!!

- حوقلة مكتومة..

\* يغلق باب البلكونة\*

\* يفتح مرة أخرى\*

وتنساش تترك لي فلوس قبل ما تطلع الصبح.. حكيت معي سهام، في  
محل جديد فتح وبدي أروح أشتري مفرش للطاولة..

\* -تنهيدة طويلة\*

تمت..

## شطرنج و شدة

مرحبا كاتبنا..

شوف.. أنا ما عندي قصة ولا شي.. حياتي أبسط من إتها تكون قصة.. أحداثها عادية وقليلة وما فيها أي مغامرات ولا شي زي اللي إنت بتحكيهم.. أنا بس جاية أحكي لك شوي عن حالي وأروح بسرعة عشان بدي ألحق أراب آيدول..

إسمي هناء، بنت عادية جداً زي أي بنت بتشوفها في الشارع كل يوم، سمينة بمقاييس الناس... بس هذا ما بهمني.. زمان كان يجرجني شوي بس لما بابا حكي لي انه اللي بحبوني بحبوني هيك، بطل يهمني الموضوع.. في المدرسة كنت طالبة عادية.. يعني مش عادية عادية.. بصراحة كانوا المعلمات يشدوا شعرهم مني.. بس شو أعمل؟ والله هاي قدراتي.. من وين أجيب طيب؟! خصوصا مس الرياضيات.. كانت بدها تترك من وراي... عمري ما فهمته الرياضيات هاد.. كانت تعقدني الأرقام والمعادلات.. وكل سنة عندي إكمال رياضيات وأنجح تلقائي.. وما صدقت على الله وأجا العاشر ورحت أدبي..

بس الأدبي كمان ما طلع سهل.. خلص، أنا ما إلي بالدراسة أبدا!! وخلصت توجيهي بصعوبة وبمعدل جداً قليل.. مع انه في ناس كثير زي ما حكيت لي ماما كانوا متوقعين أرسب..

بست إيدته لبابا عشان ما أكمل جامعة.. بس قلّي اختاري أي تخصص لو موازي ولو الساعة بألف دينار راح أدرّسك.. بس ما بصير ما تدرسي.. واخترت آداب.. ومع هيك كانت صعبة علي..

وضليت أدعي انه الجامعة تموت بس ما ماتت،، الله نجاني منها بطريقة ثانية.. بعد أول فصل خطبت.. وثاني يوم خطبة تركت الجامعة كلّها!!.. وقلت لبابا إني بدي أتفرّغ لخطيبي وأجهز بيتي وهيك.. وخطيبي الله يحميه ويخليه ما مانع.. أصلا هو ما بحبّ الشغل للست وبقول إنه الست مكانها بيتها.. وأنا هيك رأيي برضه!! إنت هيك بتفكر كمان!؟

المهم، عالصيف تزوجت.. وزوجي شاب منيح ومتعلم ووسيم وفهمان وشغله ممتاز.. صاحباتي لما شافوه انجنوا!! ورحنا شهر غسل على ماليزيا!! بتجنن ماليزيا!! وعندهم أسواق هناك بتموت.. رحت ماليزيا انت!؟...

طيب طيب.. رجعت على بيت زوجي.. بيت زي بيت بابا.. بس حديقته أصغر شوي.. وحملت بعد شهر.. وإلي متزوجة 8 سنين وعمرى 26 سنة وعندي بنتين وولدين وحامل.. انت عندك ولاد صح!؟

حاضر حاضر راح أكمل.. المهم، أنا كثير مبسوطة مع زوجي وأهلي.. وحماتي كثير بتحبني وبتحكي اني وجه الرزق..

هاي حياتي بشكل عام من بره.. ما فيها أحداث زي ما قلت لك ولا مغامرات.. من جواي أنا إنسانة بسيطة.. كثير بكره الكتب.. ما عمري قرأت كتاب، بوجعني راسي لو قرأت.. ما بفهم كيف بقرأوا الناس!! ممل كثير الموضوع!! وما بحب السياسة ولا بفهم فيها.. وزوجي مرات بضحك علي لما أسأله عن شي.. مرة سألت عن دارفور، انه زي كارفور هاد ولا شو!؟ مات من الضحك علي!! وقال لي انها بلد بعيدة.. وجديد عرفت عن

مدينة الزعتري اللي داعش بذبحوا السوريين فيها.. الله يبعدهم  
عنا.. بخوفوا والله..

ما بحياتي اشتغلت بشي.. بصحى عال 12 كل يوم.. لأرتاح وأفطر  
وأصلي وأحضر شي عالتلفزيون بكونوا اجو بناتي من المدرسة.. بطعميهم  
الموجود، وبس يرجع زوجي المسا بكون طبخت له.. بس مش كل يوم  
بطبخ لأنه غلبة والله.. مرات كثير بجيب معه أكل من بره.. والمسا بقبيل  
شوي وبس أصحى بسهر على.. mbc وعندي شغالة هي بتنظف البيت..  
وزوجي بدرس البنات بس يرجع..

هاي أنا وهاي حياتي.. بس عندي مشكلة واحدة متعيبيني.. وأتمنى إنك  
تفهمها.. مشكلتي هي نظرة الناس الي، وخصوصا صاحباتي وبنات العيلة..  
في كل شي عملته في الحياة، كانوا الناس بحسدوني أو غيرانين مني.. ما  
بحكوا لي شي بوجهي بس بحسهم انهم شايفين انه أنا ما بستاهل أمتلك اللي  
أنا بملكه.. لأنني ما عندي اللي عندهم.. وهم ما بستاهلوا ينحرموا من اللي  
محرومين منه لأنه بملكوا أشياء كثير مش عندي.. خصوصا لو بنات مش  
متزوجات أو متزوجات ووضعهم المادي تعبان وبشتغلوا بره البيت.. أو  
عندهم مشاكل مع بيت حماهم وزوجهم..

وصلني كلام زي على شو أخذها زوجها وهي ما بتعرف الخمسة من  
الطمسة؟ والله بستاهل يوخذ ست ستها.. بالله ما بجرح هاد الكلام؟!  
وشو بدهم في بنام للظهر ولا لأ؟! يعني عارفة انه هاد غلط شوي.. بس شو  
أسوي؟ هيك أنا!!

مش صح كل واحد الله خلقه شكل؟! شو بدهم طيب؟! وتخييل  
حاسدينني حتى على حب حماتي الي.. لما حماتي جابت لي طقم ذهب على آخر

ولد، انجنّوا صاحباتي!! هستروا!! تخيل!! قال لو أنا عند حماهم كان  
خنقتني..

في الآخر قلت الحمد لله على كل شي.. وما حدا بشوف قديش الثاني  
بتعب والله.. بس أنا بشر ونفسييتي تعبت من كلامهم.. فشكيت لصاحبة  
عندي.. ما عمرها حكّت لي هيك شي..

بتعرف شو قالت؟! قالت شغلة غريبة.. قالت لي "الناس يا هناء ما  
بحبوا يلعبوا شطرنج.. لأنها بتبين مين الذكي ومين الاقل ذكاء.. بحبوا  
يلعبوا شدة لأنه فيها حظ.. واللي بفوز ممكن يحكي فزت بشطارتني.. واللي  
خسر بقدر بسهولة يلوم الحظ.. وما يطلع حاله ما بعرف يلعب.. والحياة  
تقسيم الرزق فيها هيك.. زي الشدة.. عشان هيك، مع كل الكلام اللي  
بحكوا لك اياه صاحباتك أو بحكوه من ورا ظهرك.. إلا إنه وجودك في  
حياتهم مهم جداً لتوازنهم النفسي.. لأنه بقدروا يحكوا انه انت الحظ.. الحياة  
لو كانت زي الشطرنج وكل واحد فيها برتزق على حسب عقله وإمكاناته  
بتكون صعبة كثير.. ما حدا بتحملها.. هيك أحسن"

حلو كلامها صح؟ أنا ما فهمته كلّه، إنت أكيد راح تفهمه لأنك كاتب  
ومثقف هيك..

بس ريحني شوي كلامها.. خلص خلص ما راح أطول عليك.. وأصلاً  
بدي أروح أحضر أراب آيدول..

بس آخر شغلة قبل ما أروح.. أمانة أمانة تحمّلني.. عندك فكرة حسن  
الشافعي ليش ما بطلع بمسلسلات؟؟ ولا عمري شفته!!

تمت..

## كاندي كراش

- بتعرف؟ الإنسان بشكل عام مغرم بالنهايات.. شو ما كان المشهد.. مباراة كرة قدم، أو فيلم سينمائي أو رواية.. أو حتى مصارعة ديكة.. بنحب البدايات المحايدة البسيطة الحبل بالفضول.. وينستمتع بتشابك وتتابع الأحداث، لكن اللي بنكون نستناه هي النهاية.. النهاية اللي بتعطينا الحكمة أو الفرح أو الحزن.. وبتلاقينا بشكل لا إرادي بتتأثر في نهاية كل شيء وينعتبر نفسنا صرنا أكثر حكمة وأكثر نضج ولازم نختم المشهد بتنهيدة تعقبها "يا للللله!!".. وبنرجع لحياتنا اليومية وبنرجع ندور على مشهد آخر ونهاية جديدة..

بس بتعرف وين المشكلة بتكون؟؟، لما إنت شخصيا تكون داخل هذا المشهد وإنت البطل فيه.. وبايدك وقعت على البداية.. وعاش تتابع الأحداث.. وعاش الحكمة.. بس مش عارف ايما النهاية اللي لازم تحكي بعدها.. "يا الله!!".. وهذا هو الزواج..

- متذكرة البدايات طيب؟

- البدايات.. هممم.. متذكرة لحية المأذون.. كانت حلوة.. سودا وفيها شوية شعرات بيض.. مع طاقة حمرا.. وبس شفته فكرت إنه لما أحمد يصير بعمره بدي أخليه يربي لحيته زيه.. بس ما راح أخليه يلبس طاقة حمرا

سخيفة.. كنت بدي ألبسه عمامة خيرية.. عشان أشوفه زي الخضر.. هلقد  
كنت بحبته..

بتعرف؟ الناس بفكروا البنت بتوخذ جهازها معها على بيت زوجها.. أنا  
ما أخذت كثير جهاز.. أخذت حبي.. كان نبتة صغيرة وقوية جوا قلبي..  
وكنت مؤمنة إنه هاي النبتة راح تكبر وتصير شجرة..

بس شو الواحد بده يحكي؟! انتوا الرجال بتفهموش.. الله خلقكم  
بتفهموش.. بفكر الواحد فيكم إنه لو زعل مرته عشان إمه أو أخته ورجع  
راضاها في الليل إنه الموضوع انتهى.. ما بتفهموا انه كل مشكلة.. حتى لو  
انتهت في السرير، بتحفر في قلب الست، وبتوخذ من رصيد زوجها  
عندها.. من حبها إله.. بس احنا بنمثل انه الموضوع عادي وسامحناكم..  
وانتوا بتصدقوا..

- smile emoticon

- شو قهوتك صح؟ أحط لك سكر؟

- لا شكرا.. بشرها سادة..

- سادة سادة.. أحمد كمان بحب السادة.. بتعرف؟ صحيح مشاكل حماتي

وحماتي كانت عامل محبط.. بس ظل حبنا موجود.. مجرح بس موجود..

وكان في أمل يطيب يمكن.. ما بعرف..

النكسة الحقيقية كانت لما ما حملت.. خمس سنين كاملة ما خلّفت فيهم..

اختبار صعب كان.. زعزع كل كياني.. يا أخي شو المجتمع ظالم لما الست ما

تخلّف!! بس الاختبار الأقوى ما كان الي.. كان لأحمد.. وللأسف..

لما بتطلع الأيام هاي على حالتي وحالته بحاول أتذكر متى بدأ حبنا

يتسرب مثل ساعة الرمل.. أتوقع بدأ التسريب من هديك الأيام..

أولها كان منيح معي، ومتفهم انه هاي شغلة من ربنا.. بس لما ضغوطات المجتمع زادت عليه.. ما قدر يتحمّل.. رجولته كانت أضعف من هيك موقف..

مستحيل شاب يحسّ بهذا النقص الهائل اللي بتحصّه الست لما ما تكون تخلف.. أزومات نفسية متتالية وما إلها حلّ.. وكل ما تتحسن نفسيتي شوي، ترجع تندمّر.. البسة.. بتعرفها البسة!؟ كنت بس أشوفها خلّفت أبكي.. وما كنت بدي منه إلا شوية مواساة.. وقتها خسرته.. بس ما كنت عارفة يمكن..

- ولادة ياسمين ما غيرت الأمور؟

- غيرتها بالنسبة لنا الاثنين.. بس مش بشكل مشترك.. بشكل منفرد.. أنا فرحت لأنّي رجعت أقدر أواجه مجتمعي القدر اللي شبّعني معايرة.. وهو أكيد فرح لأنه واجه مجتمعه.. بس اللي كان بيننا وانكسر، خلص انكسر.. في أشياء ما بتتصلح.. شو ما كذبت على حالك وعلى الناس.. العيون.. كل شي بتقدر تشوفه في العيون.. العيون تغيرت..

ومع هيك ما يئست.. حاولت بعد ولادة ياسمين إنه نبدأ من جديد.. وكنا رحلنا من عند بيت أهله.. وسكننا في بيت لخالنا.. بس الجفا اللي كان متخبي في بيت أهله، بيّن لما صرنا لخالنا..

ستتين كاملين وأنا وهو نحاول.. بس الفقر والمصاريف وضغوط الحياة ما تركت مجال لشي.. في الليل نحبّ بعض وفي النهار ترجع الدنيا تبعدنا.. حتى ولادة سيف ما غيرت شي.. زادت المصاريف بس..

وصارت الحياة مجاملات وبس مجاملات.. محاولات لإرجاع شيء ميت.. بس من سنتين وجاي وقفنا مجاملات خلص.. وكان لازم نعرف



ولو بشكل ضمني وصامت انه الزواج بيننا انتهى.. ولازم نكمّل الحياة  
كأب وأم بس.. كزوج وزوجة كنا انتهينا.. خلصت ساعة الرمل.. ما ظل  
شي ثاني ننزفه.. وتم الانفصال..

- انفصال كامل!؟

- لا.. عايشين في نفس البيت.. بنلتقي مرات.. عند الحّمّام الصبح..  
عطاولة السفرة عالغدا.. بنشوف بعض يعني.. بس كل واحد في حاله..  
والتكنولوجيا كملت مشهد الخرس الزوجي بشكل كامل.. وأعطتنا عذر  
نتخبى وراه.. وصار كل واحد ماسك تلفونه وعايش في عالم لحاله..

- ما في أي تواصل ثاني من أي نوع!؟

- فيه.. بنطلب من بعض أرواح في كاندي كراش..

تمت..

# أسوار الكُدس

ملاحظات مهمة قبل قراءة النص..

١- القصة لشاب يجلس عند قبر والده ويحادثه.. النص مكتوب باللهجة الفلسطينية الفلاحية، لذلك قد يجد بعض المتابعين من خارج بلاد الشام صعوبة في قراءته.. للتسهيل.. استبدلت القاف كافاً..

كبر = قبر

كال = قال

يحرك = يحرق

٢- النص يحاكي شخصية شاب يعاني من التأتأة.. وقدراته العقلية محدودة.. لذلك حاول أن تقرأه كأنك تسمعه، مع تأتأة..

\*\*\*

العواف يابا.. كيف حالك؟ ان شاء الله إنك مبسوط؟! وو وكيف الكبر اللي عملت لك إياه؟! ان شاء الله عاجبك؟! وسيع يابا وعلى كدك؟! مش مذايك رجلك يعني؟ مليح يابا.. مليح.. وإن شاء الله ما دلفت عليك مية الشتا وسكيت؟ احنا البلد غركت عنّا بالشتا يابا.. والله غركت.. بس رئيس البلدية كال، انه السنة الجاي ان شالله بدهم الامريكان يعطونا

مصاري و بدّه بيني منهل كبير كدّ البلد.. ويجي الرئيس يفتتحه.. وانا بدني  
أخذ إمّي ونروح نتصور مع المنهل.. كصدي مع الرئيس..

إمّي مليحة يابا.. مليحة.. بتسلم عليك.. وبتترحم عليك كل يوم  
الصبح.. كالت لي أسلم عليك وأكول لك انها اشتاكت لك.. بس يعني  
مش خاطرها تموت.. مع أنّه مش عارف ع شو اشتاكت لك.. ما انتة الله  
يرحمك ويصلحك كنت مكسّر عظامها.. تصبّحها بكتلة وتمسيها بكتلة..

صبري؟ صبري مليح يابا.. بشتغل مع السلطة في التنسيك الأمني..  
بعطوه الف وخمسية شيكل.. شغلتهم بمسكوا المكاومين وبرموهم في  
السجون.. مسكوا سلامة البسّ الأسبوع الماضي ورموه بالحبس.. والله  
زعلنا عليه يابا... كل البلد زعلت عليه.. سبع سنين واليهود مش كادرين  
يلكطوه للبسّ.. أخوي صبري في أسبوع لكطه.. مهو.. هاظا يابا..  
خاين.. اه صبري ابنك خاين.. خاين للكظية.. ولا شو؟؟. شكله ابن حرام  
أصلا.. كل الناس في البلد بכולوا عنه ابن حرام.. معكول يابا؟.. معكول  
إمّي كايئة تخمخم من وراك مع أبو جعفر الخضرجي؟! معكول؟! وانت يابا  
باكي داير عالكهواوي الله يصلحك ويرحمك؟! وهي كايئة مع الخضرجي  
وأجاهاظ الولد؟؟ معكول يابا؟!

أنا مليح يابا.. أنا بشتغل مع اليهود.. لا مش عميل.. شو عميل انت  
الثاني؟!.. بتحسبني أنا كمان خاين للكظية؟ لا يابا.. أنا بركب بيوت  
بلاستيك.. حماموت.. في المستوطنات.. أنا وعزّ الأعرور ابن فاطمة.. بنزرع  
بلادنا يعني.. بس مش احنا اللي بنكطف.. هم اللي بكطفوا.. بس برظه مش  
مشكلة.. آخرتنا نكطف يابا.. آخرتنا نكطف.. هيك بכול عز.. وأنا  
مسدّكه.. آخرتنا نكطف..

شغلي مليح.. بطلع لي ثلاثية شيكل ع كل بيت.. اه.. بس أمي بتوخذهن مني.. كال بتظلي اياهن عشان تجوزني.. مع انه ما حدش راظي يجوزني يابا.. والله ما حد راظي يجوزني.. صار عمري ثلاثين سنة ولسه فش عندي ولاد.. الأسبوع الماظي رحنا.. ع دار أبو سميح طلبنا بنتهم هاي.. الخنفا.. عرفتها؟ الخنفا اه.. هي منيحة البنت.. وبتعرف تطبخ وكل شي.. وتساعد امي في شغل الدار.. بس ما رضوش.. والله ما رضوا.. كال أنا!! كال أنا.. ايش!! كالوا كلمة بس والله ما فهمتها.. نسيته يابا.. بس اتذكرها بكونك اياها.. المرة الجاي بس أزورك..

وانتا.. وانتا بعدين يابا شو هالعملة اللي عاملها؟! انتا كاين ميت ومش تارك لنا اشي؟؟؟ طلعت.. طلعت مم مهوي يابا.. مفضي؟ ولا من وراك ولا كدّامك؟؟؟ وطول ما انت عايش وانت نافخ لي حالك مثل ديك الحبش ليش؟ وانت فش في كفاك آجورا وحدة! الله يحركك!! مليح؟؟ حركتني!! حركت كلبي على.. على هالعملة!!! حركت كلبي والله!! وانت.. من أول ما مرظت وأنا مستنيك تموت.. قلت بصير مليونير زي هذول اللي بنسمع عنهم.. وبطلع عندك أراظي هون وهون.. وبنورثك.. طلعت مفضي!! مديون ب ٣٠ شيكل كمان!! ووين ولاعتي الزركا صحيح؟ اللي أخذتها كبل يومين ما تموت.. اه؟ وينها؟ كمان.. كمان هاي راحت!! ما استفدتش منك اشي! والله ما استفدت منك اشي يابا!! لا وانتي عايش ولا وانتي ميت! حتى.. حتى.. منيح اللي طلع لي الحمار الإبرص من وراك.. هظا الوحيد اللي طلع لي.. الله يحركك.. حركت كلبي.. هيك الواحد بترك ولاده بلا مصاري؟؟؟

أختي!؟ مين أختي؟ لطفية؟ هيها متودّرة بغزة زي ما هي.. صاروا اليهود كاصفينهم اربع تالاف مرة.. كل سنة بكصفوهم يابا.. كل سنة.. كل

سنة بموت لها ثلاث ولاد بتجيب اربعة بداهم.. متشحتفة مسكينة.. من  
نخيم لمخيم.. شو بدهم يعملوا يعني؟ الله يعين الناس يابا.. كظوا هالعمر  
غلب في غلب..

مهو.. مهو.. مهو الحكّ عليك يابا. انت اللي ودرتها.. الله يحركك في  
كبرك ان شالله.. حدا بجوز بنته لغزاو؟ وبودرها عالموت؟! مهو إسرائيل  
ذبحتهم يابا.. ذبحتهم إسرائيل.. بس طلوعوا رجال والله.. كدها وكدود..  
كصفوا تل أيبب بالكنابل الثكيلة.. بالصواربخ والكنابل الثكيلة..

مجدية؟ مليحة يابا مجدية مليحة.. كانت في نخيم اليرموك ما انتة عارف..  
بس ما تحمّلتش الكصف هناك.. وكان عليهم حصار خانك.. ما كدروش  
يوكلوا.. جوزها طلع تحت الكصف عشان يجيب اهم خبز.. لا ما  
انكصفش الحمد لله.. بس وكعت عليه كرتونة مساعدات من طيارة  
الوكالة.. هذول اللي بيرموا أكل من فوك.. اجت فوكه الكرتونة.. طكشت  
راسه كتلتة.. شكلها كرتونة سردين كاينة.. بس ما صح لوش يوكل منها  
مشحّر.. ما لحكش.. فامكدرتش مجدية تظل يابا.. تركت المخيم والكصف  
ونزحت هي وولادها عالزعتري.. وانكصف عمر اثنين من ولادها في  
الطريك.. ما تحمّلوش الجو المليح في الرحلة.. بس مش مشكلة.. ظل  
عندها ثمن ولاد.. ومبسوطين في الزعتري يابا.. عندهم خيمة.. وسريرين  
وثلاث لحافات.. وصار معهم ربو كمان.. وبوكلوا سردين وبطاطا.. وكل  
يوم بتصوروا مع الصحفيين الشكر.. وبطلعوا عال تلفزيون....

عن مين بدك أكل لك كمان؟ نعيم؟ نعيم يابا زي ما هو.. في الدنمارك..  
عند الشكر هو الثاني.. مكيف عالشكر.. ولا بدّه البلاد ولا أهلها.. لا يابا..  
بيعتش مصاري.. بطل.. وظعه صعب كال.. بس بعث لنا صورته لما انت  
متت.. كان زعلان عليك كثير والله يابا.. كان زعلان في الصورة كثير..

حزنت عليه والله. ولا بس إسود كان.. وسيارته كمان سودا... لو شفت الصورة وشفت كدّيش زعلان عليك كنت فرحت والله يابا.. وكال لنا نسلم عليك وعلى نظال (نضال) كثير السلام..

ما كلت لكش عن نظال صحيح.. الحمد لله يابا.. ارتاح من التوكيف الإداري أخيرا.. وحكموه اليهود الحمد لله.. حكموه اربع تالاف. وخمسية سنة.. بفكروا أخوي هاظ ديناصور.. بس تكلكش عليه يابا.. رحنا زرناه الأسبوع الماضي في عوفر... وأخذنا له جرزاية صوف خطرا.. عشان ما يسكعش.. وكلت له ولا يهملك يا أخوي.. ولادك كنهم ولادي.. ومرتك عايشة عنا... وان شاء الله بعد يوم الكيامة بشوي بتطلع.. وأصلا الشيخ فرج كال انه الكيامة كربت.. يعني هانت ان شاء الله يا أخوي.. هانت..

مين ظل من ولادك أخرّفك عنه يابا؟! انبرى لساني وأنا أتخرّف.. ما انتا مخلّف كبيلة ما شا الله عنك.. كايين فش وراك غير هالشغلة.. اه.. كايين تارك شغلك وكاعد تخلف بس.. وانا بكول ليش مفلس كايين..

مؤمن اه.. مؤمن مليح يابا.. بكرا في المدرسة.. بكول له.. اترك المدرسة و تعال اشتغل معي مش كابل.. بدّه يكمل كال.. وبكول لي التعليم هو الأمل.. معكول يابا في أمل؟ ممكن يطلع من كفاه خير في البلد هاي يعني؟ ممكن يابا؟...

خلص يابا تردّش خالص.. لا أكون وجعت لك راسك؟! حكك علي.. أصلا بدّيش اتخرّف عن إخواني يابا.. انا.. انا.. انا مش جاي اتخرّف عنهم.. انا جاي اتخرّف معك انت.. اشتكت لك يابا.. والله اني اشتكت لك.. اخواني بحبونيش يابا.. بظلمهم كالبيني مسخرة.. بالاخص هاظا العرص صبري..

متذكر يا ابا لما كنت انا صغير ويحي صبري يكتلني وتشوفني بعيط..  
وتكعد تراضي في وتطعميني تين؟! بعدين تركبني على الحمار الإبرص  
وتوخذني عند إسوار الكدس؟؟ متذكر يا ابا؟ وتكول لي.. إنت راح تكبر  
وتصير مثل صلاح الدين يا عايد!!

متذكر؟؟ والله إنّي بحبك يا ابا.. والله إنّي بحبك..

بتكدرش يا ابا ترجع يوم واحد؟ بتكدرش؟ كول لهم.. بس يوم واحد  
يا ابا.. بس يوم.. وبرجعك أنا عالکبر.. والله.. كول لهم.. كول لهم  
تحافوش.. إبني عايد برجعني.. بس بدني آخذه مرة واحدة عند إسوار  
الكدس وأشتري له دورادو..

بس مرة واحدة..

بطلع لكش يا ابا بس مرة واحدة؟ كول لهم يا ابا.. أمانة عليك إنك تكول  
لهم!! وشو ما بدهم بعطيهم.. بعطيهم الحمار الإبرص والولاعة الزرکا  
کمان.. وبدناش منهل ولا بدني أتصور مع الرئيس.. بديش اشي يا ابا.. بس  
أشوفك مرة واحدة..

كول لهم.. ابني الصغير بعيط.. وبدني آخذه مرة واحدة عند إسوار  
الكدس..

تمت..

## فاميليا

زمان، كان حلم أي طفل مغترب مع أهله في الخليج، انه أهله يستقرّوا بالأردن.. لأن هذا الطفل كان يعيش أجمل لحظات حياته في إجازة الصيف.. جلسات عائلية شبه يومية.. لعب دائم مع أولاد عمّه وأولاد خاله.. مفهوم الحارة وألعاب الحارة المفقودة في الخليج.. برامج الأطفال اللي بسمع عنها سمع بس.. وغير هيك من المملدّات اللي بشوفها بس بالصيف.. وفي آخر الإجازة يبكي هذا الطفل وهو يدعي انه أهله يستقرّوا في الأردن ويعيش هاي الجنّة بشكل يومي..

وفي حرب الخليج 90 شاء الله أن يلقي الملك حسين خطابه الشهير بشأن الحرب.. وفي ظرف ٢٤ ساعة، تكفّل هذا الخطاب، بيّنه يحقق أحلام مئات آلاف الأطفال ويرجعوا مع أهلهم على عمّان في أكبر حملة انهاء خدمات للمدرسين الأردنيين في الخليج.. وأنا كنت منهم..

وتركنا القرية الصحراوية المنفية خارج الزمان والمكان، واستقرينا في بيت واسع جميل في الحارة الحلم... والتّم شملنا بالأهل والأحباب..

وكنا العائلة المفضّلة في المحيط.. حاضرين في كل مناسبة.. وفي العزائم لازم يكون أبوي وولاده في صدر القعدة.. ولو في خطبة أو جاهدة.. يكون أبوي الأوّل.. وحبّ عائلي أحاطنا من كلّ جهة.. وأنسانا سنين القحط الاجتماعي في الصحراء القاحلة..



وبعد سنة من الانتظار والمشاورات، ومتسلّحاً بخبرة عشرين سنة من التدريس الابتدائي في قرية معزولة، وبتشجيع من الأهل والأقارب قرر الوالد يستثمر مدّخرات عمره ويخوض تجربة العمل الحرّ في شغلة ما يعرف فيها نهائياً.. وبمشورة من أحد الأقارب، ووعوده انه هاي الشغلة بتقصّ ذهب، بدأ الوالد في تجارة حديد البناء..

ودخلنا مدارس الوكالة، وبدأنا في التأقلم مع طبيعة الحياة في الأردن، أو هيك فكّرنا.. وكان في شويّة صعوبات أوّها.. لكن تواجد العائلة حولنا كان يسهّل علينا كل شي.. كان بيتنا خلية نحل.. لا يكاد يخلو يوم من زيارة عائلية من عم أو خال أو خالة.. والجمعة لازم لازم لمة عائلية كبيرة.. ووليمة كبيرة للجميع..

ومرت ثلاث سنوات في الأردن، وبهجة البداية راحت.. لأنه كل الأشياء اللي كانت أحلام صارت يومية وعادية.. وظهرت منغصات ما عمرنا شفناها.. بدأنا نشوف أبوي يعصب.. ويتناقش مع أمي بصوت عالي..

وشوي شوي، بدأت حياة الرفاهية اللي كنا عايشينها تتغير ملاحظها شوي شوي.. صرنا نلبس ملابس العيد لأكثر من عيد.. والفواكه اللي كانت ما تحتفي من بيتنا صارت ألوانها تقل وكمياتها تقل.. والعزائم والطلعات كمان تقل..

واكتشفنا من خلال التقشف اللي بدأ ومن خلال كلام عابر بين الوالد والوالدة انه التجارة بدأت تخسر، وصرنا نسمع كلام مثل "ولاد الحرام كثير، والواحد ما كان حاسب ها الحاسب، والناس في الأردن غير، والواحد مش لازم يثق بحد".. وحتى علاقاتنا مع محيطنا كانت بدأت تنحسر.. صار

خلاف شديد بين أبوي وعمّي وانتهى بقطيعة.. وصارت زيارات الناس  
ليتنا أقل كثافة وأخف حميمية..

مع دخولي الثانوية، كان الوالد سكر تجارة الحديد تماماً.. والخسائر  
حسب فهمنا في تلك المرحلة كانت كبيرة.. وبرغم معارضة الوالدة،  
استخدم الوالد باقي مدّخراته للبدء في تجارة خشب البناء.. مع وعود بإنّه  
يكون أكثر حذراً وأنه تعلّم من دروسه السابقة، وإن شاء الله يكون في جبر  
للخسارة...

لكن لأن أفضل طريقة لاستقراء المستقبل هي النظر للماضي.. اللي صار  
في المرة الأولى تكرر في الثانية.. خسارات كبيرة وتعرض للنصب وثقة  
عمياء وشيكات بدون رصيد.. وعتب على الدهر والناس..

في هاي الفترة، كان التقشف واضح جداً جداً.. الفواكه اختفت..  
وملابس العيد اختفت.. وصيانة البيت انعدمت تقريباً.. والأثاث اللي كان  
بدأ يصير قديم، كان يتعرض للاهتراء لكن بدون تجديد.. والفقر بدأ يدخل  
بيتنا.. ومع علاقاتنا مع العائلة كانت تسوء أكثر فأكثر.. وزياراتنا معهم  
تخف بشكل هائل..

كانت إمّي تحكي انه الناس شمتانين، والدنيا مع الواقف.. وعمرها ما  
تخيلت هيك.. ويا خسارة اللي عملته زمان.. وأبوي صار عصبي جداً..  
ونقل عصبته لنا كلنا.. كان الفقر وعصبية أبوي بخلّوا جو البيت لا  
يطاق..

حتى علاقاتنا كإخوة وأخوات كان بشوبها توتر كبير.. مرات خفي ومرّات  
معلن..

ومع دخولي الجامعة، أغلق الوالد تجارة الأخشاب بخسارة مدوية انتهت ببيع سيارتنا.. وبدأ الوالد في استخدام خياره الأخير.. أراضي الضفة الموروثة فلأحاً عن فلاح..

ودخلت الجامعة، ومعها دخلنا مرحلة الفقر الحقيقي.. انعدم الدخل تماماً.. وأراضي الضفة الصغيرة القيمة والمساحة ما كانت كافية لسد الديون.. هذا عدا عن الشماتة الكبيرة في اللي باع أراضي أبوه.. وانعزلنا عن العالم.. وما حدا برن جرس بيتنا الا اللي بدهم منا فلوس، أو بعض القراب اللي ما تغيروا بتغير الزمان.. والجنة اللي كان اسمها الأردن تحولت لجحيم فقر وعوز وشماتة..

ووصلت الأزمة ذروتها في نهايات 2003 اللي كنت فيها على وشك التخرج.. وعرضت أترك الجامعة وأشتغل أساعد أبوي، لكنه رفض بشكل قاطع.. وأصرّ إنّي أكمل وأصير مهندس.. وكان دائماً يردد ان أولاده هم استشاره الأكبر..

وقبل تخرّجي بشهرين، كان لازم نوصل للحظة الحقيقة.. كان لازم ندفع ثمن استغلال خبرة التدريس في تجارة الخشب.. الشرطة داهموا البيت و قبضوا على أبوي.. كان تجار الخشب شكوا عليه عشان الديون.. وتخرّجت وأبوي في السجن..

وبرغم كل شيء، خيارى الأول والوحيد كان أقاربنا.. ولجأت لهم أستدين منهم عشان أطلع أبوي، وكله بضمان شغلي.. وكلّ ما أنصدم بواحد فيهم أتأمل في الثاني، وأحكي يمكن يتذكروا أيام الجمعات الحلوة، يتذكروا اللي عمله أبوي، أو إمّي، لكن ما لقيت إلا كل شماتة وتشفّي مخبيين تحت قناع التعاطف الكاذب والعين البصيرة والايده القصيرة..

و قررت ما أعتد على حد.. وزرت كل المحامين المشغولين بالقضايا اللي  
على أبوي.. وكتب كميالات وتعهدات وأقساط.. وقبلت كل استغلال  
المحامين وضرب رسومهم في ثلاث بس عشان أطلععه..

وطلع أبوي من السجن، وأنا خريج جديد وعلي أكثر من خمسين ألف  
دينار ديون وكميالات.. وما معي إلا ربنا وشهادتي وموهبتي وأمل  
بمستقبل أفضل..

ووقفني ربنا واشتغلت بسرعة في شركة كبيرة.. وبنفس الوقت، كنت  
عرضت خدماتي كمصمم حرّ على كثير من الشركات والأفراد.. وبدأت  
عجلة الإنتاج..

بدأت أشتغل من 12-15 ساعة يومياً.. وبسبب موهبتي في التصميم،  
صار يجيني شغل حرّ كثير.. وصرت أكسب مريح، أكثر بكثير من أي شاب  
في سنّي.. بس الدين كان كثير كبير.. و الكميالات كانت همّ بطاردني  
وبهدّدي كل نهاية شهر.. وعملت لهم جدولة وإعادة جدولة أكثر من 4  
مرّات.. بس التزامي بالدفع لو بمبالغ بسيطة.. كان يصبرّ الناس علي..

وتمكنت اني أوقف مسلسل الانهيار.. ووقفنا حفر في حفرة الدين  
العظيم.. وبدأنا نردم فيها.. ومع تعاوننا كلنا كعائلة، كنا نسدّ ديوننا دين  
دين.. وكل دين نسدّه نشطبه من الدفتر.. وشوي شوي.. بدأنا نستقر..  
وبدأنا نستعيد علاقتنا مع المجتمع..

وبعد خمس سنوات كاملة من العمل الشاقّ والمريح مني، ومن اخواني  
اللي تخرجوا بعدي، تمكّنا نسدّ كامل ديون أبوي.... وفتحت شركة صغيرة  
لشغلي الخاص، وطلعنا فوق الصفر أخيراً..

وبدأت عجلة التصحيح تدور.. وبدأت أحسن حياتي وحياة أهلي.. بعد سنة اشترت لأبوي سيارة بدل اللي انباعت.. وعملنا صيانة للبيت.. وتزوجت.. وشوي شوي، صارت علاقتنا بالعائلة تتحسن.. وصرنا ننعم على جاهات، وأعراس.. ويوخذوا رأينا في مشاكلهم.. وصاروا الناس اللي ياما شمتوا فينا، يزورونا ونزورهم ونضحك سوا..

السنة الماضية وصلت لعشر موظفين عندي في الشركة.. ولأول مرة كنت باخذ مشاريع إقليمية.. وتحسن وضع أهلي بشكل مشابه لوضعهم أول ما إجينا عالاردن.. ورجع بيتنا خلية نحل.. ورجع أبوي يقعد في صدر المجلس.. ويكون رأس الجاهة.. وبعد ٢٤ سنة تقريبا كانت الدائرة دارت دورتها الكاملة..

تجربة الفقر مش سيئة عموما.. بتطهرك من الداخل من أشياء كثير.. وبتعلمك أشياء كثير... عن نفسك وعن عائلتك وعن الآخرين..

أنا الآن معي فلوس، ومرات بسمع الناس بحكوا إنه من عيوب الفلوس لما تكون معك، إنها بتخبي عنك وجوه الناس الحقيقية، وإنك بتتعامل مع أقنعة.. لكن عن خبرة بحكي لك.. أحسن لك ما تشوف هاي الوجوه.. استمتع بالأقنعة..

تمت..

## الآن .. هنا ..

سواء كنت بنت أو شاب .. بدي منك تغمض عيونك .. وتتحيل الآتي ..  
تحيل انك بتواجه عملاق غاضب طوله أربع أمتار، وانت بتواجهه وحدك ..  
وبعد ما يصرخ فيك بصوته الجهور .. يمسكك هذا العملاق الغاضب  
ويضربك وانت مش فاهم ليش .. تحيلت!؟

هذا هو بالضبط شعور أي طفل بعنقه أبوه .. وهذا هو الجوّ اللي نشأت  
فيه ..

لما بسترجع الشريط الضبابي لذاكرتي الحزينة، بتذكر إني كنت دائماً طفلة  
خائفة ومرعوبة .. أي صوت بحسه علي .. وأي شي بعمله بحسه غلط ..  
وأي واحد بناديني بصير أرجف وبجهز نفسي لعقاب، حتى لو مش عاملة  
شي .. وبتذكر إنه في كل مشكلة بين أبوي وإمي كنت أحس إنه أنا سببها ..  
ومجرد ما يبدأوا النقاش أهرب لغرفتي وأسكر الباب وأتخبى في الخزانة  
وأغمض عيوني .. لغاية ما تهدأ الأصوات وتضع الحرب أوزارها .. وغالبا  
ما كانت المشكلة تنتهي ببكاء محموم من إمي وشوية كدمات .. وخروج  
الوحش اللي اسمه أبوي من البيت ....

خوفي من مجتمعي المصغر وفشلي في التعبير عن نفسي فيه .. كان لازم  
ينعكس خوف وفشل في مجتمعي الأكبر .. المدرسة .. وفي الصفّ الثاني  
تقريبا، كنت بدأت مشوار معاناتي مع بني البشر .. وبدأت أفهم حالي

وأتضايق منها.. في أي تحدّي أو مواجهة مع بنت، حتى لو كانت أصغر مني، كنت أنضرب بس أخاف أضرب.. أخاف أدافع عن حالي.. وألجأ للبقاء والانعزال.. وألجأ للمعلمة عشان تجيب لي حقي.. اللي غالباً كان يضع و ينتهي بتربينة على كتفي.. وشهاتة من المعتدي....

مع تكرار الموضوع، صرت أكره الأطفال مع حاجتي اني ألعب معهم.. كنت أحبهم لأنني بدي ألعب معهم وفي نفس الوقت كنت بكرههم لأنهم بتمسخروا علي وبضربوني.... مع انه ما في إشي يسخروا مني عليه.. بس كانوا دايا يلاقوا شي.. ويدفشوني ويوقعوني على الأرض.. ومرات أقرر إنه أتصدى لهم.. بس لما يجي الوقت وأحاول محاولاتي اليائسة.. يصير جسمي يرجف وأخاف.. وأرجع أتعرض لنفس الموقف.. مرة ورا مرة....

كنت أخاف أحكي لإمي أو أبوي.. عشان ما أتبهدل بزيادة.. أكتم في قلبي وبس.. وكنت كل سنة أدعي البنات - غير المؤدبات- يروحوا من صفّي السنة الجاي، بس كل صفّ كان في بنات جداد.. يارسوا نفس الدور.. وكأنه مكتوب على جبيني مستضعفة....

فعليا، كانت أي مواجهة معي توضح من أولها إني ضعيفة.. وهم يعرفوا ويستغلوا هذا الموضوع.. كنت أحسدهم لأنهم أقوياء، حتى لو علي.. وأحسد الطالبات اللي بدافعوا عن حالهم.. كان نفسي أعرف أدافع عن حالي.. أو عن برّايتي أو محايّتي.. أو سندويشتي حتى.. وفي لحظات يأسّي القاتلة، أكذب على نفسي إنّي بنت مؤدّبة.. مش ضعيفة....

فكّرت في حلول بديلة.. وصرت أحاول أتدلل لهم عشان نصير أصدقاء.. بس ما كان ينفع.. كانوا يستغلوني بس.. ويرجعوا يهينوني ويسخروا منّي.. فاعتزلت كل شي.. حتى النشاطات المدرسية.. ما عمري

شاركت فيها.. وصرت دايبا لحالي.. وكنت مع هيك أخاف أكون لحالي..  
الصبح لازم آجي مع الناس عشان ما حدا ينفرد في.. والظهر أروح أول  
وحدة عشان برضه ما حدا ينفرد في.. لأنه المرات اللي صارت وانفردوا في  
كانت مؤلمة جدا....

وكبرت، وكبر ضعفي وخجلي وخوفي معي.. وكم تمنيت لو أموت.. أو  
تنحرق المدرسة.. أو يصير أي شي ينجيني من عذاب الاستضعاف هذا..  
كان مجرد الصحوة من النوم الصبح عشان أروح على المدرسة كابوس كبير..  
يا الله شو كنت أكره المدرسة.. وأكره نفسي الضعيفة العاجزة أكثر..

وأنا في الثانوي.. زاد الموضوع كثير.. كان يصير رمي كلام جارح..  
وسخرية.. واستغلال وتخويف.. وضرب.. وكم عاتبت قلبي الجبان  
الخواف وكم كرهته وكرهت حالي وأبوي وإمي والناس والدنيا أجمعين..  
كان نفسي أفهم شو اللي بخوفني.. ليش أنا من دون الناس؟!... ما كانت  
أجسامهم أكبر مني، ولا شي عندهم أحسن مني.. بس كنت ضعيفة..  
عصفور خايف مكسور الجناح....

كان بكفي انه بنت من الشريرات تصرخ في، أو تجحرنني عشان أخاف  
منها وأحل لها الواجب، أو أعطيها مصروفي.. كنت أعمل أي شي عشان  
أنفادي غضبهم.. وبس أروح أنفجر في موجة من البكاء المرير اللي كان  
يقطع نياط قلبي من جوا....

وكثير وقفت قدام مرايتي.. واستجمعت شجاعتي.. وقررت أرد وما  
أسكت.. وأدافع عن حقّي.. حتى عالمراية وأنا لحالي.. وأنا بمثل ردّي  
عليهم وكيف بدّي آخذ حقي وأدافع عن نفسي.. كان قلبي يدق يدق  
يدق.. ورجلي يرجّوا.. عضلة الفخذ تصير ترجّح لحالها.. وأنبسط من حالي



إني رديت.. وأتخيل وجوههم وهم خائفين مني.. وبس أرجع أتذكر شو صار.. أسكت شوي وأنهار قدام مرايتي وأبكي.. ما في فائدة.. كنت جد ضعيفة....

آخر سنة في التوجيهي كانت زي آخر سنة في السجن.. كنت بعدّ الأيام عدّ عشان أخلص من المدرسة والاستعباد اللي كنت فيه.. كنت بدّي أهرب للجامعة المنيحة اللي بسمع عنها.. وكنت بدّي اياها تكون بداية جديدة في حياتي.. ناس جداد.. ما يعرفوني.. ما راح يستغلوني أو يخوفوني.. وقررت أكون قوية الشخصية.. ويكون عندي أصدقاء جداد و حياة جديدة وأطوي الماضي الأليم الضعيف...

ودخلت كلية التربية.. وفعلاً، أولها كان الموضوع عادي.. والجامعة غير المدرسة.. الناس أوعى وأكثر أدبا وهيكل.. مع هيك كنت أنا هي أنا.. أخاف أطلب من الناس أي شي لو كان حقّي.. اذا الكنترول نسي أو تناسى يرجع لي الباقي.. أستحي أطلبه منه.. وإذا تجرّأت تجرّأت يطلع صوتي خافت جداً جداً ووجهي أحمر أحمر وأكون أرجف.. ومرات كثير أنزل بدون الباقي.. عشان هيك صرت دايماً أخلي معي فراطة عالقدّ... ناهيك طبعاً عن التحرش الجنسي في الباص اللي أبدأ ما عرفت أحمي نفسي منه إلا بالهروب..

في ناس كانوا يشوفوني مؤدّبة وخجولة.. وبنيت ناس ومربّية.. بس أنا كنت عارفة حالي أكثر منهم.. ومع هيك، مرّت علي فترة أقنعت حالي بهذا الشيء.. إنّي مؤدّبة وشاطرة وما بأذي حدّ.. وحاولت ألقأ للدين عشان أرتاح.. إنّه المسلم من سلم المسلمون من لسانه ويده.. وإنّه العفو من صفات المسلم الحقّ.. وإنّه الأجر في عدم ردّ الإساءة وأحاول أقنع نفسي انه

هذا إيمان وتقوى.. مع إتي كنت عارفة من جَوَّاي انه كل هذا ضعف بس..  
لكن كنت بواسي نفسي.. على الأقل لأخلص جامعة..

وحاولت أيامها أقرأ عن الموضوع على الانترنت.. في تنمية الذات  
وتوكيد الذات وكل هذا الكلام.. في كان كثير كلام ملخصه "زيدي ثقتك  
بنفسك".. بس كيف أزيدها يعني؟ كان كلام فضفاض ومطاط وما يفيد..  
يمكن ربح ضمير اللي كتبه بس ما كان يحل المشكلة....

تخرجت ولقيت شغل في مدرسة ابتدائية.. وحمدت ربي إني بالآخر راح  
أتعامل مع أطفال ما بييجي منهم أذى.. وقررت أبذل جهدي إني ما أخلي  
أي طفل يتعرض للي تعرضت له..

بس اللي فاجأني هم المعلمات وجوهم.. والمديرة وتسلطها.. بدأت  
علاقتي معهم كلها بودّ كبير.. بس ما أخذ الموضوع أكثر من شهر عشان  
يميزوا إني ضعيفة ويتعاملوا معي على هذا الأساس.. المديرة كانت تبهدلني  
على أقل شي، بينما في معلمات ثانياً ما تسترجي تيجي ناحيتهم.. وإذا  
حكمت معهم تحكي بأدب.. بس أنا تصرخ علي بصوت عالي وإهانات..  
وآجي بدي أرد أخجل كثير كثير ووجهي يحمرّ ودموعي ينزلوا غضب  
عني.. والمعلمات الثانياً بيتسموا على وضعي وحالتي.. وجواتهم سخرية  
كاملة مني.. ومع إنه يكون الحق عليها، أرجع ثاني يوم وأنا أعتذر منها..  
والمعلمات.. حتى العاديات منهم.. مش الكاسرات.. كانوا يستضعفوني..  
ويشغلوني شغلهم.. بالمخاجلة.. وأخجل حتى أعتذر أو أتججج.. أخاف  
أزعلهم بأقل شي.. وأتحمل أنا كل شي.. بس ما يزعلوا مني...  
وجو التعليم النقي اللي عشانه دخلت كلية التربية، وكنت مفكرته هو  
المهرب طلع مصيبة..

وفقدت الأمل بكل شيء.. بالدنيا والناس والبشرية كلها.. كلهم صاروا  
وحوش بالنسبة إلي.. لغاية ما شفت محمد..

اتصلت إمامه في أمي يوخدوا موعد يشوفوني.. عجيبته لمحمد أنا..

وعجبني كثير.. ثقته بنفسه وصوته الجهوري وجسمه الضخم كانوا هم  
أمانني اللي بدور عليه....

خلال أسبوع خطبنا.. وصرنا لما نطلع نتعشى بره كنت لأول مرة في  
حياتي، بشعر بالأمان وسط المجتمع اللي طول عمري شايفته غابة... بشعر  
إنني مش خائفة.. مش ممكن أتعرض لأذى.. كان الأسد اللي بحميني  
وبحبيتي وسط غابة البشر القذرة هاي....

في بداية العطلة السنوية تزوجنا.. ومحمد ما كان غيبي أبدا. فهمني من  
أولها.. وشاف كم موقف بيني وبين اخواته أثناء الخطبة.. وشاف كيف  
سكتت انا.. دافع عني بس ما بهدلني على ضعفي ولا شيء.. ظل ساكت..  
ولما رجعنا من شهر العسل قعد معي قعدة طويلة.. وحكى لي انه حاسس  
اني عندي مشكلة في التعامل مع الناس.. وبده يساعدني أتغلب عليها..  
بكيت له من كل وجع قلبي لما فتح الموضوع.. وعلى مدار ساعات.. كنت  
أبكي واحكي وأحكي لأول مرة بحياتي.. حكيت كل قذارات نفسي وذلي  
لشخص بحبني وما راح يحكم علي ولا يصرخ علي.. ساعات من البكا اللي  
يقطعوا الكلام أو الكلام اللي بقطعوا البكا.. لما انهرت تماما.. ونمت في  
حضنه..

ثاني يوم.. قدم اجازة شهر.. وظل معي في البيت.. وقرر انه نبدأ برنامج  
علاج نفسي بسيط.. شرح لي محمد انه مشكلتي الأساسية كانت اني كنت  
مش مستوعبة الأذى كمفهوم.. ولا متقبلته في الدنيا.. ويتمنى يختفي ولا

اني أواجهه.. مع إني أكثر واحدة تعرضت له.. برأيه.. أنا ما كنت عاجزة اني أرد الأذى.. بس كنت خائفة لو رديت.. يجي أذى أكبر منه.. عشان هيك كنت أتخبى وراضعني ودموعي.. زي ما كنت أتخبى في الخزانة..

شرح لي كمان انه رب العالمين ما خلق الحيوانات وتركها على الفطرة عبث.. الحيوانات موجودة عشان نتعلم منها لو توّهنا عن الفطرة.. والحيوانات بتتقبل حقائق الحياة والأذى المجتمعي أكثر منا.. عشان هيك كل الحيوانات بتدافع عن نفسها.. بدون استثناء..

الخطوة الأولى في علاجي كانت اني أشوف الأذى عشان أقبله كمفهوم.. انه شيء موجود وما راح يزول ولا بنقدر نهرب منه.. وبدأ محمد يورجيني مشاهد افتراس على اليوتيوب.. أسد بفترس حمار وحشي أو غزال.. فهد بفترس قرد.. ومشاهد مثل هيك.. أولها ما كنت أقدر أشوف.. ما أتحمّل الألم.. لكن مع ضغطه الشديد.. صرت أتفرج وأكمل.. وكان قلبي يتقطع على الحيوان الضعيف.. ودموعي ينزلوا.. بس كنت أكمل وأحضر..

شوي شوي.. صار قلبي يقسى.. وصار محمد يورجيني فيديوهات أقسى شوي.. فيديوهات الضباع.. اللي بفترس ضحاياها أحياء.. ومع كل فيديو كانوا دموعي شوي شوي ينشفوا.. ورجفة قلبي تروح.. وصرت أحضر بقلب ثابت ما يهتز.. شو ما كان الألم.. وامتحان هاي المرحلة كان اني أشوف فيديو لضبع بيوكل صغير حمار الوحش من وجهه وهو عايش.. وحضرته وانا ثابتة.. كنت خلص.. تقبلت وجود الأذى..

المرحلة الثانية من علاجي كانت تدريبي على التعرض للأذى والرد عليه.. بدأ محمد يمثل انه هو الجلاد وأنا الضحية اللي بتتعرض لاعتداء لفظي.. وصار يمثل انه بأذيني في الكلام.. ويعلمني كيف أرد.. مسلي كان

الموضوع.. ومع أول رد الي.. كان فعلا رائع الشعور.. وأسبوعين كاملات  
من التدريب.. صار عندي بعدهم القدرة على امتصاص الأذى وسرعة في  
الرد على تقريبا أي إساءة..

وقتها وصلنا للمرحلة اني أطبق عملي.. وعلمني محمد أكون دائما  
متحفزة ومستعدة لهجوم الناس.. لأن هاي هي الغريزة اللي بتحمي  
الحيوانات وقت الخطر.. وانه لو وصلت أي مكان بتوقع فيه الإساءة،  
التحفز هو اللي راح يقويني ويسرع ردود أفعالي..

والامتحان كان انه عزم أخواته وأهله عنا عالعشا.. وطلب مني أرد على  
أي كلمة بحكوها بحقي زي ما تعلمت.. لأنه برأيه الانسان لو ما قدر  
يدافع عن نفسه أمام ناس بهتم فيهم، مستحيل يدافع عن نفسه أمام ناس  
بكرههم.. ووصلوا بيت حماي عالعشا.. وكان موقف صعب.. بس محمد  
طممني وقبل ما يجوا حضرت فيديو الضبع وصغير حمار الوحش كمان مرة..  
ورجعت لي قوتي..

واحنا عالعشا.. رمت أخته كلمة انه "شو هالأكل الزاكي؟ من أي  
مطعم هذا؟ مش مبين أكلك!".. استجمعت قوتي وتقبلت الأذى.. ورديت  
لأول مرة بحياتي وقلت لها " هذا طبيخي.. اذا ما بتعرفي. تعمي زيه.. تعالي  
بعلمك حبيبي.. راح تحتاجيه لما تتزوجي " وأعطيتها ابتسامة زرقا... طبعا  
هي كانت فوق الثلاثين ومش متزوجة.. فكلمتي ضربتها في مقتل..  
وكملت أكلها في صمت.. ونجحت في الامتحان.. ويا الله الشعور شو كان  
رائع!!!

قبل ما أرجع للدوام ومحمد يرجع لشغله.. اشترى لي محمد اسوارة ذهب  
منقوش عليها "الآن هنا".. وحكى لي، لما تتعرضي لأي إساءة شوفي

الإسواراة.. وتذكري إنك لازم تردّي الآن وهنّا.. وإلا ما راح تسامحي  
نفسك على جرح كرامتك..

ورجعت من العطلة عام المدرسة بشعور رائع.. كان في رهبة.. بس كنت  
متحفزة ومستتية اي وحدة ترمي أي كلمة... ومن أول يوم بدأت  
الاعتداءات وبدأت الردود.. تغلبت أولها صح.. وصارت مشاكل.. بس  
محمد كان معلمني ما أخاف من شي نهائيا وكان معي يوم بيوم.. ويمكن  
مرّات ما كنت ألاقى الرد المناسب.. بس كنت أرد على أي حال.. وشوي  
شوي صرت محترفة ردود.. وقلّت الاعتداءات..

الي ستين وشوي متزوجة الان.. بيت حماي بعتبروني كنة كاسرة  
تمسكنت لما تمكنت.. وفي المدرسة أنا المعلمة الكاسرة اللي ولا معلمة  
بتستجري تيجي في طرفها.. ولا ولية أمر طالب بتحب تيجي تشوفها..  
والمديرة نفسها ما بتحب تحضر لي حصص.. وفي العيلة.. الكل بحسب  
حساب يرمي لي أي كلمة بلا ما يسمع مكانها عشرة.. متحفزة وجاهزة دايبا  
للرد.. محمد هو الشخص الوحيد في العالم.. اللي بكون في حضرته أنثى  
هادية طبيعة..

لما بتطلع على صوري زمان.. بحس حالي غريبة عن حالي.. العيون هاي  
مش عيونني.. النظرة البريئة هاي مش نظرتي... حتى ملامح وجهي  
اختلفت.. وجهي القديم كان رخو ولزج وضعيف ومسكين.. كأنه بلا  
عظم.. بس وجهي الجديد كأنه قُدّ من حجر.. والرّوح غير الرّوح.. ما ظل  
منّي إلا إسمي..

بس كل هذا مش مهم.. المهم إتو انا مبسوطه اني وقفت كثير ناس عند  
حدهم... ولسه عندي رسائل قديمه كثير لازم أرد عليها.. وراح أرد عليها  
الآن وهنا.. والزمن طويل والحياة واسعة.  
تمت..

## لودفيچ إيرهارد (عليها السلام)

يمكن من أصعب الأسئلة اللي بتواجه الإنسان أو بوجهها لنفسه بالأحرى، هو هل هو مخيّر أم مسيرّ؟ هل حياته والوضع اللي وصله اله كان نتاج فكره و اختياراته الحرّة؟ أم ضحية ظروفه القاهرة؟ يمكن الإجابة بالظروف بتكون ذات وقع أسهل على النفس، وبتريح الانسان من لوم ذاته.. لكن هل هذه هي الحقيقة؟

أول شي بتذكره كان واحد من أكثر المواقف اللي بتحفر بذاكرة أي طفل.. كنت في الصف الخامس، وكان تقريبا فصل الربيع.. وفي غمرة انتباهي مع الاستاذ وتركيزي في درس اللغة العربية، دق باب الصف.. انفتح الباب وشفّت المدير ومعاها عمّي... وبعيون كلها دهشة وخوف، راقبت الحديث الهامس بين الرجال الثلاثة اللي غادرت على اثره غرفة الصف.. في أجزاء من الثانية، كان احساس مخيف بملائي انه صار شيء أكبر من الفعل والفاعل والمفعول به، وأكبر من حصّة العربي، ويمكن أكبر من المدرسة كلها.. وقبل حتى ما أعرف شو صاير، كانت دموع الخوف من المجهول بدأت تنزل..

وفاة والدي وأنا في الصف الخامس كانت يمكن هي عنوان لحياتي فيما بعد.. وحياة والدي بالضرورة.. لكن ما كانت هي التغيير الوحيد.. في نفس



السنة وفي الصيف، وبعد عدة مناكفات بين جدتي وأمي، طلعنا من الشقة في  
بناية سيدي، وانتقلت أنا وأمي للعيش في بيت جديد.. لكن في نفس المخيم..

بيت مكون من غرفتين وصالة صغيرة مع سطح واسع.. في إحدى  
الشرايين المتعرجة اللي بتشكل مخيم الوحدات..

طبعاً اليتيم والفقر والترمل وغياب المعيل والمعين هي أسباب كافية لجعل  
أي حياة مثل حياتنا شيء تعيس.. ومادة خصبة لأي رواية بتتحدث عن  
حياة المهمشين.. لكن واقع حياتنا كان مختلف تماماً.. والفضل كله يعود  
للسيدة العظيمة اللي تربيته وتعلمته على أيديها..

بعد ما انتهى مسلسل الترحيل لأثالثنا البسيط، ورتبنا بيتنا الجديد  
المتواضع، جلست أُمي معي، وبكل حكمة وهدوء فهمتني انها اشترت هذا  
البيت عشاني وعشانها.. وانه ما راح نرجع على البيت القديم، بس راح  
نشوف سيدي وستي وأعمامي.. وانه ما لنا غير بعض، وانه احنا بحاجة  
نشتغل عشان ما نستنى فلوس من أي حد.. وانه الشغل مش عيب ولا هو  
شيء سيء.. على العكس، متعة الحياة هي في العمل والاجتهاد.. وهذا هو  
اللي بعطي الانسان قيمته.. وهاي كانت المقدمة عشان تخبرني انها تبدأ  
تشتغل في لجنة زكاة المخيم.. وأبدأ أنا كمان في العمل..

أُمي ما كانت امرأة متعلمة تعليم عالي، كانت مخلصه للصف العاشر  
بس، وكانوا بسموه على زمانها "المترك"، لكن كانت ذكية بالفطرة..  
وأسلوبها في الحياة عموماً، ومعني خصوصاً كان بتسم بالمرح والذكاء..  
ومقنع تماماً..

بدأت أُمِّي شغلها مع لجنة الزكاة، ومعه علمتني اني أنا وإياها لازم نصير تجار.. وأصحاب مشاريع صغيرة.. وفهمتني انه هذا ذكاء وتميز.. وأنها من زمان كان نفسها تعمل هيك، بس الوالد الله يرحمه كان معارض..

زبطنا السطح عنا، وعملنا بيت "خم" دجاج.. وجبنا فيه 4 دجاجات وديك كانوا رفاق طفولتي.. وكنت أنا مسؤول عنهم.. ومعهم، ما كنا أبدا نشترى بيض من الدكان.. ومع شوية تشجيع من أُمِّي، بدأت أبيع حلاوة سميد وهريسة كانت أُمِّي تعملهم في البيت..

في البداية كان الموضوع محرج ومخجل، لكن فرحة أُمِّي بالمبالغ البسيطة اللي أجيبها كان يشجعني ويحمسني إنِّي أشتغل أكثر وأصير منتج أكثر وما أخجل أبدا..

ومشيت حياتنا على هذا المنوال، وكل شوي نضيف نشاط جديد.. صرنا نزرع البقدونس والفلفل والبصل والنعنع في تنك على سطح البيت.. وكثروا الدجاجات.. والبيض اللي يزيد عن حاجتنا كنت أنزل أبيعها في سوق النادي..

وبالإضافة لهيك، كانت في مواسم البندورة تشتري كميات كبيرة.. تعصرها وتعملها رب بندورة عشان نستخدمها لأيام الغلا.. وفي مواسم الخيار والجزر.. كانت تشتري كميات كبيرة، ونخللها سوا في برميل كبير ونبيعها للسوبر ماركت اللي في شارع الثلاثين.. وطبعا الخبز واللبن واللبننة والجبنة والمخللات والمربى.. كانت كلها صناعة منزلية..

كانت تدابير بسيطة، ما عملتنا أغنياء، بس مع راتب اللجنة البسيط، كانت كافية انها تساعدنا نمشي بحياتنا.. وكنا فعلا سعداء.. وبرغم انه الفلوس كانت عالقد، عمري ما حسيت انه ناقصنا شي، أو احتجنا ندادين

من انسان.. على العكس، كان دائماً في فلوس شوي زيادة.. والجمعيات اللي كانت أمي تدخلها.. كانت ما تخلص..

بس بعيدا عن هاي التدابير، كان أهم شي نجحت فيه أمي هو انها ما خلقت عندي ولا عندها بالضرورة، عقدة الفقراء في الحقد على الأغنياء أو تمنى ما عندهم، والشعور الدائم بانعدام المساواة..

كانت دايماً تحكي لي انه نقص الدخل حقيقة ثابتة، لكن الفقر مجرد شعور اختياري.. وانه الفقراء بغضبهم وحقدهم هم بخلوا حياتهم أسوأ بخياراتهم الشخصية، يعني الفقير من وجهة نظرها مش لأنه فقير لازم يكون بيته وسخ، أو ملابسه قذرة.. أو أخلاقه سيئة.. ولا بالضرورة لازم يكون غاضب وناقم.. وإنه لو قدر يخرج من وهم الغضب والخوف اللي هو فيه، ويدخل في مظلة العمل والقناعة، ممكن كثير يقدر يستمتع بحياته بأبسط الأشياء.. وأنها من خلال خبرتها في الحياة والعمل، اكتشفت انه الانسان دائماً بتهدأ له انه بحتاج فلوس أكثر ما هو فعلياً بحتاج.. وفي أشياء كثير ممكن يعملها بدل ما يشتريها.. والفلوس هون بتكون كسل وأنانية مش أكثر..

وأنها كثير حاولت تحكي هذا الكلام للعائلات اللي بتتعامل معهم في لجنة الزكاة، بس ما حدا بسمع..

كمثال، كان بيتنا -على تواضعه وتواضع أثاثه- جميل، ومرتب ونظيف.. ودائماً نظيف وريحته حلوة.. وكانت صاحبة ذائقة فنية.. كل ما تشوف شي يعجبها في بيت من اللي في المسلسلات المصرية تحاول تعمله عنا في البيت.. كان عنا تحف مثلاً.. وتحف حلوة كانت تتعب وهي تدور عليها في أسواق المستعمل، وتجيها بأقل الأسعار.. وكان عنا شجر زينة في البيت.. ومن إحدى الجمعيات اشترت لنا مكتبة وحطيناها في الصالون...

وكبرت، وكانت هاي هي الطريقة اللي تربيت ونشأت عليها، واللي ما بتعتمد بشكل أساسي على وجود النقود، بل على العمل والجهد وصناعة الأشياء.. كان كأنه اقتصاد غير نقدي.. يعني في بيتنا، على تواضعه.. كنا قليل جداً ما نحتاج نشترى شي... كنا بنحتاج الفلوس بس عشان الملابس.. او المواصلات.. وكانت أمي دايا تحكي.. انه الانسان بطبعه قوي ومتفائل وشغيل، وما بكسره إلا الجهل والمرض.. وهذا هو الفقر الحقيقي، بس باستثناء العلاج والتعليم، كل الناس بخير..

في الجامعة طلع لي اقتصاد.. وبدأت دراسة.. طبعاً الجامعة كانت غير تماماً عن المخيم، خصوصاً كلية التجارة.. لكن تهيئتي النفسية أبداً ما خلتنني أتأثر بالتفاوت الطبقي.. أو أشعر بأي مركب نقص.. موضوع الفلوس نفسه.. بحياته ما عمل لي مشكلة..

في الجامعة درست كل تاريخ الاقتصاد.. الكلاسيكي والحر ونظريات آدم سميث وكينز وكارل ماركس والاقتصاد الإسلامي وغيرهم.. وما قدرت أوافق على أي نظرية فيهم بدون تحفظ.. كانت كل النظريات موجهة لمصلحة الرأسمالين.. وكلها باستثناء الاقتصاد الإسلامي - إلى حد ما - كانت بتركز على فكرة النقد والفائدة كأسس للاقتصاد.. وبتعتمد على الربح كقيمة عليا عند الإنسان.. على حساب العمل والإنتاج..

الصيغة اللي كانت بتوافق تطلعاتي وآرائي والتربية اللي تربيت عليها لقيتها عند الاقتصادي الألماني لودفيج إيرهارد.. نظرياته كانت واقعية وعادلة، وتحابي الفقراء ومتوسطي الدخل.. فكرة اقتصاد السوق الاجتماعي القائمة على تأمين التعليم والعلاج المجاني للجميع مع فتح باب المنافسة الحرة للجميع، كانت تجسيد لكل شيء آمنت فيه وعلمتني إياه أمي.. وهذا دفعني أحكي لها.. أنت لودفيج إيرهارد الشرق..

خلصت بكالوريوس، وطموحي كان أكمل الماجستير وأعمل رسالة حول نظرية اقتصادية بتدمج كل شي بفكر فيه.. من نظريات لودفيج ايرهارد حول العدالة الاجتماعية ونظرياتي الشخصية حول الفقر والاقتصاد غير النقدي وفكرة الملكية الخاصة الموجودة وغير الموجودة في الإسلام..

لكن الوالدة حبت إني أتزوج وتشوف لي أولاد.. وفعلا، بعد التخرج اشتغلت في شركة شحن في عمان، وبدأت مشوار التوفير عشان الزواج.. بعد سنتين كنت أنا و فداء (فتاة بسيطة من محيطنا ومن ثوبنا، اختارت لي اياها أمي) زوجين سعيدين عايشين مع أمي..

حملت فداء.. وفي اللحظة اللي تأكد فيها حملها.. بدأت أمي حملة محمومة للتحضير للطفل القادم.. كانت كأنها هي اللي بدتها تولد.. كانت تدلل فداء دلال غير طبيعي.. وتمنعها تعمل أي جهد.. وأجبرتني أبداً أجيب سرير للطفل وأحضر له خزانة، وعرباية حتى.. وصارت بدتها تتخلص من الدجاج والحمام عشان ما يآثر على الطفل..

مشاعرها العميقة والمفاجئة تجاه الطفل القادم عكست لي حرمان قديم كان في نفسها تجاه الأطفال.. وكشفت لي "جدتي لأبوي" في إحدى الزيارات، انه إمي كان عندها مشكلة في ثبات الجنين.. واني أنا الوحيد اللي كملت مشواري بين ستة أجنة حملت فيهم..

وشاء الله انه فداء يكون عندها نفس مشكلة إمي.. أجهضت ثلاثة مرّات.. وفي كل مرة كانت أمي الي عمره ما هزها شي.. تفقد أعصابها وتنهار وتلوم علي وتطلب مني أشوف أطباء أحسن.. وفي الحمل الرابع، تعاملنا مع أحسن دكتورة نسائية وتوليد.. وتكلفة إبر التثبيت كانت عالية،

لكن عشان "أمل" وعشان إمي كان كل شي بهون.. واقتربت بنتي أمل من الشهر السابع كجنين..

في هديك الأيام.. ومع قلق أمي المتزايد.. وصحة فداء اللي على المحك، وأزمتي المالية اللي سببتها أجور الأطباء، كان الهدوء اللي ميز كل حياتنا اختفى.. صار عنا قلق وخوف الفقراء اللي دائماً كنا بعداد عنه.. كنت بستدين لأول مرة في حياتي.. وصرت عصبي أكثر.. وبسهر أكثر.. وبفكر أكثر وبقارن أكثر.. وبحسب اللي في محفظتي أكثر.. كان الخوف والغضب اللي ياما أمي حكته عنه مستوطن بداخلي.. خوف من المستقبل والمجهول.. خوف الفقراء..

رتبت جمعية لولادة فداء بتستحق في الشهر الثامن.. لكن أمل كانت أسرع.. ولدت بشكل مفاجئ في الشهر السابع، وطبيعي كانت تدخل الخداج..

عملية الولادة كلفت ٨٠٠ دينار تقريبا.. وبدأ عدّاد الخداج يعدّ.. كان عندها مشكلة في عدم انتظام دقات القلب بسبب عدم اكتمال أنسجة القلب.. كنت بين المطرقة والسندان.. بين حالة البنت الصحية واللي اجت بعد انتظار.. وبين تكاليف العلاج اللي بتزيد يوم عن يوم في المستشفى اللي اضطرينا نروح عليه عشان الدكتورة..

كل ليلة كانت ليلة عذاب فعلي.. انا وفداء نتناوب عند الصغيرة، وإمي تظل معها من الصبح لليل.. بس بتدعي وتبصلي لسلامتها..

بعد أسبوعين، كنت عارف اني ما راح أقدر أدفع تكاليف المستشفى أكثر من هيك.. وما كان في أي شاغر عشان أنقلها عالبحير.. وقررت أترك الأمور لربي وأهتم بس بسلامة البنت اللي تحت الأجهزة.. كانت الدنيا

قاسية وباردة وحقيرة.. وأنا كنت في منتهى الضعف والذل.. وتحت رحمة  
أي شيء.. وكل شيء..  
كنت مجرد رجل فقير..

في الأسبوع الثالث من الخداج، وفي ليلة باردة توفت أمل.. ما تحمل  
قلبها الضعيف جهد البقاء على قيد الحياة.. في تلك اللحظة كانت مشاعري  
مختلطة ومؤلمة.. لكن ألمي كأب وكزوج كان لا يقارن بألمي على أُمِّي اللي  
انتظرت هاي البنت من كل قلبها.. وكأنها بنتها.. أُمِّي يومها ما بكت..  
كانوا عيونها مثل الجمر.. والدموع محبوسة فيها.. لكن ما بكت.. كانت بس  
تحمد الله وتسترجع..

المأساة الحقيقية كانت انه المستشفى احتجزوا جثة الصغيرة لحين تسديد  
المبلغ.. اللي وصل لحوالي 2000 دينار، غير أجور الولادة..  
مع كل المشاكل اللي عملتها معهم ومحاولاتي لأخذ بنتي بالقوة وبكاء  
أُمِّي المرّ إلا انهم ما أفرجوا عن جثمان البنت الا بعد يومين.. لما دفعت لهم  
1700 دينار وقسطنا الباقي..

كانت الحجة انه المستشفى مؤسسة استثمارية، ودفع فيها الملايين، ومن  
حقهم ضمان فلوسهم.. وانه ممكن يتبرعوا من حر مالهم، لكن مش من  
عوائد المستشفى..

يوم الدفن، أُمِّي ما رضيت حدا غريب يجي عالمقبرة.. دفنت أمل  
بأيديها.. حضنتها أكثر من ساعتين عشان تدفى ويروح برد الثلجة.. وغنت  
لها أغاني الأطفال لما بدهم أمهم تنيمهم وقرأت عليها ما شاء الله أن تقرأ من  
القرآن ودفنتها..

بعد وفاة أمل بعدة أيام أمي كانت شخص ثاني تماما.. شالت كل الدجاج والحمام وطيرت العصافير.. وتركت شغلها نهائيا.. كانت بس تجلس على السطح وتتطلع في المجهول.. حاولت قدر الإمكان أخفف عنها بدون فائدة.. وفي أول رمضان توفت على سريرها وهي نائمة..

يمكن مشيئة ربنا هي اللي أخذت روح أمل.. لكن أنا واثق انه خوف وقهر الفقراء اللي أمي عاشت عمرها تحاول تقضي عليه هو اللي قتلها.. كانت فكرة انه تروح من المستشفى ومش قادرة توخذ معها جثمان حفيدتها أكبر من احتمالها.. عاشت عمرها تهزم الفقر واقعا وفكرا.. لكن في اللحظات الأخيرة من حياتها هزمتها..

لكن أنا ما انهزمت.. والروح اللي تركتها في ما راح تموت.. راح تحمل فداء وراح تجيب أمل وراح تعيش أمل.. وراح أكمل ماجستير وأعمل رسالتي.. وراح أهديها لروح لودفيج ايرهارد الشرق.. عليها من قلبي السلام..

تمت..

### ملاحظات:

- مبني على وقائع حقيقية
- لودفيج ايرهارد هو أول وزير اقتصاد في ألمانيا الغربية بعد الحرب.. ساهمت سياساته في اقتصاد السوق الاجتماعي القائمة على العدالة الاجتماعية في نهوض ألمانيا وتحويلها من بلد مدمرة إلى أقوى اقتصادات العالم في أقل من 20 عاما فيما عرف بالمعجزة الاقتصادية..



## الطِّيف..

-1-

حيّته و أنا سنة ثانية جامعة.. آخر الفصل الأول.. في هاي الفترة من الشتا اللي بكون فيها غشاء القلب أرقّ ما يمكن.. وطائر الروح أرقّ ما يمكن.. بتهيأ لي كل قصص الحب العظيمة بدأت في الشتا.. ما بتخيل في حب يبدأ في الصيف.. الحب برعم أخضر سحري.. بده مطر و بده برد.. و بده هاي الخفة في الروح اللي ما بتيجي إلا في الشتا.. وخصوصا بعد العصر أو في الليل.. لما الانسان يحس حاله أضعف من ريشة.. ويكون القلب في منتهى الوحدة..

التقينا بالصدفة.. كان أكبر منّي ب ثلاث سنين.. متخرّج جديد وشغله على قده.. مش جميل زي أغلفة المجلّات ومش غني زي أمراء الحكايات.. ما معه إلا أحلامه و إيديه اللي راح تبني أحلامه زي ما كان يحكي.. بس بتعرفي؟ كان في شيء خلّاني أحبّه.. كان بسيط وممتدّ مثل حقول القمح.. كان بتكلّم بهدوء و يصمت كثير.. ومعظم كلامه بعيونه.. ضحكه تبسم.. وشروده تفكير.. وربّنا معطيه حكمة يشوف بواطن الأشياء ويتكلّم بجوامع الكلم..

وعشت معه سنة بس أتعرف عليه.. وأغرق شوي شوي في مجاهيل  
حبه.. وأكتشف شخصيته زي كأني بمشي في غابة مقدسة أو بفتح كتاب  
سحري قديم.. كان شي تاني..

وبعد سنة بالزبط من موعدنا الأول وتحت نفس المطر وعند نفس  
الشجرة قال لي انهم جاين يخطبوني..

ما حدا يومها كان فرحان مثلي.. مين كليوباترا؟ مين بلقيس؟ مين ماري  
أنطوانيت!؟ كنت أنا ملكة الكون وسيدته.. ودخل بيتنا كأنه السيف  
الياني.. غمامة ملائكية على شكل رجل.. راسي رسو الجبل.. فيه حزن  
وجلال نبي.. شديد كخيظ حرير، مضيء مثل صلاة الصبح ورقيق مثل  
المطر.. كان لابس قميص خمري وبنطلون أبيض، ومع وجهه الشاب  
وحكمة عيونه اللي عمرها ألف سنة كان كأنه سيدنا الخضر دخل بيتنا..

وخطبني.. وكتبنا الكتاب ولحظة توقيع العقد كانت عندي أهم من فتح  
القسطنطينية وأهم من إعلان الاستقلال.. كان توقيعني على الوثيقة بمثابة  
توقيع عقد مع الجنة.. وزغاريد الفرحة اللي طلعت من بيتنا كانت مقدسة  
مثل تكبيرات العيد.. ومع أنها كانت شتا و مطر.. إلا اني كنت متأكدة انه  
حتى حمام مكة طار و اجا يرفرف عند بيتنا..

وبدأت خطبتنا... كنا نطلع كل أسبوع مرة أو مرتين تقريبا، ويسهر  
عنا مرات.. بس نطلع، نروح نتمشى في شوارع جبل عمان القديمة.. ونوكل  
بطاطا و ذرة.. كان بسيط جدا.. وعميق جدا.. كان يعرف شو بدني قبل ما  
أحكي.. ويعرف كيف يخليني أحكي كل شي بقلبي بدون خوف أو عقد أو  
خجل.. كنت معه أشجع من ما أكون لحالي.. وكان عنده قدرة يبسط

الأشياء بحيث ما تبين عيوب.. ما كنت أخاف من وزني أو طولي أو شكل أنفي.. كنت ملكة متوجة على كل النساء من الصين إلى المغرب..

ولما كان يسهر عنا في البيت، كنت أنبسط أكثر.. كنت أحسه أقرب إلي.. وكنت أراقبه كيف يتدفى عند الصوبًا.. وكيف يقشّر كستنا وكيف يقحمش خبز مع زيت و ملح..، كان يحب الزيت و الملح.. وكانت قعدات البيت عنا بروفا للحياة اللي بدي أعيشها في كنف هذا الخضر العظيم..

أول ما تخرجت تزوجنا.. وسكننا في هذا البيت... رحنا مصر بشهر العسل.. كل أيامي معه كانت عسل.. 14 سنة كانوا هم كل عمري.. شو بدي أقول لك لأقول لك؟

لا تحكي هيك.. ولا تصدقي شو بحكوا لك الناس.. قاسم بعده عايش معي.. بنفطر سوا كل يوم وبنشرب قهوة سوا.. وبنلقط الورد سوا.. قاسم لسه معي.. وأنا أكيد معه..

-2-

شو بدي أقول لك عنه يا خالتو؟ أنا عارفة شو أقول! الله يرحمه بس.. من يوم ما ولدته لقاسم وهو بركة فوق بركة.. من وهو صغير وهو حنون حنون عا لجميع.. والله في هاالأرض كلها ما كان في متله ولا في قلب أبيض مثل قلبه..

الله يرحمه قد ما كان باسطني ومهيني.. من ما وعي عال الدنيا ما عمره قال لي لأ.. دون عن كل إخوانه.. وبس كبر واشتغل بعمره ما نقص علي أو علي أبوه أو اخوانه شي.. كان يزعل ينجن لو عرف انه ناقصني شي وما حكيت له.. ومش بس لاهله، لكل الناس والله..

ايدو كانت دايا مفتوحة للخير والي في جيبته مش إله! وكنت دايا أقول له.. يا ماما خلي معك شوية فلوس.. كثير هيك.. يقول لي يا إمي هاي فلوس ربنا، احنا بس المهم نساعد الناس.. وان شاء الله ربنا يتقبل.. وين بدي ألاقي مثله ابني هادي خالتو؟! وين!؟

ما كان في حدا ما بحبه.. طوب الأرض بكبي عليه.. الله يرحمه ويتقبل منه.. ويصبرنا على فراقه.. آخ بس آخ.. يرجع الواحد ويقول هاي إرادة ربنا.. شو بدنا نعمل!؟..

-3-

بقولوا الموت ما فيه شهاة، وما بتجوز عالميت إلا الرحمة، بس مش قادرة أدعي له بالرحمة.. قلبي مش مطاوعني..

من أول ما دخل بيتنا وخطب أختي وأنا عرفت من عيونه إنه مش مزبوط.. كان في شي ثعلبي في نظراته.. اشي بنحسّ ما بنقال..

كنت كثير ألمحه بتطلع علي بطريقة غلط.. وقلت يمكن هاي شكوك وهو اجس بس.. وبلاش أحكي لحدا يقولوا هاي غيرانة من أختها عشان هي لسه ما تزوجت.. بس الأيام أثبتت إنها لا شكوك ولا هو اجس..

من بعد ما تزوجوا بثلاث شهور يمكن، استغل أول فرصة كنا فيها لحالنا و تحرش في على شكل مزح.. بس ما كان مزح!! نهرته طبعاً.. بس كان ذكي و عارف انه ما راح أحكي لأختي شي.. فصار يستغل أي فرصة نكون لحالنا عشان يتحرش في.. مفكر يعني عشان ما تزوجت إني رخيصة.. والمشكلة كل الناس مخدوعين فيه! وأولهم أختي..

لا طبعاً ما قدرت أحكي لها! عبث كان أحكي لها.. كانت مستحيل تصدق!! ولا حدا أصلاً راح يصدق! كانت راح تطلع إني مكبودة وغيرانة وبتبلى عليه!! كل الناس بحبّوه كانوا.. ولو صدّقوا وكشفتة؟ شو كان راح يصير!؟ كنت راح أخرب بيتها بس.. فاختصرت الموضوع وتجاهلته قدر الإمكان.. الله يصطفى فيه..

بس والله ما حارق قلبي إلا أختي وولادها.. خصوصاً البنات، حارقين قلبي حبيباتي.. كثير زعلانين عليه..

-4-

بداية، الله يرحمه ويغفر له ويجعل مثواه الجنة.. رحيل أبو طارق كان فعلاً خسارة كبيرة إلنا للشركة ولأصدقاءه وعائلته أكيد.. أنا ومجلس الإدارة وكل الموظفين مصدومين تماماً.. ومش قادرين نصدق..

ما بدي أحكي عن نزاهته وأمانته وتفانيه في عمله لأنه هذا واضح للجميع وما بحتاج شهادة.. والنمو والأرباح اللي حققها للشركة في فترة إدارته كانت مضرب المثل.. لكن قبل هذا كله، فأبو طارق من لما دخل الشركة لآخر يوم فيها وكان أخ وصديق للجميع.. الصغير قبل الكبير.. لا يعوض حقيقة.. لا يعوض.. لكن هذا حال الدنيا.. الله يرحمه..

-5-

لشو جاي تفتحي جروحي يا خالتو انت؟ شو بدك أقول لك؟! بشو بفيد الحكى هلاً؟!!

طيب راح أقول لك.. وأنشري ما تنشري ما بهمني.. توخدي لك  
سيجارة؟

علاقتي فيه قديمة.. هي كل حياتي أصلاً..

ما بتذكر أي شي قبله.. من أول سنة في الجامعة واحنا سوا..

طبعا قبل ولاء.. ولاء عرفها متأخر.. أنا حبه الأول والأخير.. هي حيا

الله مرته..

لا لا.. هلاً هم بقولوا انه العشيقة دايبا بتكره الزوجة.. بس وحية

قهوتي اللي عمري ما حلفت فيها كذب إنه أنا عمري ما كررتها لولاء..

بالعكس.. كنت أنبسط انها باسطيته..

مع إنه أنا عرفته قبلها وكان لازم أنا أكون مرته.. بس برضه ما كررتها..

قاسم استغلني.. واحنا الاثنين عارفين هذا الكلام.. بحبني بس

استغلني.. وأنا كمان استغليته يمكن ما بعرف.. بس هو كان عنده شغلة

غريبة.. كان وقح وعارف انه وقح بس يبين انه ما عمل شي.. يعني قبل ما

يخطبها اجا قال لي.. بدي أخطبها.. قال هي رومانسية كثير وهو هيك

بحب.. وما بتوجع راسه.. بعكسي أنا.. مزاجية ومجنونة.. زي ما بقول..

هاد سؤال كبير.. قال لي وقتها لو تزوجتك راح أكرهك.. وراح

أطلقك.. وعشان نضل سوا.. لازم تكوني حبيبتني وبس.. بس هيك أحسن

أضل حبيبة بس..

لا ما سكتت له طبعا!! أرغيت وأزبدت وهددت ولعنت.. بس

عالفاضي.. ما قدرت أتركه.. كنت بحبه ولهلاً بحبه ولبكره راح أحبه.. في

شباب هيك.. انت يمكن صغيرة ومش فاهمة.. بس في شباب أنانيين..

بحبك بس ما بده يتزوجك.. ولا بده إياك تروحي منه بنفس الوقت..  
ويكون عارف أديش بتحبيه.. ويستغلك وانت راضية..

أكيد مش منطوق.. ليش هو الحب أصلا فيه منطوق!؟

شوفي أقول لك.. بتمر عالوحدة فترة.. بتقدر فيها تتزوج.. حتى لو من  
حدا تاني غير اللي بتحبه.. بس بعد الثلاثين خلص.. ما بتقدر.. نفسيا ما  
بتقدر.. القلب بتعب مهو.. كم مرة بده يحب القلب فكرك!؟

وأنا كنت مرتاحة بالصيغة اللي وصلت لها معه.. كنت سكرتيرته  
وحبيته وكل شي.. زوجة ثانية تقريبا كنت.. بس مش تحت مظلة القانون..  
وهو كان كتير كريم معي و بحبني.. وبس أزعل أزعل.. يوخدني معه في  
سفرة من سفراته ويراضييني.. وهاد كان نصيبي وأنا رضيت فيه...

مش عارفة.. بس يعني.. مش عارفة.. هو أنا قدام الموت شو ممكن  
أعمل؟ وكمان ضروري دايا نكون منتصرين وسعيدين في الحياة؟! ممكن  
ننهزم مرات.. في ناس بنهزموا بهاي المعركة اللي اسمها الحياة..

لا مو ندمانة.. عشت معه أحلى سنين عمري.. وهاد بكفي.. أخذت  
نصيبي من السعادة.. كمان هو راح بس القهوة ما راحت.. قهوتي لسه  
معي..

الله يسلمك حبيبتى.. ما شربت قهوتك..

-6-

والله يا أختاه، إنا لفراق هذا الرجل الصالح لمحزونون.. لكن عزاءنا أن  
هذا أمر الله.. "لا يستقدمون ساعة ولا يستأخرون" ..

أعرفه منذ جاء إلى هذا الحي.. قبل أربعة عشر عاما تقريبا قضاها هذا الرجل في حيتنا، كان فيها مثالا للمؤمن الحقيقي المدافع عن دينه وأمته.. المساعد الصامت لإخوته في الإسلام..

لا.. كانت مشاغله تمنعه وأنا أجد له عذرا في ذلك.. لكنه كان معنا في كل جمعة.. وكان في كل رمضان، يأتي إلي ويسألني عن المحتاجين من أهل الله.. يساعد هذا ويعلم هذا ويقضي دين هذا.. ويصر تمام الإصرار أن لا يعرفه أحد.. وأن يبقى هذا الأمر بيني وبينه وبين الله.. كان رجلا نادرا يا ابنتي.. قل أن يجود الزمان بمثله..

رحمه الله وتقبل منه وندعو الله أن يسكنه فسيح جنانه..

-7-

أعيد كل الجيران مدحوا لك فيه.. صح؟! ما أنا عارفة! شوفي أقول لك.. ما بتسجلي انت صح!؟

منيح.. هذا أبو طارق اللي الكل بحلف بحياته كان أوسخ واحد عنا في الحارة.. لا تتفاجئي ولا على بالك! سيك من اللي بقولوه الناس عنه!! هذا كلب مخبي بقشوره!! بس كان عنده طريقة يخدع الناس ما بعرف كيف!!

بوجهين كان!! جوزي لو تسأليه عنه ليقول لك هذا إمام الحرم.. بس أنا اللي بعرف وساخته.. وخداع وغشاش كمان.. ووقح لدرجة ما تتخليها..

لا، ما بقدر أقول لك تفاصيل..

أعيد.. لسانه أقوى شي فيه كان.. ولا شو خلاه.. أنا عارفة.. الله يغفر

للجميع بس..



ما أنا قلت لك لأ!! على فكرة انت وحدة وقحة! بتعرفي هالحكي؟!  
اطلعي بره! ما بدي أشارك معك بشي! خلص اللي عندي قلته!! أصلا مش  
مضطرة أقول لك شي أنا!! وأشطبي كل شي قلته!  
ما عصبت ولا شي.. مش شغلك.. اطلعي بره لو سمحت!!

-8-

والله يا اختي، احنا الناس المسخمطين ما حدا متطلع علينا.. لا حكومة  
ولا وكالة ولا هم.. والله لولاه كان علينا الله يرحمه ولا هالولاد ولا عمرهم  
تعلموا.. من وين كنت بدي أجيب؟ ما انت شايقة الحياة والغلا!؟  
الله يرحمك يا ابن خالتي.. والله انه نعم القريب.. وبقول لك القرايب  
عقارب.. لا والله ما هم عقارب!! الله يرحمك يا ابن خالي.. بس.. الله  
يرحمك..

-9-

يا زلمة هذا أبو طارق ما حدا بعرفه قدي! من أول يوم دخل فيه الشركة  
وكان مسؤول بس يأمن سيارات وأنا عارف انه غويط..  
بس كان جدع! غير الموظفين كلهم!! أخطبوط كان!! كان يعرف يحكي  
ويصاحب الناس كثير!! كنت تقعد معه تحسه إنه أخوك.. ولا كيف ترقى  
لمسك الشركة كلها؟ شاطر كان..

والله أنا عمري ما شفت شي.. الزلّة في دار الحق صار.. عيب الواحد يكذب يعني.. كانوا يحكوا انه السكرتيرة كانت تحبّه.. بس أنا ما شفت شي..

شوف! أنا محاسب هون من 12 سنة.. عالورق، ما حدا بقدر يحكي عليه كلمة.. بس أنا يعني كمحاسب شبه متأكد إنه كان يطلع.. بس مش زي هالمدرء الغشياء، لا.. كان حويط.. وما بخبط إلا خبطات ماكنة!! تأمين كارفور مصر متذكره؟! آه يوم ما المصريين سرقوه في الثورة، مهو كانوا مأمّنين عنا ولا شو!؟

في خبطة كارفور أنا متأكد إنه طلع له فيها كثير.. لأنه بنفسه كان ماسك الملف.. ما حدا اشتغل فيه غيره!! وقال لي بشير إبن عمتي.. بشتغل في البنك العربي مهو، قال لي بعدها بشهرين يمكن انه أبو طارق حط في حسابه ٩٠٠ ألف.. بلوة كان!! وكان يشتغل في البنوك والتمويل كمان! أخطبوط بقول لك!!

-10-

مش انت حكيتي مع أبوي وقال لك إنه كان قربينا الواو والروعة وكل شي؟ شو بذك مني!؟

شوفي.. ما راح أحكي شي عنه.. بس بدّي أقول لك انه الأغنياء ما يعطوا شي ببلاش.. يعطوك فلوس صح.. بس هادا لأنها أرخص شي عندهم.. بس مقابلها بوخدوا أغلى شي عندك!!

فسر!!.. ما لمس شعرة مني!! خلص، غطّ على قلبي ما بدّي أكمل!! لو سمحتِ خلص!!

أهلا وسهلا.. تفضلي.. شرفتي..

لا لا لا.. ما بقدر أحكي إنه أبو طارق هو مريض، لأ.. أبو طارق صديق عمري.. من أيام المدرسة واحنا أصدقاء.. خالصنا توجيهي من الشاملة سوا.. ما انقطعنا إلا فترة الجامعة كوني درست بمصر.. لكن أصدقاء من فترة طويلة.. وبيننا زيارات عائلية.. وزوجتي صديقة زوجته وأولادنا أصدقاء.. صداقة كبيرة..

في الحقيقة، كطبيب نفسي، لا يمكنني نشر أسرار مرضاي.. ناهيك عن أصدقائي.. لكن كون البحث مبهم ولأغراض علمية.. فممكن أتفق معك في الجزئية اللي انت وصلت لها، مع اختلاف التفسير..

شوفي، أبو طارق عاش طفولة صعبة.. وأهله كانوا من أفقر الناس.. طبعا حاليا هم غير، لكن طفولته كانت صعبة.. وتكلم عندي هون في العيادة عن ذكريات مريرة في طفولته.. تعرض لانتهاكات عديدة زمان وأكد تركت أثرها فيه.. بس ما كان يبرز أي ضعف.. ونتيجة عمله المكثف وعلاقاته الاجتماعية الواسعة.. كان عنده نوع من إدمان الإدمان.. كان لازم يكون مدمن على شي!! كان من داخله كرة كبيرة من التوتر.. فالإدمان كان بريحه.. بس من بره ما ببين شي..

شوفي أحكي لك يا نجوى.. في نظريتين أنا بعرفهم لتفسير أمور مثل هاي.. النظرية الأولى أنا بسميها التفكير الخطي.. بمعنى إنه عقلك ما يستوعب التناقضات هاي.. بتميل إنك تغلب وجهة نظر واحدة تجاه إنسان وتثبت عليها.. يا إنسان خير يا إنسان شرير.. فإن اخترت أن يكون خير فسقطاته هفوات.. وإن اخترت أن يكون شرير ففضائله تمثيل.. ما بتقتنع

إنه الإنسان بحمل الوجهين.. وهذا موجود فينا بشكل كبير.. وأتوقع نهجنا التعليمي ساهم إلى حد ما في هذا التفكير..

يعني أطرح لك مثال بسيط.. حسان بن ثابت كان شاعر الرسول (ص).. وهو شخصية محترمة لدى المتدينين.. لكن بتعريفه انه كان ممن خاضوا في حادثة الإفك لكلامه عن السيدة عائشة وطبق عليه الحد؟ فهل هو خير أم شرير؟! هذا السؤال تجيب عليه النظرية الثانية..

النظرية الثانية هي ما بسميها أنا، نظرية الطيف.. نحن طيف متداخل من الخير والشر.. وليس لنا وجه واحد.. يعني شخصية مثل أبو طارق ممكن نسميها شخصية مكعبة، ذات عدة أوجه.. مكعب كروي لو صح التعبير.. لا يمتلك ستة وجوه فقط.. لكن عدد لا نهائي من الوجوه كلهم أبو طارق.. وقلب هذه الكرة هو شيء مختلف أيضا، إنت ما بتعرفيه.. هذا هو الإنسان.. طيف.. والتناقضات هاي هي غير متناقضة في الحقيقة.. هي الألوان المختلفة اللي بتشكل الطيف..

أكيد.. في هاي الحالة راح يكون صعب عليك تشكلي عن هذا الإنسان وجهة نظر خطية.. لكن يمكن مش ضروري تشكليها.. لازم كل إنسان نحكم عليه ونصنّفه ونعطيه تقييم؟! مش شرط.. ممكن نقبل وجوده وبس..

ولو.. لا شكر على واجب يا نجوى.. أنا طبيب، وقسمي الطبي بحتم علي مساعدة أي طالب علم في بحثه.. خصوصا لو كانت بنت شطورة وأمورة ومميزة مثلك.. وأنا كلي ثقة إنه بحثك راح يكون شيء مميز..

العفو العفو.. بس بدني تسمحي لي أعتبر هذا الحوار عربون صداقة.. هذا كرتي وعليه رقمي.. وإذا احتجت أي استفسارات أخرى في هذا المجال

أو غيره.. لا تترددني تحكي معي في أي وقت.. ممكن نقعد ونحكي سوا في  
أي موضوع.. وممكن إذا الظروف سنحت نشرب قهوة كمان.. أنا بعرف  
محل عندهم قهوة طيبة smile emoticon ..

تمت..

## قواعد العشق الثلاثون

1. أعلم تماما أن الإعلام الهابط هو من تسبب بشكل أساسي في أن تكوني ذات شخصية ضحلة وتافهة و سخيفة.. أتعاطف معك، وأعلم أنه ليس ذنبك أنت.. لكن بغض النظر عن المتسبب، لا يمكنني تحمل النتيجة..
2. لماذا أنت متزوج؟! هذا ليس عدلا!! لماذا لم ألتق بك قبل أن تتزوج!! هذا هراء!! لن أقبل بهذا التوزيع..  
سأضع كل مكونات العالم في كيس.. أقفله جيدا وأهزه ثم أنثر المكونات مرة أخرى.. وسأعيد العملية عدة مرات حتى يأتي توزيع ما تكون فيه عازبا.. ويفضل أيضا أن أكون أنا عزباء..
3. أنا لست غبية.. أنا ناضجة بما يكفي لأعلم أنك لن تحبني بدون مقابل.. لكن من غير المنطقي أن يكون المقابل هو أن تستغل لحظة الضعف هذه لتنتهك إنسانيتي.. هذه حقارة كبيرة منك.. لكنني أقبل على أي حال..
4. لا تتعب نفسك.. أنا لا أحبك.. ولا أستطيع تفسير السبب.. لا تحاول البحث عن عيوب فيك.. لا يمكنك إصلاح الأمر.. أنت رجل طيب وفيك كل الصفات الجيدة، ولا أكاد أجد فيك عيبا واحدا.. إلا أنني لا أحبك وحسب..

أعلم أن هذا شيء قاسي.. ومن المحزن لك أن ترى أنني أهتم بمن هو أقل منك.. ولربما أمنحه ابتسامة قد تموت أنت من أجلها.. لكن هذا هو العدل.. كل إنسان يختار من يحب..

5. من فوائد التقدم في العمر، أن جمالك الأخاذ لم يعد كافيا للفت انتباهي.. يجب أن تكوني ذات شخصية مميزة أيضا.. الجسد وحده لا يكفي..

من زاوية أخرى، هذا شيء سيء.. لا أريد أن أخسر كل حيوانيتي..

6. بعد الزواج أصبح عندي قدرة عجيبة على فهم نظرات وإيماءات النساء وطريقة جذبهن.. وإنه لمن المؤسف أنني لا أستطيع استشار هذه القدرة لإيقاع النساء في حباتي.. علنا على الأقل..

7. يجب أن تعلمي أن الجلوس على فوهة بركان مشتعل لثلاثة أيام، هو أهون عندي من الجلوس معك لثلاثة دقائق..

لكنك تمتلكين جسدا وحشيا لا يليق بك.. ومن أجله أنا على أتم الاستعداد لأنافقك..

حسنا، ربما لا يجب أن تعلمي ذلك..

8. الذنب ليس ذنبك.. لقد مضى وقت طويل منذ أن كنت شخصا رقيقا.. وإن كنت قادرا الآن على كسر أدق أحاسيسك بدون أي وازع من ضمير، فإنني لم أكن كذلك من قبل..

أعلم أن هذا ليس اعتذارا.. لكن هذا غير مهم..

9. محاولاتك البائسة للتمثيل بأنني لا أثير اهتمامك تصيبني بالغثيان.. كل ما فيك يصرخ بأنك تسعين ورائي.. لكنني سأكون رقيقا بما فيه الكفاية لأتركك تستمتعين بلعبتك من جانب واحد..

- وعندما تنتهين من هذا العبث.. إلعيني وأقفل الباب..
10. أنا لا أمثل.. عندما لا أحبك، فيجب عليك سحب كلمات الحب الباردة من قلبي كما تسحبن فيلاً من بئر..
- لكنني عندما أحبك، فلن أتوقف عن الغزل.. حتى لو بدوت سخيفا ومضحكا ومثيرا للشفقة..
11. لا يمكنك تغيير مشاعرك بين الصداقة والحب وقتما تشائين.. يجب أن تنسقي ذلك معي..
12. لا.. هذا ليس سخيفا!! لا يمكنك أن تبسمي لعامل النظافة! لا يهم!! لا تبسمي له وحسب!!
13. أنا عادة ما أحبك في الأوقات التي لا تخطر لك على بال.. وغالبا لا تكونين موجودة..
14. لا تحاولي هدايتي.. يبدو هذا سخيفا.. كما أن جغرافيا الإيمان ليست بالسذاجة التي تتخيلينها.. لا يجب أن أتوقف عن موبقاتي بالتدرج لأصعد جبل التقوى بالتدرج..
- في أقصى الجحيم السفلي هنالك باب يؤدي إلى الفردوس الأعلى.. وحدث ذلك معي.. عدة مرات..!
15. لا أعلم لماذا تنفقين كل هذا الوقت وكل هذه النقود لتشتري الملابس!! الملابس لا تجعلك جميلة! العكس هو الصحيح!
- تقرأ على عدة أوجه..
16. أنا لم أقل شيئا.. كل ما دار في ذهنك كانت استنتاجات شخصية منك أنت.. كان من السذاجة بأن تفترضي أنني رجل طيب القلب لمجرد



أنتي أتحدث بشكل جيد.. هذا يشبه تماما أن تفترضي أننا من الممكن أن نتزوج لأننا تناولنا الغداء معا..

حسنا.. أنت أشد سذاجة مما كنت أعتقد..

17. أنت تثيرين اهتمامي.. لكنني كلما هممت بالنهوض من مقعدي ومحاولة مطاردتك.. جلست مرة أخرى.. قد أفعل ذلك لاحقا.. وقد لا أفعله أبدا.. الجوع هو من يقرر..

18. هل يمكنك تحديد أدنى عمر وأقصى عمر للمرأة التي تثير اهتمامك؟ (لا)

19. لا تصدق كل ترهات النساء عن الحب.. في اللحظة التي تستكين فيها إلى حبتها.. ستعاملك كقط أليف.. والنساء لا يعشقن القطط الأليفة..

20. إذا قدر لي أن أكون مع امرأة في جزيرة نائية.. فليس لدي أدنى شك في أنني سأقتلها في نهاية الأمر..

21. لئن كان لدي القدرة على اجتذابك، فلم يعد لدي القدرة على الاحتفاظ بك..

22. قد يكون لدي الخطة لتحريك جيش كامل للظفر بقلبك.. لكن بمجرد أن تبادري أنت بالاستسلام، فسأرتخي في مقعدي وأتصرف كسلطان عثماني..

لا تلوميني، أنت من كسر قواعد اللعبة..

23. لا تتوقعي من حبنا أن يدوم إلى الأبد.. لا تكوني حاملة.. كل شيء سينتهي في يوم ما.. يوما ما ستتوقفين عن إدهاشي.. ولن يكون بمقدور كلماتك أن تحركني.. ولن تضحكني أي نكتة تقولينها...

24. في الغالب لا أسمع ما تقولين.. وأجهد نفسي في محاولة إبقاء عيوني تنظر إلى وجهك.. وإذا حدث ذلك، فأنظر إلى شفاهك فقط..  
تقرأ على عدة أوجه..
25. في نهاية كل قصة عشق، أشعر بحاجة ماسة لأخذ حمام طويل ساخن، لكن المشكلة أن الماء لا يغسل سوى جسدي فقط..
26. من الرائع أن تمنحك مشاهدة فيلم رومانسي أملاً بأن تتزوجي رجلاً يحبك وتنجبي أطفالاً رائعين.. ومع أن هذا قد لا يحدث، إلا أن الأمل شيء جميل..
27. علاقتي العاطفية تتكون بشكل أساسي من تخيل مواقف لا يمكن أن تحدث، وحوارات من المستحيل أن تتم.. ومع ذلك، فهي تفرحني بشكل ينتهي دائماً بالبكاء..
28. كنت أعلم أنك تافهة و سطحية وإمرأة من الدرجة الثالثة، لكنني أحببتك.. وكنت أقبل الفتات الذي كنت تعطيني إياه كأنه كنز..
29. جزء كبير من نجاحك في علاقاتك العاطفية ينبع من ثقتك بنفسك.. في الحقيقة، لا شيء ينجح بدون هذه الثقة..
30. من المؤلم أنك لا تستطيع أن تشتكي لله من عذاب الحب.. الموضوع مخجل نوعاً ما.. مضحك في الحقيقة..

### الخاتمة:

- أسكتي يا شهرزاد

أسكتي يا شهرزاد

أنت في واد وأحزاني بواد

فالذي يبحث عن قصة حب  
غير من يبحث عن موطنه تحت الرماد..  
أنت ما ضيعت يا سيدتي شيئاً كثيراً  
وأنا ضيعت تاريخاً  
وأهلاً  
وبلاذ..

ملاحظة: أنا من كتب هذا كله باستثناء الخاتمة.. ولكن هذا لا  
يعني أنه أنا..

## كرايب..

في أشياء كثيرة، ما بتكتشفها إلا وانت بتمر بتجربة الترحيل من بيت لبيت.. مبدئياً بتكتشف إنه عندك كثير أغراض، وبستغرب كيف كان البيت واسعها أصلاً!! وبتكتشف إنه مرتك عندها 400 زوج أحذية!! وولادك عندهم لعب بتفتح محل!! وإنه ولا صحن في المطبخ بقرب للثاني.. وبتلاقي كل الأشياء اللي تمت وانت تدور عليها.. مقص أظافر.. غطا الريموت.. مفاتيح عملت بدالها.. فردة حلق.. فردات الجرابات الضايعة.. وحتى شهادات الميلاد وكروت التطعيم!!

لكن أهم شي بتلاحظه وانت بترحل.. انك بتكتشف أغراض إلـك.. كانت تعني لك كثير في زمان مضى.. لكن مع زحمة الحياة، خبيتها في درج من الأدراج ونسيت إنها عندك أصلاً ونسيت حكاياتها... هاي الأغراض الصغيرة الحميمة بتكتشفها وانت بترحل.. ولما تشوفها.. كل حكايات الماضي المرتبطة فيها بترجع لذاكرتك في غمضة عين..

الأسبوع الماضي، كنا بترحل الأثاث على شقتنا الجديدة.. وأنا بركب الأغراض في كراتين.. فتحت كرتونة قديمة.. كان فيها أول زينة جنبها لرمضان.. وكان في لعبة شطرنج ناقصة حجارها، ياما معارك دارت فوقها.. ولقيت علبة خشبية بسيطة ما عرفت لشو.. لكن أول ما فتحتها.. ارتسمت على جوانب روعي ابتسامة طويلة.. وتنهدت من قلب قلبي..

كان فيها قطعة قماش مخمل أسود.. حجمها بحجم الكف.. ورجعتني  
القطعة هاي 10 سنين إلى الورا..

كنت أيامها طالب جامعة، خريج.. وكان خالي عنده محل صغير في  
القرية العالمية في عمان بيع فيه إكسسوارات.. أيام ما كان في قرية عالمية..  
يومها أخذت سيارة الوالد، ورحت أشوفه بالمحل، عشان أعطيه شغلة  
كان طالبها من إمي الله يرحمها.. وصلت السوق، وقررت أتمشى بالسوق  
شوي قبل لا أوصل عنده.. وأشوف الناس شو بتبيع...

وأنا ماشي، لفت نظري ختیار.. كان لابس لبس فلسطيني تقليدي.. و  
رابط حطة بيضا وسودا على صدره.. صلعتة فيها شوية شعر أبيض، وعنده  
كرش خفيف.. كان قاعد على كرسي وقدامه بسطة وبنادي.. "من ريحة  
البلاد.. من ريحة البلاد.. تراب القدس و مية عكا.. من ريحة البلاد.. من  
ريحة البلاد.."

قربت أشوف شو هاي ريحة البلاد، ولا هو في جهة حاطط زجاجات  
صغيرة لطيفة، عليها علم فلسطين وجواها تراب أحمر.. ومكتوب عليها  
"تراب مدينة القدس".. وفي الجهة الثانية كان في نفس الزجاجات، لكن  
فيها مية ومكتوب عليها "ماء بحر عكا"..

أيامها كنت جاهل.. بس كنت بسمي هذا الجهل، ظرافة وخفة دم.. بعد  
ما تفحصت الزجاجات.. قربت عالختيار وحكيت له.. "شو يا حج!؟  
شايفك بتبيع البلاد!؟" وابتسمت له ابتسامة ندمت عليها..

وعرفت فوراً إنني غلطت بالتعليق.. احمرّ وجهه للزلمة.. وبينت عروق  
رقبته.. وعيونه صاروا زي الجمر!! بده يحكي ويسب ومش قادر.. غضبه  
كان أكبر من الكلام.. اجا يقوم ما قدر يتوازن.. وكان راح يوقع..

تفاديا للتصعيد، قربت عليه بسرعة.. حطيت ايدي عليه.. وبديت  
أعتذر بكلام مغربط عن اللي حكيتة.. دفعني وما رضي يحكي ولا كلمة..  
ظلمت أتأسف وهو ساكت.. ولما شعرت إنه أسفي كان بدون فائدة..  
تركته ومشيت..

طلعت من عند خالي قبل ما السوق يسكر بشوي.. وضميري كان لسه  
مأنبني على الكلمة اللي حكيتها.. تنهت إنّي ما كان لازم أسخر من إنسان  
بكسب رزقه بعرق جبينه، حتى لو بطريقة غريبة بالنسبة إلي... وقررت أمر  
من عند الختبار وأراضيه..

لما قربت عليه.. كان حط أغراضه في كرتونة.. وبده يروح.. وبين لما  
وقف انه عنده عرجة في رجله الشمال..

بدون ما أستشيريه.. وبدون كلام.. حملت كراتينه عنه.. حاول يرفض،  
بس أنا أصريت.. ولما وصلنا بره.. حطيت الأغراض في السيارة.. وحلفت  
غير أوصله.. وطلع بعد نقاش قصير..

كان ساكن في مخيم الوحدات، وطلعنا بالسيارة من المرج باتجاه المخيم..  
بعد ما دخن سيجارة وهدى.. سألني عن إسمي.. وبلش يحكي..

"شوف يا إبني يا جمال.. الإنسان مش لازم يحكم على الشغلة من  
آخرها.. لازم يشوف المشوار كله من أوله لآخره.. وبعدين يمكن يقدر  
يحكم ويمكن لأ.. البلاد اللي انت بتحكي اني أنا بعثها.. أنا عشت عمري  
عشانها..

ولدتني إمي وهم نازحين من بيت محسير سنة ال 48.. وعشان مات  
ولاد كثير في النزحة.. وأنا عشت.. سمتني ناجي.. ما شفتها أنا طبعاً بيت  
محسير.. وعيت على حالي وأنا بمخيم الدهيشة.. كل بيت محسير وبيت نتيف

وقطنًا.. كلهم كانوا هناك.. في الدهيشة.. بتعرف وين الدهيشة انت؟! جمب  
بيت لحم هاي!! مخيم.. زينكو وخيم..

عشت 18 سنة في الدهيشة.. أكثر شوي.. خلصت فيها توجيهي..  
وكنت ناوي أدرس في رام الله.. بس صارت الحرب وبس نزحوا الناس على  
عمّان نزحنا....

وصلنا عمّان بعد الحرب، أنا وإمي واخواني.. وسكننا هون في  
الوحدات.. خرابة كانت وخيم.. وتهجير ورا تهجير.. كنت حاقد أيامها  
على الوضع كله!! شاب صغير كنت.. اذا بتتنفس بتتنفس نار!!.. دخلت  
وقتها مع الفدائية.. كنت صغير وبعرفش اشي.. بس بدّي أحارب.. والمزاج  
العام أصلا كان مزاج حرب..

أخذوني عالغور.. ودربوني شوي.. وصدف بعدها بكم شهر.. صارت  
معركة الكرامة.. وكنت هناك أنا.. إذا بقول لك حاربت فيها وقتلت  
وطخيت بكون كذاب!! كنت بس بعبي كياس رمل!!  
بس شفت الدم والحرب والرصاص.. وشفت العدو أهم شي.. اشي منيح  
تشوف عدوك وجه لوجه.. اشي كثير منيح..

بتعرف يا جمال؟! دايمًا خلي عندك عدو.. اللي بعرفش يعادي بعرفش  
يجب.. المهم..

بعد الكرامة، قلت لحالي بدّي أطلع بره.. بديش أظل في الأردن.. وكان  
وقتها بلشت مناوشات بين الفدائية والجيش.. وصار في تجاوزات أدت  
بعدين لحرب أيلول سيئة الذكر.. فقلت لحالي، ما بدّي أكون هون.. بديش  
أخربط في العدو..

وفعلا طلعت.. طلعت على رومانيا.. كانوا وقتها يستقبلوا الطلبة  
الفلسطينية.. واشتراكية وحرية وكل هذا الكلام..

وصلت بوخارست.. من هون.. ونسيت الأردن وفلسطين والقضية من  
هون.. شلحت كل جلدي.. طلعتنا مش كايين عايشين.. أنا مسخم قاعد  
بحارب في الغور وعايش عالسردين.. وكل هالنسوان الحلوات قاعدات  
هون!!؟

دخلت الجامعة، حتى ناسي والله شو كنت رايح أدرس.. مكملتش  
أصلا.. هي سنة اللغة عشان أعرف أدبر حالي وبس.. سميت حالي أبو  
عرب.. واشتغلت مع فتح مسؤول اشبي مش عارف شو هو.. عشان أقبض  
ولا شو.. واندليت على شلة شباب يعجبوك.. وعشنا في جنة ربنا  
عالأرض.. وهم في الأردن يذبخوا بعض.. ماليش دخل..

لغاية ما في يوم.. بعد سنتين أو ثلاث يمكن.. كنت سهران في بار..  
ومعي هالرومانية بنت 17.. كانت مكيفة علي.. كنت أجبلها جيتز من  
إيطاليا.. عندهم كان غالي كثير.. المهم ومحسوبك أبو عرب برقص في  
البنت...."

لما وصل أبو عرب في حكايته لهون.. كنا وصلنا عند بيته في المخيم..  
وحلف يمين إلا أنزل أتعشى عنده.. وأنا كان عندي فضول أعرف بقية  
قصته.. فنزلنا الكراتين من السيارة.. ومشينا شوي في الزقق لوصلنا عند  
البيت..

دخلت بيته.. كان غرفة وصالة بسيطين.. ومطبخ متواضع من النوع اللي  
في مجلي مغطى بستارة.. وكان الصالون فيه براميل زرقا وشوات..



راح عالمطبخ.. ورحت معه.. وصار يحضر عشا قلاية بندورة وفول..  
وقعد يكمل القصة..

"كمل أبو عرب.. شو صار مع البنت!؟"

"الرومانية.. آه.. بقول لك كنت برقص معها.. ولا في واحد يوناني  
وراها كان.. سكران.. قام نكشها.. وصرخت البنت..

وهي صحيح رومانية.. بس الشرف غالي.. ولو كان روماني.. فاما  
سكتتش أنا.. قمت ضربته.. وهبوا لك علي صحابه.. وصرت أنا أصرخ..  
يا عرب الحقوني..

كنا هيك في رومانيا.. بس نكون في البار وواحد عربي تصير معه  
مشكلة.. بس يقول يا عرب.. بفرع لك واحد تونسي.. يمني، سوداني.. أي  
اشي.. بس يسمعك عربي..

كان في وحدة عربية.. ونخوة.. يضرب معك وهو أول مرة بشوفك..

المهم، ما شفت إلا هالشاب بلش يضرب في اليونانية.. تفاجأت بس  
شفته.. عملاق كان.. قد الحيط.. كومهم كلهم.. وسحبني بره البار.. طلع  
شاب من الأردن.. اسمه حمزة.. طفيلي.. كان جاي يدرس هندسة..

وتعرفنا على بعض.. وصرنا صحاب.. وسكننا مع بعض.. أبوه كان  
مستشهد في معركة الكرامة.. وانبسط كثير لما عرف إنني كنت فيها.. أبوه الله  
يرحمه كان مربيه على حب العرب وفلسطين خصوصا..

عشت أنا وحمزة 3 سنين سوا.. بس في ال 75.. كانت المنظمة ماخدة  
مجدها في بيروت.. وكان في بوادر لحرب وصرار فيه هجوم عالمخيمات..  
وصاروا يطلبوا شباب على لبنان.. وحكوا معي.. عشان أنزل على لبنان..

أنا بيني وبينك وقتها.. حسيت إنه القعدة في رومانيا نستني قضيتي الأساسية.. والخمرة اللي كنت أشربها والنسوان، طفوا النار اللي في صدري.. فقررت أنزل أدافع عن المخيمات.. ووقتها حمزة كان ظايل عليه سنة.. بس كان ثار أبوه برضه بغلي في صدره.. وشاف إنه هاي فرصة يصفي حساباته.. فتعاهدنا عالموت وترك الجامعة ونزلنا سوا..

أيامها كنا شباب كلنا حماسة.. وفش ورانا اشي.. لا مرة ولا ولاد ولا هم.. ولا سائلين عن إشي.. وعنا حلم.. وعنا عدو بدنا نحاربه.. فسافرنا.. رحنا أولها الجزائر.. 3 شهور قعدنا هناك في معسكر تدريب.. بعدين وصلنا بيروت.. وخطونا من ضمن فريق حماية نخيم تل الزعتر.. كانت الكتائب بتناوش في المخيم وكان لازمه حماية.. وبعد ما دخلنا بأسبوع.. بدأ هجوم الكرتينا وبدأ حصار المخيم..

طبعاً لو شو ما أحكي لك يا جمال.. ما راح أقدر أوصف.. لعنة الكلام إنه يختصر الحقيقة بحروف.. بس ما بنقلها زي ما هي.. وزى ما انعاشت وانحست.. يمكن انت قريت عن المجزرة والحصار.. انه القصف استمر 52 يوم.. بسطر واحد يختصروا القصة.. بس على الأرض شو صار؟! أنسى الموت.. كم روح طلعت عند ربها من يأسها؟ كم جرح نرف؟! كم طفل راح؟ كم دمعة؟ كم قطرة دم؟! وكم لحظة يأس وكفر وخوف مروا فيها الناس تحت القنابل؟! كم ظلم وقهر صار؟ في حدا يعرف؟ ما حدا يعرف.. الكلام يختصر كل شي يا جمال.. وما بعلق فيه لا رصاص ولا ظلم ولا دم..

ست شهور والمخيم محاصر.. وأنا وحمزة جوا.. أولها كنا ندفن اللي بموتوا كل يوم.. بس لما بدا القصف.. بطل في اشي اسمه دفن.. القذائف زي المطر كانت!! في الساعة الواحدة يمكن 100 قذيفة تنزل.. ما كانت

حرب أو خسارة وانتصار.. كانوا بدهم يفنوك عن وجه الأرض.. بدهم اياك تحتفي.. الجثث تكومت.. وصاروا الناس يوكلوا جثث بعض.. وبعد شهرين يمكن.. وصلوا لاتفاق انه نطلع من المخيم.... طلعنا الناس في الباصات على أساس في حماية الصليب الأحمر.. بس كانت خدعة.. اقتحموا الباصات وقتلوا الناس فيها.. يمكن يومها الدم وصل للسما.. متأكد أنا.... لغاية اليوم ما يعرف كيف ما متنا أنا وحمزة.. الموت كان في كل مكان..

رحنا بعدها على بيروت الغربية.. كان حمزة متصاوب في ايده.. تعالج.. ونزلنا على الجنوب.. كان لسه في مشاكل بس أخف شوي.. وظلينا هنالك ل 82.. في الجنوب قصدي.. في ال 82.. دخلت إسرائيل.. و تحاصرت بيروت الغربية.. وكنا احنا هناك..

والي صار في تل الزعتر صار شي قريب منه هناك.. لكن هالمرة كان في قتال عنيف..

والحرب ما كانت بالوكالة.. الضباع كلهم ومعهم إسرائيل كانوا موجودين..

حاربنا كثير يومها.. وخسرنا كثير.. حمزة هذا كان ما ينام.. صيد يصيد فيهم.. وثمانين يوم حصار ودم و قتل.. وبالأخر صار اتفاق إنه المقاتلين يروحوا على اليونان ومنها على تونس والجزائر..

كل شي انتهى خلص.. الحرب خلصت.. وكل واحد أدى دوره... سبع سنين من الدم كانوا كفاية.. بس ما طلعنا عاليونان..

أبحرت السفن وانفك الحصار، وانسحبت إسرائيل.. أنا وحمزة كنا بدنا نرجع.. بس وقفنا على حاجز سوري.. وتلاسن حمزة مع الضابط.. ولما الضابط سبّ أبوه.. حمزة ما تحمّل.. خبطه بوكس وقعه عالارض.. وبرك

فوقه.. أنا توقعت يقتلوننا.. بس ما قتلونا.. بلشوا ضرب في حمزة.. قمت  
فزعت له و صرت أضرب أنا كمان!!

أنا طخوني في إجري و حمزة أغمى عليه من الضرب.. وحبسونا.. على  
أساس يومين.. نمنا يومها في لبنان.. وثاني يوم كنا في دمشق.. دخلنا  
السجن في 12-9-1982 وطلعنا منه في 15-1-2002.. عشرين سنة  
تقريبا قعدوا اليومين..

أول خمس سنين ما شفت حمزة.. فكرتهم قتلوه.. جابوه عندي بعد خمس  
سنين.. ما بحكي كان.. هسه بتشوفه.. موعدة يجي..

طلعنا من السجن ختايرة.. أنا إجري راحت وهو بحكيش في السنة  
كلمتين.. وجينا عالآردن.. أبوي وإمي كانوا ميتين.. وإمه كمان.. أنا سكنت  
هون.. أختي ساكنة تحتنا.. وهو راح عند أهله.. بعد شهر ما تحمل.. ما  
شفته إلا جاي عندي.. فتح الباب وفات نام.. بدون ولا كلمة..

وهاي إلنا ستين سوا هون.. عمرنا كله ضاع ولا مال ولا ومرة ولا  
ولد.. فكان لازم نشتغل عشان نوكل.. أنا المنظمة بتعطيني 80 ليرة.. وهو  
ولا شي.. اسمه مش مسجل.. بندفع فيهن آجار الدار.. وبنشتغل عشان  
نوكل.. فصرنا نبيع اللي انت شفته..

وهاي هي الحكاية.. قولي عاد.. شو طلع لنا من البلاد اللي بعناها يا  
جمال!؟ قلاية بندورة في غيم!؟ خلص العمر.. وهي أنا والطفيلي جوز  
كراكيب ما حد داري فينا.. بكره واحد فينا بدفن الثاني وبموت وراه.. بس  
ان شاء الله أموت أنا قبل.. بقدرش أحمله ترى.. بقطم ظهري والله.. دنيا يا  
عمي يا جمال.. دنيا.. الحمد لله على كل شي"

لما وصل هاي المرحلة.. كنت مش قادر أحبس دموعي ومش قادر  
أحكي ولا كلمة.. قمت من مكاني.. وصرت بدني أغير الموضوع بأي  
شكل.. وهو راح يحضر الشاي....

لما رجع عالصالون، كنت فتحت شوال من الشوات.. كان في تراب  
أحمر.. مسكت حفنة تراب وصرت أشم فيها وسألته..  
"هذا هو تراب القدس أبو عرب!؟"

"تراب القدس؟ وك شو تراب القدس انت الثاني!؟.. هذا من طبربور..  
ابن اختي نظمية بجيبه.. بشتغل بليط في ورشة هناك.."

"وك شو مالك بتضحك!؟ مهو نفس التراب!! شو فرق تراب عمان عن  
تراب القدس بالله!؟ مش الله قال في القرآن في سورة اللل... قال في  
السورة.. هاي.. وباركنا في الأردن وفلسطين!؟ مش هيك قال ربنا!؟ فش  
فرق يعني... أنا بغشش حدا.."

فتحت البرميل وأنا ماسك ضحكتي.. وقلت له.. وهاي المي من وين  
عمي أبو عرب!؟

"هاي من العقبة.. نفس مية عكا مهي.. شو بتفرق؟ مية البحر الأبيض  
مهي.. شم ريحتها حتى.. نفس الريحة.. أبو السعيد جارنا اللي بشتغل  
عالتريلا.. الله يخلف عليه هو اللي بجيب لنا إياها وهو مروح.."

وك شو مالك!؟ انت بتفكر عمك أبو عرب بضحك عالعالم!؟ والله ما  
بضحك عليهم.. والله بنسطوا كثير عليهم.. هيك بشتروا فلسطين  
وبحطوها في الصالون.. وبناموا مبسوطين.. وبس يجي عندهم الناس  
بورجوهم اياهم عشان يقاهروهم.. والله وبقاها بعض فيهن.. انه هاي  
عندها تراب القدس وهاي مش عندها.. انت مش مصدق؟ هن بحكن لي"

وأنا ببتسم ويدوق مية البحر في البرميل.. انفتح الباب.. ودخل رجل عملاق، في الخمسين تقريبا.. ملاحه قاسية ونظراته حادة.. ما كان في شك انه هذا هو حمزة الطفيلي.. بس شافني نظري باستغراب.. بس أبو عرب.. حط ايده علي فيها بدا انها حركة طمانة لحمزة..

قمت ومديت إيدي أسلم عليه.. ما سلم.. كان حامل شقفة قماش خملية سودا كبيرة.. وحطها عالطاولة وفات عالغرفة وسكر الباب..

وقتها أنا حسيت إنه لازم أطلع.. استأذنت من أبو عرب.. أصر أتعشى بس ما رضيت..

"طيب استنى استنى.. بدى أعطيك شي.."

قام راح عند القماشة السودا وقص منها قطعة صغيرة بحجم الكف.. وأعطاني إياها..

ابتسمت له وأنا بدى أحضنه.. وقلت له..

"وهاي شو أبو عرب!!"

"هاي ستار الكعبة.. راح نبدا نبيعها الأسبوع الجاي.. مبروكة هاي القطعة!! مش مصدق!؟ طب والله أحسن من الستار الحقيقي هاي! اشتغلتها الأرملة إم ربيع.. مرة مبروكة والله.. ما بتقوم عن الصلاوية.. كمان القماش مخمل أصلي وطبقتين.. 12 دينار كلف المتر!! مش رخيص.. وبيال حلال كمان!!"

خذ خذ تبارك فيها.. أعطيها لمرتك.. راح تعجبها.. متجاوز انت يا جمال!؟"

حبيبي.. انت تارك العمال بحملوا غرفة النوم لحاهم!؟ قحطوها كلها  
وانت قاعد هون؟ مشان الله اترك هالكراكيب من ايدك وشوفهم.. وبرواز  
القدس أمانة انت تحمله.. ما تحلي العمال يحملوه.. ما بدي إياه ينكسر..  
تمت..

- ناجي أبو عرب و حمزة الطفيلي شخصيات واقعية وليست  
حقيقية.. لكن تم رسمها من عدة شخصيات حقيقية عايشت الحرب  
والاجتياح..

## عيد الحب

كان بإمكانني أن أقول:

- بينما تقرأ أنت هذا النص، فإن هنالك ما يقرب من 500 مليون شخص حول العالم مشغولون اليوم بتبادل الهدايا وممارسة الحب.. وأنت؟.. أنت لا تجد حتى شخصا واحداً يشتاق إليك.. يا لها من حياة بائسة تلك التي تعيشها..  
تنهّد.. إضحك ضحكة خفيفة.. إصمت قليلاً..  
بإمكانك البكاء الآن...

\*\*\*

ولكنني اخترت أن أقول:

"وأحسنوا إن الله يحب المحسنين"

195 - البقرة

"إن الله يحب التوابين ويحب المتطهرين"

222 - البقرة

"فإن الله يحب المتقين"

76 - آل عمران



"والله يحب المحسنين"

134 - آل عمران

"والله يحب الصابرين"

146 - آل عمران

"إن الله يحب المتوكلين"

159 - آل عمران

"إن الله يحب المقسطين"

42 - المائدة

"إن الله يحب الذين يقاتلون في سبيله صفاً كأنهم بنيان مرصوص"

4 - الصف

"قل إن كنتم تحبون الله فاتبعوني يحببكم الله ويغفر لكم ذنوبكم والله

غفور رحيم"

31 - آل عمران

## في صباي

-1-

في صباي، كنت مفقدا تماما لمبدأ الثقة بالنفس.. وكان شعوري بالرضا عن نفسي ينبع بشكل أساسي من رضا الناس عني..  
لذلك - ولكي أتوازن - كنت بحاجة ماسة لإثارة إعجاب الناس، أو انتباههم على أقل تقدير..

لكن المشكلة كانت تكمن في أنني لم أكن أمتلك أي شيء يثير الإعجاب.. لم أكن وسيما مثلاً.. أو صاحب قوام ممشوق.. لم أكن رياضياً.. سياسياً ولا متحدثاً لبقاً، ولا كازانوفاً يوقع النساء في حباله.. ولا حتى متميزاً في المجال الأكاديمي.. باختصار، لم أكن بارزاً في شيء.. كنت مسطحاً تماماً كلوح من الرخام..

ولحل هذه المعضلة.. قمت بتقليد عدة شخصيات ممن رأيت أنهم يثرون اهتمام الناس، والفتيات على نحوٍ أدق.. وغالبا ما كانوا من أبطال المسلسلات والأفلام.. فلدت طريقتهم في الكلام، طريقتهم في المشي، وحتى طريقتهم في اللباس وتصنيف الشعر..

كان شكلي يختلف باختلاف الشخصية التي أقلدها.. والفيلم الذي أشاهده.. فإذا كانت الشخصية لقائد عسكري قاس القلب.. تراني حليق

الرأس واللحية، حادّ النظرات.. ومرتديا ملابس سوداء توحى بالشرّ.. وإذا كانت الشخصية لمثقف فنّان.. تراني مطلق الشعر واللحية.. ناعس النظرات، مهتدل الملابس.. وأدخن كقطار.. وأتحرك وأمشي كأن مشاكلي الوجودية أكبر من هذا العالم الصغير..

وهكذا تنوع مظهري بتنوع كل شخصية قلّدتها واعتبرتها الأكثر جذبا.. كنت قاتلاً مأجوراً، قبطاناً بحرياً، جندياً.. فناناً.. رجل دين وقور.. بل حتى مهرجا في بعض الأحيان.. لكن كل تلك الألاعيب المثيرة للشفقة لم تصنع مني رجلاً.. ولم تجلب لي سوى السخرية.. والتي ربما تقبلتها بعض الأحيان باعتبارها اهتماما من نوع مختلف..

وبعد فترة من الخواء الروحيّ القاتل، قررت أن أخلع جميع تلك الأقنعة.. وأن أكون نفسي فقط.. وسواء أثار ذلك إعجاب الناس أم لم يثر.. لا يهمّ.. المهم أن لا أفقد أحداً وأن أصنع شخصيتي بنفسي..

بدأت أقرأ كثيراً وأشاهد أفلاماً كثيرة.. وكلما وجدت شيئا جيداً التزمت به، وكلما وجدت خصلة سيئة ابتعدت عنها.. رويداً رويداً بدأت ملامح شخصيتي تتشكل.. وصار عندي بعض الأصدقاء الذين أعجبهم كما أنا.. بل وبعض الصداقات من الجنس الآخر.. ولم أعد أهدأ وراء إعجاب الناس، مع أن المديح كان يسعدني جداً.. مهها حاولت إخفاء ذلك..

اليوم، وبعد عشرين عاماً.. ينظر الرجل في داخلي إلى ذلك الشاب المهزوز مشفقاً عليه، وعلى اهتمامه المبالغ فيه بحصد الإعجاب.. ويعتقد هذا الرجل الجالس الآن على قارعة منتصف العمر، أن الإعجاب البسيط الذي يتلقاه الآن بعد نضوجه، هو شيء جميل.. وإن كان يأتي في قاغ

أولوياته وحروبه التي يخوضها على كل الصَّعد.. وربّما يطمح فقط ألا يجرح  
من يحبّهم ويحبّونه.. ويحلّ مشاكله الكبرى بعيداً عن الحب والإعجاب..  
ومن يدري.. ربّما ينظر رجل عجوز بعد عشرين عاماً أخرى إلى الرجل  
والفتى بأسى ويقول..

"يا ليتني متُّ قبل هذا.. وكنت نسياً منسياً"

-2-

في صباي، نشأت في قرية صحرواية لا يتعدى عدد بيوتها المائة.. لذلك  
كانت كل طفولتي تتمحور حول قيادة دراجتي بعيداً عن القرية أو اللعب  
في بيت طيني مهجور..

في تلك المرحلة، لم تكن النقود تعني لي أي شيء.. كان جل اهتمامي هو  
اللعب ومراقبة حيوانات الصحراء.. وخصوصاً الضبّ..

لكن عندما انتقلت للعيش مع جدّتي في عمّان.. ودخلت مدارس وكالة  
الغوث.. بدأت القطع المعدنية اللامعة تأخذ معنىً آخر.. كانت تعني  
شطيرة كاملة بدلاً عن نصف شطيرة.. أو علبة عصير أفضل.. أو ممحاة  
جيدة.. أو مسطرة..

في سنين المراهقة، كنت أنا وأصدقائي من نفس الطبقة.. لذلك لم تكن  
النقود تعني لي إلا سجائر أكثر.. وربّما وجبة لذيذة من ذلك الدجاج الذي  
كنت أراح يتحمّر من خلف حاجز المطعم الزجاجي..

إدراكي لأهمية النقود وتأثيرها في حياتي بدأ بشكل أساسي عندما دخلت  
إلى الجامعة.. هنالك كانت النقود تعني فروقا واسعة بين الناس..

كانت تعني ملابس أفضل.. أحذية أفضل.. ساعة لمن لم يملك ساعة..  
كانت تعني عدم الخوف من موعد التسجيل.. أو تأجيل الدفع.. وفي أحيان  
كثيرة.. كانت تعني أن يبني المرء طاويًا..

والجوع لمن لا يعرفه - أو يعتقد أنه جوع رمضان - شيء مختلف.. الجوع  
لا يعني أن لا تكون قادرا على تناول الطعام.. الجوع هو أن تكون جائعا و  
تشم الطعام وأنت تعلم أنك غير قادر على شرائه.. بدون حاسة الشم لا  
يعمل الجوع.. بدون هذه الحاسة لا يحس الإنسان بالجوع الذي يقرب من  
الانكسار..

وكبرت.. وتخرجت.. وقررت أن أعمل وأعمل وأعمل حتى لا  
أجوع.. وحتى يكون لدي ما يكفي من هذه الأوراق السحرية المسماة  
النقود.. لكي لا أحلم بها في منامي مرة أخرى..

عملت.. وكسبت نقودا وتزوجت.. وأصبحت موظفا يلعن مديره  
وقواعد مديره في كل صباح، يفكر في مستقبل أطفاله، ويتمنى لو كانت  
الرواتب ضعف ما هي عليه.. والإيجارات نصف ما هي عليه..  
لم أعد جائعا لكنني بقيت مرهونا لفكرة أن أجمع الكثير من المال.. ولهذا  
عملت من شروق الشمس حتى غيابها..

الآن أنا على حواف الأربعين.. أمتلك سيارتين، بيتا واسعا، عملا  
خاصا، ومكتبا أنا أضع القواعد فيه.. ويذهب أطفالي إلى مدارس خاصة  
مكلفة، ليمثلوا فيها مسرحيات تحث على مساعدة الفقراء..

في صباي.. كانت النقود بالنسبة لي شيئا هامًا وأساسياً.. ومن أجلها  
ومن أجل ما تمثل.. عملت بجهد طول عمري.. ولا أزال.. وأخطط في  
العشر سنوات القادمة أن أشتري العقارات وأن أصل لحرיתי الاقتصادية..

لكن من يدري.. ربّما بعد عشرين عاماً من الآن.. قد يجلس رجل عجوز  
ما، وحيداً في حديقته.. يتناول عدة أقراص من الدواء ويحمل صور أطفاله  
الذين تزوجوا وتركوه، ليقول أنه طول الرحلة كان يحاول فقط أن يملأ  
سيارته بالوقود ويسبق الآخرين.. وفي غمرة انشغاله بالسباق، لم يلاحظ  
حتى كيف كان شكل الطريق.. و الآن انتهى السباق.. لكنه لم ينته إلى  
السعادة... انتهى إلى لا شيء..

-3-

في صباي، كان مفهوم الله غامضاً تماماً بالنسبة لي.. لم أستطع تخيل كيف  
يكون الله موجوداً في كل مكان وكيف يرى كل شيء ويسمع كل شيء.. وفي  
نفس الوقت، أنا عاجز عن أن أراه..

وعندما كبرت قليلاً، وبدأت مشوار ذنوبي بذنوب صغيرة مثل كذب  
بريء أو إفطار يوم في رمضان.. كان الأهل والمعلمون يخوفونني عقاب الله  
الشديد.. وناره التي تذيب الحديد والصخور.. فبدأت أتخيل الله كرجل  
عجوز غاضب، يمسك عصاً كبيرة ويجلس فوق الغيوم.. وهو جاهز في أي  
لحظة ذنب منّي أن يضربني بعصاه الغليظة لأهوي في جهنم سبعين خريفاً..  
وكان ذلك مرعباً جداً بالنسبة لي كطفل..

وكبرت بعدها.. وكبرت ذنوبي معي.. ولكنني اعتبرتها حاجات بشرية  
أكثر منها تحدياً لله ولقوانينه.. وكنت عندما أذنب، أطلب من الله السماح  
على الذنب الحالي مع تفهّم الذنب القادم.. لأنني بشر ضعيف.. والبشر  
يخطئون..

ثم جاء الشباب.. وجاءت مرحلة الفسق والفجور، بل وكنت من السخافة أن بدأت أشك في وجوده.. وأدعوه لإقامة العدل.. واستخدمت كل معرفتي الدينية السابقة وطلاقة لساني في مهاجمة الناس فقط.. وبدائي أنني أذكرى من أولئك العجاثر الذين يمضون يومهم فوق سجادة الصلاة يقولون أشياء مكررة..

وفي فترة ما.. توازنت روحياً ودينياً وتبت عن كل ما فعلت.. وتقررت من الله حتى رجوته أن يستخدمني.. وأن يجعلني جندياً من جنوده الذين لا يعلمهم إلا هو.. وأن يجعلني للمتقين إماماً.. كنت أصلي كما لو أنني أصلي يوم الحشر.. وأصوم كما يصوم الأولياء.. وأقبل مصائب الدنيا بكل صدرٍ رحب.. ولا أنام إلا على صوت القرآن.. وكنت على أتم الإستعداد للموت في سبيله ألف مرة..

ثم أخذتني زحمة الدنيا وملذاتها.. ونسيت الله.. ولم أتذكره إلا في المصائب.. كنت أدعوه لينجيني منها.. فإذا أنجاني منها، التزمت قليلاً ثم عدت لما كنت فيه.. لم أكن أرتكب الكبائر، لكنني لم أكن "أرتكب" أي شيء آخر.. وعقب الجنازات أستغفر الله قليلاً ثم أمضي..

اليوم.. أنا كأني مسلم عادي.. أصلي عادة وأصوم مع الصائمين.. وأتصدق بدراهم معدودة بينما أسأله الفردوس بلساني دون قلبي.. وأقرأ القرآن فلا "كهيعص" تبكييني كما كانت تفعل.. ولا "الرعد" تزلزلني" كما الأيام الخوالي.. وعلاقتي مع القرآن في أكثر الأحيان هي لتعليم بناتي قصار السور والكهف يوم الجمعة.. لكن القلب الذي تعبد في محراب الله فيما مضى، قسا فهو كالحجارة أو أشد قسوة...

ومن يدري.. ربّما بعد عشرين عاماً من الآن سيجلس الشيخ العاصي  
ذي القلب القاسي فوق سجادة الصلاة، يتلو صلواته المكررة طالباً من الله  
المغفرة على ما ضيّع في حياته.

وفي يوم ما.. سيراودني الموت عن نفسي وأقبل.. وستحصل المعجزة  
ويلتقي المخلوق أخيراً بخالقه.. وسيستقطع هذا الإله العظيم من وقته  
ليتكلّم معي أنا المخلوق الضعيف..

أتمنى - حينئذ - أن تكون لدي القدرة أن أجتو على ركبتي وأقول له..  
"ساحني يا الله.. إنني كنت عبداً جهولاً" ..

-4-

"هل أنا كنت طفلاً"

أم أن الذي كان طفلاً سواي

هذه الصورة العائلية

كان أبي جالساً، وأنا واقفٌ.. تتدلى يداي

أو كان الصبي الصغير أنا؟

أم ترى كان غيري؟

أحدق

لكن تلك الملامح ذات العذوبة

لا تنتمي الآن لي

والعيون التي تترقق بالطيبة



الآن لا تنتمي لي  
صرتُ عني غريباً  
ولم يتبق من السنوات الغريبة  
الا صدى اسمي  
وأسماء من أتذكرهم - فجأة -  
بين أعمدة النعي  
أولئك الغامضون: رفاق صباي "

(من قصيدة الجنوي - للشاعر العظيم أمل دنقل)

تمت ..

## المنظومة الأخلاقية

الحيوانات لا تمتلك أي منظومة أخلاقية.. وبالتالي لا تمتلك أي منظومة  
لا أخلاقية.. بمعنى أنه لا يوجد لديها غدر، لأنه لا يوجد لديها وفاء..  
كل شيء في عالم الحيوان واضح.. كل فرد يعبر عن نواياه بوضوح..  
فمثلا لا يمكن للأسد أن يتناول العشاء مع الغزال و يقتله في اليوم التالي..  
هذا لا يحدث.. لأن كل فرد يعمل لمصلحته ومصلحته فقط..  
نحن البشر، لدينا منظومة أخلاقية ومنظومة لا أخلاقية عكس الأولى..  
وهذه المنظومة مبنية بشكل أساسي من الافتراض الخاطئ أن الآخر "قد"  
يعمل من أجل مصلحتك لو تعارضت مع مصلحته لأسباب أخلاقية..  
ومع أن هذا الافتراض مبني داخلنا إلا أنه خاطئ.. فلا أحد يقدم  
مصلحتك على مصلحته.. وسيتناولك على العشاء لو أتيح له ذلك.. هذا  
هو الطبيعي.. ولو أنك أسقطت هذا الافتراض من حساباتك، لاستقامت  
أمرورك.. ستسقط الأخلاقيات ومعها اللاأخلاقيات لتصبح الأمور  
واضحة.. وتنتهي الخيانات و خيبات الأمل..  
لكن ما يبقي هذا الافتراض قائما في نفوسنا.. هم القلة القليلة الذين قد  
يعملون من أجلنا بدون مقابل.. هم الذين يغشوننا لنعقد أن البقية مثلهم..  
أيها الرائعون الصادقون.. توقفوا عما تفعلون.. أنتم سبب خراب هذا  
العالم.. توقفوا عن صدقكم وأخلاقكم لنرى العالم بوضوح..

## تنويعات على مقام سليمان شاه..

- لا أعلم من منهما سبب الآخر.. الوحدة والذكاء..
- لكن من المحزن رؤية أولئك الأذكياء الرائعين تائهين في صفحات مواقع التواصل..
- على الأغلب، لا تهمني المناسبة التي دعيت إليها بقدر ما يهمني كيف أبدو عندما أحضرها.. وكيف سأبدو لاحقاً في الصور..
- فواتير المطاعم تدفع في غرف القياس داخل محلات الألبسة..
- يوماً ما سأتوقف عن التدخين.. وذلك قبل أن يتوقف قلبي بدقائق..
- يجب علي أن أعترف أنني حين أنتظر شيئاً ما من الله، فإنني أبدأ للتبرع بأوراق نقدية عوضاً عن العملات.. وأحاول الكذب على نفسي أن هذا التبرع ليس مرتبطاً بأي أمر آخر.. وأنا ما ليبتها وأنا أأمل أن يتم النظر لتبرعي السخي بعين العطف الإلهية..
- عندما تعجب زوجتي، بأداء مطرب ما أو ممثل، فإنني أبدأ البحث فيه عما يمكن انتقاده فيه..
- لكن مبدئياً، أتهمه أنه شاذ..
- غالباً ما تبدو أصابع البطاطس المقلية التي تأكلها ابنتي الصغيرة شهية جداً.. لذلك فأنا أنظاها بمساعدتها في الأكل لأقتنص بعض الأصابع..

- لا أعرف إن كنا سنحاسب على أحلام اليقظة أو حديث النفس..  
لكن إن حدث هذا، فأنا في ورطة كبيرة..
- يوجد لدي في خزانتى بنطال قديم.. لم يعد مقاسه مناسباً لي.. لكنني  
أبقيه لأتذكر الأيام الخوالي السعيدة..
- إذا ما حدث وصليتّ بينما شخص ما يراني.. فإنني أحاول الظهور  
بمظهر الخشوع، وأطيل الصلاة أكثر مما أفعل عادة..
- و في حال اضطررتني الظروف لأكون إماماً في الصلاة، فإنني وبدلاً من  
قصار السور، أقرأ بضع آيات من سورة الرعد، حفظتها خصيصاً لهذا  
الغرض..
- صوتي في الغناء يطربني.. وهذا كافٍ.. يحدث أن تسمعه ولا  
يعجبك.. الأشياء السيئة تحدث..
- الفشل في العلاقات العاطفية ليس أمراً سيئاً.. تحتاج بعض الأسابيع  
للتغلب عليه وإضافة رقعة جديدة على قماش قلبك المهترئ.. السيء حقاً هو  
تلك الكيلو غرامات الإضافية التي تكسبها أثناء فترة حزنك.. لا تختفي  
بسهولة..
- حدث أن قادتني محاولة الظهور كمثقف لقراءة رواية قلوب ضالّة  
للأديب الهندي "طاغور".. الرواية كانت طويلة، ومليئة بالمصادفات  
المستحيلة كأى فيلم هندي..
- لم تفدني الرواية أدبياً بشيء.. لكن في إحدى الفقرات كتب طاغور  
يصف العشب الذي نما في إحدى الساحات الترابية قائلاً.. الطبيعة تكره  
الفراغ.. ومع أنه كان يقصد العشب، إلا إن هذه كانت أهم نصيحة تلقيتها  
في حياتي بشأن العلاقات العاطفية..

- لا أعرف تماما ما الذي يجب فعله عندما أذهب لبوفيه مفتوح.. هل أضع القليل من كل صنف فأبدو شرهاً؟ أم أضع صنفاً واحداً فقط وأترك الأطباق اللذيذة الأخرى لأبدو كرجل حضاري؟! وكم مرة أستطيع إعادة ملأ الطبق؟
- عندما يشتري الناس أشياء فارهة لا أقدر على شرائها، فغالبا ما أتهمهم بالتبذير..
- التسوق هو أفضل مضاد اكتئاب استخدمته..
- ما لم أكن منهكا تماما.. فإنني عادة أبدأ في انتقاد ما قاله زوّار بيتي فور خروجهم من الباب..
- أما إذا كنت منهكا، فإنني أنتقدهم لنصف ساعة فقط..
- هذه هي السنة الخامسة عشرة على التوالي التي أوّجل فيها الذهاب للنادي الرياضي شهرا بعد آخر..
- في التجمعات العائلية غالبا ما أفقد نسق الحديث مع الناس لأنني أكون أنظر إلى وجوههم فقط بدون الإستماع للحديث.. وفي معظم الأحيان أفكر بأشياء غريبة!
- كلما صعدت في المصعد مع امرأة، تحضر إلى عقلي جميع اللقطات السينمائية المشابهة، وتحضر شياطين الاحتمالات..
- أستهلك وقتا ثمينا كل ليلة لاكتشاف أفضل وضعية مريحة للنوم.. لكنني أنساها في الليلة التالية..
- باستثناء أمي، فإن هاتفي لا يرنّ إلا لمصلحة الطرف المتصل.. لذلك فأنا أرفع السماعة منتظرا منه أن يطلب ما اتصل من أجله..

- مع أنني لم أسمع أبداً أن شيئاً كهذا قد حدث، إلا أنني عند الخروج من أي فندق أنزل فيه، أخاف أن يفتشوا حقائبي و يعثروا على أشياءهم الصغيرة..

- أحزن كثيراً عندما أرى أشخاصاً قالوا كلاماً يعبر عني.. وأتمنى أن كنت أنا من قاله..

لكن شيئاً لم يحزنني أكثر من جونتري جراس.. عندما سمى مذكراته "أثناء تقشير البصل"

## الصدقة

هذا الأسبوع كان حافلاً جداً بالنجاح على أكثر من مستوى، وقعت عقداً جديداً واشترت هاتفاً جديداً لزوجتي، ونالت ابنتي جائزة في مدرستها..

لذلك - وكنوع من الاحتفال - قررت الخروج مع زوجتي لعشاء فخيم مساء الخميس.. إثر وصولنا لباب المطعم، وجدت على الأرض درهماً، فاعتبرتها إشارة من الله بمزيد من الرزق.. التقطته وحمدت الله ودخلت..

بعد العشاء اللذيذ، ذهبت - أجلكم الله - لدورة المياه لأغسل يدي.. وبعد أن انتهيت، لاحظت على المرأة أن عامل تنظيف المراحيض واقف ينظر إلي.. فكرت أن أعطيه بعض المال، وتذكرت الدرهم الذي وجدته.. لكنني خجلت أن أعطيه هذه القيمة البسيطة.. وثلاً لم يكن في دورة المياه سواناً، ناولته إياه ومضيت دون أن أنظر إلى وجهه..

عدت لطاولتي، كانت الفاتورة قد حضرت.. وكانت أكثر مما توقعته، لكنني لم أشأ حتى أن أتبرم.. كان احتفالاً على أي حال.. دفعت حساب العشاء، ولثلاً أبدو بخيلاً أمام زوجتي، تركت بقشيشاً جيداً وخرجت..

لدى خروجنا، كان هنالك مدينة ألعاب قرب المطعم، وأقرب لعبة إلينا كانت أن تحاول إدخال كرتين في سطل كبير.. فإن نجحت حصلت على دِبٍ محشو كبير، وإلا فلا شيء.. وكل محاولة بعشرة دراهم..

أنفقت حوالي خمسين درهماً قبل أن أياس.. لم تعجبني الخسارة، لكنه كان  
يوم احتفال، وتذكرت الدرهم إشارة الرزق القادم، فلم أحزن..  
لدى عودتي للبيت.. بدلتُ ثيابي، وجلست أقرأ وردى.. فقرأت في  
الحديث..

"يا ابن ادم، أستطعمتك فلم تطعمني، قال: يارب، وكيف أطعمك  
وأنت رب العالمين؟ قال: أما علمت انه استطعمك عبدي فلان، فلم  
تطعمه؟ أما علمت أنك لو أطعمته لوجدت ذلك عندي"..  
فقلت، الحمد لله أني لست منهم..

ثم فتحت كتاب الله فقرأت

"يَا أَيُّهَا الَّذِينَ آمَنُوا أَنْفِقُوا مِنْ طَيِّبَاتِ مَا كَسَبْتُمْ وَمِمَّا أَخْرَجْنَا لَكُمْ مِنَ  
الْأَرْضِ وَلَا تَيَمَّمُوا الْخَبِيثَ مِنْهُ تُنْفِقُونَ وَلَسْتُمْ بِآخِذِيهِ إِلَّا أَنْ تُغْمِضُوا فِيهِ  
وَاعْلَمُوا أَنَّ اللَّهَ غَنِيٌّ حَمِيدٌ (267) الشَّيْطَانُ يَعِدُكُمُ الْفَقْرَ وَيَأْمُرُكُم بِالْفَحْشَاءِ  
وَاللَّهُ يَعِدُكُم مَّغْفِرَةً مِنْهُ وَفَضلاً وَاللَّهُ وَاسِعٌ عَلِيمٌ (268)"

فدعوت الله أن يؤتيني مغفرة منه وفضلا و يرزقني من الطيبات، بإشارة  
الدرهم الذي وجدته.. ثم حمدت الله أن جمع لي الدنيا والدين، ودعوته أن  
يرزقني الخير الوفير.. ونمت..



## بدون عنوان

اليوم صحيت كثير بكير.. عالسة يمكن.. صحيت إمّي الله يخليها..  
غيّرت لي البامبرز، وعملت لي الرضعة.. في هالأثناء كان أبوي بعاتبني  
بحبّ على قلة نومهم.. لكنّه رجع استخطى حاله.. باسني ولاعبني شوي  
على السرير المورّد، وطلع عالشغل..

عالتسعة قمت من السرير.. وبعد سندويشة الجبنة الصباحية، حملت  
شنطتي وأخذني أخوي مصطفى معه عالمدسة.. المس إيناس زبطت لي قبة  
قميصي، ودخلتني عالصف مع الأولاد.. وبدت تعلّمنا كيف نرسم أنهار  
وورود.. وكيف نلوّن جوا الرسة.. وما نلوّن بره.. وحفظتنا سورة الفيل..  
عالتسعة يمكن.. طلعت أنا ويوسف من المدرسة.. رحنا اشترينا كل  
واحد سيجارة ووقفنا بره مدرسة البنات، ودخنا السجاير كإنا رجال كبار..  
بس ما طولنا هناك.. كان لازم نروح نغيّر ونطلع عالجامعة... اليوم أول يوم  
كان.. ويا دوب لحقنا نسجل مواد الفصل الأول لحوق..

بعد التسجيل، تركت يوسف و رحت أنا ومها على مكتبة قريبة نطبع  
بحث التخرج المسروق. وقضت الطريق وهي تحكي لي إنه أهلها ضاغطين  
عليها في موضوع العريس اللي جاي، وأنا أصبّر فيها شوي شوي..  
وأوعدها نكون سوا..

وصلت منها عالجامعة وطلعت عالشركة... وصلت مع أذان الظهر تقريبا... بس والله ما قدرت أصلي.. ما كان في وقت.. كان عنا اجتماع مهم مع المدير النكد.. ويا دوب لحقت أطبع التقرير الشهري وأسلمه قبل الاجتماع، وتغديت أنا وإسراء وأحلامها وطلعت..

من الشركة طلعت عند نسايبى.. ومن هناك طلعت أنا ونهى، حجزنا صالة العرس ومواعيد المشاكل الزوجية الموسمية ومشاكل الكناين والسلفات، ووصلتها عال مستشفى عشان تولد.. وأنا لسه بدي أتوضي عشان أصلي العصر في المستشفى.. ولا مدرسة البنات بحكوا معي عشان مسرحية طلاب الصف الخامس.. طلعت المسرحية عالربعة وأنا ناسي..

حضرنا المسرحية وصورنا شوية صور نقاهر فيهم الناس، وبوجهي من هناك عالورشة.. حاسبت اللي ركب المطبخ، ونزلنا الأثاث.. وأخيرا صار الواحد عنده بيت مملوك للبنك.. وخلصنا من هم الإيجارات..

طلعت بعدها، زرت إمي في المستشفى، وبما إني هناك، عملت قسطرة وتفتيت حصا وثلت المرارة.. بس والله ما قدرت أحضر دفن إمي.. كان لازم أطلع فورا على المطار.. وأذن المغرب علي وأنا في الطائرة...

رجعت من الغربية مخبي معي في الشنط، ضغط وسكري وعشيقه ثلاثينية وسيارتين ومزرعة، ومحلين تجاريات.. نعمة وفضل من الله.. وأول ما وصلت مطار عمان، أخذت الضمان وعملت قلب مفتوح، وجوزت البنات.. وطلعت أحضر عيد ميلاد إيناس بنت إبنى..

أعطيتها هدية ملونة وزبطت لي قبة القميص..

في عيد الميلاد، حكى معي أخوي الكبير مصطفى.. إلنا فترة كنا بنحكيش.. من يوم ورثة إمي..

وصلت عنده العاشرة بالليل .. صالحته .. ودفنا أبوي .. وجوزت ابني  
الصغير لبنته .. ودفنته وطلعت ..

عال 12 أخيراً وصلت عاليته .. إجت الشغالة هممتني، غيّرت لي  
البامبرز، شربتني الأكل، وورجتني صور ولادي، وحطتني في السرير المورّد  
وراحت ..

الله يلعن الشيطان .. والله ما أنا عارف هاليوم كيف خلص!

## عن الحبّ والعصاير..

- بعد تجربة عدة كاميرات، وتصوير من عدة زوايا، وبإضاءات مختلفة..
  - تقريبا اقتنعت -، أنّ الخلل في صوري الشخصية ليس شيئاً تقنياً...
  - عندما أخرج من صلاة الجمعة، أبدأ بالاستغفار عن كل كلمة آمين كاذبة قلتها أثناء دعاء الإمام..
  - أنا من نوعية الناس الذين - لو - قدّر لهم دخول الجنة، فسيذهبون إلى النار ليسكبوا الوقود على أهلها.. ويرجموهم بالحجارة..
  - الإنسان الطبيعي هو الإنسان الذي يتمتع بمقدار "مقبول" من العيوب.. الإنسان الكامل غير موجود..
- هذه النظرية التي اخترعتها، ساعدتني كثيرا في أن أتصالح مع حقيقة أنني وغد..
- لدي انعدام ثقة بالنفس يدفعني لمحاولة فرض نفسي في كل حوار، خصوصا لو لم أكن أفهم فيه.. فإذا ما قلت لي يوما أنك شاهدت فيلماً فرنسياً، وبدأت بالكلام عنه.. وبدأ الناس يستمعون لك و يعجبون بكلامك.. فإنني سأقاطعك فوراً لأقول أن زوجة ابن عمتي درست هناك.. وسأترسل في الكلام حتى يغيب موضوعك..

- مع أن الأمرين يتطلبان تقريبا نفس المهارة، إلا أنني بارع في انتقاد الناس، وعاجز أمام مدحهم..

في الواقع، أنا أعمي عيوني عن كل محاسنهم، وأبحث عن أصغر خلل فيهم لأنتقده وأضخمه.. هذا يشعرني بالراحة.. ولكنه في الوقت نفسه يمنعني من الاستمتاع بجمال أي شيء.. ربّما علي امتداح الجمال بصدق، لأتمكن من الاستمتاع به..

- كان من المفترض أن تجعلنا التكنولوجيا نوّقر الوقت.. فمثلاً نوّقر ساعتين يومياً لنقضيهما في المشي ومشاهدة الأشجار والطيور.. هكذا كانت النظرية..

الواقع، أن التكنولوجيا قتلت فضيلة الصبر، وجعلت لدينا هوساً مجنوناً باستهلاك الوقت حتى آخر ثانية.. فلم نعد نتحمل أن نجلس "هادئين" ولو حتى لعشر ثوانٍ..

صار مجرد الذهاب لدورة المياه، يستوجب أن تأخذ هاتفك معك.. من يعلم..؟ قد تتأخر هناك..

- أحتاج لتطبيق يجعلني أصلي وأنا ممسك بهاتفني.. ويفضل أن يكون مرفقاً بفتوى.. حسناً.. أقبله بدون فتوى..

- قبل عصر التكنولوجيا، لم أكن أبدأ نهاري بتصفح هاتفني.. لقد نسيت ماذا كنت أفعل في الصباح، ربّما لم أكن أفعل شيئاً.. لكن لا شك لدي أن هذا اللا شيء كان جميلاً.. أتذكر أنني كنت سعيداً في الصباح..

- كيف أصبحت أحس أن قضاء خمس دقائق في مراقبة عصفورين فوق شجرة، مجرد مضيعة للوقت؟ بينما قضاء ساعتين في التجول غير الهادف على حوائط أناس لا أعرفهم، شيء مثير للاهتمام؟

- بتكون بتحبّ "عصفور" .. ولإنك بتحبّه، بتقرّب منه عشان تملي  
عيونك منه.. بروح بهرب.. بتصير تحكي.. يا ريتني ما قرّبت عليه.. بس  
ظلّ قدام عيوني.. "العصفور" ..

بس خلص، الأشياء ما بترجع مثل ما كانت..

- أحمد الله أنني أحببتك قبل عصر وسائل التواصل الاجتماعي.. لم يكن  
قلبي ليحتمل أن أطارذك في كل تطبيق..

- ما لم يبتلعني حوت، أو يقسمني منشار كهربائي إلى نصفين، أو أتحوّل  
إلى فانوس أزرق.. فإنني وبكل صدق أرغب أن تموتي معي.. لا أريد أن  
أسير في ممرّ الأبدية وحدي.. يجب أن تكوني هناك.. ممسكة بيدي وبقلبي..

- قبل أحد عشر عاما، و في ليلة زواجنا بالتحديد، وضعت مزاجي  
ونظارتني على الطاولة الصغيرة بقرب السرير ونمت.. وعندما استيقظت في  
الصباح، وجدت النظارة فقط..

لم يكن من اللائق وقتها أن أتهمك بالسرقة، كنا نعرف بعضنا للثوّ..  
لكنني الآن، وبعد أن أصبحت أفرح فقط عندما تفرحين، وأحزن فقط  
عندما تحزنين.. لم يعد لدي أدنى شك أنك أنت من تسرّب في جنح الليل  
وسرق مزاجي..

- لا شك لديّ أنك كنتِ قاتلة متسلسلة في حياة سابقة.. كيف تفسرين  
إذن أن يعاقب الله قديسة مثلك بالزواج من رجلٍ مثلي!؟.

- عندما التقينا لأول مرة، حاولت قدر الإمكان أن أخفي عيوي وأن  
أبدو جذابا ورائعا ولطيفا.. وأعطيتك الكثير من الوعود بحياة مذهلة..  
وظننت وقتها أن هذه هي أفضل طريقة لإثارة إعجابك والحصول على  
حبّك..

مع مرور الوقت، بدأت عيوبي تظهر، عيبا تلو الآخر، ومعها تنعدم قدرتي على الوفاء بوعودي، وعدا تلو الآخر.. وظننت حينها أن حبك لي قد يقل أو يتأثر.. لكن ذلك لم يحدث، ولم تتخلي عني..

واليوم، أجلس في منتصف صحراء هذه الدنيا بوجه يعلوه غبار السنين وأجزاء مبعثرة.. في يدي سيف مكسور صدئ.. وليس علي من رداء سوى حزني.. ولا زلت تقفين إلى جانبي بابتسامتك الملائكية، لتقولين لي أن الأمور ستصبح أفضل..

لا أحد يعرفك.. لكن أنا أعرفك.. أنت امرأة عظيمة.. وأنا بكل حرائقي ونزيفي وحماتي.. أحبك..

## السقوط

- يحدث أن تعجب بشخص ما.. وترفع منزلته في قلبك.. وإذا ما صار هنالك نوع من الحديث الودي والابتسامات أو التجاذب بينكما، فإنك تقوم برفع منزلتك في قلبه - افتراضاً -.. وتتصرف على هذا الأساس..

في حال كان افتراضك خاطئ.. - وهذا يحدث كثيراً -، فإن السقوط من هذا الارتفاع مؤلم..



## تنويعات على مقام الناس

- كأرنب بريّ، يجب أن لا يكون لديك أي مشكلة مع الذئاب.. فهم وإن حاولوا قتلك، فإنهم يفعلون ذلك بإرادتهم الحرّة ولسبب وجيه جداً وهو الطعام.. وليس بسبب أحقاد أو دناءة.. وهذه منافسة عادلة على البقاء...

مشكلتك الحقيقية يا بنيّ، هي مع كلاب الصيد.. تلك المخلوقات التي لا تتنافس معك على البقاء، وتعيش في مجال آخر مختلف عن مجالك.. ومع ذلك فهي لا تكلم ولا تملّ في مطاردتك.. هؤلاء هم الذين باعوا آخرتهم بدنيا غيرهم، ويبدلون أقصى الجهود في أذيتك، لا من أجل منفعتهم، بل لمنفعة أسيادهم.. ولا ينالون مقابل ذلك إلا بعض العظام والاحتقار..

هؤلاء هم من يجب أن تحذرهم.. وهم كثر..

(من وصايا الأرنب العجوز)

- من المفيد أحياناً أن تسخر من نفسك ومن الأشياء.. لكن على المدى الطويل، فإن السخرية تعطي مفعولاً تخديرياً، ولا تزيل الألم.. لذلك، حاول بين فترة وأخرى أن تجري لنفسك بعض العمليات الجراحية.. شق الجرح بدون تخدير.. تألم كما لم تتألم من قبل.. إستأصل الدامل، طهر الجرح، وأغلقه...

لن تعود كما كنت.. لكنك ستشفى..

- ليس هنالك من قانون مكتوب يحدد نجاحك.. لا شيء يقول، أنك في عمر كذا يجب أن تكون قد فعلت كذا وكذا.. وفي عمر كذا يجب أن تمتلك كذا وكذا.. هذه كلّها أوهاام..

نحن مختلفون تماما عن بعضنا البعض.. ونجاحك لا يقاس بمقارنة ما تملكه بها يملكه الآخرون..

قد تنجح بمقاييس الناس المادية وقد لا تنجح.. هذا لا يهم.. قد تبذل جهودا جبارة ولا تنجح كما تتوقع.. هذا أيضا لا يهم.. وذلك لأن النجاح بطبيعته مرتبط بتوفيق الله عز وجل.. المهم فعلا أن تعمل كثيرا وتلعب قليلا..

وردد كل صباح..

"وعليّ أن أسعى وليس عليّ إدراكُ النجاح"

- فعليا، أنت لا تحتاج لتكون بارعا في اللغة والتشبيهات لتعبر عن حبك لشخص ما.. تكلم بصدق فقط، وكن واثقا، أن هذا الصدق، سيتجاوز في نهاية الأمر كل شيء آخر..

- أنا من البسطاء.. والبسطاء مني.. أنتم ورد هذه الدنيا وماء شتائها.. وأنتم ملح الأرض..

## إلى كل أم تقف على ناصية الحياة..

اللي كل يوم بتصحى والدنيا ليل عشان تلحق قطار الحياة السريع.. اللي عمرها ما شبعت نوم.. اللي بتفك بين بناتها كل يوم الصبح لما يتقاتلوا غالبكل.. وبنفس الوقت بتعمل فطور لجوزها.. اللي بترك ضناها اللي برضع وراها وبتطلع عالشغل لأنه الدنيا بدها هيك..

اللي بتطلع من شباك الباص على كل الناس اللي بسوقوا سيارات وبتتخيل حالها مكانهم، بس عارفة انه الحلم بعيد.. ويمكن بحياتها ما تخلص من هم المواصلات.. اللي بتشتغل في مكان بتكره فيه كل حدا.. ونفسها كلهم يموتوا.. بس مضطرة تجامل وتبتسم لأنه ما عندها رفاهية إنها تترك..

اللي عايشة عاجمعيات وبتتكركب كل أمورها لو الراتب تأخر يوم بس.. اللي بتقسم كيلو اللحم المفرومة أربع طبخات.. اللي بتتسلف من خواتها اللبسة للمرة الخامسة.. اللي بتاكل هم يوصلها كرت عرس أو حدا ينجح في التوجيهي.. اللي بتتحمل كلام حماتها وتلميحات بنات حماها.. بس عشان الحياة تمشي..

اللي نفسها تحط ولاذها بمدارس أحسن، وتشتري لهم ملابس أحسن.. وما يحسوا حالهم أقل من حدا.. بس مش قادرة.. اللي بتحضر مسرحية

مدرسة الأولاد وبتشوف ابنها كان كومبارس، وفي ولاد ثانيين أخذوا كل الأدوار ومع هيك بتظل فخورة فيه.. اللي بتقبل مستوى بنتها المتوسط لأنه الناس قدرات..

اللي بنجرح قلبها لما بتشوف صور اللي بطلعوا رحلات بره البلد، وعارفة انه صعب تطلب هيك من جوزها.. اللي ما بتلاقي وقت تمشط.. ولا تهتم بحالها.. وكل وين ووين لما تتطلع على المراية..

عشان تكتشف إنه الحلوة اللي كانت زمان عم تحتفي.. اللي نفسها تشتري لبسة أو جلباب جديد، بس دايا بتبدي حدا ثاني على حالها..

اللي بترجع من شغلها حيلها مهدود، وبتوقف في المطبخ تحضر طبخة ليومين جايات.. اللي كل ما ولادها يطلبوا منها شي.. بتأجله بأعذار واهية.. بس بدون ما يزعلوا..

اللي بتراعي جوزها، وبتتفهم ظروفه.. وما بتطلب منه أكثر من طاقته.. ولا بتقارنه بحد.. وعارفة إنه مش أحسن زلمة موجود، بس بتحبه وبتحترمه وبتصونه.. اللي بزعجها شخيره بس عمره ما عرف إنه شخيره بزعجها..

اللي بتبتسم لما تشوف الستات على التلفزيون.. بحكوا عن تحرير المرأة وحقها في العمل..

اللي ما بوصل آخر الليل إلا مش قادرة توقف على رجليها.. ومع هيك بتتعد على سجادة الصلاة تشكر ربها على النعمة، وتستغفره، وتدعيه يرضى عنها ويوفق ولادها وجوزها..

اللي صارت جدّة، واللي صارت أم، واللي كانت أم.. واللي نفسها تصير أم، واللي يئست تصير أم.. واللي راحت عند ربنا.. إنتموا كلكم أمهاتنا..

بتحبونا رغم كل شيء سيء بنعمله.. رغم عقوقنا كأبناء ومضايقاتنا  
كإخوة ونكدنا كأزواج.. لسه بتحبونا، وبتحملوا هم الحياة عنا.. بكل صبر  
وقوة وجلد.. ووجودكم في حياتنا كإناث، هو اللي بعطينا التوازن.. وبخلي  
هاي الحياة القاسية أسهل..

لكنّ مني، ومن كل رجل، كل التحية والاحترام... وكل عام وأنتنّ  
جميعاً بخير..

## تنويعات على مقام البياتي..

- إذا ما زارني أحد في مناسبةٍ ما وأحضر معه هدية مغلقة، فإنني أتصرف وكأنه لا فضول لدي بمعرفة ما تحتويه الهدية.. لكن - بمجرد خروج الضيف - فإن هذا التمثيل لا يدوم عادة أكثر من دقيقتين..
- في معظم المرات التي تكلمت فيها للناس، عن دوافعي لفعل الأشياء، كنت كاذباً..
- إذا لم يكن فيها شيء تخجل منه، لا يمكن تسميتها عائلة..
- في الوقت الذي أبتسم فيه للنادل، وأقلب فيه صفحات قائمة الطعام، لأبدو كمن يختار وجبة يحبها.. يكون عقلي مشغولاً بعمليات حسابية..
- لدي فضول عجيب في استكشاف محتويات ثلاجات الناس.. لا أريد أن أكل.. أن أنظر فقط..
- أعتقد جازماً أن معظم ما يكتبه الناس عن علاقتهم التجريدية التكعيبية السريالية المتفردة الرائعة بالقهوة، هو عبارة عن هراء..
- في اللحظة التي آمنت فيها أنني لا يجب أن أنام قدر ما أشتهي، أو أكل قدر ما أشتهي، أو أتكلم قدر ما أشتهي.. بدأ نجاحي..
- فرضية أن من يتمتع بجمال جسدي، يكون سطحياً، لا تستند إلى أوهام الحسد.. في الواقع، القبول الاجتماعي الذي يتمتع به الشخص

الجميل لا يدفعه لتطوير أي مميزات أخرى.. وفي الجانب الآخر، ترى من هم أقل حظاً من الناحية الجمالية يطورون ميزات أخرى ليحفظوا بالتنافسية.. بعد كل حساب، تبدو الفرضية صحيحة.. أجمل الأرواح التي قابلتها كانت في أجساد عادية..

- ستصل لمرحلة ما في حياتك، وأرجو أن لا تصلها متأخراً.. تعرف حينها أن معظم الجهود والكلام والأعمال التي قمت بها من أجل الآخرين كانت مضيعة تامة للوقت والجهد.. وأنت لو استثمرت هذه الموارد من أجل نفسك لكان أفضل بألف مرة..

حِينِيذٍ.. ستتشابه الأناية مع السعادة لدرجة أنك لن تفرق بينهما..

- عندما تخطئ مع امرأة، لا تراوغ ولا تحاول اختراع أعذار.. تحمل المسؤولية و إعتذر بكل صدق وأسف.. وتذكر أن الذهب - قادر دائماً - على تحسين موقفك..

- مهما كان حجم الجرم الذي ارتكبته، ولو كان قتل عشرة أشخاص، لا تنحني لأحد ولا تذلل نفسك..

قف كإنسان كامل الكرامة والعزة، واعترف بأنك أخطأت وتحمل نتيجة خطأك.. حينذاك، لن يجرواً أحد على إهانتك..

- إياك أن تفرح إذا أخذت من الناس شيئاً بدون أن تدفع مقابله نقوداً.. بطريقة أو بأخرى، ستدفع ثمن ذلك... والمسألة مسألة وقت..

- إذا ما حدث وكرهتُ شخصاً ما، فأنا أكره أطفاله أيضاً.. وأمه وأبيه، وقبيلته التي تؤويه..

- أكره بقايا النقود التي لا أستطيع سحبها عن طريق بطاقة الصراف الآلي.. والله أحتاجها يا أخي..

- أكبر عقاب لأولئك الذين لا يعجبهم شيء، هو أن لا يعجبهم شيء..

- لو غاب عنك أخوك لمدة أسبوع، ثم قال لك أنه كان في باريس، لكن لم تتح له الفرصة لالتقاط صورة أمام برج إيفل، فإن احتمال أن تصدقه لا يتجاوز الواحد في الألف..

رحم الله أبا بكر، لما قال له كفار قريش "إن صاحبك يزعم أنه أسري به من مكة إلى بيت المقدس، وعاد في ليلة" قال لهم..

"إن كان قاهها فقد صدق" ..

- ديك الجن! شو إسمك الحقيقي ياخوك؟

- I am not at a liberty to disclose such information

- أفحمتني... You carbonized me...

تمت..

(حوار حقيقي)



## عمّار

لما انولد عمّار كان عمري ثلاث سنين.. وما بعرف إذا أنا فعليا متذكر لما  
إمي روحت من المستشفى حاملته على أيدها، أو إنه - مثلي مثل الناس -  
عقلي برسم هاي الذكريات الوهمية، وبهيا لي إني متذكر.. لكن الشيء الأكيد  
إني مش متذكر أي شيء من طفولتي قبله..

كنا أسرة سينائية إلى حدّ ما.. أم شابة جميلة في منتصف العشرينات..  
وأب ثلاثيني مقتدر، وعاشين في بيت جميل زي إمي، وبلد عربي مقتدر زي  
أبوي..

وفي الوقت اللي أنا كنت فيها ماخذ ملامح أبوي القاسية وشعره  
الأجعد.. كان هو متشرب كل جمال إمي.. ملامحها.. غمازاتها.. عيونها  
الخضر.. شعرها.. كل شي فيها.. كان نسخة عنها.. كان عنده كل سبب  
يخليها تحبه.. إلا إني لغاية الآن بعتمد إنها ما كانت تحبه.. أو اللي صار بعدين  
هو اللي ما خلاها تحبه..

في عمر سنتين تقريبا.. اتضح انه أخوي عمّار عنده مشكلة في الكلام  
والتصرفات.. كان كل كلامه صرخات متقطعة ما فيها أي حرف..  
وتصرفاته بتدل إنه عايش في عالم ثاني.. وبعد فترة من التخمينات  
والتطمينات، التشخيص حسب الموضوع.. في عمر ثلاث سنوات.. تم

تشخيصه - زي ما حكّت لي إمي بعدين وعلى مراحل - بإعاقه عقلية شديدة.. وطيف من أطيف التوحد..

بعد تشخيص حالة عمّار واليأس من شفاؤه.. راحت السكينة من بيتنا.. وبدأت المشاكل تظهر رؤوسها الصغيرة مثل براعم الشيطان.... بدأت بتوتر بسيط على طاولة الغدا.. بعدين أصوات مكتومة ورا جدران غرفة النوم.. لكن شوي شوي طلعت الأصوات خارج غرفة النوم.. وزادت لدرجة إنّي كنت أتخبّي وأخبّي عمّار عنها، وصاحبها تكسير أواني ومزهريات وبكاء وعصبية.. وبعد فترة من المشاحنات، انتهى الزواج السينمائي بطلاق سينمائي.. وأتوقع إنه كان مجزي ماديا لإمّي.. لأنها أبدا ما اضطرت تشتغل..

انفصال أبوي عمّار، وحالة عمّار الميئوس منها، دخلوا إمّي في حالة إكتئاب شديدة كانت تعبّر عنها بانعزالها وصراخها المستمر.. ويمكن هذا عمل عندها نوع من ردة الفعل تجاه عمّار بالذات.. يمكن فكرت إنه هو كان السبب أو بشكل أدق، إعاقته كانت السبب.. لكن بكل الأحوال.. النتيجة كانت، إنها كانت تتحاشى تلعب معه بأي شكل وتتهرب من حبه البريء تحت أي عذر..

ما طلعتنا من البلد، ظليتنا فيها.. لكن رحلنا على بيت أصغر.. وإمّي جابت لنا شغالة تدير بالها علينا.. وتفرغت لحياتها الخاصة.. وكانت هاي أكبر فترة ربطت بيني وبين عمّار..

بغض النظر عن إعاقته، كانت حياتي معه جداً سعيدة.. ما قدر طبعاً يدخل المدرسة.. فظل حبيس البيت.. وكونه أبوي كان اختفى تماماً، وأمّي طول نهارها بره البيت.. والشغالة ما بتحكي معه.. كنت أنا دنياه كلها..

وكان هذا الشيء يسعدني بشكل لا يوصف.. كنت أول ما أرجع من المدرسة، ألاقى بستناني بصرخاته اللي زي فتى الأدغال.. وأقضي نهاري كله معه..

كنا كثير نلعب، طبعاً ما كان لعب لعب زي ما بلعبوا الأولاد.. لأنه كان جاهل بأي نوع من القواعد.. كان تخبص بس.. لكن كان وقت نقضيه سوا كإخوة.. وبرغم قدراته العقلية المعدومة تقريباً.. إلا إنه كان في نوع من التفاهم البسيط بيننا.. كان يفهم علي شو بدني..

وكبرت.. وكبر عمّار.. وفي الوقت اللي كان حبه لإمّي يكبر.. كان تجاهلها إله وخجلها منه يكبر.. كانت تنظر لي إنّي أنا الابن الشاطر المجتهد الذكي اللي بتفاخر الناس فيه، وهو الابن المعاق الغبي التي بتخجل منه وبتخبه عن الناس..

وهذا الشيء بالذات كان سبب الفجوة الكبيرة اللي بيني وبينها..

كنت - برغم كل شيء - بحبه وما يخجل منه... لدرجة مرة - كنت في الصف الخامس يمكن - كان عندي تكريم في المدرسة، كنت من الأوائل.. وكانت حفلة التكريم بعد الظهر ولازم نروح أنا وإمّي.. ولما عرضت يجي عمّار معنا ما رضيت.. كانت مانعة بأي شكل من الأشكال إنه يروح معنا أي مكان عام... فضحكت عليه بشي.. وطلعنا بسرعة بدون ما ينتبه، وما أخذناه..

لما رجعنا.. كان واضح إنه مش موقّف بكا طول الوقت.. وخابط راسه في الأرض لمنزل الدم من راسه.. لما شفته والدم والدموع معيين وجهه، نسيت كل فرحتي بالتكريم، وركضت عليه.. تركني وراح عند إمّي.. ومع هيك تجاهلته وصرخت عليه وراحت على غرفتها وسكّرت الباب.. يومها

قلبي انحرق عليه.. كان منظره وهو قاعد على باب غرفتها يبكي.. والشغالة بتحاول توخذه تغسله وهو مش راضي، أفسى من الاحتمال.. حتى أنا لما كنت أحاول أقرب عليه يضربني.. كان يجب إمي أكثر من روحه.. بس ما كان يلاقي منها إلا الصدد.. يومها بالذات بدأت فعليا أكره إمي.. وقررت إني بحياتي ما أتركه.. وأنا اللي راح أعوضه عن كل حب إمي.. وغصب عنها..

صرت لما أروح من المدرسة أطلععه معي عالخارة.. عالم جديد بالنسبة إله.. وناس جداد.. ومع إنه الموضوع عمل لي مشاكل لا حصر لها مع إمي.. إلا إنها كانت ولا شي مقارنة بالمشاكل مع الناس..

كانت طريقة عمّار في إيداء إعجابه بالناس إنه يضربهم.. هيك كان بعمل معي، بس الناس ما كانوا مستوعبين هذا الأسلوب المبتكر.. خصوصا إنهم ما يعرفوا وضعه، وشكله الخارجي لا يوحى بأي شي.. ولغاية ما فهموا هاي الحقيقة، أنا اللي دفعت الثمن..

كنت مرة ماخذة معي مشوار لآخر الخارة نشترى شي من المكتبة.. وقتها شفنا ولدين سودانيين توأم، كانوا أكبر مني بسنة، وشرانيين كثير وكانوا متحركشين في وضاربيني أكثر من مرة.. كانوا ماشيين ومعهم أختهم الصغيرة حاملة آيس كريم..

وبس شفنتهم دعيت ربّنا ما يتحركشوا فينا..

وفعلا ربّنا استجاب.. ومروا من جنبنا بسلام.. لكن من غامض علم الله، لما صاروا بمحاذاتنا تماما، قام عمّار خطف الآيس كريم من أختهم وضربها ووقعها على الأرض وهرب... حاولت أستغل صدمتهم من الهجوم الوقح والجريء وأهرب أنا الثاني بس ما لحقت.. عمّار لحاله هرب..

وأنا مسكوني.. وتمكنت في ظل انهيار الضرب الثنائي بالأيدي والأقدام،  
تمكنت بنص عين أشوف عمّار جاي بركض لعندي على هيئة منقذ.. وأول  
شي عمله لما وصل، إنّه بلش يضرب في معهم.. بس منيح على كل حال..  
هذا اللي وقفهم من الضحك..

ومع هيك، ما زعلت منه.. كان كل شي بعمله على قلبي عسل.. كان  
أخوي.. دمي ولحمي.. إبنّي كان.. أخذته كل مكان.. عالخارة، عالنادي  
القريب.. عالمسبح.. وعلمته السباحة وسبح كأنه طول عمره بسبح.. حتى  
إني مرة لما كبر.. قبل ما أدخل توجيهي بشوي.. أخذته عالمسجد..

كانوا أصحابي إقترحوا علي آخذه عالمسجد يصلي.. وأنا أدعي له.. ممكن  
ربّنا يستجيب ويشفيه.. وفعلا اقتنعت بنصيحتهم.. وساعدني إنه عمّار كان  
يهداً ويكنّ لما يسمع القرآن.. وكنت لما أصلي يوقف جنبي ويسوي مثل ما  
بسوي.. فتشجعت وأخذته معي..

لكن من وحي تجارب سابقة.. أو مصايب سابقة.. اخترت أقل صلاة  
يكون فيها ناس.. كانت صلاة العصر في رمضان.. وفي مسجد صغير ما في  
حد.. ما بتكمل فيه الصلاة صفيين..

دخلنا على المسجد.. وفعلا عمّار ظل قاعد وساكت.. وأقاموا الصلاة  
وكنا ورا الإمام مباشرة.. وبدأت الصلاة.. طبعاً أنا مش مركز نهائياً في  
الصلاة.. قلبي برجف من أي حركة بعملها عمّار.. لكن ظل هادي  
وساكت..

كانت الدنيا رمضان والجو صيف، والإمام تعبان.. قرأ الفاتحة وسورة  
صغيرة يمكن وركع.. في السجود غمّضت عيوني ودعيت ربّي يشفي أخوي  
شفاء لا يغادر سقماً.. وفي غمرة خشوعي في الدعاء، واستحضار ألطف

الكلام.. صحيت على صوت الأمام بصرخ.. كان عمّار استغل سجوده ونظّ  
على ظهره وبلّس ضرب فيه وهو يصرخ بأصواته المميزة..

طبعاً فرطت الصلاة كلّها.. وبألف يا ويلاه، لفكيناها أنا والمصلين عن  
ظهر الإمام، وانطردنا شرّ طردة، وأنا بشرح للناس إنه مسكين.. ما بعرف  
إذا أفطر الإمام يومها، بس أكيد ما إنقبل له صيام من ورائنا..

وبمواقف شبيهة مشيت حياتي مع عمّار.. وكبرنا.. وصار لازم أدخل  
جامعة.. ووقتها رحلنا كلنا على عمّان.. وهناك كانت حياتنا على موعد مع  
تغييرات كبيرة..

وقتها إكتشفت إنه أبونا اللي ما شفناه من واحنا صغار.. كاين شاري  
بيت إلنا في عمّان وكاتبه بإسمي وإسم عمّار.. وسكننا فيه.. كان بيت كبير  
حلو ومعه حديقة وقريب من الجامعة الأردنية..

دخلت هندسة ميكانيك.. وفي نهاية السنة الأولى عرفنا إنه أبوي مات  
والمحكمة حولت لنا وريثة محترمة.. وطبعاً إمي كانت الوصي على فلوس  
عمّار.. بعدها بأشهر، إمي قعدت معي وحكت لي قرارها الغريب.. حكّت  
إنه في شخص مناسب تقدم لها وهي موافقة... وإِنَّه هي تعبت وضحّت  
عشاننا، وإحنا كبرنا وتطمنت علينا، وبدها تشوف حياتها.. كانت في  
منتصف الأربعين.. وطبعاً هذا حقّها.. لكن العريس كان هو المشكلة..

كان أصغر منها بعشر سنين.. ومع إني كنت وقتها شاب صغير، إلا إني  
ميزت من أول قعدة معه نوعيته.. كان من النوع اللي يستغل وسامته وكلامه  
المعسول ووحدة النساء للحصول على فلوسهم..

طبعاً ما كان مناسب إنّي أرفض ولا منطقي.. لكن خوفاً الأساسي كان من ردة فعل عمّار.. خصوصاً إنه عريس الغفلة كان راح يعيش معنا في البيت..

تزوجوا.. وراحوا شهر غسل على تركيا.. وكانت لأول مرة بترك عمّار.. ومع إنه كان كبير وقتها.. إلا إنه الموضوع أثر عليه.. لكن الأثر الأكبر كان لما رجعوا من شهر العسل.. وعاش زوجها معنا في البيت.. بدأت الحياة الحقيقية وبدأت معاناة عمّار..

ورجعت إمي وزوجها من شهر العسل.. طبعاً كشاب في الجامعة، كان صعب جداً علي أتأقلم مع حقيقة إنه في شاب غريب عايش معنا في البيت، وهو زوج إمي!!! لكن لو أنا ساعدتني الحكمة وطبيعة الأشياء إنّي أتفهم الموضوع، فعمّار كان عاجز تماماً عن فهمه..

كان الوضع سيء للجميع، كان في شبه إحساس بالذنب - غير المفهوم - من جهة إمي وعريسها وإحساس بالضيق من جهتنا.. ومع إنه أنا ومصطفى (زوج إمي) وإمي كنا بنتصرف بنفاق الكبار ومجاملاتهم، عمّار بطفولته كان مختلف..

كانت نظراته لمصطفى قاتلة، وبدل إنه في ردة فعل عنيفة تطبخ على نار حامية.. عشان هيك كنا نظل دائماً على أعصابنا خوفاً من أي ردة فعل مفاجئة لا يحمد عقباها.. ومصطفى من جهته، كان ذكي وفاهم الموضوع تماماً. عشان هيك كان يتجنب أي حركة تقارب مع إمي بوجود عمّار، وبوجودي بالضرورة، إننا بصورة أقل..

لكن التصابي والفرحة اللي كانت إمي عايشيتها في شهر العسل، نوعاً ما  
أعمت عيونها عن حساسية عمّار.. وما أخذ الموضوع أكثر من يومين قبل ما  
يهاجم عمّار مصطفى الهجوم المحتوم...

كانت إمي في المطبخ بتعمل معجنات، وعمّار قاعد عندها، ماسك كتاب  
الطبخ بالقلوب، وبلعب بمرقّ العجين.. دخل مصطفى المطبخ، غافل تماماً  
عن ترتيبات القدر.. وإمّي الله يصلحها، يبدو إنّا حطت إيدها على  
خصره.. وكانت هاي إشارة البدء لعمّار..

في أقل من ثانية، كان مرقّ العجين معبي وجه مصطفى دمّ وطحين..  
ولولا سرعة تدخّل إمّي والشغالة، كان مصطفى راح فيها..

لما وصلت المطبخ أنا كانوا بعدوا عمّار عن مصطفى، ومسكته أنا فوراً..  
طبعاً مصطفى بيّن إنه الموضوع عادي، وإنه عمّار عقله عقل طفل وما عليه  
عتب.. لكن هذا ما كان مهمّ... موقف عمّار بعد هيك كان هو الحدث  
الأساسي..

كانت إمّي منحنية على عريستها وبتمسح عنه الطحين والدمّ.. وبنفس  
الوقت كرهانة كل وجود عمّار ونفسها تنشق الأرض وتبلعه.. كانت  
بتصرخ عليه وعيونها كلهم حقد.. وهو لأول مرة كأنه يحاول يحكي  
حوار.. كإنه إعاقة كلها إختفت وما في شي بمنعه من الكلام إلا لسانه..  
كان يصرخ ويأشر ويبكي بنفس الوقت.. ويحاول يحكي ويشرح بس لسانه  
خانه.. وشفّت في عيونه إنّه ما كان فاهم شو صاير.. بالنسبة إله كان بحمي  
إمّي وهي بتبهدل فيه... هديته وأخذته على غرفته وأنا ماكل هم الأيام اللي  
جاي..



بعدها صرت أحاول ما أتركه في البيت إلا مسافة ما أكون في الجامعة..  
لأنني عارف قديش بحبّ إمّي وقديش هي وزوجها بكرهوه.. وعلى قد ما  
كنت خايف من ردة فعله، كنت خايف عليه.. ووقتها صرت أشوف  
تغييرات على عمّار بحياتي ما شفتها..

كنت أرجع من الجامعة ألاقه في غرفته.. ساكت ما بحكي شي.. ولا  
بعمل شي.. الحوية اللي كانت فيه اختفت.. حتى لما يشوفني ما يتحرك..  
كأنه بعالم مختلف تماماً.. كان واضح إنه في إثني كسره.. بس أنا ما كنت  
عارف شو هو.. وحتىّ لما سألت إمّي جاوبت بعصبية إنه يروح ينصرف  
عمّار.. ما صار له شي..

بعدها صار عمّار لازم ينام معي على التخت كل يوم.. وتقريبا كل يوم  
يصحى من الكوابيس مفزوع.. كان وجود مصطفى في البيت عامل له أزمة  
كبيرة.. أو على الأقل هذا اللي كنت متصوره..

بعد أسبوعين تقريبا من حادثة المرق، كان يوم جمعة.. أخذت عمّار  
أحمّته.. كنت أنا متولي تحميمه من زمان.. وأنا بليف بإيده توجّع..  
وصرخ.. تطلعت مكان الوجع منيح، ولا في أثر ضربة.. كدمة صفرا  
كانت.. طبعا كنت متعود إنه عمّار دايمًا جسمه كدمات كونه كثير حركة  
ونطّ.. ومن زمان بأذي حاله.. بس المرة هاي ما بعرف ليش شكيت إنه  
ممكن يكون مصطفى اللي ضربه.. وطبعا ما في وسيلة نعرف.. لكن الشك  
انزاع..

وكعادة الأيام اللي ما بتخبي شي.. بعدها بيومين من الجامعة، ولقيت  
عمّار في غرفته وعينه زرقا ونافخة.. وإمّي وجوزها طالعين بره وتاركينه مع  
الشغالة..

بدون وعي مسكت الشغالة، ومن خوفها مني حكّت كل الحكاية  
بسرعة.. كايّنة إمي بدها تطلع مع مصطفى، وعمّار مسكها عشان يمنعها..  
ولمّا إشتد النقاش، عمّار حاول يضرب مصطفى، فراح مصطفى ضربه  
ودفعه وطلعوا..

وبكل الحقد اللي في العالم استنيت رجعتهم.. ولحسن حظ الجميع إنه  
رجعتهم ما طوّلت.. أول ما حطّ المفتاح في الباب وهو بتضحك مع إمي  
كنت فتحت الباب وتناولته..

أنا فعليا ما كنت بضربه.. كنت بضرب كل لحظة إمي أهملتنا فيها، كل  
لحظة زعلت فيها عمّار.. كل لحظة كرهت فيها جمالها وجسدها اللي شغلوها  
عنا.. كل لحظة كنت أشوف ابتسامتها للناس وننحرم منها إحنا.. كل لحظة  
أكلنا فيها لحالنا.. وخفنا فيها لحالنا.. ونمنا فيها لحالنا.. كنت بضرب حبّها  
للرجال وضعفها أمام الرجال.. ابتساماتها القاتلة إلهم وأنا طفل مراهق..  
كنت بضرب كل شي بكرهه فيها.. كنت بضربها هي فعليا.. لكن في جسد  
مصطفى..

طبعا من شدة الضرب، خافت هي إنها مجرد تقرب.. كانت واقفة  
ومصدومة!! حتى عمّار كان خايف ونحبي ورا الكنباية.. ما قمت عن  
مصطفى إلا لما غيب.. وبدون ولا كلمة.. مسكت أخوي عمّار وطلعنا من  
البيت..

كان انهم طبعا إنه مصطفى ما ظل له قعدة معنا.. وبس رجعنا ما كان  
موجود.. وإمي ما حكّت معي ولا كلمة.. وهو طبعا كان أجبن من إنه  
يشكي عليّ.. لأنّي عارف شو كان بده.. كان بده فلوسها.. وأنا مش مهم  
عنده..

ثاني يوم برضه ما حكينا مع بعض.. واليوم الثالث، قعدت معها، وحكت لي بلهجة اللي اتخذ قراره، إنه حياتها خربت بما فيه الكفاية، وإنه هي ومصطفى راح يستأجروا بيت ثاني.. وراح تزورنا كل فترة.. وما حاولت حتى تعتذر عن اللي عمله مصطفى..

طبعاً كنت متوقع ردة فعل شديدة منها، لكن مش لدرجة إنها ترحل مع زوجها.. ومع هيك، فإن سنين طويلة من برود العلاقة كانت كافية إنه ما يظهر عليّ التأثير بالقرار.. حكيت لها إنه أنا بتمناها كل خير وما كان عندي مانع.. بس طلبت إنها ترتب شنتها وتطلع بدون ما عمّار يشوفها.. وفعلاً.. أخذت عمّار عالمسبح ولما رجعنا كانت رحلت..

الوضع كان سيء أكيد على عمّار.. لكن لأول مرة ما قدرت أفهم ردود فعله.. كان مرات يكون حزين وصامت.. ومرات عايش حياته عادي.. وعشان أسليه، جبت له حيوانات أليفة.. جبت له عصافير وسمك.. لكن كلهم كانوا يموتوا.. دفعني راتبي عصافير وسمك.. العصافير إما يطيرهم أو يقتلهم وندفنهم أنا وإياه.. والسمك يوم أرجع ألاقه فاردتهم على الأرض وبلعب معهم.. أو معبي الحوض شامبو ويعمل فقاقيع.. ما عاش عنده إلا بسّ بُني.. صار صحاب هو وإياه..

عاشت إمّي مع مصطفى سنة وشهرين.. وكانت تزورنا خلالها.. زيارات أسبوعية أولها، وشهرية بعد هيك... وفي آخر أيامها معه، كنت أشوف في عيونها بعيون الإبن إنها مش مبسوطة.. وإجا أخيراً اليوم اللي خلصت فيه مغامرتها ورجعت على البيت بشنطة أواعيتها..

طبعاً ما كان في داعي تحكي لي شي.. كل شي كان واضح.. طلقها مصطفى بعد ما أخذ منها كل شي.. حتى ذهبها أخذه وباعه.. ما ظل معها

إلا تاج ذهب أبيض كان أبوي جاب لها إياه على ولادة عمّار.. هذا الوحيد  
اللي ما باعته.. كانت جداً تحب هذا التاج.. ومرات كثير تلبسه في البيت..

بعد رجعتها كانت مكسورة كثير.. كإن الحيوية المفاجئة اللي أعطها  
إياها زواجها من مصطفى، راحت وسحبت معها روحها.. عيونها الخضرة  
ذبلوا وإسودّ تحتهم.. عودها نفسه ذبل ونحفت كثير.. حتى مشيتها  
وجسمها اللي ياما اعتدّت فيه كان أشبه بخيال.. وغطت الشيب بشال  
صوفي.. كان واضح إنها كبرت في هاي السنة عشرين سنة..

واعترفت لي في لحظة صفاء روحي، من هلي اللحظات اللي ما بتتكرر،  
إنها أخطأت كثير كثير.. بحقّ نفسها.. وطلبت السماح.. حضنتها  
وساحتها، وكنت لأول مرة بحسّ فيها كإمي.. حتى علاقتها مع عمّار  
تحسّنت.. لدرجة كانت تنيمه عندها في الغرفة..

لكن طبيعة الأيام اللي ما بتتبدل، ما أعطتها وقت كثير تكفّر عن  
ماضيها.. بعد رجعتها بأسبوعين كان طيب شاب بشرح لي بأسلوب  
الأفلام المصرية في ممر أزرق من ممرات مستشفى الجامعة، إنه سرطان في  
المعدة والأمعاء ومنتشر وفي مراحلها الأخيرة..

عاشت بعدها أسبوع أو أكثر شوي.. ما لحقت تخرجي حتى.. لكن كان  
هذا الأسبوع من أجمل أيام عمّار.. ما كانوا يفترقوا أبداً.. وطول نهارهم مزح  
وضحك وحب.. ولدهشتي الشديدة، بدا إنه عمّار استوعب فكرة مرضها  
وموتها.. حتى راح بكل براءة حفر لها قبر صغير في الحديقة جنب قبور  
عصافيره وسمكاته..

بعد وفاتها، عمّار حط كل ملابسها وتاجها الذهب في صندوق خشبي  
أسود كبير.. وحطّه في غرفته.. وكان مرات بس أرجع من الشغل ألاقيه  
لابس فستان من فساتينها..

بعد موت إمي بستتين تقريبا، شعرت إني لازم أتزوج.. كنت بدي حدا  
معني يحمل معي هالحياة.. وكنت جاهز من كل النواحي.. عندي بيت  
وشغل وفلوس.. ومش ناقص إلا عروس تشاركني هالدنيا.. وما كان بدي  
منها إلا شي واحد.. ترضي بوجود عمّار الدائم في حياتنا.. وبدأت عملية  
البحث عن هاي القديسة..

طبعا عشان أكون واضح وصریح مع الناس، كنت بخبر أي حدا بسأله  
عن عروس بشرطي الوحيد، بدي زوجة تقبل تعيش معني في بيت فيه  
أخوي.. وكان هذا شرط صعب جداً عند الناس..

في معظم الحالات، كانوا الناس يرفضوا رفض قاطع.. وجزء بسيط  
منهم يوافق على زيارة مبدئية يشوفوا فيها عمّار.. كان بهمهم عمّار ووضعه  
أكثر من العريس نفسه..

طبعا كنا نروح نزورهم، ولأنه عمّار وقتها كان كبر وصار شاب طول  
بعرض وحليوة وعيون خضر، كان التفكير المتمني - لو جاز التعبير - يهياً  
للسنات خصوصا إته هو العريس.. ويصيروا يدوروا في وجهي أنا على  
الإعاقة العقلية..

طبعا أول ما أبدأ الكلام يفهموا القصة، وتظهر نظرة "سبحان الله" على  
وجوههم.. وفي غالبية الحالات، كان الرفض المؤدب.. تحت بند الحمو  
الموت، والناس قدرات.. ينهي الزيارات القصيرة.. ولو صدف وكان  
عندهم حوض سمك، كانت الزيارة تنتهي بسرعة أكبر من المتوقع..

لغاية ما في يوم دلّني صاحبة لخالتي على بيت ناس في ضاحية الرشيد..  
وطلبوا يشوفوني أنا وعمّار.. وكنت أول مرة بشوف فيها ميس..  
استقبلنا عمّي أبو أحمد بكل ودّ وترحاب.. رجل في الخمسين.. لحية  
بيضاء خفيفة وابتسامة دافئة وجسم ممتلئ بتغطيه دشداشة بيضا جميلة..  
بدا كأنه أستاذ متقاعد.. ومن هاي النوعية اللي بتتفاعل بس تشوفهم..  
بمنحوك طاقة إيجابية بمجرد إنك تشوفهم.. حتّى كان فيه شبه من إمام  
المسجد اللي صلينا عنده زمان..

دخلت أنا وعمّار لابسين مطّمين.. وأنا بدعي الله تمرّ هالطلبة على خير..  
سلمت على الرجل وعرفته على عمّار.. وأول ما شاف عمّار إبتسم له.. فعّمّار  
طبعاً بعرفش يسلم.. مش من هواياته السلام على الناس.. لكن لما شاف  
الزلمة وقّف هيك شوي، وصفن فيه.. أنا قلبي صار في رجلي.. إجيت  
أمسك عمّار وأبعده.. راح عمّي أبو أحمد أشري أتركه.. وتركته وأنا ببسمل  
وبحوقل.. وبكل هدوء قام عمّار رفع إيديه لفوق وقربهم على وجه الزلمة..  
ومسك ذنيه شوي.. شدّهم كأنه بتأكد ما بنفكوا.. وتركهم.. وقعدنا..

قعدت أنا والزلمة، وحكيت له قصتي باختصار.. إنه احنا أيتام، وعمّار ما  
عنده غيري.. وأنا مهندس وبشتغل شغل منيح.. والوالد ترك لنا ورثة  
منيحة..

طبعاً الرجل مدح في وفي أخلاقي وموقفي تجاه أخوي.. وبدأ يذكر قصص  
اللي بتخلوا عن أهلهم..

بعدها دخلت حماي.. ست بشوشة هي الثانية، لكن واضح إنها ما كانت  
بتشارك حماي نظرتها المتفائلة تجاه عمّار.. كانت أقرب لإنها جاي تستكشف..

قعد عمّار هادي.. وقعدنا وحكيئا.. وفي وسط الحديث دخلت ميس  
حاملة القهوة.. فتاة محجبة.. نحيفة شوي.. ملامح عادية.. لكن فيها رقة  
مهندسين الديكور.. وهي فعلا طلعت مخلصه تصميم داخلي.. وعيونها  
كانوا حلوين وفيهم ذكاء.. اجت تقدم القهوة.. وبدأت بعمّار.. قام أخذ  
منها الصينية كاملة.. وحطها قدامه.. ضحكت وسكتت..

حكيئا وحكيئا.. وتعرفت عليها أكثر.. والجماعة حكوا إنهم بشكل  
مبدئي ما عندهم مانع.. بس بشرط يقضوا معنا أنا وعمّار وقت أطول حتى  
يقدروا حالته..

طبعا ظهرت من عمّار بعض الحركات أثناء زيارتنا.. لكن تمت الخطبة  
على خير.. ووقتها بالذات ما جبت عمّار معي.. كونه مش ناقص مواقف  
محرجة أنا..

بعد الخطبة بفترة تقرر نكتب الكتاب.. وليلة كتب الكتاب، عزمنا عمّي  
أبو أحمد والعشا.. وهو مقرر إنه يصير صحبة مع عمّار.. كان وجهة نظره إنه  
الناس زي عمّار ما بدهم إلا حدا يجبهم.. وبعدها بصيروا أصحاب.. وهذا  
اللي كان دايمًا يحكيه لميس عشان يشجعها..

قعدنا على طاولة العشا.. وميس (أو هيك قالت حماقي) كانت عاملة  
الجاج المحشي والملوخية.. وقعدت عمّار جنبي.. وقعد عمّي ومرة عمّي  
قبالنا.. وبدأنا العشا.. وعمّار كان من الناس اللي بحبوا المخلل.. فلاحظ  
صحن مخلل قريب على عمّي وبعيد عن متناوله.. قام مدّ حاله عبر الطاولة  
وطال حبة منه وأكلها.. وهون بدأ عمّي يحكي.. "شايفة يا بابا يا ميس،  
يعني واضح إنه بحب المخلل.. شوفي شو راح أعمل.. " قام حمل صحن  
المخلل كله ولفّ من ورا الطاولة وحطه قدام عمّار.. ورجع على طاولته كإنه

فتح غرناطة، ورجع يحكي.. "هيك يا بابا.. هدول الناس ما بدهم إلا الحب.. إنت عامله هيك بترتاحي وبتكسبي أجر كبير إن شاء الله.. والله إلك الجنة يا بابا.."

وهو بسولف عن الجنة.. راح عمّار وقف.. وحمل صحن ملوخية بغلي من قدامه.. طبعاً أنا قلبي وقّف معه.. وقلت في عقل بالي.. "لو عمل عمّار أي عملة، هذا بكون العشاء الأخير.. "عمّي لاحظ ارتباضي.. وقال "لا لا عمّي إتركه.. أنا صحبة مع عمّار.. تعال عمّار عمّو.."

فعمّار عمّو ما كذب خبر.. قَرّب عند الزلّة عشان يردّ جميلة المخلل وفتح غرناطة.. ودلق صحن الملوخية في ظهره للزلّة.. وليوم العرس وهو بحط كريات على ظهره..

وتزوجنا..

بعد الزواج، بدأ عمّار ينظر لميس نظرة شبيهة لنظرته لمصطفى زوج إمي اللي يرحمها.. وإن كانت أخفّ حدة، وفهمتها لميس إنه ممنوع أي نوع من التقارب قدام عمار.. لأنه بشوفها كتهديد إله في علاقته مع أخوه..

وعاشت معنا ميس في البيت.. كانت نعم الزوجة.. وشوي شوي بدأت تتعود على وجود عمّار.. زي ما الإنسان بتعود على وجود نمر أليف في بيته.. لا هو قادر يخاف منه دايبا.. ولا قادر يتظمن له..

تعايش مع قلق.. خصوصاً إنه ما صار في نوع كثير من الودّ بينهم.. تعايش بس..

وحملت ميس.. ومع مرور شهور الحمل كانت تتعب بزيادة.. ويمكن في لحظات معينة ندمت على الزواج منّي.. أنا ما كنت مقصّر معها.. لكن يبدو تصورت الحياة مع النمر عمّار ومع بسّته راح تكون أسهل من هيك..



ما وصلت الشهر السابع إلا كانت مرهقة تماماً.. وانتقل الإرهاق النفسي إلي.. كان من السهل عليّ أعيش مع عمّار.. عشت عمري كله معه.. لكن أنانية الإنسان خلّنتني أشوفه عبء على عائلتي.. خصوصاً مع شكاوى ميس اللي كنت أشوفها بعيونها.. وكنت ألتمس لها العذر.. وكنت خايف أكثر شي من لحظة ينفجر معها هذا الإرهاق والأنانية ضد عمّار..

كان يوم جمعة.. وميس كانت بتنظف البيت.. رجعت من صلاة الجمعة.. ولقيت الشغالة بتولول.. دخلت على غرفة عمّار فوراً.. لقيت ميس على الأرض ووجهها دم ومعها نزيف.. وعمّار واقف على سريره بصرخ عليها بأصواته..

بدون أي وعي وقبل ما أشوف ميس ضربته.. كانت لأول مرة بحياتي بضربه.. وحملتها فوراً وطلعت على المستشفى.. ويومها ولدت ياسمين..

كاينة ميس طالبة من الشغالة تنظف البيت.. وتعزل الغرف قبل العيد.. ولما داخلين غرفة عمّار.. ميس طالبة من الشغالة تزيح صندوق أغراض إمّي وتنظف تحته.. ووقتها هاجمها عمّار..

ظلت ميس في المستشفى فترة بعد الولادة.. لغاية ما طلعت ياسمين من الخداج.. وبعدها روت على بيت أهلها ترتاح.. كانت مش آمنة نهائياً على حالها وبتتنا من عمّار..

وقتها عمّار كان زعلان مني كثير.. وأنا كنت زعلان منه وشفقان عليه.. بس كنت دايماً أذكر حالي إنه ماله ذنب.. وهو أخوي وأنا بحبه.. مش بشفق عليه..

لما صار عمر ياسمين 4 شهور رجعت ميس.. وجبت شغالة ثانية وظيفتها بس تحرس ياسمين.. لكن اللي صار بعدها كان جداً محيّراً.. طبعا ياسمين انولدت بعيون خضر.. وفيها شوية شبه من إمّي الله يرحمها..

عمّار من يوم ما شاف ياسمين وهو تحوّل.. صار إنسان ثاني.. صار طول اليوم واقف بس يتطلع عليها بكل حبّ.. حبّ خلاّ ميس شوي شوي.. تتظمن إله ولوجوده.. وتتركه مع ياسمين..

وكبرت ياسمين وهي روح قلبه لعمّار.. هو علّمها المشي.. والركض.. واللعب بالرمل والمي.. وهو لما كنا نطلع يجيب لها الألعاب.. وهو يطعمها بإيده.. كانت بالنسبة إله، إمه اللي انولدت من جديد..

السنة كانت ياسمين بطة مسرحية الصف الرابع في مدرستهم.. وكاتت في دور أميرة.. الدور اللي مثلته كثير وتدرت عليه قدام عمّار..

أخذنا عمّار ورحنا نحضر المسرحية.. وبس خلصت المسرحية وزققوا الناس.. قام أخوي عمّار وطلع على المسرح ووصل لعندها.. وقدام كل الناس.. شال التاج البلاستيك اللي على رأسها.. ولبسها تاج الذهب الأبيض تبع إمّي الله يرحمها.. ونزل وسط تصفيق حاد..

كل إنسان فينا عنده نقطة ضعف.. نقطة بخجل منها وبتخليه يحسّ إنه أقل من الناس.. ويمكن بدونها يعيش حياة أفضل..

لكن أنا عندي إيمان عميق.. إنه يمكن نقطة الضعف هاي موجودة عشان تبني حياتك وقوتك حواليتها.. وممكن تكون هي الدافع لحياة أفضل.. ويمكن بدونها، ما كانت راح تكون حياتك بهذا الجمال.. وفي حالتني.. نقطة القوة هاي.. كانت عمّار..

تمت..

## تأمل بسيط..

قال تعالى "وما كفر سليمان ولكن الشياطين كفروا، يعلمون الناس السحر وما أنزل على الملكين ببابل هاروت وماروت وما يعلمان من أحد حتى يقولوا إنما نحن فتنة فلا تكفر، فيتعلمون منها ما يفرقون به بين المرء وزوجه"

هذا جزء من الآية الكريمة 102 من سورة البقرة..

تأمل شخصي بسيط لهذا الآية قاذني إلى حقيقتين بسيطتين..

١- توضح الآية الكريمة أن الناس عندما تعلموا السحر (وهو أنواع كثيرة بحسب التفسير) فإنما إستخدموا منه الجزء الخاص بأذية الآخرين وليس بمنفعتهم هم.. فلم يتعلموا السحر لكسب النقود أو تحويل التراب إلى ذهب.. بل لتفريق الزوجين..

مما يدل أن الإنسان لو وضع في اختيار أخلاقي بين أن ينفع نفسه أو يضر الآخرين، فإنه سيختار ضرر الآخرين..

٢- عطفًا على ما سبق، فإن اختيار ضرر الآخرين المدفوع بالحسد، إختار التفريق بين الزوجين، ولم يختار الفقر أو المرض أو حتى موت الأطفال.. مما يدل أن نعمة الوفاق بين الزوجين هي من أكبر النعم، وهي ما يثير غضب الناس وحسدهم في أغلب الأحيان..

ودمتم..

تمت..

## الحراك الإجتماعي (مقال)

في أي مجتمع حديث في دولة مدنية، يوجد هنالك ثلاث طبقات.. الدنيا، وهو من يقومون بالأعمال اليدوية أو الوضيعة.. العليا، وهم من يملكون رأس المال ووسائل الإنتاج.. والوسطى، وهم من يملكون القليل من المعرفة ليقوموا بعمل إداري يشرفون من خلاله على عمل الطبقة الدنيا، لمصلحة الطبقة العليا..

مواطنو الطبقة الوسطى الذين أنت بالضرورة منهم.. يعيشون حياتهم بحثاً عن شيء يسمى الحراك الإجتماعي.. وهو السعي للانتقال عمودياً في المجتمع، ليصبحوا من الطبقة العليا.. وفي نفس الوقت يعيشون خوفاً دائماً من الهبوط للطبقة الدنيا..

طبعا هذا الحراك الإجتماعي، لا يكون فقط عمودياً عبر طبقات المجتمع.. بل يشمل أيضا الانتقال أفقياً عبر الجغرافيا.. أي محاولة الانتقال من الأحياء المكتظة بالعمارات المتلاصقة والشوارع الضيقة، نحو أحياء أرقى فيها شوارع أوسع، تترامى على جانبيها فلل فخمة، تحيط بها حدائق غناء وسيارات فارهة..

هذا هو حلم الطبقة الوسطى الذي يسعى كل فرد فيها بوعي أو بدون وعي إلى تحقيقه، حتى لو عبر جزئيات بسيطة ولزمن قصير جداً، مثل

إستئجار سيارة فارهة لساعتين في يوم الزفاف.. أو تناول وجبة في مطعم  
فخم في الذكرى العاشرة للزواج..

ومع أن بائعي التفاؤل يضربون لك أمثلة حقيقية على حدوث هذا  
الحلم، لبيعوا منتجاتهم.. إلا أن الواقع يثبت أن الأغشية بين الطبقات  
سميكة جداً بحيث أنه من الصعب جداً المرور خلالها، على الأقلّ عبر جيل  
واحد..

والكلام هنا ليس لتحطيم الطموح أو قتل الدافعية ولكن ليكون الحلم  
واقعيّاً إلى حدّ ما.. وربّما من المفيد لك أن تعرف أن السبب الرئيسي في  
سماكة أغشية طبقات المجتمع، يرجع بشكل أساسي إلى الطريقة التي تفكّر  
بها كل طبقة.. التصوّر الإجتماعي نحو مفاهيم مثل المال، الإنفاق، التوفير،  
الدين، العادات، العدالة، الحكومة، إلخ.. تختلف من طبقة إلى أخرى..  
وهذا ربّما هو أهمّ فارق طبقي..

باختصار.. لا معجزات.. الأقدار تورّث، ومقدار ما تملك، يحدّد من  
أنت وكيف ترى العالم.. والمادّة عنصر ثقافي.. شئت أم أبيت..

تمت..

## تنويعات على مقام المماليك..

- إذا ما تزوّج شخص من العائلة، فتاة من العائلة.. فكن على ثقة أن نصف من يرقصن في حفل الزفاف.. حاولن بشكل أو بآخر أن لا يتم هذا الزفاف..

- لتخرج من أي موقف حزين.. تذكّر أنّ السفر عبر الزمان.. يشبه السفر عبر المكان.. ما أن تخرج من الموقف/المدينة، حتى تبدأ المشاعر/البيوت تصغر قليلاً قليلاً.. ثم تلمح آثارها/أضواءها فقط.. ثم تختفي كأن لم تكن..

- يعرف علم الإقتصاد العمل، بأنه نشاط إنساني واعي غائي (لهدف) إرادي (لا عبودي) يهدف إلى صنع منتجات وخدمات.. وارتبط في التاريخ الإنساني بالقهر..

لا تشتك من وظيفتك.. طبع العمل القهر..

- القانون الثالث لنيوتن لا يعمل في العلاقات الإجتماعية.. ردّات الفعل دائماً ما تكون أكبر بكثير من الفعل.. كلمة قد تنهي علاقة.. ولحظة غضب قد تنهي زواج..

- الذين يطالبون بالحرية هم فعلياً لا يطالبون بالحرية.. الحرية مضمونة للجميع.. المطلب الفعلي هو أن لا يتحمل الإنسان عواقب أفعاله.. مثال: أريد أن أمشي عارياً دون أن يجاسبني أحد..
- عقلي يعمل بطريقة غريبة.. يعطيني نصف الحقائق فقط.. يقول لي أنه يجب علي الانفصال عنك.. لكنه لا يخبرني لماذا لا أستطيع ذلك..
- ألف مرة حكيت لك إنه السياسة مش إلنا..
- السياسة للي معهم كل شي، أو اللي ما معهم شي.. احنا الناس اللي في النص ما إلنا فيها..
- ليش أنا شو عندي؟
- عندك مرة وولاد وعقد إيجار..
- وحلم..
- وخيبة..
- إختلف مع رجال الدين كما تشاء، لكن لا تختلف مع الله..
- الحب ليس له أي علاقة بوجود الشخص المقابل.. قد تقع في حبّ كومة من القمامة، بالمعنى الحرفي للكلمة..
- ما هو حلمك؟
- أن لا أجوع..
- البخل ينتج أموالاً أكثر للبخل، وهذا تعزيز إيجابي للسلوك.. لذلك لا يمكن لسلوك البخل أن ينتهي..

- ما شاء الله يا إبنى.. أحسن من هيك عريس ما بنلاقي.. بس حابّة

أسألك..

كيف الست الوالدة؟ إن شاء الله ميتة من عشر سنين رحمة الله عليها؟  
وخواتك كيف؟ إن شاء الله مهاجرين عالسويد وولا عمرهم راح يرجعوا  
الله يوفقهم!؟

- آخر شخص يعرف أنه سخيّف، هو السخيّف نفسه.. وإذا ما  
واجهته بهذه الحقيقة يتهمك أنت بالسخف..  
مشكلة عصيّة على الحل.. وتنتشر.

- ليس من المهمّ فعلياً أن تتزوج عن حبّ أو بشكل تقليدي.. المهم أن  
يكون هنالك حبّ بعد الزواج.. وعلامة هذا الحبّ أن تكثر المشاحنات في  
بدايات الزواج.. المشاكل ليست عكس الحب..

عكس الحبّ هو الإهمال..

- يعرف خطّ الأمن القومي بأنه خطّ جغرافي وهمي.. لو وصله الأعداء  
تصبح البلد في خطر.. عند الفراعنة، كان هذا الخطّ هو نهر الفرات..

- على المرأة التي تعاني من خيانات زوجها المتكررة أن تعرف أن هذه  
مشكلة عميقة في رجولته.. يحتاج دائماً لفتاة تؤكّد له أنه مرغوب..  
الحلّ ليس بتجميل نفسك.. الحلّ يكون بزيادة ثقة الرجل بنفسه..

- يمشي الأطفال قبل تطور مفهوم الخوف من السقوط.. ولو تأخّر  
المشي وتطوّر هذا المفهوم، يكون المشي صعب جداً عليهم.. الزواج شيء  
مشابه.. يجب على الشاب أن يتزوج قبل ظهور مفهوم الخوف... وكلّما تأخّر  
كلّما صار أصعب..



- التجارة في الأوراق المالية لا تشكّل أي قيمة مضافة للاقتصاد.. كل ما في الموضوع أنها لا تتم على طاولة خضراء..  
" - العلة ليست في الوالي..  
العله يا شعبي فيك..  
لا بدّ لجثة مملوك..  
أن تتلبّس روح مليك..  
حين ترى أجساد ملوك..  
تحمل أرواح ممالك "

(أحمد مطر)

## المنطق

- قبل أن نبدأ الحديث، ضع المنطق جانباً.. ضعه على تلك الطاولة.. بعيداً عنا..
- حسناً.. لقد وضعته هناك..
- لا.. هذا لا يكفي.. أخرجته خارج الغرفة تماماً.. لا أريده أن يكون قريباً لئلا يضطر لاستخدامه..
- لقد ألقيته خارج المنزل..
- حسنٌ جداً.. الآن لنحاول أن نفهم المرأة..

## خطبة لاذعة ضد إمراة صامتة (مسرحة)

المشهد الأول والأخير..

ترفع الستارة لتظهر غرفة نوم لعائلة من الطبقة الوسطى.. سرير واسع مغطى بملاءة خمرية اللون.. وخزانة خشبية أحد أدراجها مكسور.. تقابلها مرآة كبيرة.. وعلى الحائط صورة قديمة لعروسين سعيدين.. في جانب الغرفة ممر صغير يبدو أنها يؤدي للحمام مرتبط بالغرفة.. يسمع صوت باب الحمام يُفتح، ويدخل رجل أربعيني مرتدياً بنظالاً أسود اللون مع فانيلا بيضاء.... في مقدمة رأسه صلح، ويبرز له كرّش متوسط يليق بموظف حكومي..

يقرب الرجل من المرأة.. يتحسس شنبه المحلوق.. ويبدأ بالكلام..

- الله يسامحك بس.. الله يسامحك.. يعني هيك عاجبك الشنب؟

عاجبك منظري هيك؟! هيك بكون ضمن المواصفات والمقاييس؟

بشو بضايقتك الشنب أنا مش فاهم! المرّة الجاي يا اختي تتجوزيش زلمة.. تجوزي حرمة.. زيك زيها.. ملهاش لاشنب ولا لحية..

أحسن لك والله.. لمصلحتك بحكي..

لا حول ولا قوة إلا بالله..

بتعرفي شو؟ والله العظيم صار نفسي أنحبس.. مش عشان شي.. بس  
لإتو في الحبس راح أربيّ لحيتي وشواربي زي ما بدي.. لأنه يمكن هاي  
الطريقة الوحيدة اللي ممكن أربيّ فيها شواربي في حياتي..

بتضحكي؟ إضحكي شو وراك.. بس الموضوع أكبر من الشنب على  
فكرة.. الموضوع..

شوفي.. خليننا نحكي بصراحة.. أو على الأقل أنا أحكي بصراحة... ولا  
تقاطعيني لو سمحت.. لو سمحت..

يعني إنت مرقي وحببتي وتاج راسي.. وأنا بحبك وكل شي.. بس بجد  
بجد بجد.. ومشان الله بدون زعل.. بس..

أنا مش مرتاح بحياتي معك.. أو يعني.. ممكن تكون الحياة أريح شوي  
من هيك..

مش مرتاح أماني.. مش مرتاح..

تزعليش مشان الله.. بس يعني خليني أحكي..

يعني.. كل شي في الحياة لازم يكون على زوقك انت.. وهذا بصراحة  
مش عدل.. الزواج مشاركة ويعني أنا كمان لازم أشارك.. أنا إلي دور.. إلي  
صوت.. مش صح؟! يعني.. أنا الزلّة هون.. والله أنا الزلّة.. وبديش  
أحكي كلمتي لازم تكون مسموعة وهيك.. بس يعني حقي أحكي..

يعني على الأقل.. حقي أربيّ شنبني أنا وبدون ما تزعلي.. صح؟! كل  
صحابي مربيين شنباتهم وما حدا بحكي معهم.. اشمعنا أنا يعني؟! هاي  
آخر مرة بحلقه.. هاي بحكي لك.. وإنت حرة.. إعملي اللي بدك إياه..  
خلص.. طاف الكيل والله يا أماني.. فاض.. فاض الكيل..

لا تقاطعيني.. لو سمحت.. خليني أحكي كل اللي في قلبي... لو لمرة في هالدنيا..

يعني كم إننا متزوجين؟! خمسطاشر سنة؟ والله إنه بهالخمسطاشر سنة وانت متحكمة فيّه.. شو هذا يا شيخة؟!

إحلق لحيتك، إحلق شنبك.. إلبس هاي.. تلبسش هاي.. صاحب هذا.. تصاحبش هذاك.. حتى شغلي متحكمة فيه!! شو هذا؟! خلص أمانني خلص بكفي!

تعبت منك! والله تعبت! هو هيك الزواج؟! الروحة على زوقك.. الجية على زوقك.. اللبس على زوقك.. الشلح على زوقك.. روحات أهلي على زوقك.. روحات أهلك على زوقك.. الأكل على زوقك.. السمّ على زوقك! ضراب البين على زوقك؟!

خلص! عن جد خلص!! من اليوم وطالع ما في شي على زوقك! أنا إنسان وإلي كيان! وبدي أحكي وأعبّر.. ومش راح أسأل زعلتي أو لأ!! أنا الزلة هون وأنا اللي بقرر كل شي!!

تضحكيش!! مش تافه الموضوع! وأنا خلص تغيّرت! ومن اليوم كل حياتنا بدها تتغير.. آه!!

راحت أيام إنك إنت مسيطرة على كل شي!

كل شي في حياتي سيطرت عليه من أوله لآخره.. وأنا ساكت ومتحمل وصابر.. وبحكي بحبها وبتحبني.. بس خلص.. إذا هذا هو الحب ما بدي إياه.. آه ما بدي إياه! وإزعلي وإحردني ما راح يهمني.. عمري راح وأنا بس بسمع كلامك..

من يوم الخطبة! متذكرة الخطبة والعرس!؟ شو نقيت أنا آه!؟ الكروت  
إنت عملتيهم.. والصالة إنت اخترتيها.. والسيارة إنت اخترتيها.. كل شي  
انتي.. والناس بلوموني وأهلي بلوموني كانوا.. انه ليش تاركها على راحتها  
وانت الزلّة وهالحكي ما بصير.. بس مع هيك قلت معلش.. فرحة عمرها  
وخليها تنبسط.. وبكره بس نتزوج كل شي بتغير..

فضلت راحتك على كل شي.. وسمعت كلام زي السمّ عشانك.. وشو  
صار؟ قدّرت!؟ لا.. ما قدّرت شي..

الدار انت اخترتيها.. والأثاث انت اخترتيه.. والبيت مملكة الست  
حبيبي.. وهي بتختار.. وسكتت ومشيت لك إياها.. وكتمت كل الحكي  
اللي سمعته.. وبالمناسبة.. زوقك زباله في الأثاث.. آه زباله.. وبكره.. راح  
أرميه كل هذا بره وأغيره!!

ولادي.. ولادي.. مين سمّاهم؟ إبنّي بكري.. اللي كنت بدي أسميه على  
إسم أبوي.. انت اخترت إسمه.. وتحملت كل الكلام السم من خواني  
وخواتي.. مسخرة عملوني عشانك.. وأنا ساكت ومتحمل.. وبحكي بحبها  
لأمانى.. طز في هيك حب طز!!

إخرسي! تفتحيش ثمك وأنا بحكي..

طاف الكيل معي خلص!! طاف!!

خليتني أكره حالي.. أحترق حالي.. كل ما أشوف مسلسل فيه زلّة حمش  
أحترق حالي.. انه شو النقص اللي عندي!؟ ليش هيك أنا؟ عشان بحبك!؟  
والأدهى والأمر إنك بتمدحي فيه بتكوني.. رجال يقبر قلبك.. الله يقبره  
لقلبك!!

إنه شو بدكم اتوا الستات؟! بدكم تتحكموا في الزلة وبعدين  
بتحتقروه!!؟ وبتصيروا تحبوا الزلة الحمش القاسي!؟

ولك الزبال أرجل مني كان!! وأنا بحكي بحبك.. طز في هيك حب  
طز.. خليتني أكره حالي.. نظرات الشفقة في عيون صحابي كل ما تقاطعيني  
بتقتلني كانت!! كم مرة سمعتهم بحكوا علي!؟ بحسدوك يا حبيبي  
بحسدوك.. حسدك قرد إنت واليوم اللي شفتك فيه!! وك حتى ولادي  
عارفين إني مش زلّة!!

بتعرفي؟ زمان.. كنت في الكلية.. كان معنا شاب إسمه مصطفى.. كان  
دايما يحكي لي.. "بتعرف يا أحمد الطباخة الزنجية اللي كانت تطلع في توم  
وجيري وعمرنا ما شفنا وجهها؟! هاي هي الدنيا.. كل يوم في الليل وإحنا  
نايمين، بتطبخ لكل واحد فينا شو راح يوكل ثاني يوم.. وإنت ونصيبك عاد  
شو تتلقى منها".

وهسه أنا عارف منيح شو كانت طابخة يوم ما رححت خطبتك!! ولا  
بأسوأ كوابيسي كنت متوقع تطلعي هيك..

بس خلص! من اليوم وطالع يا ويلك يا سواد ليلك إذا بسمع لك  
نفس!! قسا بالله إلا بالكندرة على راسك!! طاف الكيل منك!!

بدي أرجع زلّة زي ما كنت قبل ما أنتيل فيك!! عيطي آه عيطي!! هاي  
دموع تماسيح كلّها!! ومش فارقة معي، وأحكي لك.. أول قرار.. فش  
روحة اليوم عند إمك!! وممنوع تزوريها أو تزورك لشهر!!

وسم معكرونة ممنوع تطبخي!! برميك انت وإياها في الزبالة لو  
طبختيها!!! وبدي أربي شني غصب عنك وعن أهلك!!

(يطرق باب الغرفة.. وتدخل فتاة في العاشرة)..

- بابا..أنا آسفة بس.. ماما بتحكي لك.. مطوّل يا كازانوفا وانت  
تلبس؟! تأخرنا على عزومة تيتا..

- شو!؟

لا بابا.. آه بابا.. هيني جاي.. هيني جاي.. قولي لها.. بابا جاي.. بس  
كان بحلق شنبه..

(تخرج الفتاة.. ويبدأ الرجل في ارتداء قميص أبيض.. وتسدل الستارة)

تمت..



## تنويعات على مقام البطاطس..

- يمكنك معرفة الكثير عن شخصية الفرد، من خلال مراقبة سلوكه في قاعة الإمتحان..

بناء عليه، فإن الأشخاص الذين يخرجون من قاعة الإمتحان فور انتهائهم من الإجابات، هم أصدقائي المقربون، بدون قيد أو شرط..  
أما أولئك الذين ينتظرون حتى تسحب الورقة منهم.. (تم حذف جواب الشرط)

- في صباي، كنت أقرأ الكثير من قصص الأطفال.. ومعظمها كانت تدور حول مفاهيم الحب و العدل والأمانة والصدق والإتحاد، وغيرها من القيم النبيلة..

وقتها اعتقدت، أن هذا مجرد كلام للأطفال، وأني عندما أكبر، سأتعلم الكثير من الحقائق المخفية التي ستجعلني أدخل عالم الكبار..

الآن أجد، أن الحقيقة المخفية الوحيدة، هي أن كل مشاكل عالمنا ككبار، تتمحور حول انعدام هذه القيم.. قِيم الصغار...

- مهما بلغ كيد النساء في أي عائلة، فيكفي وجود رجل واحد عاقل وصارم، لهدمه كله..

- إذا قمت بتخيير طفل في الخامسة بين لوح شوكولاته اليوم، أو لوحين غداً، فإنه سيختار لوحاً اليوم.. ذلك لأنه لم يطور بعد إستيعاباً لمفهوم تعاقب الليل والنهار.. ويبدو له الغد بعيداً جداً وقد لا يأتي..

وإذا أصبح هذا الطفل مراهقاً وقلت له، أنه يجب أن يتوقف عن مطاردة الفتيات الآن، وعندما يتزوج سيحصل على كل ما يريد، فعلى الأغلب أنه لن يستجيب.. وسيبدو له الزواج شيئاً بعيداً جداً في المستقبل..

حتى وهو رجل بالغ، لو قلت له أن يصبر على رزقه القليل الحلال، ولا يتجه للحرام لأنها دنيا فانية.. وأن الله سيعطيه ما يريد في الجنة فلن يمتنع..

الإنسان ببساطة لا يستوعب مفهوم مرور الوقت.. عديم الصبر ويهرب من الإنتظار..

- الطلاق مثل حادث الدهس.. بغض النظر عن التسبب، الطرف الأضعف هو الضحية..

- في الحياة، ليس كما في الأفلام.. النهايات ليست دائماً ملحمية وحاسمة.. قد تكون النهاية بائسة وبطيئة مثل زهرة تذبل..

- في كل فيلم أمريكي، هنالك رسالة واحدة يخفيها الأمريكيان داخله.. مفادها "نحن أفضل منكم"..

- المسؤول الأول عن أي عملية تحرّش هو المتحرّش نفسه.. يجب إثبات هذه الحقيقة أولاً، قبل البدء في كيل الإتهامات للضحايا.. تكرار للفائدة: المسؤول عن الفعل هو الفاعل.. وليس المفعول به.. فعل.. فاعل.. مفعول به..

- أجد من السهل عليّ الآن أن أعترف بأن الجنس احتلّ دماغي كله تقريباً في فترة المراهقة.. سهولة هذا الإعتراف تأتي من فكرة أن ذلك المراهق

اختفى وحل محلّه رجل ناضج.. وبالتالي لا يمكن محاكمة هذا المراهق  
الآن.. لأنه إختفى..

في الوقت نفسه، لا يمكنني الإدلاء باعتراف مشابه عن نفسي الآن..  
لأنني سأعرض لمحاكمة.. ربّما في وقت لاحق..

- يجب أن تعلم أن المظاهر العشوائية في مدينتك، - والتي تشتكي  
منها - مثل البسطات والباعة الجائلين ومشتري الخردة، بل حتى المتسولين  
والمجانين.. هي من تعطي المدينة روحها ورونقها..

العيش في مدن "معقمة" قاتل جداً لروح الإنسان..

- تتجلى فكرة التواصل الإجتماعي، في لحظة تحس فيها أنك يجب أن  
تكتب شيئاً ليردّ عليك الناس.. وتضطر وقتها لصياغة حكمة أو قول مأثور  
أو مشاركة صورة.. أو أي شيء..

في الواقع أنت لا تريد نشر هذا الشيء للفائدة، ولا لأنه أعجبك.. كل ما  
تريد قوله هو..

"أنا وحيد.. تكلموا معي"

- برشلونة فريقتي المفضّل، والبطاطس المهروسة طعامي المفضّل.. ومن  
أخطائي المفضلة، والتي أصبحت بارعاً فيها لكثرة التكرار.. هو أنني عندما  
أقابل أشخاصاً لأول مرة.. أبدأ - وبشكل غير واعي - بالحديث عن أمور  
شخصية جداً بالنسبة لي.. وكأنني أعرفهم منذ عشرة أعوام.. وعندما ينتهي  
اللقاء، وأراجع نفسي.. لا يكفي كل الندم في العالم، لمحو مرارة الشعور..

- الحب ليس كله شوق وحنين وإنفعالات.. التخطيط لإثارة غيرة  
المحبوب بطريقة بريئة، ثم مشاهدته يحترق من غيرته، متعة ما بعدها متعة..

- أنت آلة صنع الآيس كريم.. أنت حلوى الوافل.. أنت سكر مطحون.. لهذه الدرجة أحبك! (فاطمة)
- لا يرعك المشيب مني فإني..
- ما ثنائي عن التصابي المشيب.. (البحثري)..

## الثقة بالنفس

الثقة بالنفس هي تقريبا أقوى سلاح تملكه في مواجهة الحياة اليومية، من دراسة وعمل وخلافه.. ذلك لأنها هي اليد الخفية التي تنهضك عندما تسقط، وهي الصوت الخفي الذي يقول لك أنك تستطيع.. هي إيمانك بقدرتك كإنسان ضعيف على مواجهة أشياء وأحمال أكبر منك..

والثقة بالنفس ليست شعورا داخليا كما تدّعي الكتب.. بل هي إنعكاس لثقة أولئك الذين تحبهم بك.. لذلك ترى من السهل أن تتحطم كل ثقتك بنفسك من مجرد كلمة بسيطة من شخص تحبه..

أو حتى نظرة إستهانة..

ومع أن أكثر من يحتاج الثقة بالنفس هم الأطفال، إلا إنهم - على الأغلب - أكثر من يخسرها.. وعلى يد أولئك الذين يقولون أنهم يحبونهم..

## أنا راوية .. راوية شاهين ..

من أجل الأشياء اللي بحبّها في عمّان صباحاتها.. وخصوصا الصباحات الهادية مثل صباح يوم السبت.. لما تصحى بكير.. وتطلع تشرب فنجان قهوتك الكسول عالبلكونة الكسولة.. ويسرح نظرك في البيوت والشجر والأرصفة والياسمين والتلال البعيدة.. بتكون الشمس لسه ما حميت.. ونسيم الهوا الغربي عم بفتح شبابيك في الروح.. وقتها يكون في شيء سحري في الجو.. شيء ملائكي.. شيء بخليك جاهز للحب.. لأي حب.. شيء بخليك تحبّ كل شيء.. حتى عيوب نفسك.. وبتتسم لكل غريب.. وبخليك تشوف حتى قطط الشوارع حلوة.. شيء خاص بعمّان بس.. ومش ممكن تحسه في أي مدينة ثانية...

وفي صباح عمّاني جميل مثل هذا، وبالتحديد في أول سبت من نيسان السنة الماضية.. صحيت من نومي بكير.. كنت صاحية مرتاحة ومتفائلة ونشيطة بشكل غريب.. غطيت حبيبي محمد وبست جبينه.. ورحت أشوف يزن وعلي.. كان كل واحد فيهم تقريبا نايم فوق الثاني.. غطيتهم منيح.. وحضنتهم بعيوني.. وطلعت أشرب قهوتي عالبلكون وأنا مستمتعة بهذا الشعور الدافئ لما يكونوا عيلتك نايمين ومبسوطين.. هذا الدفء اللي ولا شي في الدنيا بعوضه أو بشبهه..

خلصت القهوة.. سقيت الريحانة.. وقعدت أحضر لهم الفطور.. ومع  
إنه أول موعد عندي كان عال 11.. إلا إني من فرط النشاط والتفاؤل..  
لبست وقررت أطلع عالعيادة بكير.. تركت لهم الفطور عالطاولة مع رسالة  
حب وطلعت..

أول ما قعدت بسيارتي.. تذكرت إنه إلي فترة طويلة ما زرت بيت  
المسنين.. ويمكن هذا هو سر النشاط الصباحي المفاجئ.. كأنه في قوة  
سحرية صحتني وعم تدفعني هناك.. وبدون تفكير، كنت في طريقي  
هناك..

وصلت حتى قبل المشرفة.. وكان كل شي تقريبا على حاله من آخر مرة  
زرتهم.. نفس الروحانية اللي بحس فيها كل مرة بدخله.. جلال الشعر  
الأبيض على رؤوس النساء.. هدوء آخر أيام الحياة.. هاي الحكمة الهادية  
التي بتتسرب من كل نفس وكل حركة..

أول ما دخلت كان الجو بارد شوي، وفيه ريحة رطوبة مخزنة من الليل..  
وكانت لسه البرادي مسكرة.. وكل وحدة قاعدة في جهة من الصالون..  
حوالي 8 سيدات كبار.. وما في أي صوت طالع إلا صوت الشغالات  
بنظفوا الغرف.. حتى التلفزيون كان مسكّر..

فتحت لهم البرادي عالآخر.. دخلت أشعة شمس الربيع الهادية  
وأضافت روحانية وجمال زيادة عالمكان.. كانوا كلهم تقريبا موجودين..  
وأول وحدة انتبهت علي هي أم خالد.. صديقتي المفضلة اللي بتعرف كل  
الأخبار.. ولسانها بقطر شهد..

سيدة في أول السبعين.. مرحة وطيبة وعلى البركة.. ما عندها إلا ابن  
واحد.. وعایش في أمريكا.. كانت ساكنة مع أختها.. لكن لما أختها ماتت..

وما قدرت تقوم بحالها.. جابها إبنها هون، وبزورها كل سنة في الصيف..  
ومع هيك بتحبه ومش زعلانة منه.. وأهم ميزة فيها إنها مقتنعة تماما إنها  
مستجابة الدعوة.. وإنه الدعوة هاي هي سلاحها في الحياة..

أعطيتها شو كولاته كنت جايبتها معي وقعدت أمشط فيها وهي تسولف  
وتحكي.. وأنا بمشط فيها وبتطلع حوالي عالستات الثانيين.. قالت إنه إبنها  
اتصل فيها الأسبوع الماضي.. وإنه إجته بنت زي ما دعت بالزبط.. وحتى  
عيونها زرق زي ما دعت.. وراح يسميها حسنية على إسمها.. وقالت إنه أم  
ربيع راحت الأسبوع الماضي للمستشفى من وجع بطنها.. وهمست لي إنه  
هاد من المال الحرام.. لأنه هي فقدت علكتها.. ودعت عالي سرقتها..  
وربنا استجاب دعوتها.... وإنه أم زهير مسكينة ابنها إله ثلاث شهور ما  
زارها.. مع إنه كان كل شهر يزورها مرة.. وإنه ما بزورها إلا بس تسمح له  
مرته.. عشان هيك دعت عليها أم خالد إنه تيجيها الدورة ست شهور  
كاملات..

وهي عم تحكي.. لفت نظري ست كنت لأول مرة بشوفها.. ففكرتها إم  
خليل بالأول ونحفانة.. لكن لما سألت أم خالد عنها.. قربت علي وحكت  
بصوت واطي.. هاي جديدة.. وما بنعرف إسمها.. سمينها إم صورة...  
إلها أسبوعين هون.. ما بتحكي مع حدا ولا حدا بحكي معها.. ودايما  
ساكتة وماسكة صورة في برواز وكتاب.. وإنه أم خالد حاولت معها  
عالفاضي.. وإلها أسبوع بتدعي إنه تعرف قصتها.. بس تأخرت الإجابة  
على غير العادة.. لكن آخرتها تحكي.. وإنه إم سليم الله يرحمها هيك كانت..  
تركت أم خالد.. ومشيت شوي شوي لعند الست الجديدة.. كانت  
لابسة ثوب قطن ربيعي أبيض جميل.. ومغطية شعرها بشال خمري طالعة  
خيوط الشيب من تحته.. ودافنة رأسها جوا الشال.. فملاحها مش



واضحة.. قعدت جنبها عالكنباية وسلمت.. ما ردت.. كانت فعلا زي ما  
وصفتها أم خالد.. ماسكة دفتر أسود وبرواز فيه صورة ضاميتها لصدرها..  
كمحاولة لكسر الجليد مع الزائرة الجديدة الغامضة.. مديت إيدي  
ومسكت إيدها.. وبالإيد الثانية رفعت حبة شوكلاته أقدمها إلها.. وهون  
صارت المفاجأة..

انتفضت الست من لمسة إيدي وكأنه مسّها شيطان.. ولفت وجهها  
بشكل مفاجئ بإتجاهي بنظرة غاضبة لاقتحام الخصوصية..

كانت عيونها الزرق حادّين بشكل عمري ما تصورته.. وكأنه روحها  
كلّها تركّزت في عيونها في هديك اللحظة.. الذكاء والقوة اللي كانوا في  
عيونها ما كانوا متناسبين أبدا مع تجاعيد وجهها الجميل، ولا بشبهوا  
النظرات المستسلمة الي عند ستات من عمرها وفي وضعها.. كان عندها  
القدرة بلا شك تقرأ كل أسرار روحي..

المشاعر الي اختلجتني أول ما شفتها وشفّت نظرتها كانت لا توصف..  
وقبل ما أقدر أحكي أي شي.. أو أعمل أي حركة.. حطّت الكتاب على  
الكنباية بيننا.. ونقرت عليه بإصبعها مرتين..

بدون وعي.. مسكت الكتاب بإيد بترتعش.. وفتحت الصفحة الأولى  
وصرت أقرأ.. كان واضح إنه دفتر مذكرات.. وفي الصفحة الأولى كان  
مكتوب التاريخ 24-10-2013.. وتحتة كان مكتوب الآتي..

"أنا راوية.. راوية شاهين.. راوية عبد الحليم شاهين.. وهذه هي  
مذكراتي.."

وأنا مش عم بكتب مذكراتي كتر فكري أو للنشر.. أنا بكتب عشان ما  
أختفي كإنسان.. بكتب لأنّي في زمان ما.. في مكان ما.. كنت موجودة..

وهذا شيء يجب أن يدون.. ومع احتمال إنه ما حدا يقرأ كلامي.. لكن أنا لازم أكتب.. عشاني أنا.. قبل أي شخص ثاني.. عشان أتأكد إني موجودة.. وأثبت إني موجودة..

عمري 59 سنة.. عزباء.. مقيمة وحدي في شقة أملكها - والمملك لله - في منطقة مرج الحمام.. شقة رقم 4.. في بناية رقم 69..

اليوم هو أول أيام تقاعدي.. وأول أيام علاجي من مرض الزهايمر.. وهذا هو السبب اللي دفعني أكتب.. لازم أكتب كل شي قبل ما أنساه.. لكن قصتي مش وليدة اليوم..

في اللحظة اللي انولدت فيها توفت إمي الله يرحمها.. وعشت مع أبوي وستي في بيت صغير في حارة من حارات نابلس القديمة.. كنت أنا البنت البكر.. ومع هيك أبوي الله يرحمه ما تزوج بعد إمي..

في 67 كنت بنت صغيرة.. يا دوب كملت 13 سنة.. وطلعت مع أبوي من فلسطين مع الناس اللي طلعا، وجينا على عمان.. فيها كملت دراستي وفيها دخلت الجامعة الأردنية.. وتخرجت مدرسة لغة عربية سنة 1976..

وكأي بنت.. كان حلمي إني أتزوج وأكون أسرة.. خصوصاً عشان أفرح أبوي وأريجه.. اللي من طول عمره وهو داير باله علي.. وهو اللي كان له الأثر الأكبر في حياتي.. وطموحي وصلابتي وقوتي كانوا مستمدين بس منه..

لكن لسبب لا يعلمه إلا علام الغيوب.. ما انكتب لي وقتها أتزوج.. وتوفى والدي بعد سنة من تخرجي.. وظليت أنا وستي العجوز - اللي مؤمنة تمام الإيمان إني مسحورة - ساكنين لحالنا..

دخلت سلك التعليم.. وبدأت العمل كمدرسة للأطفال في المرحلة الأولى.. وهذا يمكن كان نوع من التحفيز للزواج أو نوع من التعويض أو نوع من التعذيب.. إني أشوف أطفال الناس كل يوم.. بدون ما يكون عندي طفل.. أو حتى كمرحلة أولى السبب في وجود هذا الطفل.. الزوج..

سنة عن سنة بدأت أكبر.. والسحر اللي بتآمن فيه ستي ما فكه تعاقب الليل والنهار.. وكل نهار بييجي يعطي أمل.. وكل ليل بطلّ يوخذ أمل..

ومع هيك.. مشكلتي الحقيقية ما كانت داخلية بس.. وعدا عن نظرات الناس وكلامهم عني كفتاة عزباء.. اضطريت أواجه المجتمع كله بعد وفاة ستي.. لما ظهرت مشكلة وين بدها تسكن راوية.. ومع مين..

كوني يتيمة.. وغريبة نوعا ما.. وبعيدة عن جذور العائلة في نابلس.. كانوا أقاربي في عمان محدودين.. ومع هيك، كان في معارضة غير مبررة وبدون حلول بديلة لفكرة إني أسكن لحالي.. لكنني عاندتهم كلهم وسكنت لحالي.. وبدأت أتأقلم مع حياتي الجديدة.. كفتاة عزباء وحيدة..

وقتها كنت دخلت الثلاثين.. ومعها دخلت في نوع من الإكتئاب العميق.. كان عندي علاقات واسعة في محيطي.. وكنت أشوف الناس يدخلوا على مؤسسة الزواج ويطلعوا منها وأنا واقفة بره..

كان الزواج وقتها بالنسبة إلي مثل طفل واقف أمام مدينة ألعاب.. بس مانعينه يدخل.. وعم بشوف الأطفال بفوتوا ملهوفين.. مع أهلهم ويطلعوا مبسوطين.. وهو واقف بستنى أبوه يدخله.. وأنا كنت هذا الطفل.. بس ما قدرت أدخل.. كنت بملك كل شيء في الدنيا يأهلني أكون زوجة إلا الزوج..

ولأن الإنسان لما يفقد الأمل في الحلول الأصلية بروح للحلول البديلة..  
كانت إيمان هي البنت اللي ردت لي إيماني بنفسي..

طفلة دخلت المدرسة عنا وهي بصف ثاني.. وأول ما شفتها حبيتها..  
كانت بتشبهني تماماً.. وكان فيها شيء مكسور.. مثلي تماماً.. وعرفت بعد  
فترة إنه والدتها توفت من قريب.. وعاشة مع أبوها وإخوانها.. كانت  
تقريباً نسخة مصغرة عني.. نسخة بعيد إنتاجها الزمن.

وبدون إستئذان دخلت قلبي.. وقررت أتبناها.. وأساعدها زي ما أبوي  
ساعدي.. وتعيش حياة حلوة.. وبدأت علاقتنا كمعلمة تبحث عن إبنة..  
وإبنة تبحث عن أم.. علاقة تبادلية تعايشية..

بدأت أهتم فيها زيادة عن الكل.. أهتم بكل شي فيها.. بلبسها بدراستها  
بشعرها بأكلها.. بكل شي.. كنت أتأكد دايماً إنها مبسوفة ومرتاحة.. وإنه ما  
حدا يزعها.. كان معظم وقتي إلهاء.. ونحكي أنا وإياها دائماً.. وفي كل  
فرصة تلوح.. أقعد معها كام.. وتعطيني بدون قصد وبكل براءة الطفولة..  
كل الحب اللي أحতاجه..

وصرت أشتاق لها لما تروح.. زي ما الأم بتشتاق لبنتها.. وكان أصعب  
شي علي.. لما تيجي العطلة الأسبوعية.. أو عطلة الصيف..

وصارت حياتي وصحوتي ونومي وأكلي وشربي بس عشان إيمان..  
وقدرت أحسن نفسيته وأقويها.. وبدأت تصير مثلها مثل البنات.. وبدأ  
الإنكسار في عيونها يروح.. وتكبر وتصير بنت حلوة وشاطرة.. وتزرع في  
كل يوم حب وحنان جوا قلبي..

حتى لما صارت إعدادي وبطلت أدرسها.. ظلينا مع بعض.. ووقتها  
كنت كبرت في شغلي.. وفي عائلتي كمان.. صرت بالنسبة للعائلة السيدة

العانس الحكيمة.. أخت الرجال.. الكل يحترمها ويحترم رأيها.. بس ما حدا تزوجها.. وَيَا نباله اللي لو كانت من نصيبه.. بس كبرت..

بس ما كان يهمني.. إستعصت بإيمان عنهم كلهم.. كانت بنتي اللي بتكبر قدام عيوني يوم بيوم ولحظة بلحظة وشعرة بشعرة.. شفتها بكل مراحل حياتها.. وبعرفها أكثر ما بتعرف حالها.. وما خلصت إيمان إعدادي.. إِلَّا كانت قطعة من روحي..

وكبرت البنت الصغيرة وصارت صبية مراهقة جميلة.. وعالتوجيهي.. كنت صرت أنا المديرية.. وصار وقت تطلع من المدرسة.. وصار وقت إنه حبي العارم إها يواجه مصيره المحتوم.. لكن أنا كنت في غفلة تامة عن هذا الكلام.. ويمكن هذا هو سحر الحب.. إِنَّه بعمينا عن نهايته.. وبخدعنا إنه يستمر للأبد..

تخرجت إيمان بتفوق.. ودخلت الجامعة.. وبدأت سنة الله في أرضه تتطبق علينا.. في أول فصل كنا على تواصل ممتاز.. لكن مع مرور الوقت.. بدأ التواصل يضعف ويخف.. ويتحول من حب وشوق لمجاملات وواجب.. لكن من طرفي ما تغير شي.. ومع بداية سنة ثانية.. كان النهر الخالد بدأ يخف بشكل كبير.. وصار لازم أواجه الحقيقة.. اللي يمكن حرمانني عنها.. إنه أنا مش إمها.. ولا عمري راح أكون إمها..

وقعدت فترة متأرجحة بين إني بدي أشوفها وبين إنه ما لي حق فيها.. ويمكن هي نفسها.. ما كانت تشوف حبي إها مهم بنفس الدرجة اللي كنت أشوفها مهمة إلي.. مهى العلاقات دائماً ما بتكون على نفس الأهمية لكل طرف.. ممكن لطرف تكون حياته.. ولطرف ثاني تكون مجرد ترف أو واجب..

وانقطعنا.. وما ظل عندي إلا الصور الباردة الجامدة.. عشان تروي أهم  
علاقة إنسانية في حياتي.. أو العلاقة الوحيدة ممكن..

وإكتشفت بس راحت إيمان واستسلمت لمنطق الحياة القاسي.. إني  
صرت في منتصف الأربعين.. وحيدة وحزينة.. ومديرة لمدرسة بيعتوا لي  
الناس فيها كل يوم ولادهم عشان يعذبوني..  
ويرجعوا بوخدوهم إخر النهار..

ووقتها تغيرت.. وتحولت من راوية المرحمة المبتسمة النشيطة لراوية  
المديرة الصعبة.. الحازمة.. اللي ما بتسامح بشي.. وكل القسوة اللي كانت  
تشكل صباحاتي حزنا على إيمان.. كانت تصوير دموع في الليل كل ما أحضن  
صورها..

في بداية السنة الدراسية هاي.. وفي أول جمعة فيها.. كنت قاعدة بصلي..  
وفي وسط الصلاة وأنا بدي أدعي لإمي الله يرحمها.. إكتشفت إنه أنا ناسية  
إسمها.. وتوقعت وقتها إنه ممكن ضعف وإرهاق مؤقتين.. لكن لما قعدت  
سبع ساعات ناسيته.. كان واضح إنه الزمن بدأ ينتصر علي..

بعدها بأسبوع.. جمعت المعلمات لإجتباع.. ولما قعدوا كلهم وحضرت  
حالي أبدأ الكلام.. نسيت ليش جمعتهم.. كان موقف أقل ما يوصف فيه إنه  
مأساوي بشكل مضحك.. كلهم قاعدين بستنوا كلامي.. وما عندي  
كلام.. وبدون أي تردد.. قدمت إستقالتي فوراً.. وبدأت أراجع الدكتور..  
وكان فعلاً زي ما توقعت كوابيسي.. مرض الزهايمر..

الدكتور بحكي إنه من النادر الإصابة بهذا المرض بهذا العمر.. لكن  
ممكن الضغوط العصبية تلعب دور.. أعتقد إنها نهاية عادلة من جهتي..  
يمكن أحد أساليب ربنا في شفاءك إنك تنسى داءك..

وهاي هي حياتي باختصار كبير لكل شي عشته.. لحظات الفرح  
ولحظات الحزن.. الحروف البسيطة هاي.. هي كل حياتي.. ومن المؤسف  
فعلا إني أقدر أختصر حياتي بصفحتين.. أختصر وجودي بصفحتين..، لكن  
هذا كل شيء..

لكن راح أكتب كل شيء.. لأنني بعقد إنه حياتي ثمينة.. وعشان هيك  
أصلاً بدأت أكتب.. واليوم أول يوم تقاعد.. وراح أستمر بالكتابة..

2-11-2013

الدكتور بقول إنه الدوا ممتاز.. ويمكن الي أنساه ما راح يرجع.. لكن ما  
في أي تأثير على الإدراك والربط والإستنتاج.. مجرد ضياع للأسماء وبعض  
المواقف.. وهذا شيء طيب..

9-11-2013

أعتقد إني عشت حياتي كلها أطمح أن أمتلك ما تمتلكه شجرة.. نسل  
خاص فيها.. بشبهها..

عندي رغبة عارمة أدون كل شيء.. ورغبة عارمة أنسى كل شيء..

13-11-2013

يبدو إني بدأت أفقد إحساسي بالإتجاهات.. ضعت اليوم عن بيتي..  
ونصحني الطيب ببيع السيارة وعدم مغادرة البيت بدون ورقة فيها  
عنواني..

أتوقع النسيان بصير بوتيرة أسرع من المتوقع.. يارب رحمتك ورضاك..

20-11-2013

الغريب في هذا المرض إنه بفقدك ثقتك بأهم شي عندك .. عقلك ..  
بطلت أعرف لما أشوف شخص إذا كنت بعرفه أو لأ .. بعتمد بس على تعابير  
وجهه ..

بدأت أشك في نفسي وفي كل شي .. الموضوع مزعج جداً ..

1-12-2013

اليوم زارني طيبي .. واضح إني نسيت الزيارة .. أعطاني حبوب أقوى ..  
بودي الكتابة لكن متعبة .. متعبة جداً ..

يبدو من العدل فعلاً أن أصاب بهذا المرض .. إذا كان من المفترض أن  
ينساني الناس .. فلا نساهم أنا أولاً ..

لا أعرف نصف تفاصيل حياتي .. ولا ربعها .. وأشتاق لإيمان ..

5-1-2014

الناس بزوروني .. محمد بزورني، لكن إدراكي يختفي .. أشعر بذلك .. أنا  
شخص .. لست متأكدة من شيء ..

(التواريخ تختفي من الصفحات)

--

دفعت إيجار شقتي لمحمد ..

--

أنا راوية .. راوية شاهين ..

--

اليوم دفعت إيجار الشقة لمحمد ..



إنتهت .. كلها إنتهت ..

إيران ..

..

لما وصلت لهاي الصفحة بقراءة مذكراتها البسيطة .. كانوا دموعي معينين  
وجهي .. باقي الصفحات كانت رسومات فقط .. وإشارات .. معظمها  
بترمز لبنت صغيرة ... والبعض غير مفهوم .. وأرقام ..

حطيت الكتاب على جنب .. وركعت عند إجريها .. ومسكت إيديها  
أبوسهم .. تطلعت علي بنظرة خالية من أي شيء .. كانوا العيون الزرق  
خالين من أي تعبير .. نظرة ضائعة في المجهول .. والصورة اللي ضاميتها في  
حزنها انقلبت .. كانت صورتها وهي مديرة .. وأنا واقفة جنبها في ثياب  
المدرسة ..

تمت ..

## القبو

هنالك في أعماق أعماق روحك، يوجد طابق سفليّ، موحش وبارد ومظلم..

وإذا حدث وساقك الضعف والفضول للنزول إليه، فإنك على الأغلب ستقضي بعض الوقت هناك قبل أن تخرج منه ساخطاً نادماً مقسماً أنك لن تعود هنالك مرة أخرى.. لكن لن يكون بمقدورك إغفاله أو نسيان وجوده بعد ذلك..

لكن هذا سيتغير، وفي كل مرة يداهمك الحزن والضعف الشديد والوحدة، ستعود طائماً إليه.. لتقضي بعض الوقت وتخرج.. لكنك ستخرج أقل حدة وغضباً من أول مرة..

المهم فعلاً أن تتذكر أنه هذا القبو ليس أنت.. ربّما جزء منك.. لكنه بالتأكيد ليس أنت.. ليس أنت..

لقد مررت بمرحلة ما من الجفاف العاطفي في حياتي، لدرجة أنني كنت أترنّم بالبيت التالي..

لئن ساءني أن نلتني بمساءةٍ

قد سرّني أني خطرتُ ببالك

الأمر بدا حميماً في وقته.. لكنه أصبح مخجلاً في مرحلة لاحقة.. وتمنيت لو  
أنني أستطيع محوه من ذاكرتي وتاريخي.. لكنني - وللأمانة- أجده الآن  
مضحكاً وجميلاً.. ولا أنوي أبداً النظر إليه كنقطة سوداء أو شطبه من  
سجلاتي.. بل أستخدمه كلبنة وأبني عليه..

وهل الإنسان في النهاية إلا فسيفساء جميلة من أخطائه وجروحه  
وإنجازاته؟

أحبّ ما أخطأت به.. كما تحب ما أصبت به.. لولا هذا، لم يكن ذلك..

## التقديس

إن أخطر ما يمكن أن يتتريك الله به أ هو أن يهيا لك عقلك أن في هذه الدنيا أناسا هم أعلى منك مرتبة وقدرًا.. كملك أو أمير أو وزير..

حينئذ أستبدأ ليس فقط بتقديسهم واحتقار نفسك.. بل وبتقديس أبنائهم أيضاً وأبناء أبنائهم الرضع.. وكأنهم يرون ما لا ترى ويعقلون ما لا تعقل.. وكان الحكمة تورث كما تورث الملامح..

فإن أصابوا بقليل من قول أو عمل.. هولته وعظمته.. وإذا ما قاموا بخطأ ما.. كذبت عقلك.. وبحثت لهم عن تبريرات لم يكلفوا هم أنفسهم عناء البحث عنها.. وذلك كله لترضي الفكرة الأساسية التي تقوم على التقديس.. والمقدس لا يخطئ.. طبعاً يعقب هذا الابتلاء أن تحاول نشره بين الناس.. وإدانة من يقول بعكسه.. وهذا أدهى وأمر..

لا أعرف صدقا كيف دخلت إلى هناك.. لكنني أعرف أنك يجب أن تخرج.. ومن أجل هذا يجب أن تعي أن الله عز وجل يعرفك بإسمك.. وقد خلقك بيده.. وبث فيك من روحه.. وأمر ملائكته أن يسوقوا إليك رزقك.... وقد ر لك أجلك.. وعاملك كما يعامل أي انسان اخر.. لم يعاملك كتابع أو نكرة.. ولم يميز بينك وبين أحد.. فلا تعامل نفسك هكذا.. لا تذلل نفسك.. أنت حر.. عش وأنت حر.. ومت وأنت حر..

## أوجستين توران

بالإضافة للكرش.. فإن من "مزايا" الزواج.. انه الانسان لما يتزوج يبطل يطلع مواعيد غرامية.. أو على الأقل هذا هو المفترض.. وهذا هو اللي لازم نحكيه قدام الناس ونربي ولادنا عليه.. لأننا أزواج مخلصون طيبون مطيعون.. ويفعلون ما يؤمرون.. والأهم الاهم.. لا يبصبصون!! (إقرأها شوي شوي ومد الواو حركتين للتأكيد)..

المهم انه ما في مواعيد غرامية.. وحتى لو تزوجت من البنت اللي بتحبها.. طبيعة مشاويركم بعد الزواج بتختلف.. المشاوير العاطفية السابقة اللي ما كانت محددة لا بوجهة ولا بوقت ولا بسبب أصلا.. وكانت مجرد خطوات عفوية لعاشقين غير مسؤولين أبتختفي.. وبحل محلها مشاوير من نوع ثاني.. مشاوير المتزوجين.. واللي كل مشوار منهم يكون محدد الوجهة.. ووقت الخروج ووقت العودة.. وشو لازم نحكي وشو لازم ما نحكيش.. وشواهدية اللي نجيبها.. الخ..

وهذا مش شيء سيء أو يجب الشكوى منه.. بالعكس هذا هو التطور المتوقع للعلاقة وهاي هي طبيعة الأشياء.. لكن شخصيا.. افتقدت أنا المشاوير القديمة.. ولأني من جماعة "لا يبصبصون".. لقيت البديل.. والبديل كان.. ميوش..

مشاويري أنا وميوش نادرة صح.. لكن كلها متعة وبدون محاذير..  
والتخطيط الوحيد لها.. انه قبل ما نطلع.. ميوش تروح "أجلكم الله" على  
الحمام.. لأنه فرش السيارة جديد.. والراتب يا دوب متحمل..  
وأصلا المكيف بطل يبرد مزبوط.. والأمور يعني.. شو الواحد بده يحكي..  
لا حول ولا قوة الا بالله..

المهم.. الأربعاء الماضي كان أحدث مشوار طلعهنا سوا.. كنت معزوم  
على عشا عامله شاب صاحبي في الجمعية الأردنية في أبو ظبي.. ورحت أنا  
وميوش.. ويومها كنت بلتقي أبو خالد لأول مرة..

وصلنا الجمعية حوالي الساعة ثمانية.. ودخلنا الخيمة اللي في الساحة..  
وقعدنا على كرسي.. نستشق هواء الأراجيل العليل وأنتظر قدوم المناسف..  
وفيا كنت بخوض نقاش جدي مع ميوش انه الجمعية ما فيها surprise  
eggs. جلس في كرسي مجاور النا رجل في أواسط الخمسين تقريبا.. ولما  
شاف النقاش بيني وبين ميوش احتد.. وكان من الممكن يتطور لاشتباك  
عائلي لا يحمد عقباه.. طال من جيته حبة ملبس.. وأعطاه إياها مع تربيتة  
خفيفة على راسها.. شكرته على فض الاشتباك بإيلاءة بسيطة.. وقبل تطور  
أي حوار بيننا.. حضرت المناسف.. وقطعت جهينة قول كل خطيب..

واحنا بتنعشى.. لاحظت انه الزلّة كان كل همه ميوش.. هو يفتفت لها  
لحمة.. ويحط لها "شوربة" على رأيها.. ويعني كأنها بتته كانت.. وهذا الشي  
طبعا فرحني.. لأنه أعطاني وقت أكثر إني أشارك في معركة المنسّف.. لكن  
بنفس الوقت أثار أسئلة في داخلي عن سر هذا الاهتمام العجيب من رجل  
المفترض انه عنده أحفاد بعمر ميوش أو على وشك.. ومش بحاجة انه يهتم  
بطفلة على هذا النحو.. خصوصا انه نظراته تجاهها كان فيها أكثر بكثير من

مجرد مجاملة.. والصراحة تطور عندي نوع من الفضول تجاهه.. لكن توقعت في سري انه ما يخلف.. وهذا الاهتمام نوع من التعويض..

بعد العشا طلعت بره الخيمة أدخن.. وميوش راحت تلعب بالألعاب.. وشوي ولقيت الرجل اجا وقعد عندي وقعدنا ندخن سوا.. بعد حديث كسر الجليد التقليدي.. سألني عن إسم ميوش الحقيقي.. فقلت له انه مايا.. ولما حكيت الاسم.. كأنه غصّ الرجال.. ودعا لي الله لا يجرمني منها.. فزاد فضولي.. فضولا على فضول.. وبطلت عارف شو بدي أحكي.. ولقيت حالي بدون وعي بحكي له.. "الله ان شاء الله برزقك.. إن الله على كل شيء قدير" ..

لقيت الرجل ابتسم.. وقال.. "الله يسلمك.. بس أنا عندي أولاد.. وربنا منعم ومفضل.. لكن ذكرتني ميوش ببنتي وهي صغيرة.. وهي بنفس عمرها وإسمها" .. وتنهد وسكت.. طبعاً أنا صارت حيرتي أكبر.. وكنت محتار بين انه بحق لي كغريب أسأله عن تفاصيل زيادة عشان أشبع فضولي.. أو أسكت.. لكن سألت.. وبعد تشجيع بسيط مني انه يفضفض وإنه فش ورائنا شي.. بدأ الرجل بالكلام.. وكأنه كان بستنى فرصة بسيطة يحكي حكايته لحد.. وبدأ فيها من أولها..

"أنا إسمي عمر.. أبو خالد.. بشتغل هون.. مهندس.. هذا يا سيدي وأنا صغير.. كنا ساكنين بقرية من قرى نابلس.. وكان أبوي الله يرحمه.. تاجر حجر بين نابلس وعمان.. وكان وضعنا ممتاز.. في سنة 1980.. خلصت توجيهي.. وكان التوجه أيامها انه الواحد يطلع يدرس بره.. وكونه كان الوالد مقتدر.. ما كان في أي مشكلة في الموضوع غير اختيار البلد.. وبعد عدة نصائح من الأقارب.. قررت أروح أدرس في الهند..

وفي الوقت اللي الوالد فيه كان بشجعني أسافر وأتغرب وأندعك..  
والدتي الله يرحمها كانت ضد الموضوع تماما.. كانت تخاف من الغربة  
والسفر.. لكن ما كان بيدها حيلة.. الأمور كلها كانت بتمشي بهذا الاتجاه..  
وطلع قبول الجامعة وحجزت التذاكر.. وتحدد موعد السفر.. وصار  
الموضوع أمر واقع.. ومع هيك حاولت محاولتها الأخيرة..

قبل ما أسافر بيوم أو يومين.. حكيت لي أمي انه وحدة صاحبته حكيت  
لها عن بصارة مغربية بتقرا الكف.. وشاطرة كثير.. وإنه إمي متأكدة إنه لو  
قرأت لي الكف.. راح أكتشف انه هاي السفارة مش من مصلحتي وما  
أسافر.. وكونه إمي كان مؤمنة بالغيبات هاي تمام الإيمان.. ما حبيت  
أكسفها.. وإجت المغربية..

طبعا هذا الكلام صار له ثلاثين سنة أو أكثر.. لكن لغاية الآن متذكر  
المشهد بتفاصيله.. يمكن إمي نفسها نسيت ملاحظها.. لكن المغربية لأ..  
كانت ختيارة.. شعرها أبيض أبيض.. وعيونها واسعات وغريبات..  
وكأنهم فعلا بشوفوا شو جواك وشو راح يصير معك.. ولكنتها غريبة..  
دخلت عنا عالييت.. وبعد الضيافة.. اجيت قعدت معاها.. ومسكت إيدي  
اليمين.. فتحت الكف.. وصارت تتطلع فيه على أساس بتقرأ.... وإمي  
قاعدة مركزة بتستنى أي شي يحول الموقف لصالحها.. وأنا بيني وبينك مش  
مقتنع بخرايبها.. لكن صار عندي فضول أعرف شو بدها تحكي.. وبس  
خلصت "قراءة" غمضت عيونها فترة.. ولما فتحتهم.. اطلعت في نظرة  
طويلة وقالت أبيات شعر متذكرها لهسه.. وكأنها انحفرت بذاكرتي.. قالت  
المغربية وقتها..

بختك يا ولدي عجيب.. ما شفت يوم مثلاة..



تقضي حياتك غريب.. سايح في أرض الله..  
ويضيع منك الحبيب.. الأعجمي ياخذاه..  
تمشي وراه العمر.. تلاقاه ما تلاقاه..

ويس.. ما زادت عليهم حرف.. وراحت... طبعاً إمي فسرت هذا  
الكلام إني مش لازم أسافر.. ومع هيك.. ثاني يوم الصبح كنت في مطار  
عمّان.. كانت أيامها ما في طيران مباشر عالهند.. لازم تقعد في أبوظبي سبع  
ثمن ساعات ترانزيت.. ومنها على بومباي..

وصلت الهند بعد 18 ساعة شحطة في المطارات وكانت الدنيا نص  
الليل.. ومش نايم كنت إلي يومين.. أول ما طلعت من المطار.. ولسه بدي  
أشوف تكسي.. حسيت حدا مسك رجلي وهو بصرخ.. طلع واحد مشلول  
شحاد.. وهو مسك رجلي من هون وأنا وقعت أنا وشنطي من هون..  
استبشرت خير صراحة..

المهم لقيت تكسي.. وأعطيته العنوان اللي أعطاني إياه قربي.. طلع  
السواق بعرفش ولا كلمة انجليزي.. فصرت أشر له اني بدي أنام.. وهزلي  
براسه إنه فهم علي.. وبعد ساعة تقريباً.. نزلني على باب مبنى صغير  
مكتوب عليه.. hotel.. حملت شنطي ودخلت.. لقيت في غرفة استقبال  
معمتة.. والموظفة اللي الكاونتر نايمة.. لما قربت عليها أصحيتها.. لقيت  
سرب نمل قاعد بمشي فوق الكاونتر.. ولما يوصل راس الموظفة.. بطلع  
فوقه.. وبرد بنزل وبكمل المشوار.. تفائلت.. بس ما كان قدامي حل ثاني..

المهم صحيتها.. وطلعت برضه ولا كلمة انجليزي.. لكن فهمت شو  
بدي.. مدت إيدها وراها وطالت مفتاح عليه رقم.. ورجعت نامت مع  
نملاتها.. أول ما فتحت باب الغرفة وضويت الضوء.. تفاجأت إنه في حوالي

عشرين فار قاعدين عالسرير.. ويبدو أنا أقلقت منامهم.. فصاروا  
يتنظطوا.. وكل واحد رجع لمخبأه.. ما كان لا في وقت ولا في حيل إنه  
أشكي على شي.. رميت حالي عال تخت.. وأنا بروح في غياهب النوم.. كنت  
بسمع خطواتهم راجعين.. ونمت وأنا بحلم إنه اللي صار في الوظيفة صار  
في...

قعدت في الهند أسبوعين تقريبا.. وما لايمتني نهائيا.. وبعد تلفونات مع  
الوالد.. تقرر إني أرجع البلد لغاية ما نشوف مكان ثاني.. وبعد فترة من  
البحث.. كانت محطة الغربية الثانية تقرر.. ومع أول الشتاء.. كنت وصلت  
بوخارست..

كانت العادة أيامها انه الطلاب العرب يسكنوا مع عائلات رومانية..  
عشان اللغة والاندماج الثقافي وما إلى ذلك... ومع توصية من لجنة الطلاب  
الدوليين بأحسن أماكن نستأجر فيها.. بدأت أدور على غرفة أستأجرها..  
وسكنت أول فصل عند عائلة رومانية مكونة من واحد ومرته.. كان هو  
متقاعد من الجيش.. وهي إلهام محل في سوق الخضرة.. ووضعهم تعبان..  
ويحاجة الإيجار..

البيت كان بسيط.. فيه ثلاث غرف وصاله.. وعند حديقة.. وقريب  
جدا على بحيرة صغيرة.. وقريب عالجامعة.. أول ما إستأجرت عندهم..  
كانوا الجماعة هاديين وودودين.. لكن خلال يومين.. اكتشفت الحقيقة..  
طلع السيد نيقولاي ومرته ناقر ونقير.. ومبدئيا.. لازم كل يوم بالليل  
يسكروا.. أول السهرة يكونوا حبايب.. لكن مع توالي الكؤوس.. بتولع  
بينهم.. وبيشلوا خناق.. طبعا انا كنت يا دوب بالروماني.. بحكي مرحبا  
وصباح الخير وهيك.. ومش فاهم شي عليهم.. بس كوني شخص موجود  
في البيت.. وعندني نخوة العرب... كنت أحاول أفزع بينهم.. فبدي أعمل

إشي.. ومع إنهم يكونوا سكرانين.. بس انه يقعدوا يشرحوا لي.. كل واحد وجهة نظره.. ويقعدوا يورجونى ورق.. وأنا قال أقرأ الورق و أفنتع.. وإنه معك حق.. وأنا مش فاهم إشي...

وأقوم عاد وهم يרטونوا بالرومانى وأنا نازل بالعربى.. "يا أخ نيقولاى.. صلى عالنبى.. الأخت دومترىتا مش قصدها اللي انت فهمته.. وإنتى ياست دومترىتا إنتى كمان محقوقة.. الله يصلحك هذا جوزك وأبو عيالك.. هيك الوحدة بتحكى لجوزها؟ أى والله لو إنك عنا بالبلد أبصر شو صار فىك!!" لا قال.. ومرات يقتنعوا بكلامى ويهزوا راسهم.. ويصطلحوا.. وعشت مع جوز المجانين هدول ست شهور.. ما تعلمت منهم إلا المسبات.. وكنت ناوى فعلا أتركهم مع اخر الفصل.. لولا كان مخبى فى القدر إنهم يصيروا نسايبى.. أو شبه نسايبى عشان أكون دقيق..

قبل أسبوع ما أحكى لهم إني لقيت بيت جديد وبدي أطلع عليه.. إجت عندهم زائرة من القرية.. الأيقونة الساحرة كريستينا.. كريستينا كانت بنت أختها لدومترىتا.. كانت مخلصه مدرسة فى القرية.. وجاية عشان تكمل جامعة فى بوخارست وتسكن عند عمته.. وأنا برحب وبهلى فى كريستينا.. كان قلبى أعطى دماغى أمر يلغى موضوع الرحيل.. وتغيرت كل مخططاتى..

البنات الرومانيات طبعاً جميلات جداً.. لكن كريستينا كان فيها شى غير عندهم.. او عن بنات بوخارست تحديداً.. كان فيها هذا الجمال القروى البسيط.. العيون البريئة اللي غير عن عيون بنات المدينة.. ما فيهم لمعة عيون البنت اللي بتحسها فاهمة كل شى.. كانت ملاك.. ملاك مغمض عمره 18 سنة.. وبعته ربنا لعندي يمنحني السعادة...

بدون ما أطول عليك.. في سنة ثانية تزوجنا.. ونيقولاوي صار بمثابة حماتي.. ودومترينا بمثابة حماتي.. ومع فهمي للغة وقتها.. فهمت مشكلتهم مع بعض.. كايين السيد نيقولاوي ماخذ قرض قبل ما يتقاعد.. وصار فاه على صاحبه.. ودومترينا يشتغل وبتسد القرض.. وكل ما يسكروا تتذكر شو عمل.. تقوم تتخانق معه.. ومع إني كنت أصلحهم بالعربي زمان. بطلت بالروماني أقدر أصلحهم.. بس هذا كله مش مهم.. كان معي كريستينا..

وحملت كريستينا.. ولأن الزمان وقتها كان كريم وطيب.. حملت الملاك بملك ثاني.... وفي صيف 1983.. رجعت من إجازة الصيف وانولدت بنتي مايا.. ولو شو ما أوصف لك فرحتي بولادتها مش ممكن تصدق.. كان كأنه السماوات والأرض والبحار والأنهار والجبال والورود وكل شي جميل تجمعوا وطلعوا مايا.. وكانت بتشبه بنتك هيك.. ضحوكة ولعوبة وحنونة.. كانت متعتي بالحياة بس أقعد ألعبها وأطلع فيها.. كنت ما أصدق على الله أرجع من الجامعة وأوصل البيت عشان أشوفها.. أبوسها.. اخذها عالبحيرة نلعب مع البط والوز ونطعمهم.. عشت معها أحلى أيام حياتي.. ما كان في الدنيا كلها أب سعيد قدي.. ولا زوج كمان سعيد قدي..

ودخلت سنة رابعة.. وقرب التخرج.. ومعه صرت أحس تغيرات في كريستينا.. صار لأول مرة في مشاكل بيننا.. ولمحت عدة مرات إنه إحنا مش راح نظل عايشين عند نيقولاوي ودومترينا للأبد.. ويمكن لازم نشترى بيت في بوخارست.. وكان هذا رسالة إنه مش ناوية ترجع معي على فلسطين وهذا شي خطير.. وعكس إتفاقنا لما تزوجنا.. وعشان تزيد الأمور سوء.. وقتها اضطررت أنزل على فلسطين لأنه أبوي كان شغله صار فيه مشاكل.. وصحته تعبت.. وطلب يشوفني... وأنا في الطيارة كنت قاعد جنب الشباك.. بطلع على الغيوم.. وبفكر في الغيوم اللي بلمت تتلبد في حياتي..

رجعت من البلد بعد ما تطمنت على الوالد.. وبقدر ما كنت مهتم  
بموضوع كريستينا.. كنت مشتاق لمايا.. بس وقتها صارت المشاكل بيني و  
بين كريستينا تزيد.. وإنقلبت الآية.. وصار نيقولاي ودومتريتا يتدخلوا هم  
يصلحونا.. وفي وسط هذا كله.. كانت مايا هي سلوتي وحياتي.. كنت  
أخذها ونروح نقعد عالبحيرة وبرائها تنسيني كل شي.. كان الحب اللي  
بتعطيني إياه أغلى من كل كنوز الدنيا.. حتى كلمة حبيبي منها كانت تنحكي  
بصوت الملائكة..

قبل ما أخرج بشوي.. كانت مايا أو ميوش زي ما صرت أدلعتها.. صار  
عمرها سنتين ونص.. وكانت الأمور بيني وبين كريستينا هديت ورجعت  
حبيبة قلبي اللي بعرفها.. والدنيا ما كانت واسعيتني من الفرح.. واتفقنا إنه  
نتخرج ونسافر سوا.. وفي كل سنة ننزل مرتين على رومانيا.. في الصيف  
والشتا.. وكان هذا حل مرضي لجميع الأطراف.. وإحتفلنا فيه بحفلة شواء  
كبيرة كان نيقولاي السكر عرابها..

ورجعت الحياة إبتسمت إبتسامة أكبر من كرش دومتريتا.. وصرت أعد  
الأيام عدّ عشان أخرج وأرجع.. وكانوا أهلي مشتاقين كثير يشوفوا كريستينا  
و مايا.. ما شافوهم إلا بالصور.. وعلى قد ما كنت مبسوط إنه راح أرجع  
لبلدي وأعيش فيها.. كنت راح أفتقد نيقولاي ودومتريتا.. وحياتنا كلنا  
سوا.. كانت يمكن هالخمس سنين في بوخارست هم أحلى شي عشته في  
حياتي..

وتخرجت ولبست الطاقية السودا.. وتصورت وميوش على كتافي...  
وتخرجت كريستينا كمان.. وصرت أنا باش مهندس قد الدنيا.. إنجنير  
كونسركتور على رأي نيقولاي.. وزوجتي الحبيبة تخرجت بشهادة في الأدب  
المقارن.. وبدأت تحضيرات السفر من جهتنا.. وتحضيرات الإستقبال

والليلي الملاح في فلسطين.. كان أبوي حالف يعمل لي عرس مطنطن في البلد.. ويذبح عشر عجول لعيون ميوش.. وإمي من جهتها كانت جهزت الشقة.. وفرشتها من مجاميعه.. حتى أواعي ميوش وكريستينا حضرتهم.. وثوب فلسطيني لكريستينا كان..

وسارت الأمور بحمي الرحمان.. وكان الحجز لعمان يوم السبت.. وآخر أيامك يا نيقولاي.. وآخر مشاكلك يا دو متريتا.. يوم الخميس طلعت الصبح عشان أعمل آخر تصديق لشهادتي من الخارجية الرومانية.. وكريستينا قالت إنها بدها توخذ ميوش وتروح عالقرية عشان تودع أبوها وإمهاً وعلى أساس يرجعوا المسا في قطار الساعة خمسة.. خلصت الأوراق ورجعت من الخارجية لقيت نيقولاي سكران و نايم ودو متريتا في الشغل.. قمت أخذت حمام.. وقلت خليني اخذ قيلولة بكونوا رجعوا.. وأنا نايم حلمت بالمغربية.. كنت لأول مرة بحلم فيها.. وأول مرة بشوفها من يوم قراءة الكف.. كانت بتعيد أبيات الشعر نفسها مع ضحكة.. وجنبها إمي عم تبكي.. صحيت من النوم زي اللي مسه شيطان.. مفزوع وقلبي موجعني.. كانت الساعة حوالي ستة.. ودو متريتا رجعت وبتتقاتل مع نيقولاي.. بس كريستينا وميوش ما كانوا موجودين..

مسكت التلفون بإيدين برتعشوا وقلب يطلع من مكانه وشفافني بس بحوقلوا وبدعوا.. وعرفني بنزل.... وإتصلت على بيت حماي في القرية أشوف وين صارت كريستينا.. ومع كل رنة للتلفون.. كان شي بحفر في قلبي.. وضحكة المغربية بترن في ذاتي.. وكأنه رنة التلفون هي ضحكة المغربية.. وأخيرا ردت حماي.. والرد كان أقسى مما توقعت.. كريستينا ما كانت رايحة عندهم أصلاً..

رميت التلفون من إيدي.. وتكومت عالكنباية زي الشوال.. وكأنه كل شي انسحب من روحي مرة وحدة.. بطلت عارف شو بدي أعمل.. ولا وين راحت كريستينا أصلا.. ووين مايا.. وين مايا.. وبدأت كل الأفكار الشيطانية تلف في راسي بسرعة البرق.. وبدأت إتصالاتي مع كل حدا بنعرفه.. صاحباتها.. قرايبها.. زملائها في الجامعة.. أهلها كمان مرة.. ما في.. إختفت.. طبعاً من كثر الإرهاق النفسي اللي كنت فيه.. صرت أتأمل إنه صار لهم شيء ولا تكون هربت.. ورحت في الليل عالشرطة.. واعلنت عن إختفائها.. وصاروا يدوروا في المستشفيات ومراكز الشرطة..

روح من مركز الشرطة على وجه الصبح.. وما كان إلها أي أثر.. وحوالي ثلاث أيام ما أنام.. وأنا أدور عليهم.. ما في.. الأرض إنشقت وبلعتهم.. طبعاً أهلي عرفوا وأجلوا كل التحضيرات.. وظلهم متابعين معي يوم بيوم.. ومضى شهر كامل وأنا بلف شوارع بوخارست يوم ورا يوم أدور عليهم.. ما في فائدة.. وزرت أهلها وقريتها.. وإكتشفت إنها كاينة مخبرة إمها إنها ما بدها تيجي معي على فلسطين.. وبدها تروح تعيش لحالها مع مايا..

في اخر الشهر.. كان شكلي إنسان ثاني.. كنت خسرت جزء كبير من وزني.. ولحيتي طويلة.. ووجهي عظامه كلها بارزة.. ما كنت متخيل في أسوأ كوابيسي أخسر زوجتي وبنتي بطريقة مثل هيك.. وكنت طبعاً على وشك أصير مخالف في رومانيا لأنه إقامتي إنتهت.. وعشان تكمل الدنيا معي.. حكوا معي من البلد إنه إمي كثير تعبانه.. ولازم لازم أنزل أشوفها لو يوم.. لما وصلت البلد كانت الله يرحمها في اخر ساعاتها.. كاينة من وقت ما عرفت انه كريستينا أخذت البنت وهربت أصايبها إنهار.. بس ما حدا رضي يحكي لي.. ولما شافنتي وشافت حالتي.. تعبت بزيادة.. وقعدنا أنا وإياها يمكن



أغلى ساعة ممكن يقعدھا شخص مع إمہ.. كانت بس بدها تتطلع بعيوني  
وتحضنتي.. ويلھا تعبھا وويلھا تعبي على بنتي.. وماتت وهي ماسكة  
بأيدي.. وتبكي.. وتحول كل ألمي وحزني لغضب هائل على كريستينا..  
بعد وفاة إمی.. إتصل في شاب من رومانيا كان معي.. وحكى لي إنه قدر  
يعرف من موظفين الجوازات إنه كريستينا ومايا طلعا من رومانيا وراحوا  
على تركيا.. وما كذبت خبر.. خلال يومين كنت في إسطنبول.. وأنا ناوي  
أقتلھا لكريستينا لو شفتها..

وصلت إسطنبول.. وما معي أي معلومة إلا إنهم نزلوا في مطار  
إسطنبول.. وبدت عملية بحث محمومة ويائسة عنهم.. كنت أروح أحاول  
أشوف وين في رومانيين.. وين في مطاعم رومانية.. أي شي روماني.. وأدور  
عليهم فيه.. ووصلت إني أوقف قدام القنصلية الرومانية بالأيام لغاية ما  
فكروني إرهابي يمكن.. بعدين صرت أدور عند دكاترة الأطفال.. عيادات  
النسائي.. الحدائق.. المطاعم.. أي شي... وكل يوم يمر علي يخليني مجنون  
أكثر من اليوم اللي قبله.. صرت أشوف مايا في كل طفل.. كل ما أسمع  
صوت طفل بحكي بابا ألف وجهي أتطلع عليه.. صرت تقريبا شبه  
مجنون.. وأبوي بحول لي فلوس.. شهر على إسطنبول.. شهر على بورصه..  
شهر على شيلا.. تعبت وتعبت معاي.. ودخل شتاء تركيا البارد وأنا تايه عند  
الأتراك وحيبتي ضايعة..

وبعد حوالي ست شهور من البحث المحموم اليأس.. مسكوني الشرطة  
التركية متشرد ومتجمد تقريبا في حديقة في أنقرة وأنا بهذي بإسم مايا..  
وشكلي زي المجانين كان.. كنت خلص إستسلمت ووصلت لحالة الإنهيار  
النفسي والجسدي.. دخلوني المستشفى أ وخلال يومين وبالتنسيق مع



السفارة الأردنية.. كانوا مرحلينني على عمّان وإستلمني أبوي من هناك.. وأيقنت أخيرا بالحقيقة.. بنتي ومرتي راحوا خلص.. إختفوا.. ضاعوا..

قعدت في البلد حوالي سنة بعدها.. ما عملت شي.. بس أتعافى من اللي صار معي.. وأهلي ساعدوني أخرج من الكآبة اللي عشتها.. وإنه كل هذا مكتوب.. وفعلا.. إيماني بالله وبالقدر.. نوعا ما طلعتني من أزمتي.. بس ما نسيتها.. وعشان يكتمل العلاج.. تزوجت بنت خالتي بحسب وصية إمي..

طبعا كان تحدي شديد جدا لزوجتي إنها تتزوجني.. لأنه أنا ما كنت شخص متزن أيامها.. وكان يمكن إنه أعمل لها مشاكل أو أشوفها كبديل.. أو أقارن بينها وبين كريستينا.. والأهم يمكن أقارن بين ولادي المستقبلين معها.. وبين مايا.. وهي مش ذنبها هذا الشي.. لكنها كانت بنت حلال وواعية.. وقدرت بكل هدوء وحكمة.. إنها تتعامل معي وتطلعني من ترسبات اللي صار.. صحيح ما نسيت مايا أبدا.. لكن على الأقل تراجع الموضوع من الذاكرة اليومية وراح لخانة جروح القلب.. وصار شي ساعدني أبدا حياتي كلها من أول وجديد..

وقتها كان في إلي ابن عم بشتغل في ليبيا.. وحكى معي إنه في شركة أمريكية ماخذين مشروع السفارة الأمريكية في طرابلس وبدوروا على مهندسين عرب.. أرسلت شهادتي وأوراقي لعنده.. وخلال شهر كنت أنا وزوجتي في ليبيا.. إشتغلت مع هالي بيرتون.. كانوا ماخذين عقد بينوا كل السفارات الأمريكية في إفريقيا وآسيا..

في ليبيا إنولد لي خالد.. وفي تشاد.. أبوي توفي.. في الكونغو إنولدت علي.. وفي مانिला إنولدت الريحانة آية.. وصرنا العائلة الرحالة.. من بلد

لبلد.. لغاية ما قبل سبع سنين تعبت من السياحة في بلاد الله.. وجسمي بطل قادر يتحمل سفر.. وصار وقت أستقر خلص.. ومن جهة ثانية خالد كان بده يدرس جامعة.. وعلي على وشك يخلص توجيهي.. فتركت هالي بيرتون.. واشتغلت مع شركة إستشاري هون في أبو ظبي.. وبدأت حياة جديدة..

وصارت مايا وكريستينا وحكايتهم من الماضي.. لكن ظل الجرح في القلب.. كل فترة براودني.. وحتى المغربية كانت مرات تيجيني في الحلم.. وإمي الله يرحمها كمان.. وفي لحظات يأس أو أمل.. سميها زي ما بدك.. صرت أدور عليهم عالانترنت.. بس بدون فائدة.. لغاية ما في يوم قبل سنتين تقريبا أ التقيت بالصدفة بزميل طيب قديم كان بدرس معنا في بوخارست.. كان هذا الصديق مقيم في أمريكا.. وجاي على أبو ظبي في مؤتمر طبي.. وكان بعرف حكاية كريستينا ومايا كلها.. لأنه كان من الناس اللي دور معي عليهم في هذيك الأيام..

وبعد الترحيب المعتاد في لقاءات الأصدقاء القدامى.. سألني عنهم فقلت له إنها صفحة وانطوت من خمسة وعشرين سنة.. وأنه أنا عانيت كثير لقدرت أطويها.. والله يسهل عليهم وين ما كانوا.. كانت مايا وقتها راح تصير 28 أو 29 سنة.. وإمها يمكن في الخمسين.. المهم.. الزلة ما إقتنع.. وقعد يحكي إنه الدنيا تغيرت.. وصار في تكنولوجيا وإنترنت.. وأكد لو دورت منيح بلقاها.. وتعهد من عنده إنه بس يرجع أمريكا راح يدفع لشركة خاصة يدوروا عليهم.. وأخذ رقمي في أبو ظبي.. وأخذ تفاصيلهم كلها وسافر..

وهو سافر من هون.. وشيء مزيج من الفضول والأمل يبني في قلبي من هون.. وبدأت صور من الماضي البعيد تتلأأ في مخيلتي.. ورجعت المغربية تزورني في أحلامي.

وسافر صاحبي.. ومرت سنة طويلة على سفره.. وما سمعت منه شيء.. ووقتها أنا تندمت إنني أعطيته تفاصيل عنهم.. لأنه فعلاً ما كنت صدقت إنني أطوي الموضوع.. صحيح أنا أب.. ومايا بنتي.. لكن أنا إنسان بالنهاية.. وعندني قدرة على تحمل مشاعر الضياع.. وعندني عائلة ثانية يستاهلوا إهتمامي اللحظي.. اللي مش لازم يضيع عشان شيء صار قبل خمسة وعشرين سنة.. لكن تلفون إجابني من أمريكا في نص الليل قلب موازين حياتي كاملة..

حكى معي صاحبي الدكتور.. وقال لي إنه المحقق اللي اتفق معه لقي كريستينا.. بس ما لقي مايا.. وللمفاجأة.. كاينة كريستينا في أمريكا مش في تركيا.. لكن ميتة من حوالي عشر سنين.. طلعت داخلة أمريكا بعد خمس سنين من روحتها على تركيا.. وصاير إسمها كريستينا توران.. كاينة متزوجة واحد تركي.. وهم حالياً بدوروا على بنتها.. اللي ممكن إسمها كمان يكون تغير.. بس لسه ما لقيوا شيء.. بس أكيد راح يلاقوها..

وعشت حوالي أسبوعين بعدها من المشاعر المختلطة.. قلق.. أمل.. خوف.. مش عارف شو هو.. يا ترى مايا عايشة؟ ميتة؟ بتعرفني؟ بتعرفنيش؟ شو حكى لها كريستينا قبل ما تموت؟ تخربطت بشكل لا يوصف.. لكن حيرتي ما طولت.. إتصل في صاحبي وقال إنهم لقيوا مايا.. إسمها مغيرة إسمها كاينة.. وصارت أوجستين توران.. وبشتغل مع مؤسسة خيرية في شيكاغو.. وراح يقعد معها الأسبوع الجاي.. ويمهد لها

الموضوع.. وخلال أقل من أسبوع.. كانت المضيضة الشقرا بتطلب منا ربط الأحزمة إستعدادا للهبوط في مطار أوهير..

اللقاء كان يوم أحد في مطعم مطل على بحيرة ميتشجان.. والبط اللي كان على طرف البحيرة.. كان كثير يشبه البط في بوخارست.. طبعا وصلت أنا والدكتور قبلها.. وهو قعد يكرر نصائحه إنه ما أتوتر ولا أنفعل.. ولا أعاتب.. والبنت أمريكية.. مش عربية.. ولازم أقبل تغييرات الزمن وما إلى ذلك.. هو كان يحكي.. وأنا كنت أتذكر لما كنت أعلمها الفاتحة وهي صغيرة.. كنا نكون قاعدين على شط البحيرة.. و كنت لما أحكي لها "إهدنا الصراط المستقيم".. كانت تحكي..موسكاكيم.. موسكاكيم.. وأحضنها ونضحك.. وأحكي لها مستقيم.. ترجع تحكي لي..موسكاكيم..

وصرت أتطلع على المدينة.. وأتحيل كل لحظة عاشتها هون بدوني.. كيف كانت تروح على المدرسة لحالها.. كيف ما كنت معها يوم التخريج.. في النشاطات.. في أعياد الميلاد.. في العطل الصيفية.. في لحظات الخزن.. لحظات الفرح.. لحظات الإنجاز.. كيف ما كنت موجود كأب في حياة بنتي لما كانت محتاجيتني.. كيف ما غطيتها بالشتا.. كيف ما كنت معها وهي بتمتحن سواقة.. وهي بتتعلم سباحة.. وهي بتحل الواجب.. و صار قلبي يوجعني.. وأنا حالف أعوضها قد ما بقدر عن كل شي..

ما صحاني من الذكريات وأحلام اليقظة المؤلمة هاي.. إلا صوت الدكتور وهو يقوم من مكانه و بسلم.. وصلت مايا.. قمت من الكرسي.. ومرتبك.. وشفتها لأول مرة من يوم الخميس المشؤوم في بوخارست.. كانت كبرت وصارت في اخر العشرين.. ملامحها مختلفة شوي.. بس لسه هي هي.. وشعرها الأسود صار طويل.. وكانت لابسة تي-شيرت أبيض وجينز أسود.. وبتدلى من رقبتها صليب مذهب.. وأنا بتطلع في وجهها وفي

راسي ألف سؤال وسؤال.. ولا هي بتمد إيدها.. وبتعرف عن حالها وكأنا  
في اجتماع شغل.. "أوجستين توران".. طبعاً سلمت عليها ببساطة ولجمت  
مشاعري.. وقلت "عمر كتانة".. وعلى يسارها كان في شاب زنجي مجدل  
شعراته ورابط عليهم بكل ملونة.. ولا هي بتعرفني عليه.. Samuel  
Milden. ماي بوي فرند.. تشر فنا سيد صامويل..

المهم قعدنا أنا والدكتور ومايا.. أو أوجستين.. والبوي فرند تبع بنتي..  
صامويل باشا ملدن.. وبدأت هي الكلام اللي نزل رصاص على قلبي..  
كمفردات وكأسلوب.. حكّت إنه من اللطيف مني كآب إنفصل عن إمها  
من زمان. إنه بعد العمر هذا كله اللي كل واحد فيه شكل حياته بطريقته  
الخاصة أرجع أسأل وأدور عليها.. وهذا بدل على مشاعر طيبة.. وهاي لفته  
طيبة هي بتقدرها وبتشكرني عليها.. طبعاً كان واضح إنه مشاعرها تجاهي  
سلبية جداً.. وخمسين سنة من مقارعة هاي الحياة خلوني أحتفظ بهدوئي في  
صدري ودموعي في عيوني... وأخذت بنصيحة الطبيب صديقي..  
وظليت هادي.. ومتحفظ.. لأنه الأمريكان غير عنا على رأيه.. ومشاعرهم  
مش زي مشاعرنا.. وقلت يمكن في مرحلة لاحقة نفسر كل شيء..

بعد الغدا.. سألتني كم إجازتي ووين نازل.. قلت لها إنه أنا ماخذ أوتيل  
قريب.. ومبدئياً راح أظل هون أسبوعين.. فحكّت هي إنه هي هذا  
الأسبوع ما عندها شغل.. وبتتمنى لو أقعد معها في البيت.. نتعرف على  
بعض أكثر.. وتودعنا على أساس أزورها في البيت ثاني يوم.. وصديقي  
الطبيب من جهته رجع على الولاية اللي هو فيها ورجعت أنا عالأوتيل وأنا  
نصف إنسان..

حكيت أنا ومايا كثير في هذا الأسبوع.. وقالت إنه إمها انفصلت عني..  
وسافروا على تركيا.. وهناك تزوجت بحار تركي هو اللي رباها.. وهو

بمثابة أبوها كان... او حتى أبوها.. وسافروا من تركيا على أمريكا وعاشوا فيها.. لكن كانوا ينزلوا إجازات على رومانيا.. وإنه إمها في اخر سنين عمرها صار عندها إدمان على الكحول.. وتوفت بمشكلة في الكبد.. وأبوها توران هو اللي رعاها وكان له أكبر الأثر في حياتها.. وتوفى بالسرطان قبل أشهر قليلة بس.. وهي عايشة مع صامويل من وقتها.. وإنه هي درست جامعة.. وبتشتغل مع مؤسسة خيرية تابعة للكنيسة.. أنا طبعا شرحت لها كل شيء.. وشرحت كيف إنه أنا ما كنت بدي نفصل.. وكيف دورت عليهم.. وإني انا كنت بحب إمها كثير.. وبحبها هي كمان كثير.. وصحيح أنا عندي عيلة.. لكن هذا لا يعني إني تخليت عنهم.. لكن أنا ما لقيتهم..

طبعا هي تأثرت شوي بكلامي أو مثلت هيك.. بس بغض النظر.. كان كلامي ومشاعري كلهم قديمين وما بأثروا في الحياة المعاصرة إلها... كنت حاسس زي واحد جاي من القرن الخامس عشر لحياة أناس في القرن الواحد والعشرين.. كنت أنا قصة حزينة منسية.. زي فيلم حزين بتحضره وبتحزن شوي وبتنساه.. لأنه ما بخصك..

مكانتي في قلبها كأب ومكانتها في قلبي كبنت كانوا مجرد تصورات شخصية عند كل واحد فينا... ومش مشتركة بيننا أبدا.. هي كان عندها أب بتحبه جدا.. ومعلقة صورته في غرفتها.. وأنا كنت يا دوب أب بيولوجي.. طالب عربي ضحك على إمها في رومانيا زمان.. وتزوجوا شوي وإنفصلوا.. فما ما كان مجال كثير أعبر عن مشاعري لأنها بدون قيمة لأي حدا..

وطبعا كنت أجبن وأرحم بنفسي من إنه أقترح إنه نعيش سوا في الإمارات.. لكن لما ذكرت لها إنه الها إخوان وأخوات.. قالت إنه هذا شيء مفرح.. ولازم تنزل تزورهم.. خصوصا إنه صامويل كثير نفسه يشوف

دي..

ما قدرت أكمل الأسبوع الثاني في أمريكا.. كانت كل دقيقة بالنسبة إلي تعذيب أكثر من اللي قبلها.. خصوصا إنه مشكلة مايا أو أوجستين الوحيدة في الحياة.. كانت إنه صامويل مش رومانسي.. بحبها وكل شي.. وقلبه كثير طيب.. بس مش رومانسي..

ورجعت للإمارات.. وسكرت حكايتي وحكاية مايا بأسوأ نهاية ممكنة.. ويمكن التعبير اللي إستخدمته العرافة.. كان أصدق تعبير ممكن.. ألقاها وما ألقاها.. أنا يمكن لقيتها.. بس بنفس الوقت ما لقيتها.. أنا سافرت من شيكاغو وبالنسبة إلي مايا بنتي ماتت.. ماتت وعمرها سنتين.. وهاي أوجستين توران اللي بتشتغل في الكنيسة وبتحب الزنجي مش بنتي.. هي كل شي إلا بنتي.. ولا أنا أبوها بالتأكيد.. وهذا اللي راح أفكر فيه.. وهيك راح تظل ذاكرتي..

وشو هاي الحياة يا إبني؟ شو إحنا وشو ولادنا؟ وشو طبيعة علاقتنا معهم؟ وشو هي المشاعر اللي بيننا وبينهم؟ المشاعر هاي كلها أوهام داخلية.. وإذا لقيت حدا أوهامه الداخلية زي أوهامك بتكون محظوظ.. لكن لو أوهامك كانت خاصة فيك إنت.. راح تتعذب مثل حكايتي.. كله بنا فوق الماي يا إبني.. ما بظل منه شي..

دير بالك على بنتك قد ما فيك.. وعيش معها أحلى أيامك.. لأنه الأولاد ضيوف.. وفي يوم راح يتركوك ضيوفك.. راح يتركوك لدنيا انت عايشها لحالك.. وأوهام موجودة بس في عقلك إنت..

لما وصل أبو خالد هون.. كانوا عيونهم حمر حمر.. وصادف وقتها ميوش كانت خلصت لعب ورجعت بدها تعمل معي حرب جديدة على ال

surprise eggs. ولما كانت سيارة أبو خالد في التصليح.. كانت فرصة طيبة إني أوصله.. ولما وصلنا عند السيارة.. شافه واحد من أصدقائه يسلم عليه.. و سأله عن بنته.. فرد أبو خالد.. أي وحدة؟ العربية ولا الأمريكية؟ و ضحكنا كلنا بأسى.. ردّ الصديق.. الثنتين.. قال أبو خالد.. العربية تخرجت وخطبت وراح تتزوج عالصيف إن شاء الله.. والأمريكية كمان منيحة.. بتواصل معها.. بس متغلبة شوي.. صاحبها مش رومانسي..

تمت..

مستوحى من قصة حقيقية.



## تنوعات على مقام النارج

- لسبب أو لآخر فإن هنالك تناسب طردي بين مقدار ما تكسب من مال وعدد الأصوات التي تملكها في أي تصويت عائلي.. وقد تستبعد تماما بالمناسبة..
- إذا ما حدث وصادفت فتاة ذات إسم عربي غريب مثل رواء، غيد، أبرار.. وأحببت أن تبدو ذكياً، فإن سؤالاً مثل.. "والدك مدرس لغة عربية، أليس كذلك؟" يحقق لك المطلوب..
- لقد إنقسم كل إنسان إلى نصفين.. حقيقي وإفتراضي.. وفي بعض الأحيان يتبادل الجزء ان المواقع.. لبصبح الإفتراضي هو الحقيقي والعكس..
- عندما تقوم بعمل غبي كإضاعة سلسلة مفاتيحك مثلاً.. فرد فعلك الطبيعي هو أن تغضب من نفسك.. وتبدأ البحث عن السلسلة.. ورد الفعل الطبيعي للمحيطين بك أن يبدأوا بلومك وتقريعك.. لكن هنالك شخصاً واحداً لن يلومك.. وسيبدأ البحث معك.. تمسك بهذا الشخص..
- عند النساء أصعب تطبيق ديني هو ترك شعر الحاجب..
- أصعب أركان الإيمان هو آخرها.. وبالقدر خيره وشره..
- الطعام الجيد لا يحتاج أي سلطات بجانبه.. هذه الحكمة تصلح لأي شيء تقريباً..

- عادة ما تختصر معظم مفاهيمك وقيمك الأساسية في الحياة في آرائك السياسية.. لذلك لو أردت معرفة كيف يفكر شخص ما.. خض معه نقاشا سياسيا بسيطاً.. وإبتعد قدر الإمكان عن يحتفظون بصور الزعماء والقادة وصور كريستيانو رونالدو..

- ما تشاهده على القنوات العربية الهابطة هو في حقيقة الأمر أخطر من مشاهدة الأفلام الإباحية.. الجنس نشاط إنساني طبيعي والإمتناع عن مشاهدته تأتي من كونه نشاط إنساني خاص.. لا أكثر.. أما ما تعرضه القنوات العربية فهو يزرع فكرة أن تستغل الأنثى جسدها كأداة تسويقية.. وهذا خلل فكري من الصعب جدا معالجته..

- إذا أردت التخلص من أي صديقاً ما عليك إلا الإقتراض منه..

- كلما شعرت أن خجلك من قول كلمة الحق للناس أيجعلك تخسر بعض الأشياء.. تذكر أن الله عز وجل قال لبعض الصحابة "إن الذين ينادونك من وراء الحجرات أكثرهم لا يعقلون".. هنالك حد أقصى للطيبة.. إذا تجاوزته تدخل في نطاق ظلم النفس..

- قد تفهم الكثير مما يحدث حولك وداخلك لو أيقنت أن الإنسان من الثدييات.. ومرحلة العشرينيات هي فترة التزاوج..

- وفي مرحلة التزاوج.. يقوم الذكر باستعراض ذكورته والأنثى باستعراض أنوثتها.. وكل طرف يبحث عن شريك..

- الأقربون أولى بالمعروف.. ليست آية ولا حديث.. لكن عملك في محيطك القريب دائما أفضل..

- العلاج لا يصرف دائما بوصفة طبية.. الجنس علاج البيتزا علاج السينما علاج والنوم أيضا علاج..

- في مباراة كرة القدم يبذل لاعبو الفريقين جهودا متساوية.. لكن فريقا واحدا فقط يحتفل.. تقبل مفهوم أنّ الحياة غير عادلة من شأنه أن يريح أعصابك..

- إذا كنت دائم الشعور بالذنب تجاه شيء تفعله.. فإقتنع أن هذا الشيء هو جزء أساسي منك.. ولن تستطيع تغييره..  
تقبل نفسك..

- If you want to have my body, seduce my mind

( هذه العبارة أنهت مراهقتي )

## الطلاء بالزهري..

هنالك فكرة خاطئة تنتشر على نطاق واسع في وسائل التواصل الاجتماعي.. وتندرج تحت ما أسميه أنا "طلاء الحياة باللون الزهري" .. الفكرة بكل بساطة تقول.. أن كل ما يحدث لك في هذه الدنيا هو خير لك ولكن أنت لا تشعر.. والله لا يريد لك الشر فيجب أن لا تحزن لأي مصاب يصيبك.. وما إلى ذلك من مشتقات لغوية مشابهة تدور في نفس الفلك..

طبعا هذه الفكرة مقتبسة من حديث الرسول (ص) "عَجَبًا لِأَمْرِ الْمُؤْمِنِ إِنَّ أَمْرَهُ كُلُّهُ لَهُ خَيْرٌ وَلَيْسَ ذَلِكَ لِأَحَدٍ إِلَّا لِلْمُؤْمِنِ إِنْ أَصَابَتْهُ سَرَّاءٌ شَكَرَ فَكَانَتْ خَيْرًا لَهُ وَإِنْ أَصَابَتْهُ ضَرَّاءٌ صَبَرَ فَكَانَتْ خَيْرًا لَهُ " وهو حديث صحيح برواية مسلم.. لكن الشاهد هنا أن الخير الذي تحدث عنه الرسول صلوات الله عليه هو خير أجر الصبر على الضراء التي أصابته.. وليس خيرا مخفيا في الدنيا..

فقد يقدر الله الضرر على الإنسان ليمتحن صبره.. والحزن على المصاب لا يخالف الصبر عليه... فقد اكون صابرا وحزيننا في الوقت نفسه.. لكنني لست ساخطا.. لأن هذا هو قدر الله.. أما أن تقنعني أو أقنع نفسي بان هذا خير ولكنني لا أراه.. فهذا شيء خارج عن واقعية الحياة ويقرب من الصوفية الذين نادوا بالفرح عند وقوع البلاء.. ودليل ذلك أن معظم الأنبياء تم إبتلاؤهم.. وحزنوا حزنا شديدا على ما أصابهم.. ولم يقولوا هذا

خير مخفي.. بل حزنوا وصبروا.. قال تعالى "وابيضت عيناه من الحزن فهو كظيم".. وقال تعالى "رب إني مسني الضر" وقال "فنجيناك من الغم".  
الخلاصة.. قد تحصل لك أضرار وخسارات لا تعوض وموت وفقد ومصائب.. وهذا من قدر الله.. وبالمقابل تحصل لك سعادة وفرح ورزق وأبناء ومال وغيره.. وهذا أيضا من قدر الله.. الحياة فيها اللونين فتقبلهما.. إفرح واشكر عند النعمة.. واحزن واصبر عند البلاء.. لكن لا تطلي الدنيا بالزهري.. لأن هذا فكر خاطيء وقد تفتن الناس في دينهم دون أن تدري..

## ليوم واحد فقط..

ليوم واحد فقط.. جرب أن تخرج من قوقعتك.. ليوم واحد فقط..  
جرب أن لا تكون ترسا في هذه الالة العملاقة التي تطحنك كل يوم.. ليوم  
واحد فقط.. لا تبق في حظيرتك.. ولا تنظر نحو سطل البرسيم وكأنه  
قدرك.. إنزع عن ظهرك هذا المحراث واركض.. أركض لآخر السياج..  
وأنظر فيما خلف هذه المزرعة.. ليوم واحد فقط.. حاول أن تكون حرا..

لا تستيقظ كالمدوغ من النوم.. إستيقظ وقتما تريد.. إصنع قهوتك بيدك  
واشربها على مهل.. ودخن معها سيجارة ان شئت... لن تموت.. أطفئ  
هاتفك.. إرمه بعيدا.. وأغلق الحاسوب.. وتلك الشاشة التي تفرض عليك  
ما ترى.. إقطع حبلك السري مع هذا العالم المجنون الذي يتم تحديثه كل  
ثانية.. لن تموت ولن يحدث لك شيء.. ثم أخرج إلى الشارع.. مرتديا أجمل  
ما تحب من ملابس.. ولا تفكر إن كانت لايقة أم لا.. نظيفة أم لا.. لا يهم..  
لا تذهب لعمل لا تحبه لأنك لست عبدا للراتب.. لا تحضر درسا تكرهه..  
اللعنة على العلم كله.... ولا تركب أي آلة لها عجلات.. إمش.. إستخدم  
قدميك للمشي... وامش بلا هدى.. لا يقودك إلا فضولك وحريرتك..  
تنفس ما تريد من الهواء.. أنظر للسماء.. هل شاهدت الغيوم من قبل؟ تناول  
طعامك في أي مكان تريده.. وأطلب ما تريد بدون أن تفكر بالسعر أو

زيادة الوزن.. كن كريما مع النادل إن أردت.. إجعله يفرح! إغمز للنادلة!!  
إستمع... إنه يوم واحد فقط..

تحرر من مسؤولياتك ولا تستسلم لما يراد منك.. لا تراسل حبيبك.. لا  
تجامل أصدقاءك.. لا تطمئن على أهلك.. لا تلاعب أطفالك ولا تضاجع  
زوجتك.. ليوم واحد فقط كن أنت.. لنفسك أنت.. إذهب إلى مستشفى..  
إلى مقبرة.. إلى ناد ليلي أو بيت هوى.. إذهب إلى أي مكان تريده.. فقط  
لأنك تريده.. وإشتر أي شيء ترغب به.. إخلع ساعة معصمك واقدفها  
بعيدا عنك.. لا ترتبط بالزمان ولا بالمكان ولا بأي شيء.. مارس أي نشاط  
تريده وتحسه مكبوتا في داخلك.. أدخل صالون حلاقة.. وقص شعرك كما  
تريد.. ولن يهم كم تبدو سخيفا.. المهم أن يعجبك.. إذهب وشاهد  
مسرحية! أو شاهد فيلما من الدرجة الثالثة.. وضع قدميك على المقعد..

إشترى جيتارا وإعزف في الشارع.. وضع قبعة لتجمع النقود ثم أعطها  
كلها لطفل عائد من مدرسة.. عاكس امرأة جميلة.. إفتعل شجارا.. إشتم  
الحكومة بصوت عال.. تبول في الشارع! مارس الشحاتة لو أردت.. المهم  
أن تكون حرا.. ليوم واحد فقط... ان تكون أنت... بلا زيف ولا أقنعة ولا  
مسؤوليات..

## حوارات

- شيخنا.. بدي أسألك في شغلة.. وخجلان شوي يعني..
- له يا إبني.. إسأل ولا يهملك.. لا حياء في العلم..
- بارك الله فيك.. سؤالي شيخنا.. هسه.. أنا كنت بحب وحدة مسيحية.. وكنت كثير كثير بحبها يعني.. وما لقيت سبيل إلا إني أتزوجها.. وبصراحة.. تزوجتها.. في علي ذنب أو شي؟
- لا يا إبني.. ليش بده يكون عليك ذنب؟ المسيحية من أهل الكتاب.. وزواج المسلم من المسيحية جائز.. ما عليه خلاف..
- الله يطمنك شيخنا.. طمئتني.. طيب بعد إذنك.. إذا ممكن يعني.. سؤال ثاني معلش.. أنا كنت كثير أحبها.. كثير كثير يعني.. وأدافع عنها.. يعني فيها شي هاي؟ كونها مسيحية وهي؟
- لا يا إبني! شو مالك؟ زوجتك هاي! طبعاً لازم تحبها وتحميها..
- طيب تمام شيخ.. الله يفتح عليك.. بس هي ترى ماتت الأسبوع الماضي.. فقعت فيها جرة غاز بعيد عنك.. وسؤالي.... بصير يعني بصير.. بعد إذنك يعني.. بعد إذنك.. بصير يعني.. أترحم عليها؟ كونها مرتي يعني..؟



- لا لا لا لا يا إبنى لا.. هون وبنوقف.. لأن هذا محرّم.. لا ترخّم على  
كافر..

- الله ينور عليك يا شيخ! الله ينور عليك... وأنا هيك بقول.. جهنّم  
اللي تحرقها! أصلاً طول عمرها كانت تحرق الرزّ!

## المجادلة

المُجادلة لغةً هي المناقشة والحوار.. ولكنها في العادة تكون مرحلة أعلى من مجرد مناقشة.. وتحتمل الحدة والرفض.. والتكرار.. وتستخدم لإبداء رأي أو دحض رأي.. توضيح فكرة.. ردّ تهمة.. إلى آخره..

طبعاً هذا المفهوم محاط بالكثير من السلبية في أوساطنا الاجتماعية.. وعادة ما يتم استخدام لا الناهية في الإشارة إليه.. لا تجادل يا أخي.. بلا مجادلة.. إلخ..

لكن بالقليل من التأمل في كتاب الله، نجد الله سبحانه وتعالى قد قال..  
"يوم تأتي كل نفس تجادل عن نفسها"

والمجادلة هنا مختلفة عن المجادلة بين البشر.. المجادلة هنا هي بين الله سبحانه وتعالى القوي القادر القهار.. وبين عبد فقير لا حول له ولا قوة.. وفي موقف يحاسب الله به عبده أو أمته على أعمالهما.. وهي مكتوبة.. ومع الفرق الهائل في موازين القوى إلا أن الله عز وجل ضمن هذا الحق لجميع خلقه.. وذلك من تمام عدله، جلّ في علاه..

ولو جاز لنا أن نتخيل هذه المجادلة يوم القيامة لغرض التوضيح لا التمثيل.. فستكون شيئاً شبيهاً بهذا..  
- أنت فعلت كذا بسبب كذا..

- يارب أنا فعلت كذا.. لكن قصدي كان كذا..

- بل كان قصدك كذا.. بدليل كذا..

- نعم يارب.. ولكن هذا لأن كيت وكيت..

ولا يترك الله عبده حتى يقر ويقتنع تماما بعدالة الحساب الذي تلقاه..  
وتحليل أن هذا يحدث بين الله وبين مليارات البشر الذين خلقهم كل على  
حدة..

هذا يوم الحساب.. وفي كتابه أيضا قال تعالى " قد سمع الله قول التي  
تجادلك في زوجها وتشتكي إلى الله والله يسمع تحاوركما إن الله سميع  
بصير".

في هذه الآية التي سميت السورة بإسمها "المجادلة" بين الله عز وجل أن  
نبيّه الكريم قبل المجادلة وهو خير بني آدم.. ومن امرأة في زمان كانت  
العرب تعتبر النساء من المتاع...

مما سبق، نستنتج أن الله عز وجل علّمنا في كتابه أن حق المجادلة مضمون  
لكل إنسان.. سواء كان يعترض على فاتورة كهرباء، أو مخالفة سير، أو نتيجة  
إمتحان أو أمر قضائي.. أو حتى حكم شرعي بل ويكشف حسابه يوم  
الحساب.. لأن المجادلة في جوهرها هي الحق في معرفة كل الحثيات التي  
بني عليها الحكم، وحق الرد عليها..

باختصار.. إنترع حق المجادلة إنتراعاً ممن هم أقوى منك.. فهو حقك..  
وبالمقابل، إضمن حق المجادلة لمن هم أضعف منك.. فهو حق لهم.. حتى  
لو كان إبنك ذو الأربع سنوات الذي يرفض الذهاب إلى النوم.. ويسأل لماذا  
يجب أن أنام..

## أربعة أيام في سجن الموقوفين

أجمل شيء في الحياة إنها حبلى دائما بالمفاجآت.. وفي الوقت اللي بتعتقد فيه إنك واقف على أرضية صلبة.. بصير حدث صغير.. بين لك إنه هاي الأرضية الصلبة مش أكثر من طبقة رقيقة من الجليد تحتها بحيرة عميقة.. وإنه التغييرات اللي ممكن تصير في حياتك هي أكبر من مجرد مخالفة سير أو فايروس إنفلونزا.. أو تسريب في ماسورة مي.. وإنه مكالمة تلفونية واحدة.. كافية تقلب حياتك رأسا على عقب.. وهذا ما تأكد لي تماما يوم الأربعاء الماضي..

في يوم الأربعاء.. - وهو يوم مشؤوم عند العرب بالمناسبة - وفي حوالي الساعة الرابعة عصرا.. كنت إنتهيت من ممارسة رياضتي المفضلة.. القيلولة.. وأخذت دش سريع تخلله ترنيم جميل بصوتي الشجي لأغنية "عودت عيني على رؤياك".. خلصت الدش.. وشكرت الله على نعمة المي.. وشكرت الحكومة على نعمة توصيل المي.. ورحت وقفت على الماية.. لكن ما حكيت معها زي ما عملت إيسا.. بالعكس.. عدت الشيبات اللي في لحيتي.. حمدت الله إنه صممنا بحيث ما نشوف أنوفنا.. ووقفت دقيقة صمت إحتراما لكل شخص بذل جهد عشان يتجاوز مظهري الخارجي ويشوف جمالي الداخلي... وطلعت من الحمام وأنا لابس بيجامتي المقلمة الفخمة.. ونظاراتي الطبية اللي بتشبه نظارات جوني دب..

ومع كوب من النسكافيه.. وسيجارة أمريكية.. جلست على البلكونة أتأمل خلق الله وأدعي إنه جارتنا الحلوة تطلع تنشر الغسيل.. وفجأة.. ومن غامض علم الله.. رن تلفوني..

على الطرف الثاني من التلفون.. كان في شخص بسألني عن عنوان بيتي عشان يوصل لي طرد من أرامكس.. وبكل طيب نية مدفوعة بفضول عن ماهية الطرد.. دليته على البيت.. وقعدت أستناه يجي وأنا بفكر في مين اللي ممكن يرسل لي طرد.. وشو ممكن يكون محتوى الطرد يا ترى.. شو كولاته؟.. دبذوب؟. كتاب؟ قبيلة؟....وانا بفكر.. وإذا بالشمس تشرق.. وإذا جارتنا - يا محلى نورها- طلعت عشان تنشر الغسيل.. وفي ذات اللحظة.. وقبل ما أشبع حواسي بما رأته.. رن علي الشخص نفسه.. طلع واقف تحت البناية من الجهة الثانية.. وطلب مني أجيب معي ما يثبت هويتي عشان يسلمني الطرد.. تنهدت تنهد الحسير.. ولعنت توقيتته الغريب.. و حملت المحفظة وتلفوني وسجايري.. ونزلت أجيب الطرد المفاجأة.. وهون كانت المفاجأة الحقيقية..

ما كان في أي شخص من أرامكس.. ولا أي شي أصفر حتى.. وما كان في طرد بالضرورة.. كان في شخصين لابسين مدني.. وواضح إنهم بفضلوا رياضة كمال الأجسام على رياضة القيلولة.. سلموا علي.. وتبرع واحد فيهم يشرح لي من ورا نظاراته السوداء.. وبصوت جيمس بوند.. إنهم من التحريات.. وإنه مطلوب القبض علي في قضية مالية متعلقة بالشركة.. قضية كنت بعقد أنا إنه وصلنا فيها لتسوية معينة مع المشتكي ألكن يبدو إعتقادي كان خاطئ.. المهم ضاع الطرد.. وضاعت النيسكافيه.. وضاعت جارتنا بالمعية.. طلبت منهم أطلع أغير ملابسي.. لكن رفضوا.. يبدو كان وقتهم ضيق.. فلقيت حالي راكب في سيارة التحريات.. لابس بيجامتي

المقلمة الفخمة... و ما معي إلا سجائري.. وتلفوني.. ومحفظتي.. وشبشيبي  
الأسود الجميل.. وشؤم يوم الأربعاء..

وأنا مريح في الكرسي الخلفي للكامري والشباب قدام... حكيت مع  
زوجتي.. وخبرتها إنه الحكومة قررت تستضيفني لعدة أيام.. وغلبوا  
حالمهم.. وبعثوا لي سيارة خاصة مع سائق ومرافق.. ويمكن صعب أرفض  
عزومتهم.. وإنه ما تقلق وهذا إجراء طبيعي وبصير مع أي نصاب.. لكن  
يمكن نضطر نأجل روحة السينما للأسبوع الجاي.. ووعدها إنه الأيام اللي  
راح تجلي فيهم عني وأنا غايب.. راح أعوضهم بنس أطلع.. وطلبت منها  
ترسل لي الأوراق اللي بتثبت وصولي لتسوية مع الشركة المشتكية.. وأنا  
بوصيها ما تنسى تطعمي سمكاتي.. لقيت الكامري دخلت مركز التوقيف..  
نزلوا الشباب.. ويبدو نسيوا يفتحوا لي الباب.. فتواضعت ونزلت  
لحالي.. بالنهاية كلنا بشر والموضوع مش مستاهل يعني.. جيمس بوند تركنا  
وراح.. وأنا دخلت مع الشرطي المخادع متحلل الشخصيات داخل مبنى  
سجن التوقيف.. مشينا في ممر طويل كثيب ومكيف.. تذكرت فيه وصف  
عبد الرحمن منيف لشعور العرب البدو لما دخلوا مكاتب الأمريكان لأول  
مرة في بدايات القرن العشرين.. وكيف إستغربوا من الجدران اللي بطلع  
منها هوا بارد.. المهم انتهى المر بردة.. فيها مكتب لحراس السجن..  
ثلاجة.. كابينتين تلفون.. وفي الواجهة باب من القضبان الحديدية يؤدي  
للسجن.... وقعت بعض الأوراق.. وأخذوا مني الحرس التلفون وبكيت  
السجائير.. لكن بعد ما تركوا لي منه أربع سجائير بس وبدون ولاعة.. (لأن  
الولاعة ممنوعة).. وأعطوني ورقة فيها رقم الخزنة اللي فيها أغراضني..  
وفتحوا لي باب السجن.. ودخلت..

طبعاً مبنى السجن بسيط جداً.. نفس تصميم الفنادق تقريباً.. أول ما تدخل من البوابة.. بتلاقي ممر طويل وواسع.. مسقوف ومكيف... على الجانبين في غرف أو عنابر خليتنا نسميها.. أربع عنابر تقريباً.. إثنين على اليمين.. وإثنين على اليسار.. وفي آخره على اليمين مطعم فيه كراسي وطاولات حديدية.. وعلى اليسار حمامات ومغاسل.. وفي نهاية الممر باب بفتح على ساحة صغيرة مفتوحة للشمس... ملعب طائرة يعني بس بدون شبك وبدون كرات.. وأسوار الساحة عالية وسقفها عبارة عن شبك حديدي..

وسجن التوقيف - من باب الثقافة العامة - يعني.. هو مش سجن بالمعنى الحقيقي.. لأنه لا يمكن قضاء عقوبة فيه.. لكن هو مكان مؤقت تسجن فيه لغاية عرضك على القاضي.. فإما بعدها أنك ترجع لبيتك.. أو ترسل إلى السجن المركزي.. بس ما بترجع للتوقيف.. لكن اصطلاحاً وللتسهيل.. راح نسميه.. سجن الموقوفين.. أو سجن التوقيف.. وفي حالتي أنا.. كان الخميس عطلة.. فالعرض على القاضي راح يكون الأحد.. فكان قدامي أربع أيام بدي أقضيهم في السجن..

المهم دخلت.. ومع إني من الناس اللي بحبوا اليمين.. إلا إني لقيت حالي أول ما دخلت.. رحت على أول عنبر على اليسار.. والي راح نسميه.. عنبر الحوت.. باب العنبر كبير.. ومصنوع من قضبان حديدية.. و مفتوح.. والعنبر نفسه عبارة عن غرفة بسيطة.. مساحتها تقريباً 5 أمتار في 5 أمتار.. بلاط بيج.. ودهان بيج.. وسقف بيج وما فيها شبابيك.. و.. وبتوزع فيها سراير حديدية منها شيء فردي ومنها طابقين.. وكل سرير عليه مخدة وحرام لو نهم سكاني.. وبخضعوا لبرنامج صارم من التنظيف الدوري كل ست شهور..

أول ما دخلت العنبر.. رديت السلام على جميع الجالسين فوق الأسرة بطريقة مشابهة للطريقة اللي بتسلم على الناس فيها لما تدخل على عزا.. سلام عام غير موجه لأي شخص.. ويكتفى من المسلم عليه أنه يرد بهمهمة أو هزة رأس.. وهذا اللي صار فعلا.. الكل رد بسلام شفوي وهمهمات وهزة رأس... إلا أبو نضال.. هو الوحيد اللي قام عن سريره وسلم علي يدا بيد.. وعلمني ثاني قانون في سجن التوقيف.. طبعا القانون الأول إنه ال dressing code مش مهم.. ممكن تيجي ببيجامة.. دشداشة.. شورت.. إنت ونصبيك عاد لما تركت جارتك ورحت تستلم الطرد..

القانون الثاني في سجن التوقيف هو إنه إسمك مش مهم.. أول سؤال بتسأله لما حدا يشوفك ما يكون شو إسمك.. بسألك شو تهتمك.. من جهة لأنه ما حدا بدو يحكي إسمه.. وما حدا بدو يكون صاحب حدا.. ولا حدا بدو حدا يتذكر إسمه بعد ما ينتهي الموضوع.. ومن جهة ثانية وهي الأهم.. إنه تهتمك هي اللي بتحدد مركزك في العنبر وفي السجن عموما.. مسجون الشيكات مثلا.. إله احترامه وخصوصا لو كان الشيك كبير... غير عن مسجون المشروب أو مسجون القضايا اللي فيها نساء وأعراض.. فلما سألني أبو نضال عن تهمتي كأبو محمد.. صرت أبو محمد طبعا.. قلت له إنها مشكلة مالية.. ولما حكيت المبلغ.. سمعت صفارة تعجب من الشخص اللي عرفت بعدين إنه هو زعيم العنبر تقريبا.. شفيق الحوت.. فقام سلم علي.. وعزمني أقعد جنبه على السرير.. وأعطاني سرير فاضي مقابل سرير.. في موقع إستراتيجي.. قريب من المكيف وذو إطلالة ساحرة على باب العنبر.. وشوي شوي.. وخلال ساعة تقريبا.. كنت متعرف على زملائي في العنبر.. وهم..



- أبو نضال: أردني في أواخر الأربعين.. أكل الدهر عليه وشرب ودخن وعمل اللي بده إياه... قصير ونحيف مع كرش صغير ولحية من الحجم المتوسط فيها شوية شيب.. حاد الملامح.. قومي عروبي.. ومسجون في عدة قضايا مالية.. لكن مظلوم فيها كلها.. الشهادة لله يا إخوان.. قضى اخر ثلاث سنوات من حياته بين السجن المركزي وسجن التوقيف.. كل فترة يترحل من السجن المركزي لسجن التوقيف.. عشان يتحول للقاضي في قضية جديدة.. ويرجع بعدين للمركزي.. وهكذا دواليك..

- شفيق الحوت: فلسطيني في منتصف الخمسينات.. إسم على مسمى.. كرشه كبير كثير لدرجة إنه حركته صعبة.. تاجر حر ومن عائلة غنية أبا عن جد.. مشهور جدا في مراكز التوقيف بقضايا شيكات كبيرة.. ومع هيك عمره ما تحول للسجن المركزي.. دايبا بوصل لتفاهات مع أصحاب الشيكات وبطلع.. مقتدر ماليا.. مرح.. وجري..

- الموجي: سباك مصري في أوائل الثلاثين.. نحيف وطويل وبشبه نجاح الموجي.... قضيته تحسين المعصية والحض على الفجور.. "لا يا باشا.. شيكات إيه؟ هو أنا حيلتي حاجة؟ أنا - لا مؤاخزة لا مؤاخزة كده - بتاع نسوان.."

- الدكتور عزيز: أردني في الأربعين.. أكاديمي ومدرس إقتصاد.. مطلوب للبنك لعجزه عن سداد القروض والكريدت كارد.. مؤدب وفي حاله.. ولبس نظارة ما بتشبه نظارة جوني ديب.. وواضح من ملابسه والجرافتا إنه إستلم الطرد في الجامعة..

أبو محفوظ: أردني في آخر الخمسين.. بشبه الجد المثالي اللي في دعايات فيمتو.. لحية بيضاء خفيفة.. ووجه وقور.. وبلدة طيبة ورب غفور..

موظف حكومة متزوج وأولاده مستقرين ومتزوجين في عمان.. ويعيش آخر أيام الغربة مع خيارته.. جارتهم مطربة أفرح.. وتكلم معها أكثر من مرة بالحسنى عشان تعدل من سلوكها.. ومع إنه بواجه صعوبة في كسر بيضتين.. إلا إنها إتهمته بالتهجم عليها وتحطيم أثاث بيتها.. وبتحكي الأسطورة إنه معارفها الأقوياء اللي بستمتعوا بفنها.. هم اللي ساهموا بزجه في السجن.... وكان واضح من دشداشته وطاقيته البيضا المخرمة.. إنه إستلم الطرد في الركعة الثانية من صلاة المغرب..

وأخيرا وليس آخرا.. أسعد الميكانيكي.. شاب أردني معثر.. قارب على الأربعين وما معه يتزوج.. بشتغل ميكانيكي آليات ثقيلة وعايش مع أهله.. كان على علاقة طويلة مع فتاة فلبينية.. ولما طلبت يتزوجها أنتهت العلاقة بإنها سجنته من أجل حفنة دولارات.. الله ينتقم منها الظالمة بس..

المهم.. هاي الناس اللي كانت معي في العنبر.. واللي تعرفت عليهم في أول وصولي هناك.. طبعا شفت ناس ثانيين في المطعم والصلاة والساحة.. لكن ما بذلت جهد أحكي مع حد جديد من عنابر ثانية ولا حدا يحكي معي.. كان أول يوم إلي في السجن.. واعتبرته للتعارف واكتشاف المكان.. لا أكثر.. وانا ممدد على السرير.. صرت أفكر كيف أنا انتقلت من الكرسي المريح على البلكون لسرير في السجن.. ويمكن لو نسقت أكثر مع المحامي.. ما كنت نزلت النزلة هاي.. لكن قدر الله وما شاء فعل.. وبما إني صرت هون.. قررت إنه تكون الفكرة المركزية أثناء فترة الأربع أيام هاي إني أستمتع قدر الإمكان.. وحلمت بالليل إني استلمت طرد أرامكس.. ولقيت فيه لعبة على شكل الموجي..

ثاني يوم كان الخميس.. وبدل ما أصحى على صوت صحيت على صوت المصعبي بضحك مع الحرس.. طبعا المصعبي هو من (سكان العنبر

الثاني).. رجل قبلي وعامل لحاله برستييج زعيم القبيلة.. والحرس نوعا ما بحسبوا له حساب كونه من عائلة كبيرة.. وجماعته معه في العنبر.. قضاياهم كلها تقريبا سرقة سيارات سياحية..

تركت المصعبي ومنظومته القبلية كلها.. ورحت أغسل وجهي عشان أبدأ يوم الخميس.. ومع صباح هذا اليوم الجميل بدت أفهم قوانين السجن بشكل أوضح وخصوصا عبر مشهد الفطور... طبعا مثل الشيراتون وجراند حياة وأي فندق ثاني.. يقدم الفطور في هذا الفندق الحكومي اللطيف في تمام الساعة صباحا لكن الوجبة شوي مختلفة عن الشيراتون.. الوجبة كانت عبارة عن رغيف خبز وحبتين جبنة مثلثات وتفاحة لكل سجين.. أقصد نزيل.. ولأغراض تنظيمية.. فإن المسؤولين عن توزيع الوجبات هم (سكان العنبر الثالث).. أبو زهرة العراقي.. نصاب مطلوب في قضايا عقارية ووجهه بشبه شجرة الزقوم.. ومساعدينه المخلصين.. حودة.. محاسب مرثشي سمين.. والبراكودا.. وحش الشيكات القادم من حلب..

عالفطور قعدت أنا وأبو محفوظ والميكانيكي والموجي والدكتور عزيز.. وكان حوار الفطور الصباحي إنه أبو محفوظ بنصح الميكانيكي يتزوج بنت من بلده ويسيه من الحرام.. والميكانيكي بشرح له إنه الزواج مكلف.. وهو مابحب الحرام بس ما في بإيده شي.. وأنه هو إنسان وعنده إحتياجات.. ولو بده يظل يستنى الزواج بموت عزابي.. وفي نفس الوقت كان في حوار ثاني شغال بين الموجي والدكتور.. كان الموجي بشرح للدكتور عزيز عن مغامراته النسائية.. والدكتور البريء مدهوش تماما من زميله غير المتعلم اللي عنده هاي القدرة على الإيقاع بالنساء.. وكل شوي الموجي يوطي صوته ويهمس للدكتور شغلة في ذاته.. والدكتور يضحك بخجل

واندهاش.. الحوارين طبعاً كانوا مثيرين للاهتمام.. لكن أنا كنت مشغول  
بمشهد ثاني تماماً.. أكثر إثارة للإهتمام وبعيد عن الطاولة..

أثناء توزيع الوجبات والفوضى والازدحام اللي بصير.. لمحت حودة  
المحاسب بخفة إيد بشيل كيس تفاح على جنب.. وبروح فيه على عنبرهم  
من غير ما حد يتتبه.. فكان طبيعي يصير في نقص لآخر ناس.. وكنت  
براقب عشان أشوف شو راح يصير.... وفعلاً.. لما إجا دور الهنود  
والباكستانية (سكان العنبر الرابع) يوخذوا الفطور.. وهم آخر ناس  
يستلموا الوجبة.. كان التفاح خلص.. ولما المساكين اعترضوا بنبرة مسكينة  
وبلغة غير مفهومة وإشارات بالايدين.. راح أبو زهرة بحركة سينمائية قلب  
كرتونة التفاح الفاضية.. وصار يحكي إنه هو زيه زيهم.. ما طلع له.. ووقتها  
إجت عيني بعين البراكودا.. وابتسمنا لبعض ابتسامة ذات مغزى..

بعد الفطور قعدت أنا وأبو نضال نسولف شوي.. وكونه سجايري اللي  
جيت فيهم خلصوا.. سألته إنه كيف بتقدر نجيب سجاير هون.. فحكى لي  
إنه التدخين ممنوع.. لكن الحرس بتساهلوا معنا وبخلونا نشترى دخان.. و  
إنه بتوزع علينا 6 سجاير في اليوم لكل واحد.. بس لازم أحكي مع  
البراكودا.. و أدفع 10 أو 15 درهم عشان يسجل إسمي بالكشف...  
ولقيتها فرصة طيبة أتعرف على البراكودا.. وأسجل فيها إسمي..

وقفنا سوا في الساحة... وعزم علي سيجارة.. وبعد تعارف بسيط..  
شرح لي البراكودا القانون الثالث للسجن.. العدل.. وقال "شوف يا  
صاحبي.. السجن هون فيه نظام وفيه عدل زي ما انت شايف.. الكل  
متساوي.. الكل بنام على نفس السرير.. وبروح على نفس الحمام.. وبوكل  
نفس الوجبة.. هذا هو العدل لأنه كلنا ولاد تسعة... وبالنسبة للسجاير..  
احنا كل يوم بنلم فلوس من كل اللي بدخنوا.. بنلم 240 درهم.. وبنعطيهم

للبنغالي اللي بنظف العنبر.. هو بشتري عشرين باكيت.. ب 200 درهم..  
وال 40 عمولته.. وبتركهم عند الحرس.. الحرس يعطوني 3 باكيتات  
الصبح.. وثلاثة باكيتات المساء.. وأنا بوزعهم بالعدل على الناس.. فبطلع  
لكل واحد تقريبا ست سجائر في اليوم.. والباقي بظل عند الحرس.. ما إلي  
فيه شي والله ما بيني وبين الحرام.. بس إذا شاب محترم زي حكايتك ما كفوه  
السجائر.. أنا يعني ممكن أدبر لك البكيت ب 50 درهم.. وعشانك طيب  
وحنان بحسب لك إياه 40.. بس أمانة لا تجيب سيرة لحداً

الصراحة أعجبني العدل اللي بحكي عنه البراكودا.. وبما إنه فكرتي  
المركزية كانت إني أنبسط.. قررت أغض طرف عن التوزيع العادل هذا  
وأمشي مع التيار.. وطلع لي 3 سجائر قطاع عام.. و بكيت قطاع خاص..  
وقعدنا أنا والبراكودا في الساحة ندخن ونسولف.. والغريب إني ما كنت  
أبدا حاسس بفقدان الحرية.. لأنني إكتشفت إن السجن بعكس الاعتقاد  
السائد.. ما بقيد حريتك... يمكن بقيد حركتك الجسدية صح.. لكن في  
خيوط كثيرة في رأسك كانت مشدودة بره السجن أبترتخي جواه.. هموم  
الحياة اليومية من شغل وتوصيل وتسوق وزيارات وهيك بتروح.. في ناس  
ثانيين بحملوها عنك.. فنوعا ما السجن يعطيك هاي الحرية اللي انت  
مفتقدها..

بعد حوارني مع البراكودا.. كانت الساعة تقريبا صارت 12 الظهر..  
وصارت الشمس حامية.. وبما إنه ما كان في مسبح.. رجعت على العنبر..  
وقعدت على سريري.. ووقتها حسيت إنه أنا كبرت في السجن.. مبارح  
كنت مسجون صغير مش فاهم شي.. بس اليوم تعلمت شغلات كثير..  
ودبرت حالي بسجائر وهي أهم شي لقطار مدخن مثل حكايتي.. وبينما

كنت مشغول بتبجيل وتمجيد نفسي وشرح مناقبي وفضائلي.. انفتح باب السجن عشان يدخلوا نزيل جديد.. الشيخ عبد الجليل..

لحية سلفية مترامية الشعرات.. شوارب خفيفة مراهقة لا يتجاوز عمر صاحبها الثلاثين.. وثوب مصمم ضد الخيلاء.. وبدون أي ترتيب مسبق.. تكفلت لحية الشيخ إنها تنصبه إمام لصلاة الظهر بدلا من أبو محفوظ.. مع إنه أبو محفوظ كان أكبر ولحيته شايبة.. لكن لحية الشيخ عبد الجليل كانت أطول وبتفصل 3 لحي من لحية أبو محفوظ.. وكان لابس ثوب أبيض وأبو محفوظ لابس دشداشة.. فما كان في مجال للمنافسة.. المهم أم فينا الشيخ.. لكنه نبهنا إنه بما إنه على سفر.. راح يصلي الظهر ركعتين بس.. وإحنا نصلي أربع ركعات.. ولما كان الموضوع غريب علينا.. طلبنا منه إنه يكمل جميله ويصلي فينا أربعة.. لأننا راح نتوه بدون إمام يا جماعة.. وتطوع الشيخ مشكورا (رفع الله شأنه) إنه يصلي فينا الأربع ركعات.. وصلينا كلنا وراه (ما عدا أبو نضال) لأنه عداوة مع الشيوخ.. وصلى فينا الشيخ.. وأنا شخصيا راحوا مني 3 ركعات وأنا بحاول أحزر تهمته..

وعلى طاولة الغدا اللي كان عبارة عن رز يشبه الرز ودجاج يشبه الدجاج بذلت محاولات عديدة لاستنطاق الشيخ... وبعد إلحاح شديد.. إعترف الشيخ إنه زوجته الثانية التي تزوجها -كنزوة جنسية- وطلقها في أقل من سنة.. حبسته في قضية نفقة.. وهون دارت حرب ضروس بين أبو نضال وبين الشيخ... طبعا وجهة نظر أبو نضال كانت إنه هذا الزواج يؤثم عليه كونه بدون سبب.. وإنه شيخ فشنك وما بتجوز الصلاة وراه.. والشيخ وجهة نظره إنه رينا حلل الزواج الثاني بدون قيد أو شرط وإنه هو ستر على فتاة من المسلمين.. وبدأ بسرد أحاديث وآيات.. طبعا الحوت البرجوازي (ذو الوجبتين) بداعي عداوته مع أبو نضال القومي.. وقف مع الشيخ (ذي

الزوجتين) ودعمه.. والميكانيكي والموجي كمان وقفوا مع الشيخ.. وثبت أقدامهم في الوقوف معه إنه بحكي قرآن من جهة.. وإنه الحوت أعطاهم سيجارتين من جهة ثانية.. بينما وقفنا أنا والدكتور عزيز على الحياض.. وانتهى النقاش إنه الكل أجمع إنه أبو نضال بحترمش الدين وبعرفش فيه مثل الشيخ.. وترك طاولة الغدا وهو بسب وبلعن.. والحوت بضحك ملء كرشه.. وقرر الحوت المنتشي بانتصاره.. إنه يوزع على الغلابا الهنود سيجارة سيجارة كرم منه.. وصفوا الهنود طابور.. وقعدوا يوخذوا سيجارة سيجارة ويدعوا للحوت مع هزة راس كلها امتنان وعرفان للمحسن الكبير.. ومع إن الشيخ متحفظ على موضوع الدخان.. إلا إنه شكر للحوت كرم أخلاقه ورأفته بالمساكين ودعا له الله يوسع رزقه.. وهون تعلمت القانون الرابع للسجن "كثرة الأتباع أهم من مضمون الخطاب"

ومن الغدا وانتصار الحوت.. اجا وقت أمارس رياضة القبلولة.. وحلمت وقتها فترة المسا ما كان فيها شي.. بس شوية حوارات عادية وقصص وعشا خسروا فيه الهنود الموز.. ومع حوالي الساعة 12 كان تقريبا الكل بده ينام.. واجا وقت تغيير شفت الحرس.. بس كوني أنا كنت مقيل.. ظليت سهران شوي وأتمشى في السجن.. ورحت قعدت في الساحة... أتأمل في هالسجن.. وسبب وجودي فيه..

لما رحنت أنام.. كانت الساعة 2.. كان الكل نايم تقريبا.. الا الحوت.. لمحته كان واقف بحكي مع الحرس جوا مكتبهم.. وبس وصلت باب المعبر ناداني الحوت.. والحارس فتح لي الباب.. قعدت في المكتب وطلع المصعبي كمان جوا.. قعدنا.. وشربنا شاي.. وحكى لي الحارس إنه الحوت حكى له عن شغلي وإذا ممكن أشغل واحد من قرابه معي.. فوعده خير.. ولقيته مقابل هذا الوعد بمد إيدته وراه.. وافتح درج.. الدرج كان فيه يمكن 100

باكيت دخان.. طال منهم اثنين وأعطاني إياهم.. وأعطى الحوت اثنين.. والمصعبي اثنين.. وقال لي إنه وصى البنغالي علي.. وإذا بدي شاي أو شوكلاته أو فطور من الكفتيريا اللي جمب السجن.. بس أحكي له وهو بجيب لي.. ونمت وأنا تقريبا مليونير بلغة السجن.. وفهمت كيف كان الحوت والمصعبي دايا معهم دخان.. وخصوصا الحوت المتصدق (جزاه الله خيرا).. والأهم إني تعلمت القانون الخامس للسجن.. "الممنوع والمسموح اشياء نسبية".

الجمعة كان يوم طيب كعادته.. أفطرنا أنا والحوت فطائر ومعجنات من الكفتيريا وشربنا شاي.. وما وقفت على دور السجائر خلص.. وصارت الساعة 12.. وحن حسب التوقيت المحلي لسجن التوقيف وما حوله موعد أذان الظهر وصلاة الجمعة.. وعلى المساجين خارجه مراعاة فروق التوقيت.. والشيخ خطب فينا عن قصة يوسف.. وكيف إنه التوحيد هو اللي طلع نبي الله من السجن.. وإنه لازم نكون موحدين ومؤمنين وأخلاقنا منيعة عشان نطلع.. وكيف قالوا له "إنا نراك من المحسنين" وهو مسجون.. "وإنا نراك من المحسنين" وهو عزيز مصر.. وإنه الإنسان ما لازم الفلوس تغيره.. وعرض الشيخ بعد الصلاة درس ديني لكيفية قراءة الفاتحة بشكل صحيح.. وإنه اللي بده يظل عشان الأجر والثواب.. وظلوا معه الهنود والباكستانية.. وكنا نسمع صوتهم برتلوا وراه..

مر يوم الجمعة بهدوء.. وكان مش ظايل إلا السبت ونروح على المحكمة.. بس السجن كان صار أهون علي.. صرت اكل براحتي.. وأدخن براحتي.. وأشرب شاي وقهوة.. وحتى استخدمت حمام الحرس مرتين.. وفي مسا يوم الجمعة وصلتني أوراق من زوجتي الحبيبة.. ومعهم غيارات



نظيفة.. فتحممت وتعطرت وتزبطت.. ولا سليمان القانوني بزمانه.. كان يوم جميل جدا.. ما عكّره إلا الأثيوبي..

الأثيوبي هو الافريقي الوحيد في السجن.. وساكن مع الهنود والباكستانية.. وأكثر من مرة عمل مشاكل على توزيع التفاح والموز وتوزيع السجائر.. إنه في ناس بطلع لها أكثر من ناس.. وناس دايمًا معها دخان وكان قصده عني وعن الحوت.. وناس ما بطلع لها.. وشفته ببهدل بالهنود والباكستانية إنه ليش ساكتين.. ما الكل بدفع في السجائر.. بس الجزء الأكبر ما كانوا فاهمين كلامه.. والي كانوا فاهمين حكوا له يمشيها.. بس هو ما رضي.. وتمشكل مع أبو زهرة.. وصارت مشكلة..

وقتها نصحني الحوت أخبي سجائري وأخفف سجائري شوي.. ولو حدا سألني أقول ما معي.. وفعلاً.. لما اجو الحرس.. حكوا له إنه الكل بتوزع عليه نفس الأكل ونفس السجائر.. وإذا بعمل كمان مشكلة راح يتبهدل.. بس ما اقتنع وصار يسولف.. وقتها الحوت غمز البراكودا.. وشففت البراكودا حكى مع الحرس وأخذ الأثيوبي على جنب يحكي معه.. وخلال أقل من نص ساعة.. كان الأثيوبي ساكت وبضحك مع البراكودا.. وفي طرف جييته كان ميين في بكيت سجائري.. وانتهت المشكلة.. ورجعنا ندخن عادي.. ووقتها تعلمت القانون السادس للسجن.. "الأذكياء يحلون المشاكل الكبيرة بخطوات صغيرة"..

السبت كان اخر يوم.. صحيت فيه تعبان.. حتى القهوة اللي شربتها ما صحصحتني.. والسجائر كانت بدون طعم.. وكان في جو غريب في السجن.. يمكن لأنه آخر يوم كان.. كان في هدوء محيط بالكل.. عالفتور أكلت مع الناس.. ما كان لي مزاج أطلب من بره.. وحتى أبو زهرة ما سرق

التفاح كعادته.. يمكن لأنه آخر يوم.. تركه للمساكين.. والبراكودا يومها  
وزع أربع باكيتات..

عالغدا جابوا لنا سمك ورز.. وكان سخن وطيب.. وفكرت حالي لحالي  
ما أكلت مينيح.. بس وأنا قايم أغسل.. لاحظت إنه معظم الناس ما كملوا  
الوجبة.. حتى الحوت اللي دايبا بسلخ الوجبتين.. كان ماخذ وجبة واحدة  
بس.. وحكى إنه معدته واجعته.. العشا نصه ما انصاب... وحتى البراكودا  
لما طلع يوزع دخان.. ناس كثير ما اجو.. ولما راح يوزع في العنابر.. كثير  
ناس قالوا ما بدهم.. فترك الباكيتين في المطبخ وراح..

كان بسود السجن نوع من التوتر.. لأنه بكره كلنا راح ننعرض على  
القاضي.. وزاد التوتر إنه أبو زهرة حكى للناس بعد صلاة المغرب.. إنه  
الحارس حكى له إنه كلنا راح نكون عند قاضي واحد.. إسمه رحيم عبد  
الجبار.. مرات يكون قاسي قاسي بالأحكام.. ومرات متساهل.. فزادنا حيرة  
على حيرة.. وقلق على قلق..

على ال 11 انطفى الضوء.. والكل راحوا على سرايرهم.. بس ما أتوقع  
حدا نام.. كان الكل يفكر بشو راح يصير معه بكره.. وشو راح يحكي  
للقاضي وشو راح يحكي له ويحكم عليه.. على التوقيف ولا واحد كان راح  
يرجع.. بس يا ترى مين راح يرجع على حياته الطبيعية الحلوة اللي كان  
فيها.. ومين راح يروح عالمركزي.. والمركزي زي ما كنا نسمع إشي رعب  
كان.. التوقيف جنة بالنسبة إله..

ما إجابني نوم.. وقمت أمشي بين العنابر.. كان الكل مغطي حاله  
بالحرافات.. بس ما في أي نفس منتظم بدل على نوم إلا في عنبر الهنود..  
كلهم تقريبا كانوا نايمين.. إلا الأثيوبي.. كان سهران وبدخن.. رحت

قعدت بالمطعم.... كانت كرتونة التفاح اللي دايمًا كان يصير عليها مشاكل كان أكثر من ثلاث أرباعها موجود.. وصرت أدخن وأفكر إنه سبحانه الله شو صار مشاكل عالنفاح.. هيو ما حدا صايبه.. والدخان اللي كنت أشتري الباكيت ب 40.. هيه عالطاولة.. ما حدا لامسه..

وعرفت وقتها القانون السابع للسجن.. إنه مؤقت.. والاحتياجات فيه مؤقتة.. والموارد فيه مؤقتة.. وييجي وقت ما بصير للموارد قيمة.. ولا للاحتياجات أهمية.. وإنه شو ما كنت أخذت موارد وأشبعحت إحتياجات.. أكثر أو أقل من غيرك.. فهذا كله مؤقت.. وفي النهاية الكل بتساوى.. بتساوى في اللاشيء.. في اللاقيمة..

رجعت على سريري.. ودخلت تحت الحرام... جماعتنا كمان ما كانوا نايمين.. بس الكل كان ساكت.. وما بقطع الصمت كل شوي إلا تسبيحة أو حوقلة من أبو محفوظ... وكنت بين الصاحي والغفيان لما انفتح باب السجن وأدخل الرقيب وبدأ ينادي بصوت عالي.. "يلا كله يقوم.. صار وقت تنعرضوا على القاضي".. وفي نفس اللحظة تقريباً.. بدأ الكل يقوموا من السراير..

تمت..

## تهرب من النوم لكي لا يأتي الغد..

تفكر فيما خسرت.. وفيما كسبت.. تفكر في من سبقوك.. وفي من تركوك.. لا بد أن أنهم سعداء الان.. حتى أصدقاك الأوغاد الذين يمثلون التعاطف معك.. هم الان سعداء.. وأنت وحدك.. لقد كنت طفلا سعيدا في مضي.. لكنك لست كذلك الان.. والدنيا أثقل من أن تحملها.. ولا يبدو أن هنالك شيء ما في الأفق.. كل يوم يكرر ألم الذي سبقه.. ولا تعلم أين ستقف هذه الدنيا..

تحاول التكلم مع الله ولكنك تعرف أنك بعيد عنه.. تحاول ولكنك لا تستطيع إستحضاره في روحك.. لا تستطيع الإقتراب منه.. تعرف أنك بعيد.. ومع ذلك لا قدرة لك على مواجهة هذا الكون وحدك...

تهرب من النوم لكي لا يأتي الغد.. ثم تهرب إلى النوم عله لا يأتي الغد..

## أنا أنتمي

أنا أنتمي لأولئك الذين كانوا أطفالا عاديين.. لأولئك الذين كانوا في الوسط.. ليسوا متفوقين ولهم حفلات تكريم.. ولا مشاغبين يعرفهم الجميع.. لأولئك الذين لا تناسبهم قياسات الألبسة.. فيضطرون دائما لتقصيرها.. لأولئك الذين ليس لديهم عضلات مفتولة ولا قوام ممشوق.. لأولئك اللواتي لا يمتلكن عيوننا ملونة ولا صدورنا مكتنزة.. لأولئك الذين يرتبون إذا تكلموا أمام خمسة أشخاص ويترسلون في الكلام امام مرآياهم.. لأولئك الذين يخافون من الشرطة وتنقبض قلوبهم في المستشفيات.. لأولئك الذين لم يتذوقوا السوشي من قبل ولم يشربوا الصودا ولا يعرفون شكل الكافيار.. لأولئك الذين لا يفهمون سوق العملات ولا ما هي المحكمة الدستورية ولا يعرفون من هو نيتشه.... لأولئك الذين طالما فضلوا الصمت على الجدل ولو كانوا على حق.. الذين ضاعت حقوقهم لأنهم ليسوا وقحين بما يكفي أو سيئين بما يكفي.. لأولئك الذين يعرفون ما معنى أن تنام جائعا.. أولئك الذين تقطع عنهم الكهرباء.. لأولئك الذين يوفرون أشهرهم ليشتروا لبسة واحدة.. لأولئك الذين تعني لهم العملات المعدنية الكثير.. لأولئك الذين تعرضوا للشهاتة.. والسخرية.. لأولئك الذين لا يلفتون الإنتباه ولا يثيرون الجدل.. لأولئك الذين يحدقون في المدينة ليلا وليس لهم صديق إلا الله..

لكل أولئك العاديين الذين تغص بهم طرقاآ هذه المدينة.. لكل أولئك  
البسطاء.. أنتمي..

## معركة أحد

في نهاية معركة أحد.. تكالب كفار قريش على رسول الله صلى الله عليه وسلم.. فجرحت جبهته وشج رأسه.. وكسرت أربعة من أسنانه.. وسال الدم بغزارة على وجهه الشريف.. وقتها قال عليه الصلاة والسلام "كيف يفلح قوم شجوا رأس نبيهم وهو يدعوهم إلى الله؟" ودعا على قيادات كفار قريش.. فأنزله الله

"ليس لك من الأمر شيء أو يتوب عليهم أو يعذبهم فإنهم ظالمون \*  
ولله ما في السموات وما في الأرض يغفر لمن يشاء ويعذب من يشاء والله  
غفور رحيم"

الشاكي: خير بني آدم وخاتم الأنبياء..

المشتكى عليه: مشركين حاولوا قتل النبي..

الحكم: ليس لك من الأمر شيء.. أو (يتوب عليهم) أو يعذبهم..

التكفير مهما كان مصدره (سني أو شيعي) ومهما كانت ضحيته هو  
تعدي على مشيئة الله سبحانه وتعالى وعلى ملكه في خلقه.. وأي آية وردت  
في القرآن الكريم تصف الكفر والتكفير إنما وردت لتصحيح عقيدتك..  
وليس لتستخدمها سيفاً تكفر به الناس.. وتبقى القاعدة الأساسية:

"إِنَّ الَّذِينَ آمَنُوا وَالَّذِينَ هَادُوا وَالصَّابِئِينَ وَالنَّصَارَى وَالْمَجُوسَ وَالَّذِينَ  
أَشْرَكُوا إِنَّ اللَّهَ يَفْصِلُ بَيْنَهُمْ يَوْمَ الْقِيَامَةِ إِنَّ اللَّهَ عَلَى كُلِّ شَيْءٍ شَهِيدٌ" (17)  
الحجج..

نحن بحاجة للانسحاب من عبادة تمثيل الله عز وجل في أرضه..  
والاتجاه لبناء أوطان تسع الجميع.. والطريق لذلك تبدأ بالتعددية.. وحكم  
القانون.. والاعتراض (السلمي) في حال وجود مخالفات.. فاضت هذه  
الأرض بالدم.. فاضت..

تمت..



## جداريّة في عشق النساء..

- كل حاجاتنا الإنسانية تحتاج للإشباع بشكل متكرر.. نأكل اليوم فنجوع غداً.. نشرب في المساء، نعطش في الصباح.. ننام ملء الكسل.. ثم يهاجمنا النعس..

إلا العشق.. مرة واحدة في العمر تكفي.. والهجر فيه يُشبع، كما يُشبع الوصل..

- أثناء بحثي عنك، كان كل إسم يشبه إسمك يخترق قلبي.. كحربة لصيد السمك..

- الإنسان ليس لفظاً يدل على مفرد، بل على مثني.. الإنسان هو أنا وأنتِ.. "فجعل منه الزوجين @ الذكر والأنثى"

- سأكون كاذبا لو قلت أنك الأنثى الوحيدة التي دخلت قلبي.. هذه قُدسيّة لا أدعيها.. لكنني وبكل صدق أقول أنني كلّما قارنتك مع أنثى ثانية.. ذابت صورتها شيئا فشيئا حتى تختفي، كمكعب سكرٍ في كوب شاي..

- ما دُمّت في الدنيا.. فالدنيا بخير..

- وحده العشق، قادر أن يمنحك ذكريات حلوة ومرة في الوقت نفسه..

- برغم كل لافتات التحذير المنتشرة على شواطئ العشق إلا أنني  
ركبت سفيتتي وأبحرت.. كنت أعلم مسبقاً أن البحر هائج والعواصف لا  
ترحم أحداً.. وأني بلا شك سأنتهي طعاماً للنوارس والسماك.. وحكاية  
للصيادين.. لكنّه كان موتاً لا بدّ منه..

كان لا بد أن أغسل قلبي بهذا الحزن السرمديّ.. ليصبح للعمر طعم  
ولون ومعنى..

- الحب الدائم ليس موجوداً في الحقيقة.. هذا رجس وتدليس من عمل  
كتابّ الحبّ.. لم أحبّك يوماً بشكل دائم.. كنت أقبلّك في الصباح وأنوي  
قتلك في المساء.. وأعود في الصباح التالي لأسترضي عينيك الغاضبتين..

- أجمل ما في الحبّ بداياته.. وأجمل ما في البدايات غموضها.. تلك  
اللحظات التي تسبق الإعتراف.. عندما يعرف كل طرف أنه يجب الطرف  
الآخر.. ويعرف أن الآخر يجب.. لكن لا أحد يعترف..

لحظات الكذب الجميل بأنه لا شيء بيننا.. موسم ما قبل تفتح زهر  
اللوز..

" فإذا صحوت فأنت أول خاطري..

وإذا غفا جفني.. فأنت الآخر.."

تمت..

## تنويعات على مقام رقيق..

- الهوس الإكتئابي الخفيف.. hypomania

حالة مخفضة من الهوس تتسبب بضعف لا يذكر في الوظائف العقلية..  
انخفاض في نوعية الحياة أقل في النوم وضعف في الأنشطة الموجهة لهدف..  
بالإضافة لميول إنتحارية..  
يبدو شيئاً مألوفاً..

- المرأة التي تمتلك ضعف ما تحتاج من أواني المطبخ هي امرأة تمتاز بالتوفير..

- الملحد أشبه ما يكون بسطل فيه القليل من الماء.. ويناقش المد والجزر في المحيط الهادئ..

- دائماً ما تبدو الملابس على المانيكان أجمل مما تبدو علي عندما ارتديها..  
الامر نفسه تقريباً يحدث عندما أستعير شخصيات الآخرين.

- تجهل المرأة أن جسدها يتحدث بدون إذنها.. وأنه يعبر للآخرين عن ما في داخلها بكل دقة.. والعارفين من الرجال يفهمون ذلك..

- شركاء في الربح.. وحيدا عند الخسارة..

- عند الأسود.. يحدث البلوغ الجنسي في عمر الستين.. وهو العمر الذي يكون فيه الشبل قد انتهى من تعلم كل أساسيات الصيد.. فصل طبيعي ورائع بين مرحلتين.

- لم أر في حياتي شيئاً أسوأ من الإنتقاد.. وبالذات إنتقاد الأشياء السيئة أصلاً.. لا تنتقد.. إطرح ثقافة بديلة..

- دائماً ما ذكر العلم في كتاب الله بصيغة المبني للمجهول "أوتوا العلم".."وما أوتيتم من العلم" وكأن العلم لا ينسب لمخلوق قط.. بل هو هبة من الله عز وجل.. المرة الوحيدة التي ذكر فيها العلم منسوباً لشخص كانت على لسان قارون عندما قال "إنها أوتيته على علم عندي".."وهنا نسب الرزق إلى الله ولكن نسب العلم لنفسه.. فماذا كان الرد؟" فحسبنا به وبداره الأرض".."

يا من أوتيتم العلم.. تواضعوا..

- وعين الرضا عن كل عيب كليلة.. ولكن عين السخط تبدي المساويا (أجمل ما قيل في العلاقات العائلية).

- حاول دائماً تتبع جذور أفكارك.. موضوع مرهق وشاق.. لكنك ستكتشف أن كثيراً من أفكارك ربما بنيت على أوهام..

- من عادتي أن أشتري كوباً من الشاي الممزوج بالحليب كل صباح.. وفي إحدى المرات.. كنت أمسك هاتفني المحمول بنفس اليد التي أمسك بها كوب الشاي.. فحدث أن كدت أفقد توازني وأثلاً يسقط كوب الشاي تركزت الهاتف المحمول يسقط على الأرض ويتحول إلى شظايا.. أي أنني حافظت على شيء رخيص مقابل شيء يعلوه قيمة بالآلاف المرات..

الخيانة الزوجية مبدأ مشابه..

تمت..

## إلى مقام السيدة..

لقد وصلت لمرحلة معينة في حياتي أحس فيها بالإشباع من كل شيء.. لا  
أرغب بصداقات جديدة.. لا أريد قراءة كتب جديدة.. لا أريد أن أستمع  
لأغاني جديدة.. ولا حتى أن أكسب المزيد من النقود..

كل ما أرغبه حالياً هو أن أجول هذا العالم معك.. نساfer معا.. ننزل في  
فنادق المتعبين.. نمشي في الشوارع الحجرية القديمة ونأكل من أيدي الباعة  
البسطاء.. أود أن آخذك في رحلة بقارب مزركش.. ونطعم النوارس التي لا  
يطعمها إلا الغرباء والعاشقين.. نزور الكنائس والمساجد والأشجار  
والأنهار.. نتسوق من البازارات المسقوفة.. ونركب المترو معا.. ثم تحملنا  
خطانا حتى يهددنا التعب.. وفي آخر الليل نجلس على شاطئ البحر  
لأغني لك أقدم ما أعرف من أغاني.. وأعذب ما أعرف من أغاني..

أريد أن أمارس الحب و الدنيا معك.. من هانوي إلى إسطنبول..

تمت..

## وأنا قلبي مساكن شعبية..

أحد أهم أدبيات الأردنيين هذه الأيام هي مقارنة فترة الثمانينات وبداية التسعينيات بما نعيشه الآن.. وكيف كانت الحياة جميلة وهادئة وكان الجيران يعرفون بعضهم بعضا والروابط الإجتماعية متينة والأخلاق أفضل.. وصولا لما نعيشه الآن من حياة سريعة متعبة و انحطاط في الأخلاق.. وانعزال داخل شققنا.. وتفكك على مستوى الروابط الإجتماعية والأطفال لم يعودوا يلعبون في الخارج لانعدام الأمن.. إلخ.. وبمعنى آخر.. كيف صارت الحياة أضيّق وأسوأ.. ولا نملك أمام هذا التغيير إلا التحسر.. والقول أن هذا هو الزمن وهذه هي التكنولوجيا.. والحقيقة أن هذا ليس تطورا طبيعيا.. ولا ذنب للزمن ولا للتكنولوجيا فيه.. لأن التكنولوجيا سبق ودخلت إلى بيوت آبائنا في السبعينات (كتلفاز) ولم يكن لهذا هذا الأثر.. السبب الحقيقي لما حدث هو أزمة في مفهوم الإسكان ورؤية خاطئة من حكومات مهملة أدت لتعاسة نعيشها ولا نفهمها.. ولتوضيح وجهة النظر هذه كتبت هذا المقال الذي أرجو أن تتسع صدوركم لقراءته.. لأنه يعني كل شخص فينا..

البيت هو أهم شيء يمتلكه الإنسان أو لا يمتلكه في حياته.. وأهم عاملين سنتكلم عنهما اليوم هما امتلاك البيت.. ومساحة البيت المسقوفة وغير المسقوفة... وعسى بعد شرح هذين المبدئين أن نفهم سويا لماذا تغيرت

نوعية الحياة في آخر 15 سنة.. ونبدأ بمفهوم إمتلاك البيوت.. الدول التي تقدر مواطنيها تحرص دائما على مؤشر امتلاك البيوت عاليا (نسبة من يمتلك البيت الذي يسكن فيه).. فيصل هذا المؤشر في الولايات المتحدة ومعظم أوروبا إلى حوالي 70٪. وينخفض في الشرق الأوسط في عدة دول ليصل إلى 35٪.. فماذا يعني هذا الرقم؟ وكيف يؤثر على حياتك؟ نجيب بعد قليل..

المبدأ الثاني هو نوعية المسكن نفسه والمساحات التي يوفرها.. تقول منظمة الصحة العالمية بتصرف "المسكن الصحي لكل أسرة يجب أن يضمن 60 مترا مربعا لكل فرد.. 30 مسقوف و 30 غير مسقوف.. " أي أن أسرة من 5 أفراد يجب أن تمتلك بيتا مساحته 150 مترا مسقوفة.. و 150 مترا كحديقة ومتنفس.. هذا في الحدود الدنيا طبعاً.. وهذا المقياس لا يوفرها إلا بيت مستقل.. لأنه لا يمكن للشقق توفير مساحات غير مسقوفة بهذا الكم.. فماذا يحدث لو لم يتم توفير هذا المتطلبات؟ وما الفرق بين السكنى في بيت مستقل وبين الشقق؟ وكيف يؤثر هذا على حياتنا.. نجيب بعد قليل.. ولكن بعد تمهيد تاريخي بسيط..

بعد حرب الخليج الأولى أوبدء تدفق الأردنيين المغتربين من بلدان الخليج بكثرة وبكتلة نقدية.. بدأت حركة نشاط عمراني في المملكة (المدن الرئيسية) لاستيعابهم.. وهنا ونتيجة لقلّة عدد الأراضي المعروضة للبيع والموصولة ببنية تحتية... ولأن قوانين تنظيم الأراضي كانت تسمح بالبناء العمودي (وهذا هو السبب الأهم).. بدأت تظهر ما يسمى بمشاريع الإسكان بكثرة (كانت موجودة بوتيرة أقل).. ومعها بدأ نمط الشقق ينمو على حساب نمط البيوت الخاصة.. ومع كسل الحكومة وبخلها في فتح مناطق جديدة.. إرتفعت أسعار الأراضي أكثر فأكثر حتى وصلنا لحرب العراق 2003.. حيث انفجرت تماما.. وأصبح المواطن العادي لا يجرؤ

أصلا على محاولة التفكير في شراء قطعة أرض.. لأن من ينافس في شرائها هم شركات إسكان ضخمة.. تدفع حتى 5 أضعاف ما يدفعه.. فلذلك هم الزبون المفضل للمالك الأرض.. وعليه أصبح حلم المواطن الذي يعمل في وظيفة جيدة أن يشتري (بمساعدة البنوك) شقة قريبة من بيت والده المستقل (الذي كان يعمل بوظيفة أقل).. أي أنه اليوم مع تعليمه العالي لا يستطيع إمتلاك بيت امتلكه والده بتعليم عادي.. وبراتب نسبيا أقل..

هذه التقسيمة السكانية الجديدة والغلاء الإصطناعي في أسعار العقار فرضت أنماط إجتماعية سيئة من أهمها.. انخفض معدل امتلاك البيوت للمواطنين.. فبالنسبة لملاك البيوت القدامى أصبحت أحياءهم تكتظ بسكان جدد ومستأجرين يأتون ويغيبون بحسب الظروف.. فلم يعودوا يعرفون جيرانهم ولا يأمنون على أطفالهم في ظل هذا الإكتظاظ.. وبالنسبة لمن يستأجرون هذه الشقق فهم لا يشعرون بالإستقرار أبدا.. ولا يتحقق مفهوم "المسكن" في الشقة التي يعيشون فيها...

وبالنسبة للمسكن في الشقق وانعدام مقاييس المساحات غير المسقوفة.. أصبح الأطفال محشورين داخل هذه العلب الإسمنتية.. ويقضون معظم الوقت أمام شاشات التلفاز والأجهزة اللوحية.. مما سبب تشوه في طفولتهم من جهة (مقارنة بطفولة آبائهم) وتسبب بضغط نفسي شديد على الأم في الشقة الضيقة.. مما ينعكس على نفسياتها السيئة التي تنقلها لزوجها.. فتتجه العائلة بشكل لا إرادي لشيء يسمى التسوق الترفيهي.. (الذهاب للسوق للترفيه فقط.. مع أنك لا تحتاج شيئا).. وهنا ظهرت المولات وازدهرت..

هل كان لكل هذه الأنماط الاجتماعية السيئة أن لا تحدث؟ نعم.. لو أن قانون البناء لا يسمح بالامتداد العمودي لما حدث كل هذا.. ولأجبرت



الحكومة على فتح طرق جديدة ومناطق جديدة وبنى تحتية جديدة.. ولبقيت الأسعار ضمن نطاقها الطبيعي لأن زبائنها هم الناس الناس العاديون.. لكن مؤسسة رخص البناء وهي أهم مؤسسة في الدولة فرضت على الأردنيين نمط إجتماعي سيعانون منه لسنوات طوال قادمة... وجعلتهم رهنا للبنوك وفريسة لطمع رؤوس الأموال.. ولا يحملون بامتلاك مسكن صغير في مسكنهم الكبير..

الصحافة (المرآة) مشغولة بالفضائح والإثارة والفنانات ولا يهمنها أبدا أن تكتب لك عن الوطن الحقيقي.. والحكومة من جهتها تصب عليك الأغاني الوطنية صبا وتدعوك لتمجيد الأجهزة الأمنية.. وكأن هذه هي الوطنية.. والتعليم بطبيعة الحال بعيد عن قراءة الوطن بشكل صحيح.. فإذن.. لم يبق إلا أنت.. إعرف وطنك بشكل صحيح.. وقم بقياسه كما تقاس الأوطان.. وميز بين الوطن الغالب والوطن المغلوب.. فمن هنا يبدأ التصحيح..

وتذكر أن من حقك يا مواطن أن تعيش في بيت لك وحدك.. لك أرض وفوقك سماء.. ولك حول بيتك مكان يلعب فيه أطفالك.. تجلس فيه مع زوجتك.. وتزرع فيه ولو شجيرة نعناع واحدة.. هذا حقك.. وأنا قلبي مساكن.. شعبية..

تمت..

## مأمون القانوني

آلاء: يمكن بديت أحب مأمون وعمري 11 سنة.. أو أقل حتى.. من أول ما وعيت عالديا حبيته.. كانوا جيراننا.. ورجعوا من الكويت تقريبا بنفس الوقت اللي رجعنا إحنا فيه.. كان أبوه بعرف أبوي.. وإمه صاحبة إمي.. وحتى أخته بيان كانت صاحبتني ومعني بالمدرسة.. بس هو كان أكبر منا بثلاث سنين تقريبا.. كنا في الصف الخامس وهو في الثامن..

فتحت عيوني في الدنيا هاي عليه.. إبتسامته.. طولته.. غمازاته.. شعره الطويل الناعم.. كان زي ممثلين السينما.. أحلى حتى.. وكانت متعتي أوقف على البلكونة أو ورا الستارة.. وأتفرج عليه هو وضحابه وهم بلعبوا كرة قدم في الشارع.. كان دايا يتخانق معهم على قانون اللعبة.. ويضل يحكي "القانون قانون يا شباب.. إلتزموا بالقانون".. ومن كثر ما كان يحكيها سمّوه القانوني.. وكنت أحب كثير هذا الإسم.. كان له موسيقى خاصة.. موسيقى فخمة.. وكنت دايا أكتبه وأخططه بالألوان على دفاتري.. وعلى جدران روجي..

إمي يمكن لاحظت إني كنت بحبه بس ما حكنت شي.. يمكن قالت لخالها هاي مراهقة وبتروح... ما بعرف.. بس هي كمان كانت كثير تحبه.. ودايا تمدح فيه.. وبيان كمان كانت تعرف.. ودفترتي كان بعرف.. وغرفتي كانت بتعرف.. ومخدتني.. وشجرة التوت.. والنجوم والسما والعصافير..

كل شي في الكون كان يعرف إني بحبه .. إلا هو... ما كانت يعرف..  
بيان: آلاء من زمان بتحبه لمأمون.. من أيام وإحنا صغار بالمدرسة.. كنا  
نزورهم ويزورونا.. وكانت دايا عيونها عليه.. وأكثر من مرة كتبت له  
رسائل عشان أعطيه إياها وما رضيت.. بموتني كان لو عرف.. كثير عصبي  
وحقاني كان.. من وهو صغير.. وكنت أخاف منه أكثر من أبوي... حتى  
إمها كانت تحبه.. وكانت تحكي لإمي.. ياريت الله أعطاني ولد زي مأمون..  
ناهض: أنا مأمون بعرفه من أيام الابتدائي.. كنا سوا في المدرسة.. أنا  
وإياه وعشان الفالوجي.. في نفس الصف ونفس الدرج.. وولاد حارة  
وحدة.... ما كان متفوق متفوق بالمدرسة.. بس كان شاطر.. وكان عامل  
زي زعيم في الصف.. كان أطول واحد فينا.. وكان عنده عضلات وهيكل..  
فتوة وشخصية.. وكل الطلاب كانوا يخافوا منه.. بس للأمانة عمره ما آذى  
حد.. بالعكس كان يدافع عني وعن عثمان دايا.. خصوصا عثمان لأنه كان  
ضعيف وحبته قليلة.. وكانوا كثير الولاد يدفعوه في دور المقصف.. لدرجة  
إنه مأمون كان يتدخل ويرتب الدور في المقصف.. وكل واحد يوقف على  
الدور.. وهو آخر واحد يوكل.. حتى لما نقلنا من الوكالة في التاسع وصار  
كل واحد في مدرسة.. ظلينا صحاب..

آلاء: وكبرت.. وكبر حب مأمون في قلبي.. وكل ما أكبر يوم.. أحلامي  
معه كمراهقة تكبر.. كنت دايا أنخيل إنه إحنا عرسان ومتزوجين.. وعنا  
بيت.. وبروح هو من الشغل بلاقيني طابخة الطبخة اللي بحبها.. وعنا ولاد  
وبنات بشبهوني وبشبهوه... كنت مفتونة فيه.. حب عمري كان.. وهو ولا  
على باله.. لغاية ما في يوم.. كنت في التاسع.. ونادت إمي على مأمون عشان  
يشيل لها جرة الغاز.. كان داخل توجيهي وقتها.. وكان صار شاب طول  
بعرض.. وبدأت لحيته تطلع.. طبعا كعادتي إستغلّيت الفرصة ورحت

عالمطبخ.. ووقتها صارت المعجزة.. ولأول مرة مأمون كان بتطلع علي نظرة غير عن نظرة الأخت.. أو نظرة البنت الصغيرة.. ولأول مرة في الحياة كنت بحس إنه انتبه إنه في قدامه بنت حلوة.. وإبتسم لي إبتسامة من كل قلبه.. قشعرت لي بدني.. وصار بعدها كل ما يشوفني يبتسم ونحكي شوي بخجل.. وكل كلمة أستعيدها ألف مرة.. وكل إبتسامة أعيش عليها شهر.. وأصلي وأطلب من الله أكبر وأحلو عشانه..

ناهض: التوجيهي تقريبا كانت يمكن من أصعب فترات حياة مأمون.. كان أبوه داخل تجارة مع قريب إلهم.. وتقريبا خسر كل فلوسه اللي رجع فيها من الكويت.. قريبهم نصب على أبوه وأخذ كل فلوسه.. وعلى الدارج هذيك الأيام.. ما كان محتاط أبوه بالأوراق.. فكانوا داخلين محاكم وقضايا.. وما طلع لهم شي.. من محامي لمحامي.. وعالفاضي.. وفي آخر فترة في التوجيهي.. كان وضعهم تعبان عالآخر.. وأبوه كانت هدته المحاكم.. وصار كثير مريض.. ووصلوا لمرحلة باعوا من أثاث بيتهم عشان يوكلوا.. وبستنوا قضيتهم اللي بالمحكمة..

وقتها كان بحبها لآلاء.. اعترف لي مرة إنه بحبها.. وإنه إمه عارفة.. ووعدته تخطبها.. وإمها حاسة.. وإنه بدرس عشانها.. عشان يجيب معدل عالي ويدرس محامة ويشغل.. ويتزوجها.. بس ما كان بين شي.. كان بحترم إمها كثير.. وما كان حابب حدا يحكي عليهم كلمة..

آلاء: بفترة التوجيهي كانت وضع بيت مأمون صعب.. أبوه مرض كثير.. ودخلوا بمشاكل.. وكنت قليل ما أشوفه.. وبس أشوفه يكون تعبان.. وعيونه حيرانين.. وآخر مرة شفته وقتها كان تعبان كثير.. كنت مروحة من عند بيان وشافني على باب البيت.. وعيونه كلهم حزن.. خفت

كثير عليه.. ولما سألته مالك.. قال ما في شي.. بس.. بعدين إطلع بعيوني  
نظرة طويلة وقال... "إنت إلي يا آلاء" .. وراح..

بيان: الله لا يعيدها من سنة.. كانت سودا سودا.. كان وضعنا صار  
بالحضيض.. تقريبا أبوي كان خسران 100 ألف دينار بهديك الأيام..  
والبيت كله مكركب ومتضايق.. وكنا خايفين بس على مأمون.. كان بده  
يقدم امتحانات الفصل الثاني.. وكان أبوي يظل يحكي له.. لا تقلق وخليك  
في دراستك يا مأمون.. والأمور بتتحل وكل شي بتعوض يا بابا.. بس كانت  
الأمور من سيء لأسوأ.. ولما حكم القاضي إنه أبوي ما بطلع له شي.. وما  
معه ورق يثبت شي.. انجلط وارتمى في البيت.. وصارتمه على جنب..  
ووقتها مأمون طلع من البيت..

وعرفنا من الناس المسا.. إنه مأمون متهجم على بيت قريتنا النصاب  
ومكسر إيديه وراسه وكاين بده يقتله.. وإنه الشرطة حبسوه.. حاولوا وقتها  
ناس كثير يتوسطوا عند قريتنا وولاده عشان يتنازلوا ما رضيو وإنه مأمون  
طالب لسه وهيك بس عالقاضي... وحكمه القاضي ثلاث سنين.. تهجم  
وإعتداء وأبصر شو... يمكن 4 تم..

ناهض: زعلت عليه لمأمون كثير لما دخل السجن.. اللي عمله أكيد مش  
صح.. بس يعني ما حد بقدر يلومه.. شاف عيلته كلها بتروح من بين إيديه  
من ورا واحد نصاب.. وحكم فينا الزمن.. بعد التوجيهي افتقرت  
الصحة.. عثمان ترك المدرسة واشتغل مع أبوه في التجارة.. وأنا دخلت  
كلية الطب.. والقانوني دخل السجن..

آلاء: يوم ما دخل مأمون السجن.. كان زي كأني أنا تمت.. الله بس بعلم  
شو صار في وقتها..

الشوا: القانوني من يوم يومه زلمة.. من أول ما دخل عنا المهجع.. كانوا جايينه من التوقيف لعنا.. وكان ولد صغير أيامها يا دوب مكمل 78.. وكان شكله غريب.. ابن ناس ومش خرج سجون يعني.. المهم.. دخله العسكري عنا.. وقاله فوت يا رامبو فوت.. فات وقعد في الزاوية وما حكي ولا كلمة.. أنا مش متذكر على شو كنت محبوس وقتها.. بس كنت ماكل سنة بالصلاة على محمد.... كنا أنا والحوت داخلين سوا.. سرقة ذهب يمكن.. لا لا.. سلب.. سلب بالإكراه.. اشي زي هيك..

المهم.. ووقتها قام الغزال.. كان الغزال أيامها الكل في الكل في المهجع.. أزعر مدقق ما حدا بطلع معه براس.. وصار يتخوث عليه للقانوني.. صار يقول للعسكري.. جايب لنا أحداث هون؟ رجعه عالخصانة يا معلم.. وأكثر من أسبوع والغزال حاطط حطته.. وهاك المسكين ساكت.. لا في يوم.. الغزال زهق منه ومن سكوته.. قام صار يستفز فيه وجاب سيرة أخته للقانوني.. ووقتها قامت القيامة.. ما وعينا على مأمون إلا وهو بخرط راس الغزالي في حديد السرير.. والدم معبي المهجع.. كان بده يقتله لولا تدخلنا.. ونقلوا الغزال عال مستشفى.. ونقلوا القانوني عالانفرادي.. الغزال صار معه ارتجاج في المخ.. وخلص محكوميته في المستشفى.. وطلع من المستشفى إنسان ثاني... كان عقله مش مساعده.. واعى وكل شي.. وبحكي.. لكن شخص ثاني.. وتدين وقتها وصار شيخ وبقولوا حتى راح على مكة.. والقانوني قعد 3 شهور في الانفرادي.. وكان مستنيه الموت لما يطلع..

بهذيك الأيام كان في واحد اسمه أيوب.. كان عميد السجن وماخذ مؤبدين.. ولما عرف بقصة القانوني والغزال.. تحلف للقانوني يقتله.. إنه كيف تعدى على جماعته.. وأول ما طلعه للقانوني.. كان أيوب بستناه في

الساحة وسكينته معه..ومسكه من إيدته وراحوا قعدوا سوا.... لكن بعد ساعة قعدة.. قاموا من مكانهم وأيوب حاطط إيدته على كتف القانوني ويضحكوا.. ما حدا عرف شو صار.. بس كان واضح إنهم صاروا صحاب.. ونبه أيوب على كل السجن.. إنه القانوني أخوه.. واللي بقرب عليه يا ويله.. وعشنا معه 4 سنين في السجن كان هو زعيم المهجع صار.. والكل بعرفه وبحسب له حساب.. وأغلب قعداته كانت يا إما لحاله.. أو مع أيوب.. أو يقرأ كتب من المكتبة.. وطلع بعدي بشهر..

آلاء: كنت في سنة ثانية صيدلة لما طلع مأمون من السجن.. كان الحزن انتهى والزمن مّر وطوى كل شيء... واقتنعت بعد فترة إنه هذا حب مراهقة.. وأكد أنا ومأمون ما راح يصبر بيننا شيء.. ولازم أركز على مستقبلي ودراستي.. وكبرت ودخلت الجامعة وشفيت ناس جداد وعالم جديد.. عالم مختلف عن مأمون ومشاكله.. ووقتها أصلا كانت العلاقات انقطعت بيننا وبينهم خلص... كان أبوه مات بعد شهر مادخل السجن.. واخته تركت المدرسة.. وصارت تشتغل هي وإمها بالخياطة عشان يصرفوا على حالهم.. فنوعا ما.. صاروا مختلفين عنا.. وأبوي وقتها نبه على إمي ما تتعامل مع ناس زي هيك.. سمعة مش طيبة و ما راح يجينا خير من وراهم.. بس مع هيك إمي بالسر كانت تتظمن عليهم.. كانوا جيراننا.. ومن باب الفضول.. رححت مع إمي يوم ما طلع نسلم عليه من ورا بابا..

كان شخص مختلف تماما تماما عن مأمون اللي دخل..كانه كبران 20 سنة.. ضحكته وإبتسامته وحيويته كانوا رايجين.. وشعره حتى راح.. كان يقصه خفيف كثير.. زي العسكر... حتى هاي النضارة والطرارة في الوجه كانت رايجة.. وجهه صار كأنه مقصوص من حجر.. وعيونه صاروا قاسيين.. وباردين.. غايرين لجوا وغميقين كثير.. بخوفوا.. حتى وهو

بحاول يبتسم لي.. ما ارتحت لابتسامته.. كان شخص ثاني غير مأمون اللي  
حييته.. وعرفت وقتها إنه قراري كان صح.. ويمكن كلام بابا كان صح..  
وأنا طالعة من عندهم.. كنت طويت صفحته في حياتي للأبد.. ذكرى في  
مرحلة المراهقة ويس..

ناهض:

كنت سنة خامسة طب لما طلع مأمون من السجن.. كان شخص مختلف  
تماما عن مأمون اللي دخل... شكله تقريبا ما اختلف.. توقعت يُطلع حاطط  
وشم ومشوه وهيك.. بس لأ.. طلع زي ما دخل.. شعراته بس كانوا  
رايحين.. وكبران شوي.. قعدنا سوا.. وحكينا على الأيام القديمة..  
وهيك.. وبآخر القعدة سألته شورا ح يطلع علي بعيون حادة وقال  
".. أنا طول عمري يا ناهض بحب القانون وبآمن فيه.. وكنت ناوي أصير  
محامي.. لكن أبوي خسر فلوسه بالقانون.. وأنا دخلت السجن بالقانون..  
وطلعت منه كمان بالقانون.. عشان هيك أنا راح أشتغل بالقانون.. بس  
بطريقتي.. وراح أصير مأمون القانوني عنجد.."

الشوا: بعد ما طلعت من المخروب السجن بشهر. كنت قاعد أنا  
والحوت مفلسين.. لا شغلة ولا عملة.. المهم اتدايننا حق قزازتين عرق..  
وقعدنا عندي في البيت.. محضرين نبدا سكرة مرتبة تفرقع فيها الكؤوس  
وتدور فيها الرؤوس.. ما لقيت إلا الجرس برن.. وطلع أشوف مين الدبق  
هذا.. طلع القانوني.. أول ما دخل.. حط القزازيز على جنب.. كان لا بسكر  
ولا بدخن.. وبعد السلام بلش يحكي..

"أنا يا شباب إلي حق.. لازم أحصله.. وانتوا عارفين.. بس أنا السجن  
ما راح أدخله مرة ثانية.. بدي أحصل حقي وأنا بره.. وعشان هيك بدي



تشتغلوا معي.. والشغل معي راح يكون أحسن بألف مرة من الزعرنات  
الهافية تبعتكم هاي.. انا راح أصرف لكل واحد فيكم راتب شهري 500  
دينار.. بس اللي بحكي لكم عليه اه بكون اه.. واللي لأ يعني لأ.. وشغلوا  
معكم اللي بدكم إياه.. بس بدون ما تيجي سيرتي.. فكروا كويس..  
وإسكروا الليلة.. وبكره بنحكي" .. وطبق الباب وطلع..

بعد حوالي أسبوع.. إتصل فينا القانوني وطلب منا نتغدى معه في مطعم  
بس نقعد على طاولة لحالنا.. وما نحكي شي ولا نتدخل.. رحنا قعدنا..  
واجوا اثنين هناك قعدوا معه.. واحد منهم نقيب بعرفه بس كان لابس  
مدني.. والثاني لابس بدلة وعرفت بعدين إنه محامي..

المهم نزلت المشاوي للجميع.. وبعد الغدا.. شفت القانوني بحكي مع  
النقيب.. وبأشر علينا.. وبورجي النقيب صور ولاد صغار.. والمحامي  
قاعد.. عصب كثير النقيب.. وصار يصرخ ويحكي إنه ما بقبل أي تهديد...  
كنا بدنا نقوم.. أشر لنا القانوني نقعد.. وقعد يهدي الزلّة ويحكي معه..  
والمحامي من جهته هداه كمان.. وما شفنا إلا تصافوا وخلص الغدا..  
وفهمت بعدين إنه القانوني فهم النقيب إنه احنا بدنا نشتغل ضمن القانون..  
ما بنطلب غير هيك.. وشغلنا مهم إلنا زي ما سلامة ولاده مهمة إله..  
وراح يكون في مقابل مجزي.. ووافق وكانت بداية الشغل..

ثاني يوم كان الحوت لابس لبس محترم.. وراح قعد مع الجماعة اللي  
سرقوا فلوس أبوه للقانوني.. وقال لهم بالحرف زي ما القانوني وصاه.. إنه  
القانوني طلع من السجن.. وما عنده مانع يرجع.. بس هو بده فلوسه..  
بدون محاكم.. بدون قانون.. وبدون شوشرة... ومعهم 3 أيام.. و 3  
إنذارات.. وعندهم شرطة البلد كلها يشكو لها.. من العريف للملك.. الحق  
بده يرجع... يعني بده... ولما يقرروا يدفعوا يحكوا مع الحوت عشان يقعدوا

مع القانوني.. وتكون الفلوس معهم.. حكى لهم هيك وطلع.. بس خلصوا الثلاث أيام.. الجماعة ما عملوا شي.. فكروه تهديد فشكك يمكن.. ويمكن شكوا على الحوت.. بس ما في بلاغ بتهديد.. لازم يكون في شي.. تقرير طبي.. إعتداء.. أي شي... ففي نفس اليوم بالليل.. بعثت واحد من جماعتي حرق إهم سيارتين وهرب.. وقتها إتصلوا على الحوت في الليل يسبوا و يلعنوا.. وراحوا الصبح شكوا عليه.. بس قدام النقيب.. الحوت حكى إنه كان نايم في المستشفى عشان البواسير.. ومعه تقرير طبي بثبت هالحكي.. وإنه ما بعرف الجماعة وأول مرة بشوفهم.. وهذا بلاغ كيدي.. وبالقانون أفرج عنه النقيب لعدم وجود أدلة.. ولحين إستكمال التحقيق..

وهم بحققوا مع الحوت كان موعد الضربة الثانية.. واحد ثاني من جماعتي مسك إبنهم الصغير للجماعة وهو طالع من المدرسة.. أجهده على زاروبية.. وخط له في شنطة المدرسة راس خروف مقطوع... وروحه لأهله.. المسا كانوا الجماعة فهموا الرسالة.. وعرفوا إن الله حق.. وما كان في داعي نكمل.. إتصلوا على الحوت.. والتقوا بره.. وطلبوا يشوفوا القانوني.. ويعطوه فلوسه.. وبهذالك الأسبوع تنغنشنا.. وسكرت أنا والحوت لما قلنا بكفي.. ويومها حتى بعث القانوني فلوس لأهل أيوب.. بس ما فهمت ليش..

بيان: فرحتي برجعة أخوي مأمون ما كان بعدها شي.. كان هو الوحيد اللي باقي لنا في الدنيا بعد أبوي الله يرحمه.. والله ينتقم منهم اللي فرقونا عن بعض.. رجع أخوي.. ورجعت الروح لبيتنا.. ومع إنه كان جو فرحة إلا إنه عيون إمي ما نشفوا من البكا عليه...

كان كثير متغير.. بس طمناها ووعدها مأمون إنها أزمة وانحلت.. وكل شي راح يرجع لوضعه بأقل من شهر.. وفعلا.. خلال شهر.. كان مأمون حاكمي مع الناس.. والله سبحانه رقق قلوبهم ودفعوا كل حق أبوي الله يرحمه وزيادة.. ويومها تركنا أنا وإمي شغل الخياطة.. الحمد لله والشكر لك يا رب..

ناهض: بعد فترة عرفت إنا مأمون حصل فلوس أبوه.. وقال لي وقتها إنه وصلوا لتسوية مع المحامي.. بس كان في كلام.. إنه التسوية ما كانت بريئة.. وإنه مأمون هو اللي حرق السيارات.. وكان ناوي يقتل ولادهم... ووقتها بدت الحارة كل تحاف من مأمون.. بس عالساكت.. كان واضح إنه مأمون بدأ يشتغل بالقانون بطريقة.. متفردة..

الشوا: بعد العملية الأولى.. بشهر يمكن.. حكى معي القانوني على عملية ثانية.. كان في واحد ماخذ بضاعة من ناس ب 30000. ومش دافع.. والجماعة متضررين.. واللي صار في الأولى صار في الثانية.. الحوت حكى معه.. وأنا نفذت.. وخلال أسبوع مش أكثر.. كان دافع حق البضاعة كاملة.. أخذ القانوني حصتنا.. والمحامي أخذ حصته.. والناس رجع لهم الباقي.. وفتح العداد..

خلال سنة.. كنا مسويين يمكن 20 عملية.. شيكات.. إيجار متأخر.. واحد مش راضي يطلق.. شغلات زي هيك.. وكلها من ورا المحامي و قضاياه.. اللي ما بنحل في المحكمة نحله إحنا.. ووين ما كان الضحية نطوله.. ولو في السجن.. أيوب كان يطوله.. ويحيب منه المطلوب.. وعشان يترتب الشغل.. إشتري القانوني محل طابقين.. عمل اللي تحت نادي بلياردو.. واللي فوق مكتب إله.. وصرنا نقعد أنا والحوت في النادي.. والقانوني فوق.. وصرنا يشتغل معنا حوالي 10 من المعارف.. وكلهم إلهم

رواتب.. حتى أيوب.. كان راتبه يوصل أهله كل شهر.. والحياة صارت سكر..

آء: بعد فترة من طلعته ورجوع حقهم إهم.. صارت الفلوس تبين على أهله لمأمون.. رجعوا تقريبا زي ما كانوا.. حتى مأمون نفسه إشتري سيارة جديدة.. وصار ما بلبس إلا بدل.. وكان كل ما يشوفني بيتسم لي بأرق شي بقدر عليه.. بس خلص.. اللي كان بيننا إنتهى.. ويا رب كيف القلوب بتتغير.. حبه راح من قلبي.. بس يبدو هو ما كان مقتنع.... وحتى لما أحكي لإمي شو بعمل المسكين هاد.. كانت تزعل وتحكي.. والله بحياتك ما بتلاقي مثله لمأمون.. بس أنا ما كنت بدني مثله خلص.. كنت مبسوطة بجامعتي.. وما بدني الأجواء هاي كلها.. وتعرفت وقتها على أحمد....

الشوا: بعد خمس سنين شغل مع القانوني.. كانت الأمور حلاوة.. صرنا نشغل مع أكثر من محامي.. مش ملحقين.. وكله بحسابه.. وعشان الأمور تكون سليمة.. طلع القانوني رخصة شركة تحصيل ديون.. وصرنا أنا والحوت والشباب موظفين رسميين.. وطلعت حياة أحلى بكثير من اللي كنا عايشينها.. كنا بنتهبل إحنا زمان.. وقتها صار شغل شغل.. عالأصول.. وكله لمساعدة الناس وكله بالقانون....

وصار بشتغل معي حوالي 30 واحد.. وكل الزعران الصغار اللي كانوا بتسلطوا على أصحاب المحلات في الشارع التجاري طلعناهم.. وإستلمناه كله لحالنا.. من أوله لآخره.. وكل صاحب محل يدفع لنا 20 دينار شهري.. بدل حماية.. وما دخلنا السجن أبدا.. لا أنا ولا الحوت ولا القانوني... كانوا شبابنا هم اللي مجهزين يدخلوا السجن ويطلعوا منه حسب الحاجة وفي أي وقت.. لأنه مش كل الزباين زي بعض.. مرات كانت الأمور تنحل على

إسم القانوني.. ومرات الزبون بعند.. وبصير لازم يدفع بأساليب صعبة  
شوي الله يصلحه.... بس كله كان بالآخر يدفع..

ناهض: خلصت طب وتخصصت جراحة.. وظلت علاقتي مع القانوني  
منيحة ولو على فترات متباعدة.. ما كان بيننا أشياء كثير مشتركة.. بس  
صحبة قديمة... وكنت أحسده فعلا على نشاطه وشغله.. كان شعلة نشاط..  
وبختلف تماما عن أي خريج سجن ثاني.. كان يشتغل في تحصيل الديون مع  
محامي.. وكان بدرس المسا دورات إنجليزي.. ولغات وسباحة حتى..  
وكان مفكر يعيد توجيهي ويكمل محاماة بالمراسلة... ويقراً كثير.. كان  
بحاول يبني من نفسه شخصية جديرة بالإحترام.. شخصية تمحي آثار  
السجن.. وكنت دائما أحسه بقيس نجاحه في عيوني.. ما كان يغار مني  
أبدا.. لكن كان بحب يسمع مني إنه ناجح.. ومرات كثير يجي يناقشني في  
روايات وكتب بقرأها.. وحتى أعطاني مسرحية فاوست هدية.. وما كان  
مأمون جاهل أبدا.. بالعكس.. كان شاطر وواثق.. بس كان بحاول يبني  
حاله من أول وجديد..

ومع كل هاي الإيجابيات.. كنت أحس إنه يشتغل بشي يمكن يكون  
غلط.. كان إله 5 سنين طالع من السجن.. ووقتها صرت ألاحظ إنه إسمه  
لحاله بفرض نوع من الإحترام الممزوج بالتحفظ بين الناس.. كان في حكي  
كثير عنه إنه زلمة منيح ويساعد وبحب الحق وتبرع للفقرا كمان... بس  
برضه كان في ناس بقعدات خاصة.. وغير عن قصة فلوس أبوه.. كانوا  
يحكوا إنه شبه زعيم عصابة.. وإنه قلبه ميت.. وفي ناس تأذت وانظلمت  
منه.. حتى إنه أهلي كانوا نوعا ما متحفظين على الصحبة بيني وبينه...

بس أنا علاقتي فيه كانت صداقة شخصية.. وماكان شي بهزها.. وما  
شفت عليه شي.. فما كان بهمني حكي الناس.. وهو نفسه شرح لي مرة إنه

عنده شركة مرخصة.. وأموره كلها قانونية وعنده كمان نادي بلياردو..  
وشغله كله في السليم... لكنه ناجح والناجح إله أعداء.. فما أخذت ببالي..  
ولأني أصلا بعرفه زلمة حقاني.. ما صدقت عنه شي..

وفي يوم كان سهران عندي... فاجأني بسؤال غريب.. سألني إنه لو تقدم  
لآلاء.. يا ترى بتوافق عليه؟ وكان سؤال صعب جدا ومفاجئ.. مفاجئ  
لأنه من يوم ما طلع من السجن ما حكى عنها.. هذا من جهة.. ومن جهة  
ثانية لأنه آلاء صيدلانية.. ونوعا ما متعلمة.. وهو لأ.. وصحيح يمكن  
زمان كانوا يجبو بعض.. لكن الزمن بغير جبال وأنهار.. ما بده يغير بني  
آدمين؟.. ومع إني كنت متوقع تماما إنهم يرفضوه.. إلا إني وعدته أجس  
النبض.. وشكرني على العرض.. خصوصا إنه ما بده إمه توخذ أي خطوة  
قبل جس النبض.. خصوصا إنه أبوها من زمان زمان ما بحبه.. وطلع  
مأمون من عندي وأنا بفكر إنه كل شي يمكن كان بعمله.. والشخصية  
الجديدة اللي ببنيها.. كانت كلها عشان يكون لائق بآلاء.. سبحان الله..

آلاء: وأخيرا خلصت جامعة وخلصت رحلة الألف ميل.. وبحسب  
قرار الصيادلة العرب لسنة 1995.. صرت الدكتور آلاء.. وبدأت أعيش  
الفترة الذهبية بحياتي. فترة حصد الإنجازات.. وإنتظار حبيبي أحمد..  
إشتغلت في صيدلية قريبة من البيت.. وبدت أعيش حياتي كأني فتاة عزباء  
مرتاحة بتستنى حبيبي يجي يخطبها.. وطبعاً هاي الفترة بتكون فترة عرسان..  
وقلت خلينا نتسلى ونشوف هالعرسان ونطفشهم.. لغاية ما يخلص  
حبيب عيوني ويجي.. ولحظي النحس.. كان مأمون أول شخص بتقدم..  
وبطريقة مش شجاعة حتى..

ناهض: كونه آلاء كانت قرابة إلنا من بعيد.. خلّيت إمي تجس نبض  
إمها.. وكان الرفض التام من آلاء ومن أبوها.. ومع قلة حيلة من إمها  
وصلنا الرفض القاطع.. وقعدت يومين بعدها أفكر كيف أحكي له إياها  
بأسلوب لطيف ما يجرحه.. لأنه شو ما كان.. صعب الإنسان ترفضه بنت  
كانت تحبه وهو لغاية الآن عايش حياته عشانها.. خصوصا إنه سبب  
الرفض شيء بجرحه أصلا وبحاول يخلص منه.. لكن تأخير الرد كان برضه  
ممكن يعطي نتيجة سلبية.. عشان هيك توكلت على الله وقررت أزوره في  
مكتبه.. وأحكي معه هناك.. وكانت أول مرة بزوره في مكتبه.. وأول مرة  
بدخل عالمه عن قرب.. كان متحفظ جدا بهذا الخصوص..

كانت الساعة حوالي 4.. وأنا بعرف النادي.. بس ما عمري دخلته..  
وبعرف إنه المكتب في الطابق الثاني.. صفيت السيارة على الباب.. وفتحت  
باب النادي.. ومعه فتح عالم القانوني اللي كنت بجهل كل شي عنه.. كان  
كأي نادي بلياردو.. مليون دخان سجائر.. وأصوات كرات وناس بتلعب..  
وموسيقى شغالة عالعلي.. بس العجيب كان منظر الناس اللي جوا.. كلهم  
عن بكرة أبيهم أشكالهم مخيفة.. وأول ما اتبهوا الوجودي انطفى المسجل..

وصوت الكرات اختفى.. والعيون كلها تركزت علي.. وساد الصمت  
فجأة.. ومن بين العيون الفضولية.. ظهر رجل ضخم.. ومشى بخطوات  
ثابتة بإتجاهي... نوعا ما مختلف شوي.. ولبسه شوي مختلف عنهم.. لكن  
نفس الدرجة من الرهبة.. وقال لي بصوت زي الفحيح.. "تفضل!".. قلت  
له إني أنا الدكتور ناهض.. وجاي أشوف مأمون.. صديق قديم.. إطلع في  
من فوق لتحت.. ومسك سماعة التلفون وحكى مع شخص فوق.. وأول  
ما إجاه الرد.. انفرجت أساريه.. ومشى قدامي باحترام وود.. وطلعنا درج  
للطابق الثاني.. ورجعت كرات البلياردو تلعب والأصوات تصدح..

وصلنا فوق.. فتحنا باب.. ودخلنا ممر فصلنا تماما عن أجواء النادي  
الصاخبة وريحة الدخان.. وصار في هدوء عجيب بصاحبه برودة تكييف  
وهواء نقي ونظيف.... ووصلت لمكتب شخص يبدو إنه سكرتير  
القانوني.. اللي بدوره دخلني على مأمون..

كان مكتب مأمون أبعد ما يكون عن التصور.. مكتب واسع وكبير..  
مفروش موكيت أبيض فخم... وكنبايات جلد فخمة.. في اخره مكتب  
خشبي فخم بقعد عليه مأمون.... على يساره كان في حوض سمك كبير  
مضاء بالأزرق.. وعلى يمينه مكتبة كبيرة... فيها كتب كثير.... وعلى  
الطرف الثاني طاولة إجتماعات عاكسة عليها أشعة الشمس من النوافذ  
الكبيرة... ويعلو كل شي.. سقف أبيض مزخرف.. كان مكتب أشبه  
بمكتب مدير مؤسسة ضخمة.. مش صاحب نادي بلياردو..

حتى القانوني كان شكله بتماشى تماما مع البريستيج.. كان قاعد ورا  
مكتبه لابس قميص رسمي أبيض وبنطلون رمادي.. وعلى العلاقة وراه  
كان جاكيت البدلة... كان رجل أعمال شاب تقليدي.. قدامه كان شخص  
قاعد بإستكانة.. وفي أطراف المكتب كان شخصين واقفين كأنهم حرس..  
ولابسين أسود بأسود... سلم علي مأمون بحرارة الملهوف.. وطلب مني  
أستنى شوي.. لأنه عنده شغلة بده يخلصها.. رحت قعدت على صوفا بيضا  
قريبة من المكتبة.. وصرت أتأمل مكتبته.. كان في المقدمة.. مدن الملح..  
حكمة الغرب.. السلطوية.. القضاء في العصر العباسي.. كتب قيمة كلها..  
وما شال عيني عن الكتب إلا إنه إنفتح الباب.. والشخص اللي قابلني كان  
مدخل معه عثمان الفالوجي.. صاحبنا القديم.. اللي كان إلي سنين ما شفته..



الفالوجي ما عرفني.. وأصلا كان واضح إنه متوتر زيادة إنه يتفحص الوجوه.. وبعد ما سلم على مأمون.. وقعد مقابل الزلثة الأول.. بدأ مأمون الكلام بهدوء شديد وصوت بارد..

"يا عثمان يا فالوجي.. خيلنا ندخل بالموضوع.. الزلثة هذا اسمه سمير الشاعر.. بتعرفه أكيد.. وإجا هون يشكي لي منك.. إنك ظالمه ببضاعة وفلوس.. وبعد ما فحصنا اوراقه بعناية لقيناها مش كاملة.. بس لما سألنا ناس عندك في المحل.. تأكدنا من كلامه 100%.. وأتوقع كمان إنك إنت كمان متأكد من كلامه.. عشان هيك.. أنا نادينك هون عشان نتفاهم معك.. وتنحل المسألة بهدوء.. بدون محاكم.. وبدون قانون.. وبدون شوشرة..

فاشوف يا عثمان.. إنت صاحبني وحببي.. وكنا زملا زمان.. بس الحق حق.. وانت فلوسك ومركزك ومركز أبوك يبدو هياوا لك إنه ممكن توكل حق الناس بدون محاسبة وترميهم يتمرمطوا في المحاكم.. ونسيت إنه الدنيا هاي ما انبنت على المصاري.. انبنت على العدل وعلى الحق.. وبس يغيب العدل ويسود الظلم راح توقع هاي الدنيا.. وعلى ذكر الظلم يا عثمان.. جوا مفهوم الظلم.. في مفهوم اسمه تأثير الظلم.. يعني انت بس توخذ فلوس حدا زي الشاعر.. وتظلمه.. الأثر اللي بكون في حياته نتيجة غياب الفلوس هاي.. أكبر من الفلوس نفسها.. والأثر هذا كل يوم عن يوم بكبر.. وبغير حياة الناس وواقعهم.. والقضاء اللي انت بترمي الشاعر عليه.. مهمته يتعاون هو والمحامين عشان يطولوا هذا الوقت أطول فترة ممكنة.. الوقت بين ضياع الحق ورد الحق.. ومعه طبعا بكبر التأثير على حياة المظلوم.. لغاية ما يجي يوم.. والحق يبطل إله قيمة.. بكون التأثير دمر كل شي خلاص.. وسواء إجا الحق أو ما إجا.. بدون فايذة.. فأنا هون يا عثمان مش محصل ديون عشان تضحك علي.. إذا كنت مفكر تضحك علي.. أنا قضاء كمان..

بس قضاء قطاع خاص.. فضاء سريع.. ولما يجوا عندي المظلومين يشكوا لي  
من ظالمين زيك.. ما راح أسمح حياتهم تتدمراً وانت تظل مرتاح..

هذا من جهة... ومن جهة ثانية يا عزيزي يا عثمان.. ربنا اللي طول نهارك  
تركع له وتسجد له في الجامع.. لو إنك بتعرفه صحيح.. راح تعرف إنه ما  
توعد اللي بترك الصلاة ولا اللي بفطر رمضان.. ولا اللي بترك الحج.. هذول  
ما حكى معهم.. بساحهم بينه وبينهم.. الموضوع محلول وما بأثر على حدا..  
لكنه توعد السراقين والنصايين والظالمين واللي بوكلوا مال اليتامى.. هذول  
هم اللي توعدهم بجهنم في الاخرة لأنه هذول هم الكفرة الحقيقيين...  
وعشان هيك.. أنا - مأمون القانوني - بما إني ظل الله على الأرض..  
وموجود عشان الحق يرجع لصحابه.. ويرجع بسرعة.. فأنا بتوعدك قدام  
كل القاعدين.. إنه خلال أسبوع.. لو فلوس الشاعر ما رجعت أراح  
أحرقك وأحرق أبوك وأهلك وولادك وكله وأنا قاعد هون بمكتبي..  
وإسأل عني يا عثمان.. بس حاول ما تجربني."

عثمان من الصدمة ما حكى ولا كلمة.. والشاعر اللي هو الشاكي أصلا  
كمان سكت.. وساد نوع من الصمت في المكتب.. ما بتسمع إلا أنفاس..  
وقتها قام القانوني عن مكتبه وراح وقف عند حوض السمك.. وصار  
يطعمي السمكات.. وحكى وهو داير ظهره.. موعدنا يا شاعر الخميس  
الجاي هون في مكتبي.. الفالوجي راح يجيب الفلوس.. راح توخذ منها  
80% وتترك الباقي.. وهسه لو سمحتوا اتركوني أنا وضيبي لخالنا..  
كنت لأول مرة بفهم شو هو القانون اللي بشتغل فيه القانوني.. وكيف..  
ولمصلحة مين.. وليش في ناس بتكرهه وليش في ناس بتحبه.. وفهمت  
وقتها سر القسوة والبرود اللي في عيونه... والطريقة اللي حكى فيها مع

شخص مفترض بينهم عشرة وحية.. شرحت لي مدى القسوة في قلب الرجل.. مقارنة بمدى رفته وهو بحكي عن آلاء..

طلب لنا قهوة.. وقعدنا نحكي حديث جانبي عابر.. بعدين سألني عن آلاء.. وشرحت له موضوعها بالطف بطريقة ممكنة.. تنهد تنهيدة طويلة.. وسأل.. مين اللي رفض.. هي ولا أهلها؟.. فقلت له إنه الطرفين.. سكت فترة طويلة.. وقام عن كرسيه وراح وقف عالشباك وحكى.. "المجتمع يا ناهض.. بكره وبحتقر ناس زي القانوني وجماعته.. بس لازم يجي يوم ويتعلم هذا المجتمع.. إنه اللي بسكت عن الظلم راح يواجه العنف.. واللي ما بحارب الفقر راح يحارب الفقرا".. وسادت فترة من الصمت.. رجع بعدها لعندي.. وابتسم وحكى بصوت مخنوق.. "عموما.. كل إنسان إله قدر واحد.. والله يسعدها آلاء وين ماكانت.. وشو ما اختارت.. وأنا شاكر إلك إنك ساعدتني بالموضوع.."

الشوا: ما بعرف شو غير الدكتور صاحبه في القانوني بعد هذيك الزيارة.. بس الأكيد إنه تغير تماما.. كان لأول مرة من سنين بروح بكير من المكتب.. بس السر تبعه ما طول.. ثاني يوم طلب مني نحط واحد مسؤول بس عن بنت صيدلانية إسمها آلاء.. يحميها بشكل غير مباشر.. وكان كل يوم يسأل عن أخبارها.. وينجن لما يعرف إنه صاير لها شي.. حتى في يوم يبدو حدا حكا له إنه صاحب الصيدلية اللي بتشتغل فيها مدايقها بشي.. انجن.. وبعد ساعة ما خلصت دوامها كانت الصيدلية حطام.. وانسجن ثلاثة من عنا على القصة..

حتى في شغلنا صار عنده نوع من التهور والعصية.. زاد عددنا صح صرنا 100 تقريبا.. وكبرنا وكبرت عملياتنا.. والمصاري زي الرز صارت.. كنا وصلنا القمة.. والمدينة كلها تحت أمرنا صارت.. بس العمليات صارت

أقوى وأعنف.. ومرات كثير.. كان ما يستنى الحوت يتفاوض مع الناس  
خصوصا اللي بطلبوا مهلة.. كان يبدأ هجوم وحشي عليهم وبدون وعي..  
وبدأت شوية مشاكل تظهر مع الشرطة.. ومشاكل تبدأ مع ناس ثانيين..  
خصوصا جماعة فتوح... المخدرات يعني.. اللي كان طول وقته القانوني  
يحكي.. "الأسود يا شوّا ما بتتقاتل في الغابة.. لو تقاتلوا بموتوا.. لأنه فش  
دوا.. فكل واحد بوخذ مساحة وبلعب فيها.. وإحنا وفتوح زي هيك..  
إحنا بحالنا وهم بحالهم.. ومش من مصلحة حدا فينا يدخل في الثاني ولا  
يأذيه" ..

آلاء: وبعد سنتين من الخطبة.. توجت حبي لأحمد بالزواج الميمون..  
كان أحلى شي في حياتي.. الرجل اللي حلمت فيه طول عمري.. وأخذنا شقة  
واسعة في عمارة أهله.. وسكننا فيها..

الشوّا: أنا عمري ما عرفت القانوني تبع بنات.. أصلا كان عنده حساسية  
من أي شي بمس الأعراس.. وأي قضية كان فيها بنت ما كان يرضى يدخل  
فيها.. حتى الحوت تعلم ما يجيب سيرة أي بنت قدامه.. لكن هاي البنت  
آلاء كانت غير.. كانت ماخدة عقله تماما.. مع إنه شكلها أنا عارف كيف..  
والله لتر الكونياك أحلى منها..

بيان: شو ما حاول ينجبي.. كان مأمون مكسور من زواج آلاء بس ما  
حكى شي.. حاولنا أنا وإمي نخطب له اللي بده إياها.. بس ما كان موافق..  
ووصل أول الثلاثين وهو مش راضي.. حتى يوم عرسى حاولت أشوف له  
بنات.. ما رضى.. كسرت قلبه الله يكسرها..

ناهض:: بعد قعدتي مع مأمون يوم عثمان الفالوجي.. خفت علاقتنا  
كثير.. هو خفف حكى وأنا كمان خففت.. يمكن أنا صرت أذكره بفشله مع

آلاء.. وبنفس الوقت كانت قسوته فوق الإحتمال.. وما شفت بعدها إلا مرات معدودة.. مرة في عرس أخته بيان.. ومرة كان جاي مع إمه عالمستشفى..

الشوا: في شغلنا تعرضنا لمشاكل كثير.. أصلا طبيعة شغلنا المشاكل.. لكن القانوني كان دايمًا موجود عشان يحلها بهدوء وبدون أي ضغط أو عصبية.. بس في آخر فترة.. وخصوصًا بعد ما هاي البنت تزوجت.. تغير كثير.. خسر من وزنه كثير.. وصار عصبي أكثر ومتوتر أكثر.. وصار مرات كثير يترك لحيته.. ولأول مرة من يوم ما عرفته وهو صغير في المهجع.. صار يدخن و وصار يشرب قهوة كثير.. وأخطاؤه وعصبيته في الشغل كثرت.. وصارت تأثر علينا.. خسرنا محامي مهم كان يساعدنا.. وخسرنا أكثر من شرطي كانوا يتعاطفوا معنا.. وخسرنا شاب مهم من عنا.. كانت الأمور في النازل. وكنت أحس في شي سيء قاعد بتراكم.. وراح يجي يوم وينفجر فينا.. وإجا اليوم..

كان يوم سبت.. وإبنة لفتوح تاجر المخدرات هو و شباب من عندهم.. تعدوا على شاب من عنا على خلاف بسيط... صح كانت ثالث مرة على نفس الشاب.. بس يعني خلاف عادي كان كثير يصير مثله زمان.. وكان القانوني يحكي مع فتوح وينحل الموضوع.. لكن المرة هاي كانت غير.. ووقتها أصلا القانوني كان مش شايف قدامه.. كانت إمه مريضة كثير.. وصاحبته الصيدلانية جايبة ولد.. فلما عرف المسا بالموضوع أعطى أمر مباشر للشباب.. يصفوا إبنة لفتوح.. ولما حاولنا أنا والحوت نتدخل ونحكي له إنه ممكن تنحل.. أصر.. وقال لازم هذول يعرفوا حجمهم.. أنا القانوني ما حدا بيحي بجماعتي.. وأعطى الشباب كل واحد 3000 دينار

وقال لهم روحوا وأهلكم عندي.. واللي بده يصير يصير.. كان واضح إنه  
فقد كل حكمته وتركيزه..

ما مات ابن فتوح.. تشوه ونام ليلتها في المستشفى.. وانفتحت علينا  
أبواب جهنم.. بيننا وبين جماعة فتوح من جهة.. وبيننا وبين الشرطة من  
جهة ثانية...

أول يوم انمسك من عنا أكثر من ثلاثين واحد وجماعة فتوح جرحوا  
أكثر من عشرين.. والشرطة سكروا النادي وسكروا مكتب القانوني.. حتى  
محامينا وكلّ واسطاته.. ما قدروا يعمل شي.. الحكومة كانت بدها إياه  
للقانوني.. وكانوا يستنوا على أي نكشة.. وإجت النكشة.. الحوت مسكوه  
جماعة فتوح في المزرعة وشوهوا معاملة.. وكرد على الموضوع.. بعث القانوني  
ناس شوهوا إبنه الثاني لفتوح.. بعدها بيوم إنمسكت أنا الصبح...  
وسمعت من الشرطة وأنا في المخفر المسا إنه القانوني انطخ.. وموجود في  
المستشفى بين الحياة والموت..

ناهض: كنت في المستشفى لما جابوه حالة طارئة.. كان شبح من القانوني  
تبع زمان.. لحيته طويلة.. عيونه غايرين وتحتهم سواد وتعب.. وجسمه  
هزيل ومشدود.. وفي جسمه ثلاث رصاصات.. الرصاصة اللي دخلت في  
الكلية اليسار دمرتها تماما.. ورصاصة في الفخذ كانت سطحية.. لكن  
رصاصة الرئة كانت هي المشكلة.. وقعد في العناية المركزة في حالة خطرة..  
الشوّا: وأنا في السجن قعدت أنا وأيوب.. كان مبلش يختيار وحركته تثقل..  
وزعل كثير كثير على القانوني.. وقتها حكا لي.. "القانوني هذا شاطر.. عرف  
شو يشتري وشو يبيع.. عرف إنه انتوا انكسر عندكم الخوف من الحكومة..  
وصار عادي عندكم تدخلوا السجن وتطلعوا منه عادي.... وعرف إنه  
الناس بخافوا من الأذى.. وبخافوا منكم.. والحكومة مش راح تقدر

تحميهم.. فاشترى الشجاعة هاي منكم وباع الناس الأمان اللي بطلبوه.. وأخذ هو الفرق.. وبنفس الوقت أعطى المظلومين الشيء اللي هو انحرم منه.. أو اللي أبوه إنحرم منه.. العدل السريع.. بس المشكلة سمّ السجن ظل في دمه.. ما عرف يرجع طبيعي.. ولا عرف يعيش زي ما الناس عايشة.. ظل عايش تحت جناح إنه مظلوم.. واللي خسره ما قدر يتجاوزة" آلاء: اليوم وصلني خبر إنه مأمون طخوه ناس وبالمستشفى.. ما بنكر إني حزنت عليه.. بعد كل حساب كان جزء من تاريخي.. وحيته في يوم من الأيام.. بس أكيد شخص مثله كانت هيك راح تكون نهايته.. ما بقدر أتمنى له الشر.. بس يمكن أريح إله ولكل الناس... لو ربنا يوخد امانته.. ناهض: وأنا بتطلع على مأمون وهو مغيب تحت الأجهزة.. بتذكره وإحنا صغار.. كيف لما كنا نلعب قدم.. ويظل يحكي.. القانون قانون يا شباب.. وكيف القانون اللي كان يحبه ويحترمه.. هو نفسه اللي غير له حياته.. وحوله من رجل بحب القانون لزعيم عصابة..

يمكن يموت القانوني خلال ساعات.. وتنتهي قصته معه.. ويمكن كمان يطيب.. وساعتها يا يرجع يعيش حياة طبيعية بعيدة عن المشاكل.. أو يرجع يبني عصابته من جديد.. ويتقم من أعداؤه... هذا كله حسب إرادة ربنا.. و يمكن كمان يكون لدعوات الناس دور.. الناس اللي ساعدهم.. والناس اللي آذاهم.. مهى قصة القانوني بالأول وبالآخر.. بين إيدين الناس..

تمت..

**مقتبس بشكل جزئي عن شخصية حقيقية..**

## الثقب

- عارف؟ حاسّة جواروحي في ثقب أسود كيبير وغميق... بضل دايا يوجعني.. ويحسني إني فاضية.. وإنه الهوا بلعب في قلبي.. خصوصا في الليل..

وحطيت فيه كل شي ممكن تتخيله.. شغلي.. دراستي.. الكتب اللي بقرأها.. الأغاني اللي بحبها.. الأواعي.. العطور.. البيتزا.. القرآن اللي بقرأه.. أهلي.. بستتي.. كرة السلّة.. وفلوس.. حطيت فيه فلوس كمان.. وكل الأشياء الغلط اللي بعملها.. كلهم بلعهم.. كلهم.. ولسه بوجعني.. شو بعيّه هاد؟ قول لي بس شو بعيّه..

- الحبّ



## بدي أبوي..

بتعرف ؟ وإحنا صغار.. كان في عنا تينة كبيرة في البيت.. وكان أبوي الله يرحمه مرات يحكي لنا " كل واحد يوخذ صحن وروحوا جيبوا لنا تين" .. أنا كنت صغير وقصير و التينة عالية.. آخذ صحني وأظل أحاول أحاول ما أطول شي.. بس إخواني الكبار يلقطوا تين كثير وما يرضوا يعطوني.. أرجع لأبوي وأنا ببكي و صحني فاضي.. يترك التين تبعهم.. و يوخذني يحملني على كتفه.. و يخليني ألقط تين كثير.. وبس نرجع عالقعدة.. يحكي لهم شوفوا مصطفي قديش لقط.. أشطر واحد مصطفي..

مبارح المرة طلبت مني فلوس عشان بدها تشتري جلباب جديد لعلياء.. جلبابها كثير قديم.. والبنات صايرين بحكوا عليها.. كلهم عندهم كثير لبس والمسكينة ما عندها غير هالجلباب المهري.. وأنا مش طالع بإيدي شي.. وقتها تذكرت أبوي..

بدي أبوي..

## البدوي

قبل أحد عشر عاما.. وفي ليلة قمراء مثل هذه.. كنت أجول صحراء العرب.. بدويا جاهلا.. خشن اليدين و الطباع والملامح.. أرتدي ثوبا بنيا من الخيش.. وأحمل عصاتي الغليظة في يدي.. وتتهادى خلفي ناقتي العرجاء.. وفي لحظة كشف رحماني.. فتح الباب الخشبي الكبير على مصراعيه.. وسمح لي الأوز الأرجواني أن أدخل جتتك.. ثم أغلقوا الباب.. ورأيتك.. محاطة بالطواويس البيضاء والغزلان الملونة..

معك تعلمت أن أمشي بدون أن أدوس على الأزهار.. وأن أشرب الماء بطريقة تختلف عن ناقتي.. معك تعلمت الجلوس إلى الطاولة.. وشرب الهوى من ماء العيون.. معك تعلمت كيف أبني بيتا من الياسمين.. وأنام على سرير من أمانى.. معك تعلمت كيف اغسل يدي بباء الغمام.. بعد كل وجبة من غرام.. وكيف أستشق العطر.. وكيف أسافر في ليل شعرك حتى الفناء.. معك تعلمت كيف تشتعل النار في الصدر.. وكيف تمطر الدنيا حزنا وحنينا.. معك تعلمت كيف أكتب.. وكيف أرسم وكيف ألون بالزعفران.. معك تعلمت أن أعد أصابع قدميك حتى العشرة.. وأعد النجوم في عينيك حتى الألف.. معك سمعت عزف الكناري لأول مرة.. ومن يديك تذوقت عسل الكستناء.. معك تعلمت كيف يقدس ثمر السفرجل.. وكيف يعامل شجر النخيل.. بكل إحترام..

معك تغيرت كثيرا.. إلا أنني بعد أحد عشر عاما.. أعتقد أنني لا زلت  
بدويا جاهلا.. ولم أر من تلك الجنة.. إلا اليسير اليسير.. كل عام و أنت  
جنتي..

## بين القلب والعقل ..

لو كنت تبحث عما يعبر عني .. فإن آخر ما يمكن ان يعبر عني هو الكلام الذي يقوله لساني .. ذلك العضو الأحمر الملتوي الذي لا يفعل شيئاً سوى الكذب .. علي وعلى الآخرين .. ولا يغرك عقلي .. فعقلي هو الآخر يخدعني كما يخدعك .. يحاول التظاهر أنه أنا .. ويتكلم كأنه أنا .. ويتصرف كأنه أنا .. ويبدو كأنه هو كل شيء .. لكنه في الواقع لا شيء .. هو فقط أشبه ما يكون بحاسوب عملاق أصم .. لا يملك أي صورة أو فكرة أساسية من نتاجه .. بل يستقبل المعلومات و يحللها و يخزنها .. أما أنا الحقيقي .. فموجود داخل قلبي .. داخل تلك الحجرة الصغيرة المتكررة على هيئة مضخة دم ..

في تلك الحجرة الصامتة ... توجد كل مشاعري الحقيقية .. وفيها كل ما أو من به أو أكفر به ولو أنكرته .. هي عقلي الحقيقي وعيني التي ترى .. وفيها كل دوافعي التي تأمر العقل والجوارح .. فيها كل أمراض التي تختفي خلف العيون الخائنة .. عندما أنظر إلى شيء .. وأقصد شيئاً آخر .. عندما أقول شيئاً وأضمر شيئاً آخر .. فيها شهواتي التي لا أستطيع التحكم بها .. تخيلاتني الدينية التي يندى لها الجبين .. ضعفي .. إنكساري .. إحتقاري لنفسي .. فيها ثقتي و غروري .. ورغبتني في التفوق على الآخرين .. فيها شكوكي وإلحادي و يقيني .. فيها ظلمي للناس و شعوري بالظلم وأسئلتني عن القضاء والقدر .. فيها نظرتي الحقيقية لله .. كيف أرجوه وأغضب منه وأعاتبه .. ثم ألوم نفسي وأستغفر .. ثم أعود .. فيها كل حلقاتي المفرغة .. فيها رؤيتي

للناس ولعائلتي.. فيها مجاملاتي لمن أكره.. غيرتي ممن هم أفضل مني.. فرحتي بمن هم أقل مني... وطمعي وإشتهائي فيما ليس لي.. فيها احتقاري لكسل الفقراء.. وفيها تعاطفي معهم.. فيها كرهني لفوقية الاغنياء ورغبتني أن أكون منهم.. فيها فرحي ومخاوفي.. تنقبض وتفزع إذا خفت.. وتشرح إذا فرحت.. فيها الكذب الذي أكذبه.. حتى على نفسي.. وفيها الصدق المؤلم الذي أصدقه.. فيها نوايا أعمالتي التي ربما أكذب بها على الناس و على عقلي.. لكن قلبي يدركها تماما... فيها شعوري الحقيقي وأنا أصلي.. وأنا أصوم.. وأنا أتصدق.. وفيها كفر وبقايا من إيمان ضعيف.. فيها ما لا تراه العين.. ولا يدركه العقل.. فيها وحدتي.. بكائي.. وشعوري أنني غير مرئي.. وغير مهم.. فيها كل ما يفسر تصرفاتي التي تفوق المنطق أو تخالفه.. فيها أنا بكل تناقضاتي.. عاريا من كل زيف..

والخطير في هذه الحجرة الصغيرة التي تسمى القلب والتي سأحاسب أمام الله بشكل أساسي على محتواها.. أن مفتاحها ليس بيدي.. هي بين ضلوعي ولكن ليست تحت تصرفي.. لا أستطيع أن أضع فيها الأشياء.. لكنها تتسرب قليلا قليلا إليها دون علمي.. وصعوبة معرفة ما في هذه الحجرة.. لا تساوي شيئا أمام صعوبة تغييرها و تنظيفها من الداخل.. كم مرة قررت أن أتوب ولم أستطع.. كم مرة قررت أن أصبح طاهرا ولم أستطع.. وكم مرة بكيت على بابها وقرأت كتاب الله.. ومع ذلك لم يفتح لي.. هذه الحجرة الصغيرة صعبة وخطيرة.. وإذا حدث و امتلأت بالقاذورات.. وتأكد الله أن لا فائدة منكأ حال بينك و بينها فلا تملك لها شيئا.. أو ختم عليها فلا تعقل ولا ترى.. وعندها ستكون حياتك مجرد إضاعة وقت لا أكثر.. وكل محاولاتك الكاذبة للعودة ستكون بلا فائدة..

وأنا أحس الآن أن قلبي أسود...

## تنويعات على مقام الراست

- الحيز الذي تأخذينه من وقتي ليس كبيراً.. لا نلتقي كثيراً.. لا نتحدث كثيراً.. ولا يبدو لمن يرانا من بعيد أن بيننا الكثير.. إلا أن تأثيرك في حياتي أكنقطة حبر في كأس ماء..
- ستستهلك وقتنا قبل أن تعرف أن النقود بحد ذاتها.. شيء مجرد و عديم القيمة.. ولا يمكنها أن تشتري سوى ما يصنعه الناس..
- وكم مرة غضبت مني لأنني لم أفهم ما تقولين.. وعذري السفر في مجاهيل العيون العسلية..
- أكره الحوارات التي أضطر لاصطناعها كلما أردت النظر إليك.. بودي أن أكون شجاعاً بما يكفي لأقول.. جئت هنا لأنظر في عينيك قليلاً ثم أمضي.. هذا كل شيء.. نقطة انتهى..
- من عجائب خلق الإنسان.. الملل الذي يعتريه.. لأنك حتى لو وفرت له كل ما يريد.. فإنه سيملّ ويتعد.. لذلك يبدو من الحكمة أن يظل في حالة ترقب دائم.. قلق دائم.. أحلام دائمة.. لأنه إذا شبع إنتهى...
- لقد صممت اللذات في الدنيا بطريقة عبقرية.. بحيث أن هنالك حد معين للذة لا يجب عليك إختراقه.. إذ تتحول اللذة بعد ذلك إلى سباق محموم نحو المجهول.... سباق خطر و مؤذي..

- الحزن ضيف ثقيل الظل.. لكنك لن تستطيع منعه من زيارتك..  
تحدث معه.. تعلم منه.. لكن لا تسمح له بالمبيت..

- الشكوى الدائمة من أخلاق الناس وأذى الناس و قلة فهم الناس..  
ومحاولاتك اليائسة للإصلاح.. لا تفيد بشيء.. بل تعكر مزاجك الصافي..  
وتضيع وقتك.. قم بواجباتك تجاه نفسك و عائلتك.. (لكي لا تشعر  
بالذنب) ثم إستمتع قدر الإمكان بحياتك.. حياتك أنت.. إستمتع  
بطعامك.. بمسكنك.. بملبسك.. بعطرك.. بمن تحب.. وإذا مللت و بقي  
لديك بعض الوقت.. ساعد الناس و إعمل الصالحات..

"يا أيها الرسل كلوا من الطيبات و إعملوا صالحا" .. كل من الطيبات يا  
أخي.. كل من الطيبات..

- إبتعد قدر الإمكان عن أولئك الأشخاص الذين يتصرفون وكأن  
الدنيا ستنتهي غدا..

- الأطفال لا يحتاجون لعبا بلاستيكية أو إلكترونية.. هذه اللعب  
صممت للأطفال الذين يعانون من الوحدة.. الأطفال بحاجة أطفال  
ليلعبوا معهم... هذه حاجة فطرية عند الإنسان.. وتستمر لعمر السبعين..  
أو أكثر ربما..

- الأجساد مثل أواني المطبخ.. سواء كانت فاخرة أو عادية.. فإنها لا  
تؤكل.. إلا أن الأواني الفاخرة تأخذ بعض المديح..

- أحمد الله كل يوم خمسين مرة.. أنني ولدت على ذلك الجانب من  
النهر.. حيث لا يقدر الناس قائدا ولا زعيما.. وأشفق صراحة على من  
ولدوا على الجانب الآخر..

- عندما كنت ضعيف الإيمان.. كانت كل جملة مديح قالها سكير عرييد  
أزرق العينين أشقر الشعر عن رسول الله أتسعدني..
- أنا أترنم بالأغاني كما سمعتها أول مرة.. حتى لو قلت بعض الكلمات  
بشكل خاطئ.. لا تصححني.. الأغنية تروقني و تطربني هكذا..
- فعسى ربي أن يؤتيني خيرا من جنتك.. ويرسل عليها حسابانا من  
السماء.. فتصبح صعيدا زلقا" هذا الرجل يمثلني.. وهذه الآية تمثلني..
- لست جاهلا بقضايا الأمة.. ولا مغيبا عن مشاكلها.. لكنني وبكل  
صدق.. وبعد تفكير عميق.. إخترت أن تكون عينك هي قضيتي المركزية..  
وأهم أولويات حياتي..
- الجمال يحرص على العنف.. هذه حقيقة علمية ثابتة.. لذلك نقرص  
خدود الأطفال عندما نلاعبهم.. ولأجل ذلك أيضا..  
(جزء من النص مفقود)

تمت..





ساكون كاذبا  
لو قلت أنك الأثنى الوحيدة التي دخلت قلبي.  
قدسه قدسية لا ادعيها..  
لكنني وبكل صدق اقول  
انني كلما فارنتك مع انثى ثانية..  
ذابت صورتها شيئا فشيئا حتى تختفي.  
كمكعب سكر في كوب شاي..  
ما دمت في الدنيا..  
فالدنيا بخير..

مأمون القانوي  
ويك الجن

